

釋宗金書





禪宗全書

# 雜集部八

( 91 )

藍吉富 主編

北京圖書館出版社

圖書在版編目 (CIP) 數據

禪宗全書 / 藍吉富主編. — 北京: 北京圖書館出版社,  
2004.12

ISBN 7-5013-2602-9

I. 禪… II. 藍… III. 禪宗—文獻—匯編 IV. B946.5

中國版本圖書館 CIP 數據核字 (2004) 第 103681 號

責任編輯: 王冠 于浩

封面設計: 許冬麗

ISBN 7-5013-2602-9



9 787501 326020 >

本書原名為《禪宗全書》，藍吉富主編，經北京版權代理有限公司代理，授權北京圖書館出版社獨家出版發行。

書名 禪宗全書 (全 101 冊)

著者 藍吉富 主編

---

出版 北京圖書館出版社 (100034 北京市西城區文津街 7 號)

發行 010-66139745, 66175620, 66126153, 66174391 (傳真),  
66126156 (門市部)

E-Mail cbs@nlc.gov.cn (投稿) btsfxb@nlc.gov.cn (郵購)

Website www.nlcpress.com

印刷 河北三河燕郊古籍印裝廠

開本 880 × 1230 毫米 1/16

印張 4414

版次 2004 年 12 月第 1 版 2004 年 12 月第 1 次印刷

---

書號 ISBN 7-5013-2602-9/B · 108

定價 18000 圓

# 目次

列祖提綱錄	一
敘	三
緣起	四
凡例	五
原書總目	六
卷一：聖節啓建提綱——受勅奉旨提綱	一二
卷二：降香到提綱——詔復披剃提綱	二六
卷三：國忌提綱——謝雪提綱	三九
卷四：佛降誕提綱	五〇
卷五：佛成道日提綱——先期率衆財提綱	六一
卷六：達磨忌拈香法語——母忌提綱	七〇
卷七：五參提綱	八四
卷八：五參提綱	一〇六




卷九：五參提綱	一二五
卷十：五參提綱	一四三
卷十一：五參提綱——解制提綱	一六四
卷十二：解制提綱——冬夜提綱	一八二
卷十三：歲夜提綱——爲亡者對靈提綱	一九七
卷十四：告香普說——檀越時請普說	二一三
卷十五：檀越特請普說	二三四
卷十六：檀越特請普說——水陸陞座提綱	二五三
卷十七：肅衆提綱——迎待尊宿引座提綱	二七〇
卷十八：迎待尊宿致謝提綱——到宗刹諸山請提綱	二八五
卷十九：施主請陞座提綱——供法衣提綱	三〇五
卷二十：供法帔提綱——歸省受業提綱	三二一
卷二十一：受請陞座拈衣法語——名德頭首受請借座陞座	三三六
卷二十二：名德受請借座陞座提綱——入院提綱	三五一
卷二十三：拈勅黃法語——燒懷香法語	三六八
卷二十四：白椎後垂語——入院後當請開堂提綱	三八五
卷二十五：即入院日請開堂提綱	四〇一
卷二十六：即入院日請開堂提綱——當晚小參提綱	四一五

卷二十七：當晚小參提綱——	報謝回寺提綱……………	四二六
卷二十八：報謝回寺提綱——	像成檀越請提綱……………	四三七
卷二十九：請藏經提綱——	開田并謝提綱……………	四四九
卷三十：退院提綱——	秉炬……………	四六一
卷三十一：爲住持遷化佛事法語——	請東序知事提綱……………	四七二
卷三十二：請列職雜務提綱——	請兩序……………	四八四
卷三十三：謝西序頭首提綱——	沙彌得度垂示……………	四九七
卷三十四：度僧提綱——	住持爲亡僧秉炬……………	五〇八
卷三十五：住持爲亡僧秉炬——	建楞嚴會提綱……………	五二一
卷三十六：結制提綱……………	……………	五三四
卷三十七：中夏提綱——	解制提綱……………	五四八
卷三十八：頭首四節秉拂——	月分須知……………	五六三
卷三十九：元旦提綱——	元宵日提綱……………	五七五
卷四十：寒食提綱——	青苗會提綱……………	五九〇
卷四十一：立秋日提綱——	開爐提綱……………	六〇〇
卷四十二：開爐提綱——	製法鼓提綱……………	六一一

# 列祖提綱錄

清・婁東行悅集







列祖提綱錄敘

住黃梅四祖雙峰山東吳嗣祖沙門戒顯撰

靈山拈華少室安心。雖曰直指單傳。不立文字。而以楔出楔。用兵止兵。既於無言說中。而藉言說。即於無綱要中。而有綱要。故曰依經解義。三世佛冤。離經一字。即同魔說。不易之道也。奈耳食者。流膠滯。陳說謂既稱向上。衆流截斷。惡藉又言。又云。既號宗門。拈來便是。豈有格則且援。曹谿不識字。爲躲根捷徑。由是邪正不分。朱紫混雜。群言淆亂。瓦缶爭鳴。言不涉典章。事不合軌。則街談俚語。信采亂道。蜀日粵雪。反肆譏訶。而宗門事大變矣。呆翁悅和尚。與余同土。且共事有年。既而法嗣南澗。旋從繼席。道行四載。痛念法門江河日潰。砥柱無門。佛祖慧命。攸關端在。說法乃哀。集列祖法語。分門析類。輯成部帙。自上堂小參。示衆普說。以至隨機拈示。各有科條。其見諸行事者。千端萬緒。一準大智老祖百丈清規。綱舉目張。各有部從。題曰列祖提綱錄。比類以觀。如亞夫細柳之陣紀。律精嚴如光弼入子儀軍。壁壘一變。俾末學晚進。猶

及見古德說法大全。駁功匪細矣。或曰。禪貴胸襟流。出穢性吐露。今編列義類。動成格。則令剽竊之徒。印板打來。模子脫出。不更與賊過梯乎。余曰。非也。學家杜撰亂說。只爲不通綱要。倘肯向此精研。自然識法者。懼如入清廟明堂。見三代禮樂。綿最倨。侮自慙。兇戲高者。金章玉句。剔骨刷髓。次者。亦規行矩步。言不妄發。狐狂喧囂。得此大救懸之國門。布之叢席。豈不與統要聯珠五燈諸集共爲宗門日月也哉。

康熙五年仲秋三日

列祖提綱錄敘

住金陵棲霞寺古閩嗣祖沙門大依撰

吾宗自大智以下。典模大備。誠所云三代禮樂也。洎南宋後。稍凌夷衰微矣。有明二百餘年。岌岌於廣陵。散燾廟間。諸老先後高建旗。鼓於江東。南嗣而兩宗門下。莫不家發豐城之劍。人懷射斗之光。但頽靡之餘。叢席草創。法紀未詳。近一二老成留意舊章者。亦既神而明之。然綱要未經提揭。而條理依舊參商。予

二十年前與采翁和尚同參濟下尊宿每抗論及此蓋不勝扼腕焉。既而南北各師吳楚異域和尚久出世名藍爲東南禪子所皈。一日竟拂衣去。抱特立之志走天下。名山川廣搜博探二十年來而列祖提綱成。自粵北歸首抵金陵。過我攝山燒燈道。故爰出是書。命爲弁首。快意之餘。焚香載讀。如登百丈堂。見聲鐘伐鼓。千五百人濟濟跼跼。奔載拜也。至於法言之超卓。眼目之分明。四百餘人如出一人。四十餘卷不多一字。集者之心力真鎔鑄古今矣。或云禪貴妙悟。又言其末規則奚爲。設若令世尊降天垂寶蓋之重。向紙錢灰裏坐臥。舍花雨梵樂之供。就厨房竹筒裏覓食。則四十九年百萬。人天將何所瞻。依何所開悟耶。抑思沛公之馬上終歸制度。鷗羣之野戰還習陣圖。安有到潼關云見天子。外宮牆能富百官。也是書也。三百餘種三千餘則合上下古今人先型俱在目。擊道存皆和尚之血心片片赤手提持。倘或承言滯句播弄篇章。帶累呆和尚沒量罪過而列祖亦沒量罪過也。

康熙七年正月。上元日。

列祖提綱緣起

武林十八澗理安禪寺住持婁東行悅述

宗門列祖之機緣拈頌禪燈諸錄載之詳矣。宋元諸尊宿見後學罕能通究。復爲採摭機緣。繫以拈頌別訂集本。流布叢林。使學者備考明辨。易若指掌。此真大法光明幢也。其拈古集曰。宗門統要。頌古集曰。頌古聯珠。然統要又見續集。聯珠亦見通集矣。惟列祖陞座提綱語。古今採集者闕如。每遇叢林先輩。咸爲慨歎。行悅人微。道薄。聞見陋狹。勉承先輩之志。借百丈清規。住持日用諸事。會集列祖提綱語二十年間。蒐獵群策。以事集言。因言立事。或今或古。隨見隨書。故無尊卑。世次。宗派。異同。僅如妙喜之正法眼藏。其編次標題。槩遵清規舊本。所集古今提唱宗師四百餘人在臨濟至龍池。幻祖下三世止。曹洞至壽昌。經祖下三世止。雲門澄祖下二世止。其爲仰雲門法眼。及五宗前正傳旁出諸祖。各收至燈錄止。處提綱語三千餘則。叢林所宜事務之要。三百餘種。命曰列祖提綱。錄次四十二卷。雖列祖提持佛法大綱旨要。固

不在茲而於唱道立言之體大略備矣。庚子春因謝先南澗院事。乃攜是稿浪遊粵東。感都督栗公性然。并劉公新菴鳳菴兩護法喜流通大法。捐資共爲劖劖首倡。雄郡郡伯陸公孝山葭州太尊。閔公捷宇保昌邑侯李公集公及王公曼壽李公茂先張公偏菴蕭公聖至等。解囊捐資。翕然樂助。板刻既成。謹書緣起於右。

康熙五年十二月成道日

### 提綱錄凡例

一是書大要以清規諸事爲綱。列祖提綱作目。但從上列祖提持大法綱要。本不合分門別類。同世間事類備要等書。奈有祖以來所遺微言妙句。散漫不一。學者縱欲博覽而禪門典籍未必盡備。縱備未必盡諳先德說法大故。因借清規住持日用諸事略詳其槩。猶全鼎一臠。大海一滴。用被初機。兼資閱覽。

一聖節在至元重編清規中。只詳啓建聖節上堂軌

儀。至如滿散除疏語外。皆未詳也。見圓悟諸祖俱有聖節滿散語。愚恐至元以前古清規內有此成式。不敢遽遺。故立爲滿散一種。又見演祖諸師不分啓散而單名聖節者。此一種似乎難順。只得從權亦立爲正節。如此等類是編常有。大凡提綱之名。但與清規九章相近。卽爲編立。若非切事應機。與九章太不相合。及雷同前輩者。俱不載。

一提綱篇首如先德單目上堂示衆。不立別名者。俱借五參一事統攝。若九章內疊見而屢編者在五參晚參及四節小參內亦少收。

一夏前告香普說在先德全部錄中不能多見。又欲如清規法式者。更是難得。是編僅錄古林月江二尊宿語。存其古意。又特請普說單載大慧者。彰其機辨縱橫波瀾浩大也。

一是編無關宗派。凡尊宿提綱有合於從上法式其言句又得簡古而開人眼目者。槩收。

一佛法住持日用陞座上堂小參普說等體。在清規儀禮中久已詳明。今時諸方往往訛傳混行。甚至

疊用二號者。雖於化門無大關係。殊欠典型。故清規一書。不可不時置案頭。所以是編提綱篇首。所載陞座上堂等名。各依先德舊本。槩不敢少有更異。

一是編問答機緣。一槩不錄。主於提綱故也。如就當機問答提唱者。間載一二。

一事遇提綱多者。多收少者不妨一則。所貴存其事耳。如清規所載請主喪者。爲大方宗師。舉遷化諸佛事。內有唱衣時。提衣佛事。法語愚曾徧索古今。缺如。然提衣之名。仍載諸目錄。一以使後學知法門有此大體。次待後來好古者補行餘悉類此。

一提綱後凡有叙謝結座二種。一槩不刪。

一諸祖提綱。或在大藏。或在群書。雖比事尋索。按語較對。而訛闕雷同之陋。深知不免。實愧心力逮盡。獨智難週耳。伏望大方明眼宗師。曲垂刪正。

列祖提綱錄總目

卷首

叙

緣起

凡例

卷一祝釐

聖節啓建八則

聖節滿散六則

月望十則

改元登極共二則

受勅奉旨共九則

卷二

降香到七則

聖主請陞座三則

宗藩請陞座四則

詔復五則

卷三報恩

正節日三十一則

景命四齋月旦十四則

初八念三共二則

千秋節二則

受師號并紫衣共八則

天眷請陞座五則

詔汰三則



聖忌六則

聖后忌二則

祈晴四則

祈雨十四則

謝雨五則

祈雪二則

謝雪二十則

卷四 報本

佛降誕六十則

卷五

佛成道三十三則

佛涅槃二十七則

涅槃日先期率衆財一則

卷六 尋祖

初祖忌拈香二十則

百丈忌二則

開山忌五則

開山忌上堂三則

嗣法師忌拈香三十三則

嗣法師忌上堂七則

嗣法師翁忌拈香二則

師翁忌上堂二則

掃歷代祖塔拈香四則

祖塔塔主請上堂五則

受業忌拈香一則

父母忌共二則

卷七 住持日用

上堂五參一百五十則

卷八

上堂五參七十則

卷九

上堂五參一百六十七則

卷十

上堂五參一百七十九則

卷十一

上堂五參三十則

晚參八則

小參結制三十七則

卷十二

小參解制十五則

小參冬夜二十七則

卷十三

小參歲夜三十六則

小參對靈五則

卷十四

普說告香二則

普說夏前告香四則

普說中夏一則

普說特請一則

卷十五

普說特請五則



開堂祝聖佛事拈勅黃三則

捧御香二則

拈割付九則

拈公帖四則

拈護法疏二十則

拈方外交疏五則

拈山門疏九則

拈諸山疏二則

拈三宗疏二則

拈宗刹疏二則

拈江湖疏五則

拈法座四十二則

拈祝太上皇皇太后等香四則

拈祝聖香二十則

拈護法香十一則

拈報謝香一則

燒懷香四十則

### 卷二十四

白椎後垂語四十三則

請就別刹開堂八則

入院後請開堂二十六則

### 卷二十五

入院日請開堂四十則

### 卷二十六

入院日請開堂八則

載住入院十則

當晚小參十六則

### 卷二十七

當晚小參十三則

載住當晚小參二則

爲建寺檀越陞座一則

管待崇使四則

留請兩序五則

報謝出入七則

報謝回寺八則

### 卷二十八

報謝回寺十八則

白衆出隊六則

出隊歸二十則

立聖像胎骨二則

入腹臍三則

開光明十則

聖像成九則

### 卷二十九

請藏經一則

捨經函一則

迎經開經共四則

焙經補經共二則

營建劈草一則

開基立礪共三則

豎柱二則

上梁八則

挂寺額二則

落成九則

鑄鐃一則

結竈進火共三則

法座成三則

建寶塔一則

上塔珠寶索共三則

相輪合尖共二則

建壽塔一則

定基開基共二則

立石開閉共三則

請行橋并謝共五則

開田并謝看共四則

卷三十

退院辭衆二十則

退院載歸四則

爲住持遷化佛事入龕移龕共一則

鎖龕四則

法堂挂眞三則

舉哀二則

奠茶湯三則

大夜對靈小參二則

起龕四則

全身入塔四則

闍維奠茶湯一則

秉炬五則

卷三十一

秉炬四則

安骨二則

起骨轉骨共二則

煨骨二則

靈骨入塔三則

撒骨一則

入祖堂安牌五則

估唱提衣訣法語

下遺書尋宿訃至二十則兩序請西序頭首三則

請兩堂首座十則

留首座二則

請藏主侍者共五則

請東序知事一則

請監寺提點共三則

請典座三則

卷三十二兩序

請修造二則

請化主五則

發化主十則

請監收四則

舉名德兼法嗣立僧十四則

立僧後秉命普說一則

秉命入室後普說一則

兩序進退五則

挂鉢時請知事二則

請兩序三則

卷三十三

謝西序頭首六則

謝兩堂首座十則

謝書記藏主七則

謝知殿侍者共二則

謝東序知事六則

謝都監監院共五則

謝維那三則

謝典座三則

謝化主十一則

謝莊主一則

謝諸莊監收五則

謝兩序十則

剃髮執刀垂示十則

付衣垂示八則

卷三十四大衆



度僧上堂七則

付戒八則

辦道具鉢盂拄杖拂子共三則

大挂搭歸堂四則

名勝挂搭一則

普請七則

爲亡僧鎖龕六則

起龕十八則

奠茶湯二則

住持爲亡僧秉炬四十則

### 卷三十五

住持爲亡僧秉炬五十則

起骨三則

煨骨三則

入塔二十一則

撒骨二則

爲尼起龕二則

秉炬二則

入塔二則

爲優婆塞起棺二則

秉炬五則

起骨一則

入壙撒土十則

點主一則

爲優婆夷起棺三則

秉炬八則

煨骨一則

入塔三則

撒骨一則

點主一則

建楞嚴會三則

### 卷三十六節臘

結制九十則

### 卷三十七

中夏十二則

建盂蘭盆會一則

解制七十五則

### 卷三十八

頭首四節秉拂結制四則解制二則

冬夜二則

歲夜三則

住持謝四節秉拂二十則元旦三十則

### 卷三十九

元旦四十五則

立春日十一則

元宵五十二則

### 卷四十

寒食十則

鋪帳簾一則

端午四十二則

建青苗會六則

散青苗會五則

炙茄會二則

### 卷四十一

立秋日五則

開旦過一則

中秋四十二則

重陽三十則

開鑪十五則

卷四十二法器

開鑪三十五則

鑄法鐘一則

鳴法鐘三則

挂板二則

挂木魚一則

冬至四十五則

挂法鐘二則

施法鐘一則

挂鐘板三則

製法鼓四則

列祖提綱錄總目終

列祖提綱錄卷第一

武林十八澗理安禪寺住持婁東行悅集

聖節啓建提綱祝釐

圓悟勤禪師開聖節上堂。頂天履地共荷皇恩。含齒戴髮均承帝力。神霄降慶。眞主示生。傾萬國丹心。祝一人聖壽。當陽有路。萬派朝宗。一句無私。輒輸肝膽。還委悉麼。皇圖齊北極。聖壽等南山。

天申節開啓上堂。五月天申節。眞人降中天。萬國傾葵藿。處處啓法筵。雲居古道場。共爇一炷烟。龍圖鳳曆等乾坤。睿算彌隆億萬年。下座。

大慧杲禪師聖節上堂。拈香罷。忽雷震驟雨。遂云。震法雷。擊法鼓。布慈雲。兮。灑甘露。卽今法雷已震。法鼓已擊。慈雲已布。甘露已灑。事上也合理。上也合事。理既合。且作麼。生話會。下座。與大眾到大佛殿。啓建乾龍聖節。

元叟端禪師聖節啓建上堂。一佛出現。千佛讚揚。一華開敷。千葉周布。一人端拱。無爲八表。來朝萬邦。入貢只如林下道人。共樂昇平。同歸化育。一句如何舉。

唱下座就大佛寶殿啓建天壽聖節

恕中愍禪師啓建聖節上堂拈拄杖崇高不極廣博無涯是謂聖中之聖天中之天馭三光以照臨總萬寓而光宅無思不服有感必通畫拄杖壁開華嶽連天秀放出黃河徹底清

啓建上堂心王不妄動六國一時通罷拈三尺劍休弄一張弓正恁麼時直得黃河清徹白日流輝金輪御而玉燭調麒麟出而鳳凰現普天之下用至道而不知懷生之倫荷大造而無謝且林下道人如何祝讚豎拂子只將者箇真消息仰祝吾皇億萬年

了庵欲禪師上堂獅子吼無畏說百獸聞之皆腦裂香象奔波失却威天龍寂聽生欣悅左豎拂子云者箇不是獅子吼右豎拂子云者箇不是無畏說諸人耳在一聲中一聲偏在諸人耳不是寂聽生欣悅恁麼恁麼卷舒立方外乾坤不恁麼不恁麼橫縱挂域中日月恁麼中有不恁麼不恁麼中却恁麼下座詣大佛殿啓建天壽聖節

上堂前佛性命後佛紀綱豎拂子云總在拂子頭上

拈起也風生百谷放下也水肅千江今朝啓建聖節合作麼生舉唱豎拂子云臥龍纔奮迅丹鳳便翱翔

### 正節提綱

五祖演禪師聖節上堂十二月初八日今上皇帝降誕之辰不得說別事乃高聲云皇帝萬歲皇帝萬歲眞淨文禪師聖節上堂率土之土皆屬王土率土之民莫非王民今朝臘月八日當釋迦如來成道之辰是今上皇帝降誕之日所謂前聖後聖聖德共明人王法王王道同久應千年之慶運統萬國之歡心伏惟皇帝陛下萬歲萬歲復召衆云大殿上念佛祝延聖壽下座

佛眼遠禪師聖節上堂皇帝以天下爲家兆民爲子父子一體天下一家王愛於民民敬於王愛敬既同王道無外所以佛言如民得王又云如民之王且王外無民民外無王王在民外民不受賜民在王外王道不廣如何曰民無知曰民如何曰王聖神曰王今上皇帝至神至聖爲民父母天寧降誕之節日月星辰聯珠合璧江河淮濟激濁揚清乾坤造化草木虫

魚呈祥瑞顯奇特。皆皇帝至德之所感致。也。伏願南山北嶽齊齡。永永萬年無窮。無極。遂下禪床作舞。曰。會麼。山僧舞。蹈揚塵。萬歲萬歲。萬歲下座。虎丘隆禪師。聖節上堂。示現天宮補處身。堯風舜日耀乾坤。今朝共祝南山壽。萬國來朝萬乘尊。

鐵關樞禪師。聖節上堂。乾坤大一統。玉帛朝萬邦。森羅同一舌。起立合掌云。萬壽無疆。

大慧杲禪師。天申聖節上堂。稽首能度諸世間。無量殊勝福德聚。金輪統御四天下。普施羣生安隱樂。還有知恩報恩底麼。良久云。一年三百六十日。唯有今日最吉祥。

應庵華禪師。聖節上堂。聖諦第一義。高而無上。廣不可極。瀰而無下。深不可測。乾坤依此而覆載。日月依此而照臨。虛空依此而寬廣。萬靈依此而變通。故我林下道人。依此學。無爲法。悟無生忍。且道報恩一句。作麼生道。一爐沉水一聲佛。仰祝吾皇億萬年。

聖節上堂。天上無雙日。閻浮一至尊。萬年松不老。聖壽等乾坤。

聖節上堂。時康道泰。天清地寧。一人端拱。無爲萬物各得其所。普天率土。無不承恩。航海梯山。均蒙雨露。釋迦彌勒。共樂昇平。文殊普賢。咸揚正化。塵塵刹刹。皆現威光。物物頭頭。全彰正眼。且道報恩一句。作麼生道。祇將一味無求法。仰祝天申億萬年。

密庵傑禪師。聖節上堂。摩訶衍法。離四句。絕百非。諸佛說不到。拂子善提持。乃舉起拂子云。還見麼。以此祝君壽。壽算等須彌。

聖節上堂。諸佛不說說。祖師不聞聞。留下一轉語。千古鎮乾坤。且道是那轉語。蓋起恭身叉手云。皇帝萬歲萬萬歲。

聖節上堂。靈機廓徹。妙叶無私。智鑑洞明。通途絕迹。一切處現吉祥事。不昧見聞覺知。亘塵沙劫。堅密身突出。行住坐臥。天上天下。歌有道。五湖四海。樂無爲。林下道人。將何報德。多子塔前消息。在一回拈出一回新。

天申聖節上堂。心同虛空界。示等虛空法。證得虛空時。無是非法。既無是又無非。便乃以虛空爲正體。

以恒沙國土爲妙用以須彌不動之山爲壽山以功德甚深之海爲福海包羅萬有津濟四生實天中之天聖中之聖適當誕彌之月仰傾葵藿之誠一句全提千祥併集祝聖君壽地久天長

會慶聖節上堂虛空可量風可繫無能盡說佛功德佛功德海既難量吾君聖壽亦如是

聖節上堂日日是好日時時是好時惟有十月二十二吉星垂照最希可

雪巖欽禪師聖節提綱萬化之源萬物之母德被河沙量包海宇聖中之聖主中之主慶會一時壽崇千古以坤自賁月朗太虛以乾爲子紅日卓午正恁麼時香藹金爐簾垂玉殿如何是蕩蕩無爲之句卓拄杖云含弘光大品物咸亨復舉智度菩薩母容受一切法而無分別相師頌云一切法離分別相依前諸相自如如春風影裏乾坤大無限江山開畫圖

乾會節提綱健行不息之謂乾萬法歸一之謂會會萬法歸自己者其惟聖人乎運乾德以位天者其惟至理乎理之至也本乎無作人之聖也體乎無爲堯

風蕩蕩兮舜日熙熙

中峰本禪師聖節示衆大哉乾元至哉坤元一氣含容萬有民無得而名焉功高列聖之上德邁羣王之先蕩蕩乎用大巍巍乎體堅龍抱九重天上日眞光垂照萬斯年大衆還知麼即日瑞分利土春滿寰區大毗盧頂分身優曇鉢華吐燄以故天下稱之爲聖人之佳節也但生植於天地之間者莫不被其澤惟我釋氏之流乃被其澤之尤者也何以爲然蓋孤虛柔弱而不能自立也言孤則遠離親族不營世家言虛則寄食檀門棲遲林麓言柔則潛心空寂守節循規言弱則守護性真不與物競自非聖人不念佛囑曲垂外護則僧園資具安敢自稱常住而不遭陵奪於他人之手乎由是吾儕安居暇食一時刻咸出聖恩雖天覆地擎不足云喻使盡形求法終身向道至若忘軀畢命亦不足以酬其萬分之一豈容懈怠懶墮虛延白晝而更馳情於利欲者乎茲遇聖節曲引微忱以相勉勵記得後唐莊宗皇帝問興化和尚云朕收中原獲得一寶只是無人酬價化曰請陛下

寶看帝乃引手舒幃頭脚化曰君王之寶誰敢酬價  
龍吟霧起虎嘯風生則不無莊宗興化若曰酬中原  
寶價至竟未曾定奪臣僧遙對天廷輒成一偈蓋天  
蓋地中原寶無古無今塞太虛價重乾坤酬未得佇  
看皇化越唐虞

天目禮禪師聖節上堂天何言哉四時行焉地何言  
哉萬物生焉君何言哉萬方安寧風調雨若海晏河  
清正恁麼時如何野老不知堯舜力勾芒祭罷餉春  
耕

聖節上堂坐琉璃殿垂夜明簾混然一體以難該冥  
應衆緣而無貳從上以來推尊此位且全身奉重一  
句如何舉唱妙叶羣機齊入貢從教諸道自分權  
楚石琦禪師聖節上堂舉無著與外道論義著云天  
下太平國王長壽外道杜口不能破師頌云義有河  
沙數不出者一句蚊子上鐵牛無你下嘴處

無用寬禪師天壽聖節上堂威音王佛今朝示現德  
被蒼生光騰海甸不假揩磨不須煅鍊太湖臣僧聊  
通一線吾皇聖壽等乾坤赫赫神光普周徧便下座

笑隱訢禪師聖節上堂下兜率降闍浮本迹不二御  
金輪宣正法權實全彰乘願示生隨機闡化靈樞密  
運躋吾民於安養之中寶鑑高提措四海於鈞陶之  
內故我林泉之下化日舒長鐘鼓清時玄風遠播三  
輪不住施受俱捐畢竟如何祝讚良久云無爲功德  
不思議淨智妙圓體空寂

聖節上堂化工密運納羣生於覆燾之中端拱無爲  
躋四海於仁壽之域如華嚴海融攝三千世界似帝  
網珠交羅百億山河正與麼時如何是不涉誕生底  
句一氣不言含有象萬靈何處謝無私

了庵欲禪師天壽聖節上堂摩醯正眼洞徹十虛迦  
陵仙音徧周沙界標三才而建立舉四海而安之續  
列聖之丕圖膺靈山之付囑摧怨破敵運金剛輪發  
政施仁作獅子吼當流虹之瑞旦慶萬世之昌期然  
則黃桴土鼓共樂昇平堯舜之君猶有化在所以道  
向上一路千聖不傳萬仞崖頭縱橫得妙卓拄杖云  
將此身心奉塵刹是則名爲報國恩

天壽節上堂萬法是心光諸緣惟性曉本無迷悟人



只要今日了。且道了箇什麼。良久云。甲辰正月十一日。大元天子降生時。刹海塵毛咸稽。首萬年松長萬年枝。

聖節上堂。金剛正體洞徹。十虛般若靈光。該羅萬有。昭昭於心目之間。而相不可覩。晃晃於色塵之內。而理不可分。與天地同一覆。與日月同一照。臨與山嶽同一穹。崇與江河同一流。注所謂佛。佛授手。祖祖相傳。若聖若凡。皆承恩力。慶逢嘉運。仰祝堯齡一句。當陽如何舉唱。劫石有銷。日君恩無盡時。

資聖南禪師聖節上堂。顧視左右曰。諸人還知麼。夜明簾外之主。萬化不淪。琉璃殿上之尊。四臣不昧。端拱而治。不令而行。壽逾百億。須彌化洽。大千沙界。且道正恁麼時。如何行履。野老不知黃屋貴。六街懽聽靜鞭聲。

蔣山泉禪師聖節上堂。拈拄杖。擊法座。一下云。以此功德。祝延聖壽。便下座。

用彰俊禪師聖節上堂。麟鳳龜龍。昨夜一時出現。臣僧拄杖子。見此休徵。嘉瑞歡喜。踴躍出來。與無量壽。

世尊把臂交歡。同聲慶贊。拈拄杖。大道虛玄。天地先昆虫草木。悉陶埏神功。普極三千界。睿算超過億萬年。以拄杖卓一下。

石屋珙禪師天壽聖節上堂。箕翼長明。地天長泰。風不鳴條。雨不破塊。君乃堯舜之君。俗乃成康之俗。王母晝下雲旗。翻海山四月蟠桃熟。

#### 滿散提綱

圓悟勤禪師散聖節上堂。神霄真人降駕。長生帝君御極。神靈開旦。夷夏欽風。萬瑞咸臻。千靈擁祐。布義軒無私之政。追盤螭太古之風。萬國赤子歌謠。八表昆虫鼓舞。福流千界。慶集一人。林下禪人如何圖報。共持清淨。無爲化仰。祝吾皇億萬春。

散乾龍節上堂。淵聖皇帝君臨萬國。北狩未還。乾龍節臨祝。嚴睿算。臣僧一句了。無覆藏。還委悉麼。佛殿裏燒香。

散天申節上堂。天上古佛人間至尊。五月下降闕浮。五月君臨萬國。奮中興業。清四海塵。永固龍圖。長堅鳳曆。遙瞻北闕。仰祝南山。一句全提。當機顯露。還委。

悉麼建炎天子天申節聖壽彌隆億萬年

無文燦禪師崇壽節滿散二千年前四月八日西天  
竺國親曾出現二千年後東震旦土依舊示生天上  
天下惟我獨尊前身後身一夢兩覺長育萬物如春  
行地照臨萬物如月行空承乾之運而無可見之功  
行坤之道而無可見之迹臣僧一坐六十小劫入思  
惟三昧經八十返求一語讚歎不可得求一語名狀  
不可得於不可得中乃見王母面授新熟蟠桃恭遇  
滿散未免和盤托出良久云太后舉觴今上拜九重  
春色異人間

乾會節滿散昨朝方祝聖人壽今朝又祝聖人壽天  
地中間兩重人同時出現相前後扶桑樹頭紅日方  
昇蟠桃枝上春風未老直得東湖番湖交口讚歎芝  
山閣山鞠躬稽首自有天地開闢以至于今如此盛  
事希有希有祝聖人福祝聖人壽祝聖人多男子願  
視大衆云可中忽有人出來問聖人福聖人多男子  
不待問敢問聖人壽畢竟是多少豎起拂子云萬年  
松在祝融峰

恕中愍禪師滿散上堂一年三百六十日惟有此日  
最吉祥黃河澄清聖人出文經武緯開明堂聖人既  
出天下太平無爲而治不令而行南北風塵俱蕩盡  
熙熙萬姓歌黃唐

景命四齋日月旦提綱

圓悟勤禪師八月日日上堂秋光清淺明明不退轉  
羣木蕭疎一一解脫道不出陰界可以徧歷浮幢王  
不立纖塵可以具足金剛智何況園裏菜青田中禾  
熟豈非歲稔時和心融境寂且不離向背一句作麼  
生道星河秋一鴈砧杵夜千家

五月旦日上堂鐵樹龍鬆石牛哮吼火雲亘天長萬  
丈金烏普照大光明直得東海鯉魚振鬣揚鱗南國  
波斯呈撓舞棹文殊普賢不敢說理說事德山臨濟  
不敢行棒行喝正恁麼時會麼拄杖擬吞三世佛燈  
籠百斛瀉明珠復云釋迦老子道若有一人發真歸  
源十方虛空悉皆消殞五祖和尚又云一人發真歸  
源十方虛空磕著築菩山僧卽不然若有一人發真  
歸源十方虛空錦上鋪花



眞淨文禪師上堂。今朝十月一天下。煖爐開。衲僧頂門眼。依舊蒙塵埃。歲月既已往。死生還到來。床添新藁薦。一任雪成堆。遂拈袈裟角。云。大眾人人有分。須是頂門眼。開始得。喝。一喝下座。

大慧杲禪師上堂。古者道了得。一萬事畢。今朝是九月。一諸人作麼生了。驀拈拄杖。云。不得喚作拄杖子。便了。取好。既不喚作拄杖子。作麼生了。擲下。云。差之毫釐。失之千里。

月旦上堂。月生一鐵輪。天子寰中勅。月生二豐干。騎虎入鬧市。月生三蠛蠓。眼裏巨鼈鱉。驀拈拄杖。云。莫有同生同死底麼。出來與徑山拄杖子相見。良久。云。見義不爲。何勇之有。擲下拄杖。

應庵華禪師。月旦上堂。召大眾。云。三日前五日。後若不揮劍。漁父棲巢。明果有一轉語。也要諸人共知。犀因玩月。教生角象。被雷驚。華入牙下座。

雪巖欽禪師。八月一日上堂。方便門。解脫門。毗盧寶閣門。以拄杖一擊。八字俱開。然雖如是。只許向者裏。暫時止宿。一息一食而已。若欲直指。大休大歇。大安。

樂田地。前頭大有活路在。

蒙庵欽禪師上堂。臘月初歲。云。徂黃河凍已合。深處有嘉魚。活潑潑跳不脫。又不能相煦。以溫相濡。以沫。慚愧菩薩摩訶薩。春風幾時來。解此黃河凍。令魚化作龍。直透桃花浪。會即便會。擬人面前。且莫說夢。

恕中愠禪師上堂。今朝七月一。屋角秋風動。無上解脫門。豁達無遮。擁東來西來。南來北來。明窓下。如法安排。是佛是祖。是聖是凡。手面上。等與一透。有主有賓。全體全用。徹骨風流。十八不共。三千刹海。夜沉沉。妙高山色。自孤聳。

石屋珙禪師。七月日。日上堂。人間秋十日。湖寺便生涼。竹色溪邊綠。荷花鏡裏香。即心猶未是。作境謾搏量。空劫已前事。今朝爲舉揚。

了庵欲禪師上堂。小盡二十九。大盡三十日。從頭檢點來。今朝二月一。春山疊亂青。春水漾虛碧。寥寥天地間。獨立望何極。老明覺向者裏。打開寶藏。運出家珍。其柰坐在尊貴中。致使諸人當面踉過。喝。一喝。愚丘靜禪師。月旦上堂。月生一東巖。乍住增愁。寂紅。

塵世路有多端。米麪倉儲無顆粒。崖爲伴。泉爲匹。颯颯清風來入室。山王土地暗中忙。雲版鐘魚偷淚滴。世人莫道守空巖。亦有東籬打西壁。

雲羅長禪師上堂。不知時分之延促。不知日月之大。小灰頭土面。且與麼過。山僧每遇月朔。特地鬪釘家。風抑揚。問答一場笑具。雖然如是。因風撒土。借水獻花。有箇葛藤。露布與諸人共相解。摘看。薰拈拄杖。擊香臺曰。參堂去。

別峰寶印禪師月旦上堂。六月初一。燒空赤日。十字街頭。雪深一尺。掃除不暇。迴避不及。凍得東村。廖胡子。半夜穿靴水上立。

月望提綱

谷隱聰禪師月望上堂。十五日已前。諸佛生。十五日已後。諸佛滅。十五日已前。諸佛生。你不得離我者裏。若離我者裏。我有鈎子鈎你。十五日已後。諸佛滅。你不得住我者裏。若住我者裏。我有錐子錐你。且道。正當十五日。用鈎。卽是用錐。卽是。遂有頌云。正當十五日。鈎錐一時息。更擬問如何。回頭日又出。

閻悟勤禪師三月望日上堂云。華殘雨過。已度韶光。風暖雲凝。將臨夏景。不逐四時。凋變隨例。七八分。更或削迹。吞聲不免。牽藤引蔓。百草頭上。則且置脚。下泥深一句。作麼。生道。春日晴。黃鸝鳴。

密庵傑禪師月望上堂。十五日已前。開池不待月。十五日已後。池成月自來。正當十五日。吹無孔笛。唱太平歌。佛及衆生。同聲唱和。且道。超羣拔萃一句。作麼。生道。四海浪平。龍睡穩。九天雲靜。鶴飛高。

上堂。今朝六月十五。祝聖陞堂。擊鼓木童。火裏吹笙。石女雲中作舞。也大奇也。大奇。天無四壁。地絕八維。五湖四海。來入貢。衲僧聞見。眼如眉。喝一喝。下座。了庵欲禪師上堂。今朝九月半。萬事隨時變。霜風刮地來。木葉盡零亂。古人道。要識不遷義。但向萬物凋落處。會取是你諸人。會也未。若也會得。旋嵐偃嶽。而常靜。江河競注。而不流。野馬飄鼓。而不動。日月麗天。而不周。其或未。然只知事。逐眼前。過不覺。老從頭上來。

月望上堂。十五日已前。水向石。逐流出。冷十五日已

後風從花裡過來。香正當十五日。火後一莖茅鐵蛇鑽不入。喝一喝。

上堂。昨日十四。今日十五。大法難明。時光易度。動則涉塵勞之境。靜則沉昏醉之鄉。動靜雙泯。則落空亡。動靜雙收。則顛預佛性。到者裏。須知有透脫一句。始得拈拄杖云。倒跨楊岐。驢踏殺長沙虎。擲下拄杖云。三歲孩兒。抱花鼓。莫來攔我毬門路。

石田薰禪師三月望上堂。但得本莫愁。末喚甚麼作本。喚甚麼作末。松柏千年青。不入時人意。牡丹一日紅。滿城公子醉。山僧恁麼道。若有不肯底。是我同參。圓極峯禪師月望上堂。韓信打關。未免傷鋒。犯手張良。燒棧大似曳尾靈龜。既然席捲三秦。要且未能囊弓裹革。煙塵自靜。我國晏然。四海九州。盡歸皇化。自然牛閒馬放。風以時雨。以時五穀熟。萬民安。大家齊唱村田樂。月落參橫夜向闌。

報本利禪師月望上堂。今日月望。打箇糊餅供養大眾。拈拄杖作圓相曰。還識此餅麼。不但恭養一人。百千萬億人。祇是一箇細嚼飽餐。不得咬破。雖然如是。

切忌麵生參

初八念三提綱

雪巖欽禪師上堂。一夜雨聲滴滴。元是簷前雪消。冷地令人憶著。相國寺裡芭蕉。何也。零零落落。一似宜春臺上正月八日。趕齋和尚底七條。

眞淨文禪師上堂。十月二十三天寒下。暖簾昏黃一覺睡。南海出榆甘。

改元登極提綱

雪峰慧禪師建炎改元上堂。天地之大德曰生。聖人之大寶曰位。今上皇帝踐登寶位。萬國歸仁。草木禽魚咸被其德。此猶是聖主應世邊事。王官降誕已前。一句天下人摸索不著。

龍牙才禪師因欽宗皇帝登位。衆官請上堂祝聖。已就座。拈拄杖卓一下曰。朝奉疏中道。本來奧境。諸佛妙場。適來拄杖子。已爲諸人說了也。於斯悟去。理無不顯。事無不周。如或未然。不免別通一消息。舜日重明。四海清滿。天和氣樂。昇平延祥。拄杖生歡喜。擲地山呼萬歲聲。擲拄杖下座。

千秋節提綱

愚庵及禪師千秋節冬至上堂千秋令節今朝是九  
九陽生第一爻四海陰霾俱解駁宕雲深處祝唐堯  
金山惟仲禪師皇太子韓國公頭晬之辰上堂妙高  
臺畔龍象駢闐化城閣前聖賢會合正是我皇植福  
之地乃爲禪流選佛之場洞啓法門廣開要路悟之  
者頭頭顯道物物明心高蹈大方圓融至理迷之者  
重重昧性句句乖宗空自精勤終無了達苟能於斯  
一致畫斷兩邊不離當人便同正覺真可謂金輪統  
御玉燭遐明萬國賓從八方寧靜龍蛇出穴丹鳳來  
梧野老謠歌行人讓路堯風與祖風並扇舜日共佛  
日齊明奔波遊子徑歸家是處高人遊佛國然雖如  
是且龍生龍子底句又作麼生良久曰非但天神來  
密祐更資遐算助吾皇

受勅奉旨提綱

圓悟勤禪師在蔣山受勅陞座寒巖枯木白雲堆散  
質何能中巨材豈爲虛聲徹清禁紫微聖詔九天來  
既然事出意外要須直下承當所貴正眼流通仰祝

無疆睿算直得昆草木悉仰動地風光大地生靈  
咸霑唐虞睿澤處處和風徧野人人喜氣盈眸感覆  
燾無疆之恩荷一人生成之德正當恁麼時還委悉  
麼碧桃冉冉凝朝露紅杏蒙蒙映彩霞

改昭覺寺爲崇寧勅黃到開堂全機大用觸處現成  
溢目清光貫通今古一塵含法界一念徧十方盡大  
地是真實人總利海爲大解脫只在當人略回光相  
自著眼看可以克證無生頓超方便是故諸佛出世  
爲一大事因緣祖師西來亦不出見性成佛只如今  
日奉皇帝勅建大伽藍賜額度僧祝嚴聖壽一場佛  
事耀古騰今判府旌旆光臨羣賢車蓋畢集四衆瞻  
仰萬姓歌謠爲國開堂舉揚宗教山僧不敢囊藏被  
蓋其有諸佛說不盡底祖師提不起處對衆八字打  
開去也遂舉拂子云大衆還見麼擊禪床云還見麼  
見處透脫聞處精明一念返本還源卽具頂門三眼  
萬里更無纖翳千聖齊立下風坐斷報化佛頭直得  
壁立千仞且這是什麼人境界鵬弓已挂狼煙息萬  
里謠謠賀太平下座

龍門遠禪師撥田劄子至上堂謝恩。舉百丈和尚  
謂衆云。你等爲我開田。我與你說一段大義。衆開田  
了。請師說大義。百丈起來。展手舒伸。大衆古人得恁  
麼徑截。還會他恁麼方便處麼。百丈說大義。辛勤事  
可知。龍門無道理。大衆絕狐疑。帝力乾坤重。君恩雨  
露垂。有人相借問。雲外略揚眉。爲什麼揚眉。良久云。  
萬古長春。

密庵傑禪師奉聖旨就本寺開堂。上堂。靈源不昧。萬  
古微猷。入此門來。莫存知解。知解既不生。如王寶劍  
殺活臨時。舉一明三。目機銖兩。塵塵刹刹。普現威權。  
物物頭頭。全彰正眼。便見一塵合法界。一句截千差。  
於一毫端。現寶王刹。坐微塵裏。轉大法輪。高而無上。  
仰不可及。淵而無下。深不可測。自然風行草偃。水到  
渠成。不是神通妙用。亦非法爾。如然何故。乃是當人  
從無量劫來。現成受用境界。契券分明。直饒千佛出  
現。各各放大寶光。也侵占一星兒不得。所以道一切  
法不生。一切法不滅。若能如是解佛法。常現前。以此  
壽聖人。則天長地久。以此祝賢佐。則伊尹周公。以此

保國安民。以此康福天下。殊勝中殊勝。奇特中奇特。  
畢竟結角羅紋。在什麼處。天上有星。皆拱北。人間無  
水不朝東。復舉僧問百丈大智禪師。如何是奇特事。  
百丈云。獨坐大雄峰。僧禮拜。百丈便打。師云。百丈善。  
能據虎頭。亦能收虎尾。雖然。頭尾兩全。至竟未徹源  
底。今日忽有問靈隱。如何是奇特事。只對他道。爲國  
開堂。僧若禮拜。但云。知恩方解報恩。且道。與百丈是  
同是別。若揀得出。平步青霄。其或未然。更聽一頌。虎  
驟龍驤。與麼來。嘉然平地起風雷。棒頭正眼明。如日  
凜凜。清風廓九垓。久立衆慈。伏惟珍重。

奉聖旨就靈隱寺開堂。上堂。祖師心印。狀似鐵牛之  
機。去則印住。住則印破。不去不住。當頭坐斷。千眼頓  
開。明如白日。寬若太虛。不可以智知。不可以識識。人  
人具足。物物圓成。拈一機。則千機萬機。頓赴說一句。  
則千句萬句。流通。譬如善舞太阿。一不觸手。二不墮  
地。三不住空。又如獅子筋琴。撫之則羣音頓絕。所以  
道。大人具大見。大智得大用。攬長河爲酥酪。變大地  
作黃金。普令一切有情。無情不墮。有爲不住。無爲富



實不能驕。貧賤不能困。各安其分。守其當。直得堯風蕩蕩。帝道平平。野老謳譟。漁樵鼓舞。且憑箇什麼道理。便乃如是。天高羣象正。海濶百川朝。復舉波斯匿王問佛勝義諦公案。師云。拓開天關。踏翻地軸。言見諦句句朝宗。還他過量人。能提過量事。於過量境界中。作過量殊勝佛事。雖然未免一處誦詛。在今日忽有問徑山勝義諦中。還有世俗諦否。若言其有。智不應一。若言其無。智不應二。一一之義。其義云何。只對道。日月光天德。山河壯帝居。太平何以報萬國。盡歡呼。久立衆慈伏。惟珍重。

元叟端禪師大德。七年八月二日。護持聖旨。到山領衆望闕謝恩。罷上堂。平生抱愚拙。必意安林丘。磐陀一片石。松下聊優游。迴鸞五色詔。警爾來巖幽。天恩浹肌骨。淺薄將何酬。願君爲堯舜。願臣爲伊周。金枝與玉葉。光耀千秋萬民瞻。秬稌四海銷戈矛。竺儂正法眼。如水常東流。

了庵欲禪師聖旨至上堂。久晴不雨。田夫斂斷眉頭。久雨不晴。衲僧浸爛鼻孔。進一步。撞倒百億須彌山。

退一步。踏翻無邊香水海。且截斷千差孤危。不立一句。作麼生道。好大衆。疊疊綸音下。九天融融春意滿。林泉一爐沈水。一聲佛。仰祝吾皇億萬年。

林泉倫禪師至元十八年十月二十日奉旨。就大都大憫忠寺。舉火焚燒道藏。僞經。除道德經外。盡行燒毀。師升座。謝恩畢。拈香云。佛心天子。憫衆生。恐墮三途邪見坑。箇裏了無偏黨處。就中朱紫要分明。所以道聖鑑無私。天機莫測。既來頌德。敢不酬恩。此香端爲祝延大元世主。當今皇帝聖躬。萬歲萬歲。萬萬歲。伏願金輪與法輪同轉。福越三祇。舜日共佛日齊明。壽延億劫。次舉火云。憶昔當年明帝時。曾憑烈焰辨妍媸。大元天子續洪範。顯正摧邪。誰不知。嗟乎道教陰靈佛書。自古至今。造訛捏僞。益竊釋經。句句圖謀。貝葉題名。謗毀如來。賊誣先聖。醜辭惡語。何可言哉。無蒂狂談。實難徧舉。始自張陵杜撰。不尊老氏立言。謬作醮書。兼集靈寶。詐道從空。而得妄言。太上親傳。用三張鬼法。以誑惑愚夫。設五通神符。而魔奸匹婦。以此觀之。葛孝先徒。援要妙。陶洪景謾述浮辭。杜光

庭白拈巧偷劫賊無異陸修靜外好裏弱說客何殊  
若非喫苦不甘爭肯說長道短鮑靜被誅猶可王浮  
招報非輕傳奕姜斌不堪齒錄張生焦輩何足言論  
寇謙之口舌瀾翻損他利已林靈素機謀諂詐敗國  
亡家毀人祖兮定遭一時之辱滅賢良兮必招三世  
之殃因果無差報應有準嗚呼悲法琳不遇而遭貶  
嗟道世雖再而難爲致令釋子傷心幸得皇天開眼  
恭惟我大元世主聖明皇帝陛下闢邪歸正去僞存  
眞恐衆生永墮迷津今萬姓咸登覺路雪冤已竟感  
謝皇恩粉骨碎身莫能酬報遂以火炬打一圓相云  
諸仁者只如三洞靈文還能證此火光三昧也無若  
也於斯會得家有北斗經枉教人口不安寧其或未  
然從此灰飛煙滅後任伊到處覓天尊急著眼看  
普覺朋禪師嘉佑伍年奉旨斷還九里松集慶古路  
上堂山前一片閒田地曠大劫來無界至今朝恢復  
又歸來坐斷脚頭并脚尾東也是西也是南北東西  
無不是畢竟酬恩作麼生十里荷花九里松直指堂  
前香一炷

弘覺恣禪師順治十六年天使至召師上京問道上  
堂有大陀羅尼門明踰日光量同眞法界烈似金  
剛燄堅如持利風是故名爲正句亦曰居頂亦曰頂  
王三昧卽者頂句其昧之自含生也則觸途成滯其  
章之自諸聖也則徧界光通不見祖師道國王長壽  
天下太平直得外道六師亡鋒結舌飲氣吞聲默無  
言說豈非天人羣生類皆承此恩力者耶大眾旣承  
此恩合作麼生祇受龍袖拂開千聖眼金毛獅子奮  
全威喝一喝卓拄杖下座

詔住大內萬善殿結制日奉旨開堂聖駕親臨特差  
內院官執香迎師陞座師拈香祝聖問答畢乃云靈  
山密旨千聖同宣少室眞宗萬靈共證其奈依稀越  
國者多彷彿楊州者衆正如入京朝聖主纔到潼關  
卽便休所以不觀廣大門風焉知威德自在拈拄杖  
卓一下云若向者裡一踢鴻門洞開兩扇則可謂脚  
跟不動身入帝鄉造託非他盡踢御園春色欽承有  
自無違咫尺天顏諸仁者宣德門前且無曲徑含元  
殿上覓甚長安然則把定乾坤奚煩顧佇流通正眼

端在茲辰何故欣逢聖主隆吾道千載難忘此一時  
復云制結皇家禪安大內地爐掘深深之坑獸炭燒  
醺醺之煤欽差內院三員正副監司兩位禁城把斷  
密不通風閤闔牢關水無滲洩如此嚴切爲汝諸人  
諸人合作麼生卽得若作皮骨通身換難報我皇護  
念恩白椎云諦觀法王法法王法如是卓拄杖下座

列祖提綱錄卷第一

列祖提綱錄卷第二

武林十八澗理安禪寺住持婁東行悅集

降香到提綱

圓悟勤禪師秦魯國大長公主降香請陞座天高無  
極無極有尊地厚無垠無垠有主鏡萬象方寸懷六  
合胷中發大機顯大用是故乃祖乃佛或拈華或面  
壁或行棒或行喝或詞辨縱橫或寂寥無說周旋往  
返只明此箇無爲宗旨所以人人分上各各壁立萬  
仞無一絲毫移易虧欠豈不見道譬如帝力不棄一

民不謂不知而不容不謂知之而含有到箇裏啓無  
爲之化行不言之教各各頂天履地飲泉水實地脉  
正當怎麼時還委悉麼一穗寶香天上降金輪皇億  
萬斯年

金山仲禪師皇后遣中使降香爲皇帝祝延聖壽上  
堂法本無說隨事應機心本絕形遇緣卽現古今如  
是凡聖同途蓋衆生迷妄不知遂成流轉故能仁頓  
忘情見了達根源不從外求亦非內得所以佛佛授  
手祖祖相傳道貫一乘宗分五派臨濟則賓主互換  
韶陽乃顧鑑全超瀉仰則父子相投曹洞乃君臣慶  
會清涼法眼直指惟心建立門風各張鋪席包含萬  
象該括大千冥冥不混於色聲蕩蕩豈妨於語嘿把  
定則十方坐斷虎踞龍蟠放行則千聖出興風行草  
偃助堯仁政化祝睿算延鴻降伏衆魔普利羣有然  
雖怎麼猶涉程途且道正令當行如何理論良久云  
一氣不言含有象萬靈何處謝無私  
密庵傑禪師降御香到上堂天地合其德日月合其  
明四時合其序風以時雨以時國泰時平民康物阜



萬姓四民合其一心。熙熙焉。陶陶焉。一人有慶。兆民賴之。是故林下禪人居於四民之外。二六時中。據德山。棒擔睦州。板驅耕夫。牛奪饑人。食拈一莖草。作丈六金身。將丈六金身。作一莖草。卷舒自在。縱奪臨時。堪報不報之恩。共助無爲之化。復舉肅宗皇帝問忠國師。如何是十身調御。國師道。檀越踏毗盧頂上行。前日開堂。次僧問。如何是十身調御。山僧對他道。垂手過膝。諸人且道。山僧與麼答他。與國師是一是二。若道是一。語言參差。若道是二。佛法豈有兩般。畢竟如何。大海若知足。百川應倒流。

佛日岳禪師。哲宗皇帝遣中使降香。師登座問答罷。乃曰。此箇法門。不在筌蹄。豈干問答。直饒盡十方刹土。抹爲微塵。一一微塵。盡爲衲僧。各如滿慈。驚子。窮天。玄辯。竭世。樞機。到者。裏一點用。不著。何以故。生佛圓融。自他平等。人人鼻孔。遼天。各各壁立。千仞。蓋不知真隨安。轉法逐緣。遷自昧靈。光枉投異趣。所以破有法王。運無緣慈。駕三乘舟楫。渡五性波瀾。翻戀澄潭。月影靜夜。鐘聲。故使懷州牛。喫禾廬陵米。價長又

不免勞。初祖達磨。逗器支那。教外菱花。不磨。甄鏡衣中。驪額不數。他珍。未挂古帆。見成公案。由是悟取。無悟底。面目迷。是不迷底。鄉關三際。無私十方。洞暢自家田地。枯木生枝。古廟香爐。寒灰再發。莫不一切語言文字。資生產業。皆與實相。不相違背。若然者。無影樹下。合同。船漁翁。鼓舞中有黃金。充一國野老。謳歌共樂。昇平同躋。壽域自是天長地久。海晏河清。且道共樂昇平一句。作麼生。道良久。曰。羅浮打鼓。韶州舞久立珍重。

佛陀遜禪師。哲宗皇帝遣中使降香。師陞座問答罷。乃曰。傳持此事。豈以搖唇鼓舌。馳騁言鋒。而可議然於方便門中。事無一向。是故文殊以無住爲本。曹溪以無念爲宗。無念之宗。爲萬法之宗。無住之本。爲萬法之本。衆生棄本逐末。背覺合塵。一失其源。迷而不復。故祖師西來。不立文字。特唱宗乘。只教諸人明見自性。與佛同壽。歇則菩提。不從人得。佛言。我於然燈佛所。無一法可得。然燈佛方與我受記。若有一法可得。然燈佛即不與我受記。如是舉唱。猶是化門。且不

落化門一句作麼生道。冬無寒臘下看。復曰。諸仁者。道非隱顯。遇緣卽宗。法無去來。因時而會。若緣時而未會。雖佛祖亦何爲。且恢張祖席。創立叢林。豈一僧之所能。必假國王大檀越爲之護助。佛日乃可光揚。自昔京城未聞是道。先帝始建法幢。延四海之高流。爲一時之大事。故今日佛道如此之盛。皇帝陛下少踐丕圖。早聞妙法。不忘佛記。克紹前芳。遂令山野之人。獲預朝廷之命。卽將此開堂善利上祝聖壽無疆。伏願舜日與佛日齊明。堯風與祖風並扇。萬邦無事。時當熙盛之年。四海晏清。人樂昇平之化。久立珍重。佛印清禪師。哲宗皇帝遣中使降香師登座問答罷。乃拈拂子召大衆曰。還見麼。手中拂子。層層爲諸人放百種寶光。復擊禪床曰。還聞麼。座下。猊臺句句爲諸人演一乘了義。諸人若向者裏悟得。則曠大劫來。我人業識。當體煙滅。灰飛現前身世。根境塵勞。徹底冰融。雪泮。便見靈山正法眼藏。昭昭溢目。全彰少室涅槃妙心。晃晃通身。獨露譬如。演若悟鑑中面目。元來只是已頭。亦如力士護額上圓珠。到了不從他得。

如斯則無量神通三昧。塵塵本爾。圓成恒沙諸佛法門。念念一時具足。諸仁者。有能恁麼擔去。便謂立證無生。不待僧祇而成。正覺如今。要見無生。麼。良久云。一氣不言。含有象萬靈何處謝無私。

中峰本禪師。延祐六年九月初六日。駙馬太尉潘王璋奏奉聖旨。御香入山。謁師於幻住庵。翼日請師就師子正宗禪寺。陞座。大道無爲。大功不宰。大善無跡。大位不居。一切處海印發光。千萬古金枝挺秀。訪圓通大士於潮音洞裏。買石得雲。饒修如意輪期。於明慶寺中。移花兼蝶。至香風奏四天之樂。梵音轟大地之雷。二千載已現國王。五百劫常爲世主。一大藏教。隨機運轉。百千善行。任意發揮。祝萬歲於九重。保三韓於上國。此是太尉潘王海印居士尋常行履處。只如今日。偕行宣政院使平章相國王子從官高登天目下。視人寰。且佛法相應一句。如何指陳。匝天匝地。祥雲起無古。無今。瑞氣騰某道行全虧。病衰滿體。限藏巖穴。惟待殞亡。記六載前。伏承太尉潘王書下逮。謂得旨南來。首謁補陀。次登天目。今年之夏。忽聞

王車從至杭。繼臨海岸。親見十二面。滿月慈容。於潮音洞裏。約山僧見處。又却不然。其觀世音聖相。當數年前。最初發一念時。而滿月慈容。當處與王之兩目。如鏡照鏡。自爾凡舉一念。則一觀音示現。舉百念。則百圓通現。前所現之聖容。隨念起處。竟莫知幾千萬身。豈特王心爲然。自車從離京之日。自此而南。三千五百里驛程。若聞若見。俱使知有補陀巖人。人心。中皆具現觀世音菩薩之慈容。此又豈數量可知耶。如是無利不現之身。皆含裹於王之最初一念。而其應現。又不止於今日。將見亘百千世。後傳王之。躬詣補陀巖。使觀世音自在。神通光明。世世增長。其無作妙用。殊勝功德。未易以算數知也。今乃與宣政院使平章相國及王子宰相尙書侍郎舍人宣使一行官從。同時會集。尋奉王旨。謂一衆俱欲問向道之說。若使一一請問。未免詞繁。俾陞此座。普爲衆說。記得先師高峰和尚三十年深居此山。每以一箇萬法歸一一歸何處話。教人默默提起。密密咨參。但不使間斷。亦不爲物境之所遷流。亦不爲愛憎順逆情妄之所障。

蔽惟以所參話頭。蘊之於懷。行也如是。參坐也如是。參到用力不及處。留意不得時。驀忽打脫。方知成佛。其來舊矣。著子是從上佛祖了生脫死之已驗。三昧惟貴信得及。久遠不退轉。更無有不獲其相應者。所以古宿有謂。但辦肯心。決不相賺。今日太尉王與宣政平章相國王子從官。皆是夙承佛記。遠種靈根。而華茂果圓。相逢此際。豈非一時慶會。千古因緣者哉。又記得教中有謂。若人欲識佛境界。當淨其意。如虛空。且淨意如虛空。置之不問。還識佛境界麼。如一香一華一旛一幢。非佛境界。官殿樓閣園林浴池。非佛境界。乃至光明殊勝等俱。非佛境界。本上座今日忍俊不禁。指似去也。山高水深。是佛境界。日上月下。雲騰鳥飛。是佛境界。明暗色空。壞空成住。三途六趣。九有四生。爐炭鑊湯。諸惡苦趣。是佛境界。諸仁者。還信得及麼。當知佛境界。充徧。故衆生境界。亦復充徧。離佛境界。外別無衆生境界。舍衆生境界。外別無佛境界。所謂佛境界者。極而言之。迷則佛境界俱是。衆生境界。悟則衆生境界俱是。佛境界。如楞嚴謂如。

我按指海印發光。汝暫舉心塵勞。先起此說。豈有定體耶。謂海印者。廣周法界。不於印外別容有一法。而得安住。一切諸法。皆海印之眞光。含攝諸塵。圓裹三際。此印隨佛心量。建立無異。無別不增不減。而衆生罪亦復如是。但悟迷之有間也。使我廣說循環莫盡。恐稽王聽不欲詞。繁記得昔日。趙王訪趙州和尚。州不下禪床。乃問王曰。會麼。王云。不會。州曰。自小持齋。今已老見人無力。下禪床。道尊德備。須還趙州不下。禪床師法。有在無端。末後垂示。大似偷心。未忘不妨。使人疑著。爭似幻住。以三千六百丈天目山爲禪床。行則與王共行。坐則與王共坐。或有人問其中事。若何。聽取一偈。圓通示現潮音洞。幻住深棲天目山。至竟不能逃海印。嘉聲千古播人寰。

受師號紫衣提綱

智門祚禪師。因李都尉奏師紫衣。到日上堂。問話且止。斯日皇恩。且道自何而降。老僧本志。弊衣遮幻質。糲食補饑瘡。無何都尉聞天。榮頒紫服。著且又違本志。不著又負天心。挂不挂。且致你道。祖師挂什麼衣。

苦也委悉。許上座終日著衣。未曾挂著一縷絲。終日喫飯。未曾咬著一粒米。若不委悉。看老僧今日披衣去也。遂乃披衣。

雪竇顯禪師受師號。上堂。禪家流還如戰將。見鬪勇健。索不來。卽便擒下。雖一朝之作。爭似借水獻華。唱太平歌。好夜雨。山草滋。爽籟生。古木閒吟。竺仙偈。勝於嚼金玉。蟋蟀啼。懷牆苟免。悲局促。道人優曇華。迢迢遠山。綠是知道。無不在。誰云間然。故天有道。以輕清地。有道。以肅靜谷。有道。以盈滿。君有道。以敷化。故我今上皇帝金輪統御。叡澤滂流。草木禽魚。無遠不及。嚴野抱疾之士。俄承寵光。此生他生。無以云報。賢守司封。高扶堯舜。下視龔黃。襲千載之雅風。鎖萬邦之春色。佇當明詔。別振休聲。貳車屯田。諸廳朝宰。不敢飾辭。褒讚仲尼。言云。吾禱久矣。

圓悟勤禪師鄧樞密奏到紫衣。師名上堂。大道絕遮。攔其誰趨。向虛空無背面。何處雕鏤。迥出威音王。高超毗盧頂。直得絕塵絕跡。離相離名。海口莫能宣。佛眼覷不見。其奈巖中宴坐。諸天雨華。淨室掩關。梵音。

恩諭遠稟一人洪造特資宰輔陶鎔棋服師名薦臻  
巖穴既爾從天降下理應直下承當泉石光輝林鬱  
增秀風行草偃水到渠成由是擊開解脫門顯示正  
法眼調無生曲唱太平歌樂無爲之化去也還委悉  
麼優鉢羅華開敷著無香氣名自樞密府恩從九天  
至草木生光輝麟龍不爲瑞誓奮鐵石心仰答丘山  
惠

佛照光禪師淳熙四年正月二十四日特賜佛照禪  
師號領衆門迎勅黃歸寺陞座拈香祝聖畢乃云當  
陽日擊直下知歸左右逢源七通八達著著有出身  
之路頭頭具透脫之機有時神出鬼沒換斗移星有  
時八字打開兩手分付恁麼也得不恁麼也得恁麼  
不恁麼總得我爲法王於法自在放去收來有何罣  
礙直得龍驤虎驟鳳翥鸞翔奇特中奇特殊勝中殊  
勝正當恁麼時且道知恩報恩一句作麼生道吾皇  
萬萬年復舉黃檗和尚示衆云汝等諸人盡是不著  
便底恁麼行脚何處有今日還知大唐國裏無禪師  
麼師著語云打草要蛇驚時有僧出衆云只如諸方

聚徒領衆又作麼生檠云不道無禪只是無師師云  
黃檗眼觀東南意在西北檢點將來未免面皮厚三  
寸且道靈隱恁麼批判意在什麼處從前汗馬無人  
識只要重論蓋代功

月江印禪師陀羅麻室利皇后賜紫衣土堂迦葉上  
行衣輪王髻中寶得來本自無心披處長短恰好且  
如何是報德酬恩底句昨夜日輪開桂花今朝月窟  
生芝草

玄極頂禪師明太祖高皇帝賜紫衣謝恩上堂內使  
傳宣出紫宸賜衣何幸及微臣金襴照耀天人喜白  
氍鮮明雨露新光寵山林回佛日逗除霜雪布陽春  
餘生受用流傳遠萬歲宗門沐至仁

千巖長禪師受紫衣上堂陳年布襪破毳毳新製金  
襴天上來裏得虚空無少賸山河朶朶笑顏開  
尼淨智光禪師受紫陞座拈香祝聖問答罷顧視大  
衆曰若論說禪說道則諸大禪師已說了也教山僧  
到者裏說箇甚麼卽得豈不見先德道千種言萬般  
解只要教君長不昧然雖如是畢竟如何遂以法衣



覆頂良久云。袈裟蒙頭萬事休。此時山僧都不會。便

下座。通載云。彼時諸禪長老同在御前受。緊因命資次說法。而光受當其末。

### 聖主請提綱

圓悟勤禪師今上皇帝在藩邸時。請陞座。金剛心真華藏界。潤一佛出世。千佛擁衛。一華開敷。萬華周匝。現殊勝。因作奇特事。可以保安家國。可以入聖超凡。惟仗不思議神通。難思微妙作用。車不橫推。理不曲斷。豈不見昔日波斯匿王問釋迦老子。聖義諦中。還有世俗諦否。若言其有。智不應一。若言其無。智不應二。二二之義。其事云何。釋迦老子道大王。汝於龍光王佛時。曾問此義。吾今無說。汝亦無聞。無說無聞。是真聖義諦。是名一理。二義。一二之義。其事如是。釋迦老子頂額放光。肘下懸符。於百千萬億境界中。提起當陽一著。諸人還證據得麼。若證據得。按頭獲勅。如證據不得。伏聽處分。正當恁麼時。如何放開一線道。觸處現神通。復舉昔日有一王者。往見西天祖師。既相見已。遂命祖師說法。祖師云。大王來時好道。去如來時師拈云。佛法卽是世法。世法卽是佛法。以直道

而行。風行草偃。山僧有箇小頌。至簡至易。最尊最貴。往還千聖。頂額頭。世出世間。不思議。彈指圓成。八萬門。一超直入如來地。

大慧杲禪師今上皇帝在建邸。遣內知客入山。供養羅漢。祝聖。請陞座。欲識佛性義。當觀時節。因緣。時節若至。其理自彰。敢問大衆。作麼生是自彰底理。舉起拂子云。還見麼。又擊禪床云。還聞麼。聞見分明。是什麼。若向者裏提得去。皇恩佛恩一時報足。其或未然。徑山打葛藤去也。復舉起拂子云。看看無量壽世尊。在徑山拂子頭上。放大光明。照不可說不可說。又不可說。佛刹微塵數世界。於諸世界中。轉大法輪。作無量無邊廣大佛事。其中若凡若聖。若正若邪。若草若木。有情無情。遇斯光者。皆獲無上正等菩提。所以諸佛於此得之。具一切種智。諸大菩薩於此得之。成就諸波羅密。辟支獨覺於此得之。出無佛世。現神通光明。諸聲聞衆。洎夜來迎。請五百阿羅漢。於此得之。得八解脫。具六神通。天人於此得之。增長十善。修羅於此得之。除其憍慢。地獄於此得之。頓超十地。餓鬼

傍生及四生九類一切有情於此得之隨其根性各得受用無量壽世尊放大光明作諸佛事已竟然後以四大海水灌彌勒世尊頂與授阿耨多羅三藐三菩提記當於補處作大佛事無量壽世尊有如是神通有如是自在有如是威神到者裏還有知恩報恩者麼若有出來與徑山相見爲汝證明如無聽取一頌十方法界至人口法界所有卽其舌只憑此口與舌頭祝吾君壽無間歇億萬斯年注福源如海渴漾永不竭師子窟內產狻猊鸞鷟定出丹山穴爲瑞爲祥徧九垓草木昆蟲盡歡悅稽首不可思議事噲若衆星拱明月故今宣暢妙伽陀第一義中真實說大覺蓮禪師皇祐二年十二月十九日仁宗皇帝詔至後苑齋於化成殿齋畢傳宣效南方禪林儀範開堂演法又宣左街副僧錄慈雲大師清滿啓白滿謝恩畢乃啓白曰帝苑春回皇家會啓萬乘既臨於舜殿兩街獲奉於堯眉爰當和煦之辰正是闡揚之日宜談祖道上副宸衷謹白師遂陞座拈香祝聖問答罷乃云古佛堂中曾無異說流通句內誠有多談得

之者妙用無虧失之者觸途成滯所以溪山雲月處處同風水鳥樹林頭頭顯道若向迦葉門下直得堯風蕩蕩舜日高明野老謳謠漁人鼓舞當此之時純樂無爲之化焉知有怎麼事使下座

#### 天眷請提綱

圓悟勤禪師喬貴妃請上堂一句全提千差併會一華開現萬福來臻往復無間而有源動靜不移而常寂處處是佛頭頭是道若也深信得及更不假他人餘力直似壯士屈伸臂頃全出此機若動若靜若出若處殊勝中現殊勝奇特中現奇特更非外緣全承渠德所以道天人群生類皆承此恩力若識此恩動止作爲百千變現悉不落虛正當怎麼時一句作麼生道當陽徧界無回互千重百匝轉光輝喬貴妃娘子請爲法真和尚病起上堂鸞峰單提向上機千靈不謀而會合少室密傳正法眼萬象不融而圓通契印相投緣因相入神功如天地之覆載妙智若日月之照臨沙界等平略無向背有大解脫士證大解脫道關大解脫門示大解脫事今現攢簇不

得底病。直教千聖覓起處。不見諸佛衆生。皆有是病。諸佛若病。卽非衆生。衆生若病。卽非諸佛。是故以衆生病。故示有此疾。由茲王舍城人。各各舉頂上光。悉來問病。而是大士。隨求顯示。令其萬仞壁立。以至衆生病。盡大解脫。士亦安。既安之後。有大檀越。作大法施。建大法幢。演大法義。雨大法雨。一一交羅。重重無盡。正當恁麼時。應時應節。一句作麼。生道還委。悉麼靈苗。增秀氣。瑞草祥光。復成一偈。示病維摩。元不病。問疾文殊。初不來。建大法幢。啓大施。頓令千眼一時開。

喬貴妃設千佛會上堂。千華顯瑞。應萬善積。靈臺廣闊。解脫門大開。無價藏。舉揚正法眼。表示千佛。因直得偏界絕。籠羅當陽。無取捨。透聲透色。亘古亘今。有具大信根。修菩薩行。發難思。願力啓清淨莊嚴。建大道場。具列珍羞。一香一華。一茶一果。同法性等太虛。塵塵剎剎。千佛放光。如理如事。十方普應。所以大匠無繩墨。良材無曲直。紅輪燦太虛。偏界皆輝赫。一華開一佛出世。一塵舉一佛成道。主伴交參。森羅顯煥。

集無涯福祿。祝睿算無疆。正當恁麼時。作麼。生道室內。千燈相照。耀天邊寶月。更清圓。

大內貴妃請上堂。一句子出於千聖頂門。一妙機發於無盡寶藏。遍無依倚。杳絕端倪。非色非心。非如非異。盡虛空窮法界。都虛是箇大解脫門。你諸人浩浩地。於中出入。還覺寒毛卓竪麼。若向脚跟下一念不生。全體顯露。則淨裸裸。活鱗鱗。要行卽行。要住卽住。要用卽用。要休卽休。不指第二頭。不落第二見。到者裏。亘古亘今。凝然寂照。若踏著去。透脫生死。是甚閒事。能以無漏根力。建法幢立宗旨。衣被一切羣靈。盡未來際。無有窮盡。正當恁麼時。且道。承誰恩力。還委悉麼。五蘊山頭。無相佛放光。動地廓周沙頌云。一心無住。著偏界法王家。崇成無漏福。端坐寶蓮華。大內慶國夫人請上堂。處處實無回互。塵塵爾有鑑。覺萬象以不見而見。萬法以不聞而聞。不見見其見。不聞聞其聞。其聞包含萬有。離却見不見聞。不聞別有一段奇特事。要須是箇大解脫機。大解脫用。然後方能歷落起處。全真豈不見。僧問雲門。如何是



塵塵三昧門云鉢裏飯桶裏水又僧問如何是諸佛出身處門云東山水上行一等是箇時節朴實頭處直是朴實頭孤危峭峻處直是孤危峭峻正當恁麼時將箇什麼提持將箇什麼眼目辨別還委恁麼試玉須經火求珠不離泥復頌云此心含法界明契本來人千祥如霧集萬善若雲臻

### 宗藩請提綱

圓悟勤禪師鄆國大王請上堂至理自調然千華曾現瑞無在無不在十方即目前若是利根上智一舉便解承當既能截斷衆流可以超今冠古以如是智以如是力以如是心以如是顯明同杲日寬若太虛所以道譬如虛空體非群相而不拒彼諸相發揮又道若人欲了知三世一切佛應觀法界性一切惟心造蓋此清淨本元離去離來離聲離色若以真實正見契寂如如雖二六時中不思不量無作無爲至於動靜語默夢覺之間無不皆是本地風光本來面目現諸祥瑞現諸奇特皆是從無量無邊劫海薰習種智從清淨微妙根智如是應現正當恁麼時如何無

相光中千佛現一道清虛亘古今復舉釋迦老子靈山會上說大般若舍利弗於佛前問須菩提夢中說六波羅密與覺時是同是別須菩提云此義幽深吾不能說此會中有彌勒大士次補佛處可往同之彌勒云誰爲彌勒誰是彌勒者師拈云還委恁麼一句當機萬緣寢削更聽一頌夢中說法覺無殊妙用神通不出渠誰是誰名總彌勒祥光起處現明珠

莘王請陞座大衆以佛見佛無異見以法說法無別說佛法聞見總現成當陽直下全超越當陽一著非佛非法非見非說非有非無非異非如寬若太虛明如果日所以三世如來於此示生於此修行於此悟道於此成佛全不由他獨承渠力只如今千聖頂額上拈出了也不以眼見不以耳聞不以言宣不以心知正當恁麼時須是箇人始得所以道大人具大見大智得大用舉一明三告往知來正當恁麼時不涉寅緣一句作麼生道還委恁麼楚澤莫開五百歲蟠桃暗長一千年復頌云一塵纔舉一刹現一華開時一佛生克證金剛得長壽六根晝夜放光明

濟王請陞座以無漏根作奇特事以解脫智種金剛緣不於他處現身長在頂門獨露非心非佛非異非如等閒拈一莖草作丈六金身等閒說一句可以當金剛寶劍人人皆稟此用各各悉稟此心若能返照迴光便是毗盧正體豈不見波斯匿王問釋迦老子云我昔未成佛時見迦旃延咸言此身死後斷滅我雖值佛心猶狐疑此身念念遷變不知有不遷變者於是釋迦世尊謂波斯匿王言爾雖知遷變不停還知身中有不變者否王合掌白佛云我實不知佛言大王汝年幾歲見恒河水王言我生三歲時見佛言如今云何王言經今六十二年見與三歲時無異佛言大王汝面雖皺皺者爲變而此見精性未曾變變者受滅不變者元無生滅釋迦老子向千聖頂額萬仞峰頭指出金剛性不變不易湛寂凝然堂堂顯露由是波斯匿王識其本心敢問大眾只如今一切人皆見山僧陞堂且道此見從何而得與威音已前空劫那畔是同是別若見得無異無別則見現前正當恁麼時一句作麼生道觀面擊開無盡藏頭頭涌出

夜明珠復云濟國大王具大根器有上乘種性生爲帝子身極貴榮不忘諸佛付囑知有此大因緣垂神教典深識果因凡所施爲心源洞照所以此之作善因緣行陰騰保其富貴長久福祿彌隆有福修福若大海之納衆流惟利根種智之人具如是作用只此便是普光殿無相身爲盧舍那萬行因華圓果海福源洪注溢天河

眞覺添禪師元祐初游京師徐國大王聞師道風一日遣使召師入宮陞座毗盧遮那實性與汝等諸人本性無別從曠劫來輪轉法界於受生中無本無末無去無來無性無相無古無今纖塵不立毫髮難存無正法之可分何象末之爲間故知法界衆生無成無壞自性本源是佛然雖如是據衲僧門下天地懸殊既有生而有滅復有去而有來正像末法既無差性相昭然而可觀於其中間無有成佛無不成佛於般若藏無所間然直饒三世諸佛六代祖師天下老和尚神通過於鷲子辨智勝於滿慈到者裏也須結舌亡鋒良久曰國令已傳清宇宙人人各賀太平年

詔汰提綱

文殊道禪師。宣和改元。下詔改僧爲德士。上堂。祖師西來事。今朝特地新。昔爲比丘相。今作老君形。鶴筆披銀褐。頭包蕉葉巾。林泉無事客。兩度受君恩。所以道欲識佛性義。當觀時節因緣。且道。卽今是甚麼時節。毗盧遮那頂戴寶冠。爲顯真中有俗文殊老叟身。披鶴氅。且要俯順時宜。一人旣爾。衆人亦然。大家成立叢林。喜得群仙聚會。共酌迷仙醉。同唱步虛詞。或看靈寶度人經。或說長生不死藥。琴彈月下。指端發太古之音。幕布軒前。妙著出神機之外。進一步。便到大羅天上。退一步。却入九幽城中。祇如不進不退一句。又作麼生。道直饒羽化三清路。終是輪迴一幻身。法海立禪師。因朝廷有旨。革本寺爲神霄宮。師陞座良久。乃謂衆曰。都緣未徹。所以說是說非。蓋爲不真。便乃分彼分此。我身尙且不有。身外烏足道哉。正眼觀來。一場笑具。今則聖君垂旨。更僧寺作神霄。佛頭上添箇冠兒。算來有何不可。山僧今日不免橫擔拄杖。高挂鉢囊。向無縫塔中安身立命。於無根樹下。曬。

●續題

月吟風一任。乘雲仙客駕鶴高人來。此呪水書符印牙作法。他年成道白日上昇。堪報不報之恩。以助無爲之化。祇恐不是玉是玉也。大奇。然雖如此。且道山僧轉身一句。又作麼生。道還委悉麼。擲下拂子。竟爾趨寂。

詔復披剃提綱

圓悟勤禪師。僧復披剃。謝恩。罷陞座。天中之天。聖中之聖。處域中之大。超方外之尊。執寶籙以臨民。覆金輪而御極。廓清六合。亭毒萬方。聿降綸言。重興佛法。遂使普天釋子。復換僧儀。歸本務於裴相。公納冠簪於傳大士。重圓應真頂相。再披屈叟田衣。傾之間。追還舊觀。皇恩崇重。倍萬丘山。草木之微。云何圖報。輒傾肝膽。少出毫芒。大衆先佛有頂顙一機。如擊石火。似閃電。光祖師有末後一句。吞栗棘蓬。跳金剛圈。可以敵勝驚群。可以轉凡成聖。騰今現古。蓋色騎聲。如今對衆拈來。不犯從前露布。還委悉麼。洪鈞妙力。先天地覆。載恩歸大聖人。披剃當晚。小參。重圓僧相復方袍。優鉢羅華未易遺。

思重丘山何以報。擬提綱要一秋毫。盡十方世界若長若短若縱若橫。以至香水海不可說不可說。無邊刹海盡在箇一秋毫。有時現無邊身。東涌西沒。南涌北沒。中涌邊沒。作無量無邊神通變化。也只不出此一秋毫。有時冷啾啾地。如枯木朽株。寒灰死火。一念萬年。萬年一念。也只不出此一秋毫。乃至作爲無量無邊殊勝奇特。難行苦行。轉化一切成佛作祖。亦不出此一秋毫。諸人還知此一秋毫麼。若知去未開口已前。未舉意已前。生佛未兆已前。空劫已前。好薦取。既薦得則卷而懷之。任任運運。如兀如癡。不妨是一箇沒量大人。如或未然。却須返照。回光若動。若靜。若住。若行。若坐。若臥。須是究他根源。始得。父母未生已前。父母既生之後。六根四大三百六十骨節。完具寒時知寒。熱時知熱。饑時知饑。飽時知飽。以至頂天履地。含齒戴髮。盡承此箇恩力。且道此箇恩力如何。趣向還知麼。一氣不言。含有象。萬靈何處。謝無私。文殊道禪師。復僧上堂。不挂田衣。著羽衣。老君形相。頗相宜。一年半內。閒思想。大抵興衰各有時。我佛如

來預議法之有難教。中明載無不委知。較量年代。正在於茲。魔得其便。惑亂正宗。僧改俗形。佛更名字。妄生邪解。刪削經文。饒錢停音。鉢盂添足。多般矯詐。欺罔聖君。賴我皇帝陛下。聖德聖明。不忘付囑。不廢其教。特賜宸章。頒行天下。仍許僧尼重新披削。實謂寒灰再發。枯木重榮。不離俗形。而作僧形。不出魔界。而入佛界。重鳴法鼓。再整頽綱。迷仙醉變。爲甘露瓊漿。步虛詞。翻作還鄉曲子。放下銀木簡。拈起尼師壇。昨朝稽首擎拳。今日和南。不審祇改舊時相。不改舊時人。敢問大衆。舊時人是一箇。是兩箇。良久曰。秋風也。解嫌狼藉。吹盡當年道教灰。大梅英禪師。詔復天下僧尼。師獨無改志。至紹興初。晨起戴樺皮冠。披鶴氅。執象簡。穿朱履。使擊鼓集衆。陞座。召大衆曰。蘭芳春谷。菊秋籬。物必榮枯。各有時。昔毀僧尼。專奉道後。平道佞復僧尼。且道僧尼形僧作麼生。復取冠示衆曰。吾頂從來似月圓。雖冠其髮不成仙。今朝拋下無遮障。放出神光透碧天。擲之於地。隨易僧。復提鶴氅曰。如來昔日。曾皮衣。數載。爾將

鶴擎披還我丈夫調御服。須知此物不相宜。擲之舉  
象簡曰。爲嫌禪板太無端。豈料遭他象簡瞞。今日因  
何忽放下。普天致仕老仙官。擲之提朱履曰。遠磨攜  
將一隻歸兒孫。從此赤脚走。借他朱履代。麻鞋休道  
時難事。掣肘化鵬未遇。不如鷄畫虎不成。反類狗。擲  
之橫拄杖曰。今朝拄杖化爲龍。分破華山千萬重。復  
倚肩曰。珍重佛心真聖主。好將堯德振吾宗。擲下拄  
杖。斂目而逝。

大慧杲禪師被旨還僧。謝恩罷。拈香祝聖畢。乃就座。  
云。青氈本是吾家物。今日重還舊日僧。珍重聖恩。何  
以報。萬年松上一枝藤。遂拈起拄杖云。一枝藤在者。  
裏且報恩。一句作麼生。道若也道得。粉骨碎身未足  
酬。一句了然超百億。其或未然。山僧不免爲諸人道。  
破長將日月爲天眼。指出須彌作壽山。

列祖提綱錄卷第二

列祖提綱錄卷第三

武林十八淵理安禪寺住持夢東行悅集

國忌提綱報恩

大慧杲禪師徽宗皇帝大祥上堂拈香罷。乃就座云。  
身從無相中受生。猶如幻出諸形象。幻人心識本來  
無。罪福皆空。無所住。從上諸聖莫不皆從無所住處  
成就。衆生於無所住處。降神處。胎十月於無所住處。  
示現誕生於無所住處。示現行七步於無所住處。示  
現處王宮於無所住處。示現出家於無所住處。示現  
行苦行於無所住處。示現坐菩提樹下成等正覺於  
無所住處。示現降伏魔軍於無所住處。示現坐道場  
轉法輪度有情於無所住處。示現授諸菩薩阿耨多  
羅三藐三菩提記於無所住處。作佛事已。示現入般  
涅槃。召大衆云。從上諸聖。既如是。示現今。日臣僧宗  
杲亦如是。說法只將如是之法。恭爲徽宗聖文仁德  
顯孝皇帝顯肅皇后用嚴仙駕。伏願不守自性。普現  
塵中堅密身。同彼上人住。不思議解脫海下座。  
天目禪師徽宗皇帝上僊上堂。星辰日月佐乾穹。覆



冒坤維已大同十二玉樓人自去山河長在月明中  
笑隱祈禪師文宗皇帝聖恩滿散藏經上堂尊而無  
上高超象帝之先貴不可名坐斷毗盧之頂其體之  
大則容攝十虛其用之廣則包括萬類如月涵衆水  
無分淨穢之殊春在百花不見正偏之相妙有不有  
真空不空所以道無邊刹境自他不隔於毫端十世  
古今始終不離於當念擲大千於方外納須彌於芥  
中於斯見得便見文宗皇帝昔從佛地示現王宮撫  
治邦家又安宗社化導已周復歸佛位寂然不動智  
普應於十方廓爾無私化已周於沙界臣僧與麼讚  
揚且道還契聖意也無良久云優鉢天香吹不斷又  
從兜率下閻浮復說偈云佛心覺照妙無遺包括乾  
坤轉化樞日應萬機常歷歷那伽大定自如如三千  
利海毗盧藏百億山河帝網珠惟願不忘悲智力重  
開慧日照昏衢

聖恩滿散藏經上堂掀翻寶藏不涉言詮頓悟經王  
寧拘文字所以道在聖同聖在凡同凡在天同天在  
人同人塵塵剎剎爾念念爾不動纖毫修證心一

超直入如來地諸人若能如是披閱方可上承文宗  
皇帝神御頓轡圓覺妙場遊戲大華藏海住佛境界  
同佛受用或示千百億身四聖六凡群機齊赴或現  
三十二應河沙國土妙用全彰如是則祐我邦家福  
我黎庶功高莫報恩大難酬正與麼時且追嚴一句  
作麼生道良久云虛空可量風可繫無能盡說佛功  
德復舉梁武帝請傳大士講經士揮尺一下下座師  
云法筵龍象聽全提大士何煩按尺揮真俗混融猶  
有化君臣道合自無爲風吹日炙毗盧藏鵲噪鴉鳴  
諸佛機三會龍華齊渴仰人間天上幾時歸  
聖恩滿散藏經上堂釋迦如來爲一大事因緣出現  
於世四十九年宣揚正法化導群生至法華會上爲  
諸弟子授記作佛始暢本懷然後入般涅槃示化儀  
之有終也如我文宗皇帝乘佛願輪續皇正統靈樞  
密運廓清魔孽之封疆寶印全提紹繼祖宗之神器  
屢推義讓廣布仁慈宰輔效忠建大勳於伊呂嗣皇  
繼聖臻至治於唐虞八表歸仁萬邦樂業而奄棄臣  
民復歸佛位皇太后遣使頒降金帛看閱大藏經文

上資聖駕佛化王化功歸一揅金輪法輪同轉道樞於一毫端現寶王刹當圓成破一微塵出大經卷稱性演說其見色也頭頭觸勸其聞聲也處處觀音文殊於無差別智現有差別身普賢於有差別境入無差別定刹刹自然正受塵塵法爾禪那何處不成等正覺何處不轉大法輪何處非化導群生何處非入般涅槃又何福不臻何恩不報如斯提唱猶是教乘展演之譚只如不落玄妙機關一句如何剖露良久云先皇功業垂無極聖子神孫億萬年復舉東印土國王請般若多羅尊者齋次王問云衆僧看經尊者緣何不看者云貧道入息不居陰界出息不涉萬緣常轉如是經百千萬億卷非但一卷兩卷師頌云是經常轉百千卷越聖超凡亘古今阿闍自使丹鳳宿澄潭豈飾臥龍吟江河淮濟同歸海鉞劍鋒盤共一金縱有虛空廣長舌宣揚不盡聖恩深弘覺志禪師毅宗烈皇帝小祥陞座黃閣簾垂紫羅帳合體極尊貴未盡今時須知向上更有一人逍遙行鳥道擺手出玄途混迹類中華冠從教下却藏身

炭裏寶殿一任蒼生然而雖不存正位九州四海悉稟威靈雖不守大功而地普天咸承恩力所以道有物先天地無形本寂寥能爲萬象主不逐四時凋既不逐四時凋且道此人即今作麼生奉重隨緣觀自在何處不稱尊

佛日嶽禪師建中靖國元年皇太后上僊被旨同六禪長老就文德殿陞座乃曰最初說法者不知末後句末後說法者不知最初句最初句適來慧林禪師已爲諸人說了也說則說了末後句且如何說若約三乘十二分教偏圓頓漸半滿一音不免執指爲月入海算沙直似澄潭月影後夜鐘聲隨扣擊以發音逐波瀾而不散猶是生死岸頭事故乃菩提達磨觀象神州有大乘器所以泛杯千頃浪登陟萬重山首造於梁梁以果因有爲之法而垂問達磨揭聖諦第一義而奉答梁主未契遂之嵩少九年面壁不立文字迥出三乘直指人心見性成佛當時神光二祖立雪斷臂得髓明心一花五葉結果自成六代傳衣後人得道自此東華方信有正法眼藏涅槃妙心中下

○似剩

隨根迷悟相半。信知此事非大根大器。不能領悟。何以故。見聞覺知。是法法離見聞覺知。便乃火聚當岐。鐵山在路。自然少室峰前。壁立千仞。曹溪路上。水泄不通。於其中間。祖風不無。凌遲頽綱。亦將委地。雖然如是。法無定相。道假時章。建大法幢。演大法義。與此一大事。因緣利樂。有情不在。他時須際會。千佛前後。知之。今日幸遇大聖人。出現於世。廣大流布。廓周沙界。實千載之一遇。至若堯舜禹湯。端拱垂衣。無爲之化。不爲不至。若乃開方便門。○示眞實相。十方嘉會。四聚同延。闢古佛之家風。發含生之大本。未可與今日同時而語。何謂也。釋提桓因。與善現。發明般若。唯止眞空。波斯匿王。爲慶喜。特指不遷。猶存俗諦。惟此教外別傳。向上一著。章顯當今。豈非希有之緣。應在震旦。然溪山各異。雲月是同。同聲相應。同氣相求。方知此事無古無今。無彼無此。高而無上。廣不可極。淵而無下。深不可測。毛吞巨海。芥納須彌。在天同天。在人同人在。天則爲日。爲月。爲照。爲明。在人則爲君。爲臣。爲忠。爲孝。以此而推。百億日月。百億須彌。百億四

大海根身器界。情與無情。同一體性。莫不仁者見之。謂之仁。智者見之。謂之智。百姓日用而不知。其能會萬物於自己者。其唯聖人乎。由是燈燈續焰。葉葉相承。百千世月。點慧燈光。融三界十萬里星排。祖幹涼蔭。四生是知。法輪再轉。於支那帝日長輝。於震旦始然者。法無大小。物無適莫。皆被其光。皆蒙其澤。以至草木禽魚。無遠不及。祇如舍衛國王。欲往靈山。見佛。勅諸臣僚。山河大地。草木叢林。須同去見。若一草一木。不去。吾則不得見佛。大衆祇今乾坤之內。宇宙之間。山河大地。草木叢林。去亦不去。來亦不來。湛湛無私。巍巍不動。乃文乃武。乃禪乃律。同在九重天上。慈德殿前。同時見佛。諸仁者。見則不無。且作麼生見。良久云。重瞳日月明。無盡隆準山河秀。有餘佛印。清禪師皇太后上。僊五七波旨。演法於慈德殿。登座問答。罷乃曰。適來淨因禪師云。最初說法者。不知末後句。末後說法者。不知最初句。臣僧今當末後說法。却奉爲大行太后。演最初句。還知麼。靈源湛寂。物我皆如。佛性眞淨。凡同體。彌綸千古。廓徹太虛。



本絕去來何管生滅。今日人天交接。幽顯普臨。皇風習習。以和春帝日遲遲。而育物萬乘。正登於舜殿。六禪齊仰於堯天。奉爲太后建此法筵。指古佛心。開正法眼。於斯見得。朱樓玉殿。重重現清淨法身。金闕瑤池。處處露本來面目。唯佛與佛。同證同知。伏惟珍重。

### 祈晴提綱

天童樸禪師祈晴上堂。久雨不晴。半睡半醒。可謂天地合其德。日月合其明。四時合其序。鬼神合其吉凶。遂喝曰。住。住。內卦已成。更求外象。卓拄杖云。適來鄉得雷天大壯。如今變作地火明夷。

雪巖欽禪師祈晴上堂。久雨不晴。浸爛衲僧鼻孔。如何是衲僧鼻孔。浮雲散盡。碧天寬。赫赫金盆海裏。涌高峰。妙禪師祈晴上堂。天關久鎖。不開容日夜滂沱。鼓黑風。以拂擊禪床。一下云。憤性一槌。俱擊碎頂門。迸出一輪紅。

湛堂準禪師祈晴上堂。剗久雨不晴。直得五老峰頭。黑雲變。巖洞庭湖裏白浪滔天。雲門大師忍俊不禁。向佛殿裏燒香。三門頭合掌。禱祝。祝願。願黃梅石女。

生兒子母團圓。少室無角鐵牛。常甘水草。喝一喝。有甚交涉。顧衆曰。不因楊得意。爭見馬相如。

### 祈雨提綱

圓悟勤禪師祈雨上堂。曹溪路上。天高地厚。少室峰前。土曠人稀。孤然危坐。冷蕭蕭大野橫身。風颭颭。眼見則睹耳聽則聞。口說則啞。雖然。不出一毫端。含吐十虛無。向背既然。有恁麼神通。具恁麼作用。爲什麼乾燥燥地。東海鯉魚打一棒。忙忙地。便爲霖。

龍門遠禪師知府曾公舍人入山祈雨上堂。舉劉禹端公問雲。居雨從何來。對云。從端公問處來。師云。雨從何來。不須尋討。徧滿虛空。拔濟枯槁。定明妙應。靈通知府舍人台造。眞箇是爲雨爲霖。莫不爲忻爲好。且問諸人。是定明雨。舍人雨。百姓雨。定當得麼。良久。卓拄杖一下云。三下座。

眞淨文禪師祈雨示衆云。獅子不食鵬。殘快鷹那打臥兔。放出臨濟大龍。抽却雲門一顧。遂拈拄杖云。龍行雨。至三草二木。大滄泰禪師祈雨上堂。火雲燒田苗。泉源絕流注。娑

竭大龍王不知在何處以拄杖擊禪床云在者裏看  
看南山起雲北山下雨老僧更爲震雷聲助發威光  
令遠布乃高聲曰闕弄闕弄

石屋珙禪師祈雨上堂記得去年時五月火雲燒田  
天不雨家家插種望今年不料今年又如此偉哉公  
侯將相心憂民切切如憂已扣之龍神便感靈來此  
閻浮澍甘雨霈然不止三日霖天人群生悉歡喜敢  
問諸人且道承誰恩力以拂子擊禪床云蘇嚕蘇嚕  
嚕哩嚕哩

師子端禪師祈雨上堂山澗水流如鑿開旱年祈雨  
爲民災不知雲從何處起只見雨從頭上來

無相真禪師慈溪邑侯祈雨請就龍潭示衆遮壤龍  
王現白龜應身何事出潭遲欲知利物及民處便好  
爲霖濟旱時

衆市戶再祈雨請就龍潭示衆久旱山川若火焚神  
龍何忍臥淵深願與雷電重施雨以濟斯民渴望心  
無文璫禪師祈雨上堂一冬不雨一春不雨九土皆  
焦枯天高叫無路拈拄杖云開先拄杖子忽然變作

空行龍王油然起雲霈然洪澍直得枯者榮甲者拆  
萌者吐卓拄杖一下云發機須是千鈞弩

無用寬禪師祈雨上堂本自無生掣電揮星須彌倒  
卓雨似盆傾喝一喝下座

愚庵及禪師祈雨看經上堂舉睦州看華嚴經次有  
僧問是甚麼經州云大光明雲青色光明雲紫色光  
明雲那邊是甚麼雲僧云南邊是黑雲州云今日定  
有雨師云睦州將錯就錯瞞者僧則易瞞普慈則難  
山門今日看經設有僧問是甚麼經只向道扇子踣  
跳上三十三天築著帝釋鼻孔東海鯉魚打一棒雨  
似盆傾豐年野老謳歌甚佳處嘉禾合穗生下座  
恕中懣禪師祈雨上堂甘雨愆期田疇龜拆請僧鼻  
孔焦熱生煙拈拄杖云拄杖化爲龍向南閣浮提行  
雨去也山僧不可洗手奉功未免助其神力卓拄杖  
云急急如律令勅

筓庵問禪師祈雨上堂萬里無片雲青天也須喫棒  
以拂子指云那邊雲生也擲拂子云一雨普滋  
弘覺恣禪師祈雨上堂拄杖子化爲龍吞却乾坤了

也。山河大地甚處得來。雲門老子只解瞻前不知顧後。把將話頭。打作兩橛。殊不知山河大地。卽是拄杖子。拄杖子元不異大地。山河一切智智清淨。無二無二分。無別無斷。故所以拄杖子有時把住。山河光燦。燦絕滲絕。漏拄杖子有時放行。大地黑漫漫倒嶽傾湫。是則固是。祇如拄杖子今日輪次。山僧又且如何。提掇舉起。拄杖云。拄杖子化爲龍興。雲吐霧彌。覆乾坤去也。炎蒸暑熱。從甚麼處得來。大衆山僧。恁麼提掇。還稱他雲門意旨也。無稱與不稱。則且置。擲下拄杖云。擔板休於潭影臥。爲霖且去潤焦枯。

三宜孟禪師祈雨上堂。拈拄杖曰。震法雷。兮。鳴法鼓。山門頭。彌勒開眉。布慈雲。兮。灑甘露。塔尖上。商羊起舞。四海龍王。腦門裂。三十三天。叫冤苦。雲鎖趙州關。雨打雲門普拈起。一毫端。塵刹無焦土。於此作佛法商量。笑諸君從頭莽鹵。所以者一著子。大似龍王行雨。不從龍王身出。不從心出。不自雲生。亦非空有。以不思議力。時行雨事。成熟穀稼。繁長草木。大衆旣不從身心中出。且道雨自何來。卓拄杖曰。赫連皇甫。

牧雲門禪師祈雨上堂。十五日巳前。乾爆爆地。十五日巳後。天作時雨。山川出雲。正當恁麼時。如何。溪北耕南田。地上泥牛耕出古黃金。

#### 謝雨提綱

智門禪師謝雨示衆云。數日好雨。且道雨從甚麼處來。若道從天降。那箇是天。若道從地出。喚甚麼作地。若更不會。所以古人道。天地之前。徑時人莫強移。箇中生解。會眼上更安錐。又云。赫日裏。我人雲霧裏。慈悲霜雪裏。假謁雹子裏。藏身還藏得身麼。若藏不得。却被雹子打破你骨髓。

楚石琦禪師州中謝雨上堂。正覺知見時。知見卽是心。當心卽知見。知見卽如今。娑竭羅龍王出海。繞須彌山三匝。一頭直至梵天口。吐黑雲。遮却大千世界。然後降雨。於是梵王問云。雨從何來。龍王答云。從問處來。又問云。問從何來。龍王懺懼而退。起一陣猛風。吹散黑雲。依舊天晴。日頭出。顧視大衆云。我適來道箇什麼。衆無語。乃呵呵大笑。

恕中愍禪師祈雨有應上堂。信心生一念。諸佛盡能。

知拈拄杖云。諸佛在者。裏信心在什麼處。昨日焚香禱告。今朝驟雨。傾盆清涼。熱惱甦活。枯苗畫拄杖。不是信心所感。不是諸佛降靈。若也會得。被我熟瞞。若也不會。長連床上有粥有飯。

無相真禪師謝雨衆。請就龍潭示衆。山僧多幸。造靈祠。却感龍天力。護持上澤。不知何以報重來。聊以謝恩私。

弘覺恣禪師立秋并謝雨上堂。三伏火雲中秋風動。寥泝香芬十里荷衣。搗千家月歷歷。清秋令明明。朱夏節夏秋曷以分。智者薄甄別。大衆者裏合得甚麼語。與此時相應去。莫是月色水鋪地。薦發秋滿空麼。算來猶隔半月程。莫是秋風吹渭水。落葉滿長安。眼前未有與麼事。畢竟作麼生。道得恰好去。上僧者裏有一道。依時及節。不傷物義。鑄古鎔今。通上徹下。底靈驗底。眞言只是諸人不得作佛法會。不得作世法會。但能至心聽受。要會天地同根。萬物一體。有甚麼難。乃合掌。云。易見龍王。大易見龍王。甘露連注龍王毗疎。其梨那龍王會麼。山中無六月。一雨便成秋。

### 祈雪提綱

五祖演禪師祈雪上堂。一年只餘此月。天道未嘗降雪。奉告三界龍神。各自遞相報說。普天普地鋪銀。且要應時應節。更望大衆慈悲。爲念普賢菩薩。畢竟作麼生摩訶薩。

應庵華禪師祈雪上堂。夜來得一番雪。子細思量。有五件奇特事。應時應節。灾殃殄滅。能除惱熱。衆人定疊。又見老鴉頭白。且道。衲僧門下。畢竟如何。文殊疾走無邊方。普賢眼裏。重重添屑。

### 謝雪提綱

楊岐會禪師因雪示衆。楊岐乍住。屋壁疎滿床。皆布雪珍珠。縮却項暗嗟吁。良久云。翻憶古人樹下居。因雪示衆。雪雪處處光輝明皎潔。黃河凍鎖絕纖流。赫日光中須迸裂。須迸裂。那吒頂上喫蒺藜。金剛脚下流出血。

保寧勇禪師因雪上堂。瑞雪下殘臘。和風生早春。空將未歸意。說向欲行人。未歸意絕忌。諱欲行人何疎。親繞須彌山。轉百千匝。不知畢竟向甚處。藏身拍禪。

床下座

湛堂準禪師因雪上堂。今朝臘月十夜來天落雪。群峰極目高低白。綠竹青松難辨別。必是來年蠶麥熟。張公李公皆忻悅。皆忻悅。皺腹謳歌笑不徹。把得雲簫繚亂吹。依稀猶如楊柳枝。又不覺手之舞之。足之蹈之。左之右之。喝曰。禪客相逢。祇彈指。此心能有幾人知。

雪竇顯禪師謝雪上堂。雪覆蘆花欲暮天。謝家人不在。漁船白牛放。却無尋處。空把山童贈鐵鞭。

蔣山泉禪師因雪上堂。召大眾云。還有過得此色者麼。良久云。文殊笑普賢。嗔眼裏無筋。一世貧相逢盡道休官去。林下何曾見一人。

洞山聰禪師因雪上堂。春寒凝。夜來好雪。還見麼。大地雪漫漫。春風依舊寒。說禪說道易成佛。成祖難珍重。

眞淨文禪師因雪上堂。大地雪漫漫。春來依舊寒。說禪說道易成佛。作祖難洞山。則不然。而今坐立一一成佛作祖。何更有難有易。遂拈拄杖云。不可不成佛。

△同聲問

所以假言三十二八十也。空聲拄杖子。喚作成佛。不是空聲。轉迦彌勒。文殊普賢。不是空聲。而今觸目遇緣。萬別千差。不是空聲。都無實事。佛法到者裏。也要人承當。有麼。有麼。乃擊香臺下座。

因雪上堂。舉龐居士辭藥山。因緣師云。全禪客當斷不斷。反招其亂。且道全禪客當時合下得什麼語。免被龐公折挫。如今真有扶持佛事者麼。出來開發大眾眼目。亦表自己參學身心。如無老僧爲你說破。今日臘月初十。山門街坊。乞丐者入寮打疊。忽有人問諸丐者。已在寮中時。又作麼生。良久乃喝云。相逢不下馬。各自有前程。

大慧杲禪師因雪上堂。買鐵得真金。求雨得瑞雪。五峯玉琢成。千樹銀花結。龍王降吉祥。普賢呈醜拙。二世如來祕密門。今日一時都漏泄。雖然如是者裏。有一處可疑。且道疑箇甚麼。恐日出後一場漏逗。因雪上堂。臘月十五天降雪。爲瑞爲祥。無空闕。文殊露出廣長舌。普賢大士得一概。如何是那一概。看錮鏘著生鐵。



應庵華禪師因雪上堂。卽心卽佛。非心非佛。不是心。不是佛。不是物。冷水浸冬瓜。大家厮漚。漚雖然。漚漚中。却有箇分曉。處。蕭拈拄杖云。山僧夜來吟得箇山偈。舉似大眾。雪子落紛紛。烏盆變白盆。忽然日頭出。依舊是烏盆。忽有箇衲僧出來道。長老長老。此是雪詩。乃對他道。冬行春令。便下座。

密庵傑禪師因雪上堂。滿目紛紛呈瑞雪。填溝塞壑誰辨別。文殊無處頓渾身。普賢失却真妙訣。烏鴉變作白頭鴉。鐵樹翻成銀線結。報諸人。警不警。庭際無人立片時。便是太平底時節。喝一喝。下座。

雪巖欽禪師因雪上堂。寒風凜冽遙空下。雪非特紅爐焰上。莫覓蹤由。逗入蘆花深處。猶難辨別。往往到者裏。十箇有五雙。盡道明一色。邊事殊不知。正是空中花眼中屑。正恁麼時。且道是天寒人寒下座。巡堂喫茶。

中峯本禪師因雪示衆。一片兩片飛入人間。尋不見三尺五尺積向茅簷。難辨的銀象三千界。靈瑞身光有空皆徧。玉龍八百萬敗殘鱗甲。無地可埋梅花之

恨獨深。漁簑之歸未晚。且道與蒲團禪板邊坐堆堆底人。有何交涉。古者道今日雪下。叢林有三種僧。一種向被位頭。究明自己。一種向經案上吟詠雪詩。一種向火爐角說喫堂供。此三種僧。那箇合受人天供養。合受不合受。置之勿論。諸禪德。你還知結雨爲雪。凝水爲水。底道理麼。然結雨爲雪。固是造物變化。宜手不知。如凝水爲水。遽以流注之質。頓成堅礙之形。雖金石不可與較。其固請以喻明之。佛性猶水也。以無量劫中迷妄之寒氣。念念凝合。由是結佛性之水爲冰也。且正當冰時。未嘗不具佛性之水。奈何迷妄之寒。交結未化。雖全體是水。而不得爲流注灌溉之用耳。或不以智慧之日融之。安有自化之理。如是觀察。向道之念可得。而免諸或謂古人相逢彈指便解知。歸豈必待奮神力下苦工。而後然哉。你殊不知。或不曾奮神力下苦工於曩昔。任你相逢彈破指頭也。無你知歸之理。未有一佛一祖不因智慧之日融化。迷妄之寒冰。而能復其佛性之水也。今日一箇所參話信得及處。靠得穩時。豈非眞智慧耶。一旦工夫熟。

時節至千丈氷山也是水萬尋雪嶺也是水滔滔然  
流歸佛性之海任你空中積雪火裏生氷未聞凍合  
無邊之海諸禪德莫道本上座長於譬喻蓋法理如  
是也更聽一偈凍雲四合雪漫漫孰解當機作水看  
只爲眼中花未瞥啓憲猶看玉琅玕

無文璨禪師因雪上堂古人道若端的得一回汗出  
一莖草上現瓊樓玉殿山僧從前疑著此語今日看  
來果然

國雪上堂捱到虛空粉碎時空花一任眼前飛若還  
別覓安心法客路漫漫何處歸

呆庵莊禪師因雪上堂大地雪漫漫山深分外寒斷  
肱人不到面壁也無端大眾且道是祖師無端山僧  
無端拈拄杖擲下云無端無端

愚庵及禪師因雪上堂嘉拈拄杖卓一卓云乾坤大  
地一時粉碎了也十方諸佛六代祖師天下老和尚  
直得瓦解氷消獨有普賢菩薩具大神力現大神變  
歡喜踊躍喃喃說偈云雪子落紛紛烏盆變白盆忽  
然日頭出依舊是烏盆忽有箇漢出來道長老長老

此是雪詩禪僧分上合作麼生只向道三冬多瑞雪  
鼓腹樂堯年

月江印禪師因雪上堂白牛露地南泉無處尋踪香  
象渡河普賢失其境界寒凜凜玉樓起粟白皚皚銀  
海生花古佛堂前燈籠起舞夜明簾外露柱交參顯  
揚少室家風揭示新年佛法太陽溢目依然水綠山  
青大地春回直得河清海晏拍禪床野老不知堯舜  
力鑿鑿打鼓樂豐年

密雲悟禪師因雪上堂昨日青山今朝白雪衆兄弟  
好消息野鹿行人步步成跡唯有挂角羶羊絕氣息  
從來獵犬難尋覓高著眼始得

列祖提綱錄卷第三



列祖提綱錄卷第四

武林十八湖理安禪寺住持婁東行悅集

佛降誕提綱報本

黃龍南禪師佛誕上堂今日四月八我佛降生之日。天下精藍皆悉浴佛。記得遵布衲在樂山會裏充殿主。浴佛之次。藥山問汝只浴得者。箇還浴得那箇麼。遵云把將那箇來。藥山便休。大眾古人隨時一言半句。亦無巧妙。今人用盡心力安排。終不到他境界。衆中商量或云者箇是銅像。那箇是法身。銅像有形。可以洗滌。法身無相。如何洗得。藥山只知其一。不知其二。被遵公靠倒。直得口似搗擔。不勝懣懣。又云古德垂問。只要驗人。問汝那箇便是者。箇把將那箇來。正是隨聲逐色。較他言句上。他圈續藥山見伊不會。所以便休。又道藥山恁麼來。早是無事起事。好肉上剗瘡。遵公不見來病。却向灸瘡癰上。更著艾燭。有云古人得了逢場作戲。無可不可。何高何低。彼此知有。自是後人強生分別。如前所解。蓋不遇人一失其源。迷而不復。所以只憑識心思量計較。以當宗乘。殊不

◆ 日子裏

知有作思惟。從有心起用。此思惟辨於佛境。如取螢火。燒須彌山。縱經塵劫。終不能著。是故行脚高人。切須自看。從上來事。合作麼生。畢竟將何敵他。生死勿以少許浮靈。識見自作障礙。佛法不是者。箇道理同安。今日不避口業。與諸人說破。此二尊宿。一出一入。未見輸贏。三十年後。不得錯舉。

開福道寧禪師浴佛上堂。未離兜率。已降王宮。未出母胎。度人已畢。諸禪德。日日從東畔出。朝朝鷄向五更啼。雖然不是桃花洞。春至桃花亦滿溪。又道毗藍園內。右脇降生。七步周行。四方目顧。天上天下。唯我獨尊。大似貪觀天上月。失却手中珠。還知落處麼。若知落處。方爲孝子順孫。苟或未然。不免重下註脚。良久云。曰。天生伎倆。能奇恠末上輪。他弄一場圓悟。勤禪師浴佛上堂。一手指天。一手指地。末上一機。衲僧巴鼻。步步蓮華。金盆澡洗。西天東土。共流傳至今。處處澆香水。良久云。車不橫。推理無曲斷。下座雲。峯悅禪師。四月八日上堂。教中道。四月八是佛生之日。放大光明。照耀十方。地涌金蓮。華自然捧雙足。

東西及南北各行於七步。分手指天地作獅子吼聲。上下及四維無能尊我者。後來雲門大師舉了云。老僧當時若見一棒打殺與狗子喫。却且圖天下太平。師云。奇恠。諸禪德雲門雖有定亂之謀。且無出身之路。若也辯得。許你頂門具一隻眼。便下座。

龍門遠禪師浴佛上堂。如來妙色身。真實難藏。覆不挂本來衣。豈著娘生袴。無憂樹下降生時。南北東西行七步。行七步度盡衆生。無所度。今辰四月初八。我佛如來降生之日。天下精藍煎湯浴佛。佛則從諸人浴。且道如何是佛。要知麼。佛名如來。常在不滅。有人見得。山僧更不忉忉。若無人見得。山僧重說偈言。昨日如來垂法雨。今朝法雨洗如來了。然一味無差別。雲外青山朶朶開。欲報如來深恩。殿上重新浴過下座。

護國元禪師浴佛上堂。者釋迦老子初生下。來便作箇笑具。一手指天一手指地云。天上天下唯我獨尊。後來雲門大師道。我當時若見一棒打殺與狗子喫。却貴圖天上太平。倘有人不肯放過。却道讚祖。須是

雲門始得。且道那裏是讚他處。莫是一棒打殺處是麼。且喜沒交涉。今日南明乍此住持。祇得放過。若不放過。盡大地人竝皆乞命。始得如今事不獲已。且同大衆佛殿上。每人與他一杓。何故。豈不見道。乍可違條。不可越例。以拂子擊禪床下座。

大慧杲禪師浴佛上堂。未離兜率已降王宮。未出母胎。度人已畢。者箇是題目。摩耶夫人毗藍園裏。攀無憂樹右脇而生。悉達太子。直得九龍吐水沐浴。金軀地涌金蓮。以承其足者。箇是序分。以手指天地作大獅子吼。上下及四維無能尊我者。者箇是正宗。育王今日專爲流通去也。遂拈拄杖卓一下云。釋迦老子來也。舉起云。淨法界身。本無出沒。大悲願力。示現受生。已上四段不同。收歸上科。擲下云。下座與大衆同到殿上。再講經首。囉啊。

浴佛上堂。九十七種大人相莊嚴。微妙淨法身。示現誕生。出母胎。爲衆生故作佛事。且作麼生。是作底佛事。良久云。下座與首座大衆同入。如來香水海助者。老子轉大法輪。

浴佛示衆末後一句子聲前露保蓋天蓋地蓋聲蓋色黃面老子得箇一著子便道未離兜率已降王宮未出母胎度人已畢及至初生則震動一切世界網便一手指天一手指地作大獅子吼道天上天下惟我獨尊爲一大事因緣故開佛知見示佛知見悟佛知見入佛知見殊不知數千年後被箇跛脚阿師要一棒打殺與狗子喫貴圖天下太平且道釋迦老子過在什麼處莫是指天指地開大口麼莫是不合鼓弄人家男女麼莫是開佛知見示佛知見悟佛知見入佛知見麼若恁麼商量不惟謗他釋迦老子亦乃辜負雲門大師到者裏若知雲門落處卽知自己落處且道落在甚麼處良久云萬古碧潭空界月再三撈攬始應知復舉僧問五祖如何是佛祖云露曾蹶足如何是法云大赦不放如何是僧云釣漁船上謝三郎師云此三轉語一轉具三玄三要四料揀四賓主洞山五位雲門三句百千法門無量妙義若人揀得許你具一隻眼

梁山遠禪師浴佛上堂舉藥山浴佛公案拈云者僧

● 結語

問處依稀越國鬚楊州藥山答來眼似流星機如掣電檢點將來二俱不了若是山僧卽不然當時纔見他問只浴待者箇且浴不得那箇但轉木杓柄與伊待他擬議之間攔面便潑假饒者僧有大神通具大智慧也無施展處敢問大衆者箇卽且置喚甚麼作那箇下座佛殿燒香爲你說破

靈隱原禪師浴佛上堂舉藥山浴佛話師云者一箇那一箇一一從頭都浴過藥山布衲謾商量仔細看來成話墮成話墮轉請訛拍禪床云武林春已老臺榭緣陰多

浴佛上堂舉香嚴和尚云去年貧未是貧今年貧始是貧去年貧猶有卓錫之地今年貧錫也無衆中忽有箇漢出來問長老錯了也今朝四月八是佛生日如何舉此公案山僧只對道住持事繁下座

妙峯瑗禪師浴佛上堂今朝是如來降生之節天下緇流莫不以香湯灌沐共報洪恩爲甚麼教中却道如來者無所從來既是無所從來不知降生底是誰試請道看若道得其恩自報若道不得明年四月八

還是驚頭澆

天童覺禪師浴佛上堂。今日是釋迦老子降誕之辰。長蘆不解說禪。與諸人畫箇樣子。祇如在摩耶胎時。作麼生以拂子畫此。○相曰。祇如以清淨水浴金色身時。又作麼生復畫此。○相曰。祇如周行七步。目顧四方。指天指地。成道說法。神通變化。智慧辯才。四十九年。三百餘會。說青道黃。指東畫西。入涅槃時。又作麼生。乃畫此。○相復曰。若是具眼衲僧。必也相許。其或未然。一一歷過始得。

應庵華禪師浴佛上堂。德山拆卸佛殿雲門一棒打殺。麻三斤。殿裏杖林山下竹筋鞭。三遭痛棒。九到洞山。若作佛法商量。爛却舌頭。不作佛法商量。墮坑落塹。到者裏黑漆拄杖。有屈無叫。處古廟香爐。雖冷燒殺闍黎。正恁麼時。如何。武陵春已老。臺榭綠陰多。浴佛上堂。始從鹿野苑。終至跋提河。用盡自己心。笑破他人口。至於拈花付囑。達磨安心。南北分宗。曹溪列派。向衲僧門下。正如掘地覓天。以拂子劃一劃云。正當今日。是我如來大師慶誕之辰。天下叢林一年。

一度謂之浴佛。若喚作浴佛。喫棒有分。若不喚作浴佛。辜恩負義。豈不見遵布衲浴佛次。藥山遂問。汝只浴得者箇。要且浴那箇。不得布衲云。把將那箇來。藥山便休去。師云。遵布衲當時。若是箇漢。待他道浴那箇。不得使拈杓子劈面擲。雖然也不得屈藥山。何故不入虎穴。爭得虎子。

佛生日上堂。鐵壁鐵壁。從來真實。號之曰佛。常在苦海中立。風吹不入。水灑不濕。棒打不入。是故以本願力。撈攬衆生。不息雲門。忍俊不禁。打與狗喫。此意深寂。非語默可及。四月八日是渠誕。迹露柱燒香湯已畢。大家送至龕室。泥人揩背。一拶骨出。忽然怒發。打瞎頂門眼。一隻直至而今。叫屈屈屈。屈屈堪述。休相憶。清風匝地。有何極咄咄。

焦山體禪師浴佛上堂。年年浴佛。在今朝。目擊迦維路。不遙果是當時。曾示現。宜乎惡水驚頭澆。

雪巖欽禪師浴佛上堂。四月八生。悉達九龍吐水。浴金軀。雲門一棒要打殺。是大神呪。是大明呪。是無上呪。汝等諸人。還見黃面老子麼。以拄杖一時打散。

佛生上堂。一棒打不殺。千古阿剌刺。是阿誰。子名悉達。更問如何。吟四月八。

佛生。日上堂。東行西行。指天指地。盡謂如來降生。我道魔王出世。一棒打殺。貴圖太平。時當孟夏。麥綠桑青。

浴佛上堂。無憂樹下。右脇誕生。已是造妖捏怪。那堪七步周行。雲門一棒打殺。未爲剿絕。看來只好活埋。解脫無底。淨坑依前。日午三更。

佛生上堂。九龍吐水。七步周行。雲門一棒打殺。正是摩頂授記。葛藤枝蔓。重生擲拂子。云從教偏地。縱橫佛生上堂。指天指地。點胃點肋。將謂六識未具。初生孩兒。元來通身是膽。白拈正賊。雲門老師道。一棒打殺。餓狗不妨奇特。

高峰妙禪師浴佛上堂。舉世尊初生。話乃云。見怪不怪。其怪自壞。大眾會麼。更聽一頌。指天指地。展戈矛。直至如今。戰不休。假使群靈都殺盡。一身還有一身愁。

佛誕上堂。指天指地。一棒打殺。鳩屎砒霜。合造毒藥。

颺在三千世界中。不知那箇親遺著。卓拄杖一下。佛誕上堂。呱聲未絕。便稱尊。攪得三千海嶽昏惡水。一年澆一度。知他雪屈是酬恩。

中峯本禪師浴佛日示衆。大眾盡十方世界。是無憂樹。悉達太子。卽今下生。一手指天。一手指地。諸人還見麼。乃云。天上天下。惟我獨尊。還聞麼。如其不見。不聞。本上座贏得熱瞞諸人去也。碧芙蕖。紅芍藥。結成越樣花。亭黑斑豆。赤沙糖。煎就異常香。水鼠尾。巴短長。一尊佛。相牛眼睛。大小一柄杓。頭普請諸人。同時灌沐。喚作報德。有德皆報。喚作酬恩。無恩不酬。然報德酬恩。且置之不問。只如二千年外。九龍吐水。所浴底。與今日衆手所澆底。是同是別。若道同。孤負釋迦。若道別。孤負自己。且釋迦老子。黃金面具。生鐵心肝。他管你孤負不孤負。但是爾自己。等閒孤負。則未免虛生浪死。極未來際。安有解脫之期。爲諸人者。一念子。不能警地。帶累者。老漢捨兜率降王宮。入母胎。示人世造妖捏怪。大抹高揮。曲盡化儀。老婆心切。豈謂諸人逗到今日。轉增迷倒。沈酣憎愛。結縛死生。孤負



萬端不可枚舉。你還知三根椽七尺單一鉢香炊九條田服盡是者。老漢積劫累世。指天指地中流出。更不肯奮起一片決定不退轉正志。翻身跳上破蒲團。猛提起箇無滋味話。一踏到底。豈更有別方便耶。今日者箇浴佛之杓柄。卽是出生死險道之梯航。斬輪轉根株之劍刃。豈戲劇哉。況是寶爐散薈。雲蠟炬吐優曇之穗。梵音宣而雷動。森羅萬象共證圓聞。禪影移而雨傾。塵刹十方同躋正覺。所以云未離兜率已降王宮。未出母胎。度人已畢。直下安有一毫剩法。與人爲知。爲解。涉見涉聞。雖然。只如四月初八日。已前還有者箇消息也。無不因別足曾三獻。那得連城價倍高。

千巖長禪師浴佛上堂。摩耶今日產嬰孩。剛道天宮降下來。不是鷄窠生鳳卵。分明象子出驢胎。無明果向空中結。三毒華從火裏開。堪歎禍根深不拔。叢林一歲一番災。

北磬簡禪師浴佛上堂。一聲哇地便吒哩。突出如斯大闢提。此土西天起殃害。堂堂洗土不成泥。

佛誕上堂。汲井花水。煮薔薇露。清淨法身。遭沾汚。良久云。活戾世界一年一度。

無用寬禪師浴佛上堂。無用震威一喝。驚得虛空迸裂。雲門大師脚短一棒。打伊不殺太湖。今日報恩一杓惡水澆潑。喝一喝云。下座去。大殿裏。諷經浴佛。佛誕日上堂。周行七步。弄精魂。殺活行藏。手眼親末法兒孫。重檢點。毗藍園裏百花新。大衆見麼。天上天下。惟我獨尊。空費梁山水一盃。擲拄杖下座。

古林茂禪師佛誕日上堂。釋迦老子曠大劫來。未嘗入滅。四月八日。何曾降生。若謂周行七步。目顧四方。指地指天。作獅子吼。正是謾你諸人。豈不見遵布衲在藥山浴佛。次山云。汝只浴得者箇。不浴得那箇。衲云。把將那箇來。山便休去。藥山鉤頭有餌。不妨擲去。拋來遵布衲脚下。泥深未免東撐西拄。檢點將來。一人浴得者箇。不浴得那箇。一人浴得那箇。不浴得者箇。澹湖卽不然。者箇那箇。總與一杓惡水。何故功不浪施。

元叟端禪師浴佛上堂。雲門當時一棒中峯。今朝一



杓只此報德酬恩一任諸方貶剝下座

佛誕上堂。學應庵和尚頌云。草本無端拈出來。更加註脚放癡。默西天此土誰知。已夜半優曇火裏。開師云。應庵與麼道。大似看錮鏑著生鐵山僧。別資一路。要與黃面老子相見。寶覺真空。無是非。是悲願弘深。上下分指七十九年中。妖怪從茲起。瞎眼波斯滿大唐。槽袋亂呈知幾幾。

佛誕上堂。黃面老子初生下時。一手指天。一手指地。周行七步。目顧四方。云。天上天下。惟我獨尊。與麼說話。如將金輪寶位。直授凡庸。其奈土曠人稀。相逢者少。雲門云。我當時若見一棒打殺與狗子喫。却貴圖天下太平。因風吹火。雪竇云。徐行踏斷流水聲。縱觀寫出飛禽跡。畫虎成狸。山僧恁麼抑揚。意在於何。珊瑚枕上兩行淚。半是思君半恨君。

楚石琦禪師浴佛上堂。一手指天。已在言前。一手指地。莫教錯會。天上天下。可知禮也。惟我獨尊。口是禍門。正當恁麼時。如何委悉。拈拄杖。千古長如白練飛。一條界破青山色。

浴佛上堂。今日如來降誕之日。灌沐金軀之時。爲復是有塵濯沐。爲復是無塵濯沐。若道有塵濯沐。與如來敵體相違。若道無塵濯沐。早是塗污了也。畢竟如何。可惜一盆湯。

浴佛上堂。未有世界。早有此性。世界壞時。此性不壞。出世不出世。成佛不成佛。總是閒言語。淨法界身本無出沒。大悲願力。示現受生。恁麼說話。正是俗氣不除。且道。喚作釋迦老子。不喚作釋迦老子。一舉四十九。

恕中愍禪師佛誕上堂。明珠在掌。隨衆色以分輝。寶月當空。逐千江而現影。拈拄杖。釋迦老子生也。九龍吐水。沐金軀。地涌金蓮。捧雙足。眼有瞳人底。謂我誑嚇。閻闔皮下。無血底。謂我將蝦釣鼈。卓拄杖。觀音買胡餅。笑倒金剛神。

呆庵莊禪師佛誕上堂。瞿曇降誕。是斯辰脫。賺古今多少人。恨殺雲門棒頭短。虛空迸作一條痕。浴佛上堂。舉藥山浴佛話。師云。藥山能縱不能奪。蓮布衲能奪不能縱。總未具超宗眼。在黃龍南禪師云。

二尊宿一出。一入未見輪贏三十年後不得錯舉。早  
是錯下名言。徑山見處也要諸人共知。今日殿中普  
請浴佛者。箇那箇不得動著杓柄到手更莫顛顚。擊  
拂子。將此深心奉塵刹。是則名為報佛恩。

鐵關樞禪師。佛誕上堂。毗藍園降生八十種隨好行  
作象王行。吼作獅子吼。拈拄杖雲門大師來也。卓拄  
杖云。阿爺阿爺。

愚庵及禪師。佛誕上堂。良久云。釋迦老子生也。蝦蟆  
蚯蚓同證法身。露柱燈籠共相慶賀。雲門大師道我  
當時若見一棒打殺與狗子喫。成人者少。敗人者多。  
擊拂子下座。

佛誕上堂。身口意清淨。是名佛出世。身口意不淨。是  
名佛滅度。三文錢娶箇黑老婆頭。不梳面不洗。知他  
是凡是聖。

月江印禪師。浴佛上堂。若人欲識佛境界。當淨其意。  
如虛空遠離妄想及諸趣令心所向。皆無礙諸禪德。  
拈起杓子。便被杓子礙。浴得者箇。浴不得那箇。便被  
那箇礙。浴得那箇。浴不得者箇。便被者箇礙。作麼生。

得所向皆無礙。去向悉達。太子未入母胎以前。道將  
一句來。

浴佛上堂。天上天下無如佛。十方世界亦無比。世間  
所有我盡見。一切無有如佛者。此是釋迦世尊。翹足  
三七日。贊弗底沙。佛偈超過彌勒九十一劫。檢點將  
來。好不丈夫。只今莫有超釋迦越彌勒者麼。設有也  
好。與三十棒。回向畢。復云。兜率宮中閒不樂。却來生  
此苦婆娑。指天指地成何事。添得叢林攪鬧多。備備  
侗。婆婆婆。和和千年無影樹。今時沒底靴。

南石琇禪師。佛誕上堂。東山五祖演禪師。因曾問云。  
如何是諸佛出身處。五祖云。東山水上行。圓悟和尚  
云。天寧則不然。如何是諸佛出身處。薰風自南來。殿  
閣生微涼。妙喜老祖聞得。當下豁然大悟。五祖圓悟  
恁麼提持。鄭州出曹門。妙喜悟去。眞州望長蘆。徑山  
見處也要諸人共知。諸佛出身處。渾不用思惟。早晨  
喫白粥。如今肚又饑。

佛誕上堂。未出母胎。天左旋地右轉。已出母胎。天左  
旋地右轉。僧問德山密禪師云。佛未出世時。如何山

云河裏盡是木頭船。僧云出世後如何。山云者頭踏著那頭。掀良久相逢說盡平生話。依舊心肝不帶來了庵。欲禪師浴佛上堂。大眾還見釋迦老子麼。未離兜率滿面塵埃。既出母胎。通身泥土。饒你山河大地草木叢林。盡爲衲僧一一衲僧有無量杓一一杓中有無量香水。海直從今日洗至窮劫。還得淨潔也無者裏眼親手便倒轉杓頭。便見垢相。永離十方清淨。其或未然。釋迦老子有沒量罪過。山僧有沒量罪過。不干諸人事。下座。

浴佛上堂。釋迦老子未離兜率。已降王宮。好與三十棒。未出母胎。度人已畢。好與三十棒。本覺與麼判斷也好。與三十棒。釋迦老子過處。本覺固自知之本覺。過處諸人還知麼。良久拍禪床云。攜取詩書歸舊隱。野花啼鳥一般春。

笑隱訢禪師浴佛上堂。今朝四月八日。天下叢林悉皆浴佛。只如無邊身菩薩。以竹杖量世尊頂丈六了。又丈六量梵至天。不見世尊頂。相正與麼時。且作麼生浴。直得長干塔踣跳上。非非想天撞倒。百億須彌。

山掀翻無邊香水海。杜順和尚歡喜踊躍說偈讚歎。懷州牛叟不益州馬腹。服天下覓醫人。灸猪左膊上。釋迦老子被他驚頭一杓。隱身無地。諸人隨例浴佛。則不無。且道杓柄長多少。喝一喝。

天真則禪師浴佛上堂。佛具清淨法身。因甚年年四月八日。將水灌沐諸人。若向者裏透得。本來與佛同生。亦能作獅子吼。其或未然。莫怪海門泄漏。且道作麼生泄漏。天上天下惟我獨尊。

法舟濟禪師四月八日示衆。舉藥山浴佛公案。師云。兩箇老漢開浩浩者。箇箇分別不少。山僧卽不然。待他道把將那箇來。便與驚頭一杓。管教他布衲渾身是水。永劫不乾。是事且置。只如教中道。如來法身淨若虛空。汝等諸人一杓兩杓。擬向甚麼處下手。若有下手處。不妨舉起杓頭。若也不堪下手。莫道一杓兩杓一滴也。無著處。舉杓云。且道者一杓向什麼處下手。便浴佛云。智水湛然滿浴。此無垢人。玉芝聚禪師浴佛上堂。欲知佛性義當觀時節。因緣只如孟夏漸熱。自釋迦老子降生。以至今日。無絲毫。

變異之相時節既無變異。當知巍巍相好亦無絲毫變異。無端向四十九年說心說性說頓說漸。致令後代兒孫。啐啄不丈夫者。總被惡水澆却。卽今狹路相逢。不妨衆等也。各各與他一杓不見道。得人一牛還人一馬。捨身與受身。誰是報恩者。擊拂下座。

密雲悟禪師四月八日上堂。呪聲一發。獨稱尊引得兒孫惡水淋。不是與人難共聚。大端細素要分明。便下座。

筓庵問禪師佛誕日。解制上堂。師拈杖云。釋迦老子生也。卓拄杖云。切忌動著。錯且。直是釋迦老子錯。是山僧錯。是諸人錯。辨驗得者。箇錯字出與你草鞋一緇。其或未然。且聽拄杖子爲諸人判斷。九龍吐水。右脇降生。豈不是釋迦老子。周行七步。目顧四方。豈不是釋迦老子。天上天下。唯我獨尊。豈不是釋迦老子。卽今在什麼處。若道不是釋迦老子。釋迦老子又在什麼處。卓拄杖云。風送野雲歸碧洞。月垂滄海作明珠。復卓拄杖下座。

佛誕上堂。一手指天一手指地。明如日。黑似漆。周行

七步。目顧四方。軟如鐵。硬如泥。天上天下。惟我獨尊。幸自可憐。主因甚雲門。却要一棒打殺與狗子喫。家肥生孝子。國霸有謀臣。

佛誕上堂。入山不避虎兇。入水不畏蛟龍。人天衆前。不怕天下人檢責。非爲分外。莫有恁麼人。麼便請出來。當場決戰。佛未出世。人人鼻孔遼天。出世後。因甚杳無消息。此是古今辨龍蛇。鍛凡聖。別邪正。析縈素底大關鍵。透過底恁麼也。不得不恁麼也。得恁麼不恁麼。總得透不過底恁麼也。不得不恁麼也。不得恁麼不恁麼。總不得。所以學道須是鐵漢。著手心頭。便判直趣無上菩提。一切是非。莫管。說一切是非。莫管也。不管是凡是聖。不管是佛是魔。不管是古是今。不管他是彼。是此。橫趨直入。不顧危亡。奮勇爭先。連帶便用。不妨有時示凡示聖。有時現佛現魔。有時舉古舉今。有時分彼分此。要且聖凡籠罩。他不住。佛魔繫縛。他不著。古今度量。他不出。彼此安置。他不得。然後頭頭應用。左右逢源。一任喚他是凡也。得是聖也。得是佛也。得是魔也。得是古也。得是今也。得是彼也。得是此也。

也得偏塵偏利得妙隨流事是過量事人須過量人。若是過量人自知過量事今日釋迦老子降誕之辰。山僧雖則出他一頭地也不敢埋沒者老子一些子。你看者老子纔出母腹開張大口一手指天一手指地周行七步目顧四方天上天下惟我獨尊若也親見者老子面目臨濟三玄三要也在裏許洞山五位君臣也在裏許雲門一鏃三關也在裏許馮仰九十六圓相也在裏許法眼心外無法也在裏許既一總在裏許跛脚阿師因甚要一棒打殺與狗子喫驚拈拄杖當爐不避火迸當言不避截舌祖禪殃及兒孫那怕銅頭鐵額放行也瓦礫生輝把住也黃金失色者條棒今日落在山僧手裏且要一擔擔却卓拄杖鐵牛對對黃金角木馬雙雙白玉蹄拈得一枝無孔笛逆風吹又順風吹復卓拄杖下座

玉林琇禪師佛誕度僧上堂師云報恩新長老今年纔廿四黃面老瞿曇是吾最小子古往今來多少屈曲柔床的大善知識凡於四月八日播弄瞿曇小老的矢臭氣則有分還曾夢見瞿曇的師麼若向者裏

緇素得不論剃髮不剃髮不虛親到報恩若者裏緇素不得直饒新報恩親手爲他剗草也未免對面白雲千萬里驚喝一喝下座

佛誕上堂有一人佛之一字素不樂聞念佛一聲嗽口三日有一人見佛歡喜禮拜讚歎種種供養一人恁麼一人不恁麼同到報恩來且道留那一箇卽是有般漢便道功德天黑暗女有智主人二俱不受是者般的正好捉來朝打三千暮打八百何故大海若不納百川應倒流

山茨際禪師佛誕示衆舉世尊初生話畢師云古今尊宿盡道雲門此語奇特謂是將此身心奉塵刹是則名爲報佛恩若據東明今日簡點將來大小雲門只具一隻眼何故只管瞻前不管照後東明今日早五更起來燒一炷香獻一杯水連稱釋迦如來三聲復大展坐具九拜且不是應時及節亦非報德酬恩具擇法眼者試爲我緇素看

朝宗忍禪師浴佛上堂彌陀寺裏釋迦誕生僧俗堅請注座高陞諸佛菩薩一齊稽首穢土淨土一道均



平所以周行七步而目顧指天指地以稱尊如來出世不爲別事。虛空大地更無別人大衆議取鉤頭意。莫認定盤星。自古真金不博金。那堪屈己以從人。卽今便好猛提。取莫待須臾水淺身下座。

弘覺恣禪師。佛誕上堂。世尊初生。草本不勞拈出一手指天。一手指地。賣弄小孩兒。周行七步。脚跟未點地。在目顧四方。望空啓告。天上天下。惟我獨尊。因供死款雲門一棒。打殺貪他香餌。著他鉤。天童恁麼判斷。雖則相席打令。猶是大嚼對屠門。然旣慶贊。因齋何妨。借花獻佛。乃召云。大衆。世尊初生。拈向一邊。祇如雲門一棒。且道打得他。殺打他不殺。若打得他。殺西天東土。瓦解冰消。豈有今朝與麼事。若打他不殺。山僧不免更下毒手去也。拽拄杖下座。一時打散。

#### 列祖提綱錄卷第四

#### 列祖提綱錄卷第五

武林十八澗理安禪寺住持婁東行悅集

#### 佛成道日提綱

雪巖欽禪師臘八上堂。黃面老子六載辛勤。尋得鼻孔打失眼睛。且道落在什麼處。雪山午夜一天星。佛成道上堂。道本無形。亦本無名。未聞其壞。安有其成。黃面漢不合造妖捏。恠指出夜半一星。帶累後代兒孫。盡是哺糟啜醢。彷彿佛。至今醉夢不醒。山僧拄杖子。未免爲諸人別開一隻眼。作金鷄報曉一聲。卓拄杖云。紅日升天。萬國明。

介石朋禪師。佛成道示衆。六載將身草裏埋。當時合眼。幾曾開果。然見得明星。現未到門庭。冷似灰。偃溪聞禪師。佛成道上堂。錯錯六載。草繩空自縛身。了開得眼來。天大曉。古今天地。古今日月。古今星辰。拍膝云。劍去久矣。切忌刻舟。

石屋珙禪師。臘八上堂。只在山中多少好。無端走入鬧籃來。衆生福薄。難調制。一點明星是禍胎。

臘八上堂。雪山高且深。忍凍吞麻。如此過六年。仍



然是快活無端。觀明星剛言成正覺。拂袖下山走也。是低一著。更云度衆生。重重露拴素。看他堂上。秀何似山中樂。錯錯年年有箇臘月八。

元叟端禪師臘八上堂。未到雪山。脚跟下好與三十。既到雪山。脚跟下好與三十夜半。見明星。脚跟下好與三十。更有三十山僧自喫。釋迦老子無分。何也有功者賞。

佛成道上堂。舉世尊於雪山。夜觀明星。豁然大悟。乃云。奇哉。一切衆生。具有如來智慧德相。但以妄想執著。不能證得。師云。老和尚一時錯認魚目。以爲明珠。直至如今。翻成話。欄靈鷲峰前。明星爛爛。與昔日雪山。略無少異。我此一衆。莫有豁然大悟者麼。良久云。家無白澤之圖。必無如是妖怪。

高峰妙禪師臘八上堂。黃面瞿曇。夜半成道。正是喚奴作郎。贏得一場好笑。山僧怎麼告報。也是細姑嫌嫂。

楚石琦禪師上堂。如來明星現時成道。你道半夜裏。瞋睡的。還見明星麼。

呆庵莊禪師上堂。舉世尊觀明星。公案師云。我要問釋迦老子。喚什麼作智慧德相。喚什麼作妄想執著。擬議不來。劈脊便棒。衆中還有與釋迦老子出氣者麼。拈拄杖。不敢望汝。與釋迦老子出氣。只是自己鼻孔摸索得著也好。靠拄杖。

愚庵及禪師佛成道上堂。舉趙州問南泉。如何是道。泉云。平常心是道。公案師云。王老師過犯彌天。將釋迦世尊六年雪山。千苦萬辛。所得無上大道。等閒花壁。殆盡合與二十拄杖。當時趙州眼光。燦破四天下。面被熱瞞。則且置。今日衆中。莫有爲世尊拔本底麼。如無隆教。不是爲他閒事。長無明。忝爲遺教。遠孫未免出隻手去也。拽拄杖下座。一時趕散。

恕中愍禪師臘八上堂。一明一切明。一了一切了。豁開總持門。諸法不相到。六年冷坐。舌上生芽。夜觀明星。眼中添翳。以手拍禪床左邊云。釋迦老子。過者邊著。就中若有識機。宜別休咎。底必然別有生涯。下座上堂。光透日月。明暗不收。智出聖凡。賢愚不立。雪山深處。夜觀明星。豁爾大悟。螢火之光也。敢問未悟以

前向什麼處。踏坐既悟已後。又向什麼處出頭。通方作者。試出道看。良久云。休休。看看白却少年頭。填溝塞壑。無人會雲。自高飛。水自流。

無用寬禪師。佛成道上堂。六年雪山錯。忽見明星錯。走下山來錯。錯錯假使九州之鐵也。難鑄此一錯。卓拄杖一下云。大地含靈同成正覺下座。

中峯本禪師。示衆玄玄絕待妙妙。無依獨露。眞常全彰。全體名不得。狀不得。雪老冰枯。理無礙事。無礙天荒地迥。萬里雲收。午夜四方星燦。長空揭開。威音那畔。腦門間陀陀光燦。燦燦擲擲。體背後眼孔淨。保保赤條條。勒回三萬劫。風飛雷厲之神機。突出五千軸。海涌雲屯之寐話。大衆釋迦老子來也。卽今在諸人眼睛裏。仰見明星頂額上。戒等正覺你諸人還覺眉毛動也。無如其未委。各請歸堂。

唯庵然禪師。臘八上堂。明星一見出山來。剛道娘生已眼開。不是觸體乾得徹。爭知春色上桃腮。用彰俊禪師。臘八上堂。晝見日夜見星。大地衆生阿誰不曉釋迦老子。捏目生花。剛道於中有箇悟處。二

十一日杜口不言。幸自可憐生。四十九載脫空謾語。著甚死急。噯一聲下座。

了庵欲禪師。臘八上堂。日日佛誕生。日日佛成道。空裏無花折去。雞水中有月看來。好賣狗懸羊一體三寶。垢面蓬頭。輟出時何異大蟲裏紙帽咄。

臘八上堂。萬法是心光。諸緣惟性曉。本無迷悟人。只要今日了。咄哉老瞿曇。討甚閒煩惱。出山與入山。自起還自倒。夜來斗轉玉繩橫。不覺全身墮荒草。喝。

臘八上堂。二千年前正覺山。前明星現時釋迦。世尊戒等正覺。二千年後本覺山。中明星現時我此一衆。成箇什麼。喝。一喝覺卽了。不施功。定慧圓明不滯空。東澗水流西澗水。南山燒炭北山紅。

臘八上堂。深山巖崖有什佛法。冷坐六年。全無合機。豁開正眼。定乾坤。十方世界。阿刺刺。喝。一喝箭穿紅日影。誰是射鵰人。

臘八上堂。老胡三更失却牛。天明起來拾得馬。從茲要騎卽便騎。到處要下卽便下。佛殿上蟬吻忍俊不禁。肆口說禪。不覺觸著山門頭。金剛惡殺把耐重子。

一擲撞倒金香爐。下鐵崑崙。踏翻鴛鴦湖。不留涓滴。却向山僧拂子頭上。慶讚云。佛道懸曠。久受勤苦。乃可得成。喝云。被山僧一喝。直得懣懣懣。懣依位而立。下座。

臘八上堂。正覺山前明星現。時釋迦世尊與大地衆生。一時成佛。祖師門下。蹉口道著。佛字嗽口三日。先行不到。末後太過。各與二十拄杖。忽有一箇不顧危亡底。漢出來道。本覺與人判斷也。合喫二十拄杖。山僧却須分付明窓下。安排何故。佛滅二千年。比丘少慚愧。

臘八上堂。雪嶺六年弄巧成拙。出得身來。天寬地濶。好事大家知。今朝臘月八。

月江印禪師上堂。我觀大地衆生。具有如來智慧德相。皆以妄想執著。而不證得。釋迦老子與麼道。大似蠅螟蟲向蚊子眼睛上。作窠向十字街頭叫道。土曠人稀。相逢者少。檢點將來。也是唾酒糟漢。

上堂。二千年前臘月八。黃面瞿曇雙眼活。阿僧祇劫喫鹽多。苦行六年添得渴。凍不殺餓不殺。腳頭脚底。

去聲云

乾坤濶

佛朗性禪師上堂。煩惱頓息。名爲佛智。三界無法。故曰受記。汝亦如是。吾亦如是。復高聲云。釋迦老子出山來也。便下座。

天真則禪師上堂。晝見日夜見。星登舟。疑岸動。捏目便花生。瞿曇昔年到而不點。則上座今日點而不到。諸人還夢見明星麼。以拂子打圓相。喝一喝。

筈庵問禪師。佛成道上堂。釋迦老子成道。天下叢林。恰好有飯。開口便噉。有眼。伸手便要。大家一飽。膨脝奉願。施主年年到者。一日不要忘了。旁不甘底。便去。長老太無厭。生山僧道得人。一牛還人一馬。你也莫錯會。好拍手笑云。等是共行山下路。嶺頭各自看風煙。擲拄杖云。明星現也。添桶歸堂去。

佛成道。解制上堂。太陽溢目。萬里不挂片雲。懸盡間浮脚跟。何曾動轉。塵塵三昧。只在毫端。點著。便知毋勞。露布伶俐。漢向生佛已前。薦得明。如果日湛。若太虛千眼洞開。一機頓現。結也布漫天網。打衝浪鯨鯢。解也展萬里程。縱摩天俊鶻。溪山雖異。雲月是同。不。

妨竿木隨身到處逢場作戲。且左右逢源一句。莫有人道得麼。自從踏破毗盧頂。諸佛從教立下風。

佛成道上堂。日不待火而熱。月不待風而涼。佛不待悟而成道。不待修而證。山是山水。人是人物。是物是法。住法位世間。相常住。忽若形名未立。朕兆未彰。喚甚麼作山。喚甚麼作水。喚甚麼作人。喚甚麼作物。喚甚麼作迷。喚甚麼作悟。喚甚麼作衆生。喚甚麼作佛。若不知有。爭能知有。廓大千於方寸。挾了義於微芒。諸人知處。山僧不知。山僧知處。諸人不知。各不相知。各各不相借。且道釋迦老子。還有出頭分也。無正覺山前。明星現處。輝天鑑地。耀古騰今。甚生驚異。甚生奇特。豎拂子云。何似山僧拂子。緩緩地出來。道眼若不睡。諸夢自除。心若不異。萬法一如。黃金自有黃金價。汝丈夫。我丈夫。驀喝云。高著眼下座。臘八上堂。師云。千鈞之弩。不爲鼯鼠發機。萬里烏雞。豈爲盲龜驅馭。尺水能興一丈波。是人知有騎賊馬。捉賊快便難逢。打開寶藏。紫羅帳裏。撒珍珠。汝諸人欠少箇什麼。更說甚麼迷。說甚麼悟。說甚麼諸佛說。

甚麼衆生。古今日月古今山河。同一心知。同一聞見。既然如是。釋迦老子二千五百年前。向夜半明星現時。忽然打失眼睛。鼻孔。且道是悟不悟。者裏若沾他滴水。便見墮坑落塹。何故。大丈夫須是向他頂額上行。方堪爲他提轡。挈水方知者。老子未出母胎時。也在裏許。出母胎後。也在裏許。汝諸人。也在裏許。山僧也在裏許。且道拄杖子在裏許。不在裏許。驀卓拄杖云。庭前石筍抽條。也會見高枝宿鳳凰。

玉林琇禪師臘八上堂。周穆王三年癸未臘八。釋迦文佛觀見明星。豁然悟道。歎曰。奇哉。一切衆生。具有如來智慧德相。但以妄想執著。不能證得。崇禎十二年己卯臘八。玉林道人望見青山。不覺好笑。顧左右云。汝等各踏毗盧頂上行。誰能拈些子妄想智慧。誑謔山僧看拍案云。阿呵呵。好大哥上來也。恁麼散去也。恁麼今日行端行鎮。幾度有齋供養大衆。大家落堂喫了飽。勦勦地要行。便行。要坐。便坐下座。朝宗忍禪師臘八上堂。今朝正是臘月八。釋迦老子眼睛瞎。白日青天被鬼迷。夜對明星將眼刮。自家盲。

味已堪憐。引得群盲泥土撒。一年一度開闢闕盡。未  
來際難合。熟祇爲當年遺禍。根後來漆桶枝邊。掘山  
僧忍俊不自禁。謹對人天大衆。前以拂子擲下云。今  
爲汝等連根拔。且道拔斷後。有何消息。合掌云。我不  
敢輕於汝等。汝等皆當作佛。喝一喝。卓拄杖下座。

涅槃日提綱

雪巖欽禪師二月十五日上堂。若謂釋迦老子古已  
入滅。又道佛身充滿於法界。而常處此菩提座。若謂  
釋迦老子本不曾滅。面前觸目無非山河大地草木  
叢林。桃紅柳綠。燕語鶯吟。畢竟那箇是釋迦老子。憑  
召大衆衆回首。乃云。將謂瞌睡。

佛涅槃上堂。就謝月溪侍者。硯溪上人束布毛爲筆。  
借月溪爲硯。磨無煙墨。向虛空中大寫如來入般涅  
槃四字。正恁麼時。點畫既成。畢竟如何。定當卓拄杖  
云。將謂義之楷法。尤來張顛草書。

上堂。岸柳搖金。溪桃吐玉。波旬無端起舞。阿難平地  
悲哭。因甚如此。親見如來面目。

上堂。焚三昧火。自舉金棺。阿難悲惱。波旬喜歡。總是

如來清淨寂滅現前時節。若謂明日卽無。今日卽有。  
何必瞞人自瞞。直是令人大不甘。

上堂。不生不滅之性。溪桃映水。而紅岸柳和煙而綠。  
無去無來之相。雪瀑噴空。而下雲峰拔地。而高我佛。  
如來正大法眼。無量秘密寶藏。盡底打開。一時分付  
了也。只是道。今日則有。明日則無。未可容易註破。何  
也。長憶江南春雨後。夕陽影裏鷓鴣啼。

藏叟珍禪師。佛涅槃上堂。盡大地是紫磨金身。諸人  
終日開眼。覷見釋迦老子。心肝舉步。築著釋迦老子。  
鼻孔說有說無。是誑說。生說滅。是謗說。卽心非心。是  
妄不誑。不謗不妄。春風吹落桃李花。淡煙疎雨籠青  
嶂。

元叟端禪師上堂。拈拄杖。釋迦老子卽今在山僧拄  
杖頭上。放無量妙寶光明。出無量妙寶音聲。摩胸脅  
告大衆云。汝等諦觀吾紫磨金色之身。今日則有。明  
日則無。瞻仰取足。毋令後悔。諸人若也。諦信得及。拄  
杖子功不浪施脫。或未然。釋迦老子入涅槃久矣。擲  
下拄杖。



梢堂益禪師佛涅槃上堂擊拂一下。彰聖今日將三十年前冷灰中爆出烏荳。換老胡眼睛去也。喝一喝。云設有一法過於涅槃。我此一喝不作一喝用。

靈隱原禪師佛涅槃上堂涅槃生死等是空。花佛及衆生皆爲剩語。諸人到者裏作麼生會。良久拍禪床云。但見落花隨水去。不知流出洞中春。

湛堂深禪師佛涅槃上堂兜率降生雙林示滅。掘地討天。虚空釘橛四十九年。播土揚塵三百餘會。納盡敗闕。盡力布網。張羅未免。喚龜作鼈。末後拘尸城畔。擲示雙趺。旁人冷眼看來。大似弄巧成拙。卓拄杖云。若無者箇道理。千古之下。誰把口說。且道是甚麼道理。癡人面前切忌漏洩。

高峰妙禪師上堂周行七步。猶或跡。擲示雙趺。豈易收。微雨灑花千點淚。淡煙籠竹一堆愁。

無文璨禪師上堂諸行無常。是生滅法。生滅滅已。寂滅爲樂。釋迦老子死在者裏。至今二千餘年。未有能活之者。薦福雖是臂長袖短。試爲諸人活看。合掌云。容顏甚奇妙。光明照十方。

上堂今日則有明日。則無天。何高地。何極。謂吾滅度。謂吾不滅度。一箇死屍。許多狼籍。我觀靈山百萬大衆。惟波旬却有丈夫氣息。何故面赤不如語直。

石屋琪禪師佛涅槃上堂七十九年賣弄脫空。二月十五一場合殺。直饒藏得渾身。未免露出雙腳。百萬人天雲散。水流丈六金身。煙消火滅。迦葉自歸。鷄足山魔王嫉妬心。方歇。諸仁者要見釋迦老子麼。卓拄杖一下云。遍地春風。桃李花紅。若白紅白者白。

正堂辯禪師上堂花開隴上。柳綻堤邊。黃鶯調。夜之琴芳草入謝公之句。何必聞聲悟道。見色明心。非唯水上覓漚。已是眼中著屑。壁開胸曰。汝等當觀吾紫磨金色之身。今日則有明日。則無。大似無風起浪。全不知羞。且道今日事作麼生好。箇迷達達磨。不知誰解承當。

用彰俊禪師上堂古德道涅槃後有大人相。釋迦老子涅槃了也。大人相在什麼處。以拂子打圓相。還見麼。容顏甚奇妙。光明照十方。我昔曾供養。今復還親觀。



上堂形影一生苦樂隨至形影一滅苦樂何有靈山六年坐堆堆地是苦四十九年口吧吧地是苦摩胸告衆櫛示雙趺是苦且道如何是樂老瞿曇燒作一堆灰了也諸人還知麼喝一喝

月江印禪師上堂舉唐順宗問佛光滿禪師云佛從何方來滅向何方去既言常在世佛今在何處答云佛從無爲來滅向無爲去法身等虚空常在無心處帝大悅師云法身廣大等虚空生滅何須較異同夾路桃花風雨後馬蹄何處避殘紅

上堂釋迦老子四十九年三百餘會大似幻師幻出山河大地草木叢林城邑聚落人畜草芥皆與實相不相違背末後還作幻虎還食幻師幻師既滅諸幻隨滅諸幻既滅幻滅亦滅良久拍禪床云雙林樹下少人行多子塔前開如市

楚石琦禪師上堂摩訶示衆云要見釋迦老子向者裏識取汝等善觀吾紫磨金色之身今日則有明日則無看者野狐精縮頭去過去諸佛亦如是現在諸佛亦如是未來諸佛亦如是卓拄杖云如是如是又

卓一下云不是不是下座

上堂二月十五中春節紅花白花相間發金棺不獨示雙趺花裏靈禽更饒舌說箇什麼喝一喝

上堂末法比丘有三種執一人云如來決定在娑羅雙樹間入般涅槃執此爲實累他釋迦老子死了活不得一人云常在靈鷲山及餘諸住處執此爲實累他釋迦老子活了死不得一人云一切法不生一切法不滅若能如是解諸佛常現前活的釋迦老子便是死的釋迦老子死的釋迦老子便是活的釋迦老子執此爲實正是大病世醫拱手總不與麼時什麼處與釋迦老子相見風煖鳥聲碎日高花影重

呆庵莊禪師上堂舉世尊摩胸告衆公案師云瞿曇末上一場敗闕百萬億衆中更無一人有衲僧氣息諸人還見世尊以手摩胸麼水向石邊流出冷風從花裏過來香下座

恕中愍禪師上堂今朝二月十五令人做壽腸肚疎山手中木蛇咬殺南山猛虎翻身觸破虚空好手應難修補搥胸只合哭蒼天發機須是千鈞弩拍禪床

上堂。古者道涅槃。心易曉。差別智難明。與麼說話。勞而無功。世尊涅槃會上。以手摩胸告衆云。汝等善觀吾紫磨金色之身。今日則有明日。則無瞻仰。取足毋令後悔。有甚差別。耶。雲門大師拈起扇子云。扇子踣跳上三十三天。築著帝釋鼻。孔東海鯉魚打一棒。雨似盆傾。有甚差別。耶。以拂子畫一畫云。人貧智短。馬瘦毛長。須知還煙浪。別有好商量。

了庵欲禪師上堂十五日以前。諸佛不出世。十五日以後亦無有涅槃。正當十五日。柳綠花紅。山明水碧。頭頭見劫外風光。處處是大人境界。只貴當陽坐斷。直下知歸。稍涉思惟。便成剎法。拍禪床云。降牆難隔。借來竹險。浪不傾。端坐船。

上堂。如來不出世。亦無有涅槃。以本大願力示現。自在法拈拄杖。不是大願力。卓拄杖。不是自在。法舉起也。千身彌勒放下也。隨處釋迦。只爲諸人。眨上眉毛。却入娑羅雙樹間去也。靠拄杖。見之不取。千載難忘。愚庵及禪師上堂。衆生畢竟無生死。諸佛何曾有涅槃。一把柳絲收不得。和煙搭在玉欄干。

●熱羅熱

南石琇禪師上堂。釋迦老子從兜率天上。託生大術胎中。早是染却生死重病。及乎降生。便乃一手指天。一手指地。可見攢簇不得。底迨見明星出現。豁然悟道。正是病眼見空花。四十九年三百餘會。廣說略說。直說曲說。顯說密說。豈非熱睡饒譚語。至於臨末。稍頭摩胸告衆云。善觀吾紫磨金色之身。瞻仰取足。毋令後悔。若謂我滅度。非我弟子。若謂我不滅度。亦非我弟子。病入膏肓。莫能療治。非但世醫拱手。便是耆婆神醫。只得倒退三舍。北山遠孫今日却要爲他療治。若療治不得。後代兒孫永失恃怙。若療治得。便見紫磨金色之身。巍巍堂堂。煒煒煌煌。觸處顯現。擊拂子。柳色黃金嫩。梨花白雪香。

上堂。不厭生死。不求涅槃。古廟香爐去一條白練去。熱瞞海內參玄士。笑倒階前石敢當。

鐵關樞禪師上堂。說無說有。覆水難收。露足露胸。脚忙手亂。三千界內。百億刹中。黃面瞿曇。通身紅爛。是汝諸人扶持得起麼。喝一喝。

笑隱訢禪師上堂。身口意清淨。是名佛出世。身口意

不淨是名佛滅度。拈拄杖云。且道。卽今釋迦老子。是出世耶。是滅度耶。卓拄杖云。同生不同死。有何用你金襴。示雙趺。放倒又扶起。

天真則禪師上堂。梨花恰紅。桃花恰白。老聃生釋迦滅。分明兩彩一賽。論甚各年同月。你道同我道。別切切。切雲門口過。憑誰雪。良久喝一喝。

無趣空禪師。佛涅槃。示衆釋迦老漢。做了一生好漢。末後對衆寐。語若謂我滅度。非吾弟子。若謂吾不滅度。亦非吾弟子。汝等諸人。作麼生道得。一轉語便見。雙林樹上枯水生。枝敬畏庵前冰消瓦解。有僧出曰。和尚亦寐。語師側耳作聽勢。僧無對。師曰。者漆桶。

先期率衆財提綱

弘覺恣禪師涅槃。先期率衆財上堂云。何得長壽金剛不壞身。釋迦老子於塵點劫前。以無量大神通大願海。無邊方便智慧海。難思難說。出生功德諸波羅密海。成就紫磨金色之身。及至唱滅。雙林摩胸告衆。依舊今日。則有明日。則無。且作麼生定當。總爲戰爭。收拾得。却因歌舞破除休。

列祖提綱錄卷第五

列祖提綱錄卷第六

武林十八澗理安禪寺住持婁東行悅集

達磨忌拈香法語尊祖

千巖長禪師。初祖忌拈香九年。面壁坐斷天下人舌頭。隻履西歸。喪却自家窮性命。吾本來茲土。又喪不盡也。傳法救迷情。又坐不斷也。既坐不斷。喪不盡畢。竟作麼生。一花開五葉。結果自然成。

鐵關樞禪師。達磨忌拈香九年。面壁若些滯貨。發落不得。賣金不是。買金人斷臂安心。剛受屈。插香無端。揣出虛空骨。

楚石琦禪師。初祖忌拈香者。漢西來特地癡。默不立文字。虛張意氣。直指人心。轉見病深。見性成佛。翻成窠窟。靈山直是不甘他。牛糞燒香。狗屎茶。因甚如此。祇爲如此。報德酬恩。只者是。

愚庵及禪師。初祖忌拈香。對梁王廓然無聖。此地無金。二兩坐少林。九年面壁。俗人沽酒三升。無影樹花。敷五葉。無煙火焰。續千燈。太平本是將軍建。不許將軍見太平。

祖忌拈香。雙耳帶金環。兩眼如墨突。行脚不逢人。九年空面壁。破邪師六宗。異見亂世英雄傳。上乘一心之印。太平奸賊隻履翻。何處歸一花五葉成。狼藉顧左右云。淨智妙圓。體自空寂。

祖忌拈香。西來九年面壁。前無釋迦。後無彌勒。單單遺下履一隻。等閒賣弄。價重連城。奇特商量。分文不直。一番拈起。一番新。千古令人轉相憶。呈香云。休相憶。今朝十月初五日。

呆庵莊禪師祖忌拈香。來時缺兩齒。去時留一履。者箇老胡僧。孟浪絕倫比。乃喚云。者裏還有祖師麼。老僧與伊斯見。則箇以香置爐云。莫恠空疎。伏惟珍重。祖忌拈香。梁王殿上。將金博金。少室峰前。以楔出楔。葱嶺那邊。逢末雲誰知。弄巧翻成拙。

恕中愍禪師祖忌拈香。破六宗之邪見。傳上乘之妙法。日鑿一竅。七日而混沌死。插香云。無人知此意。令我憶南泉。

天目禮禪師祖忌達磨祖師從西天來。被流支打落當門板齒。直過東震旦中。尋討不見。諸人還委悉麼。

至今千載後。缺陷不關風。

了庵欲禪師祖忌拈香。碧眼胡尊性急。一語不投機。闔國追不及。少林面壁弄盡精神。只消斷臂。師僧三拜而立。伎倆既盡。心事亦休。隻履西歸。空棺示跡。後代兒孫。充滿中國。莫不向今日燒牛頭栴檀之香。具酥酪醍醐之食用。伸追遠用報恩德。正眼觀來。何異棒漏卮。以灌焦釜。而終莫能濕。所以開福比丘。蒸雲門胡餅。烹趙州臘茶。雖然禮貌。麤疎畢竟臭味相入。祖忌拈香。西天著不得。東土著不得。破六宗謾有多言。對梁王全無朕迹。坐久成勞。忽轉身。春風滿地。華狼藉。

月江印禪師祖忌拈香。跨水逢羊。歷魏遊梁。八九年冷坐。全無巴鼻。三五回中毒也。好恓惶。若謂是十萬里西來傳佛心。印無鼻孔。漢將什麼聞香。

南石琇禪師祖忌拈香者。箇老胡渾無面目。攪得支那天翻地覆。不立文字。分明曳尾靈龜。直指人心。蚤已畫蛇添足。年年此日。一爐香斷。絃須是鸞膠續。祖忌拈香。在西天曾挫異見王。到東土撞著梁武皇。

廓然無聖。大似秦時轆轤鑽九年面壁。正如喪車後藥囊雪中。覓得一箇。方始能破天荒。從此惡毒滋長。喚作五葉聯芳。北山忝爲末裔。不知滿面慙惶。一甌山茗。一爐香。家醜重重。又外揚。

祖忌拈香。達大道兮。過量通佛心。分度不與凡聖同。纏超然名之曰祖。只如大光和尙。具甚麼見。却道不是。祖甜瓜徹蒂。甜苦瓠連根。苦。

笑隱訢禪師。祖忌拈香。八百年前。向者裏落節。却贏得一著。八百年後。向者裏拔本。却輸了一著。且道是那。一著。一任天下衲僧。貶剝。

祖忌拈香。東土西乾。無授受。一華五葉。自芬披兒孫。豈敢超宗祖。只要家風似舊時。顧衆云。達磨大師來也。大衆同伸三拜。

佛朗性禪師。祖忌拈香。今日示終。始活葬於熊耳。三年隻履歸。是你不是你。魏國宋雲。回葱嶺。相耳語。形神妙耶。法爾如是一花五葉。函蓋天地。從來沒意智。都在吾手裏。便拈香。

百丈忌拈香法語

佛朗性禪師。百丈祖忌拈香。再參馬大師。祖視繩床角。一喝不掩耳。鷺鷥騎白鶴。清規鑑得麼。夜來巡火鐸。

全室泐禪師。百丈忌拈香。豎拂挂拂。神出鬼沒。併却咽喉。捫空揣骨。五百生來。墮野狐。鬚鬚赤對赤。鬚鬚。

開山忌拈香法語

雪巖欽禪師。小釋迦祖師忌日。拈香。插鉢而立。去死十分拔鉢。便去弄鬼精魂。山鳥山花。笑殺人。慚惶炷此一爐薰。

松隱然禪師。開山和尙忌日。拈香云。巴陵三轉語。未足酬恩。楊岐作女人拜。深爲負德。然上座總不恁麼。何故。字經三寫。烏焉成馬。

恕中愍禪師。空照忌拈香。未見巖頭口似磑盤。既見巖頭眼如木突。本然理拄地。撐天何勞。置問主人。翁呼來喚去。猶欠惺惺。插香云。相逢不下馬。各自奔前程。

月江印禪師。大覺和尙忌拈香。代圓通應詔而起。爲九峰草疏而來。對使者焚却龍腦之鉢。創家堂如築。



黃金之臺。此是大覺老人平生受用不盡底三昧。雖相去二三百載。而聲光燁燁。猶百千之迅雷。稽首僧伽眞古佛。鄧峰千古碧崔嵬。

無文璨禪師。伏虎祖師。忌辰拈香。氣食萬牛。風生萬籟。有爪牙而不能藏。伏有文章而不能韜晦。若到薦福門下。伏聽處分。未爲分外。何故樹上安身法。他未夢見在。

### 開山忌提綱

大慧杲禪師開山忌日上堂。今日一會是當山國一大覺祖師爲諸人向一切處轉無上法輪。全提底時節。直得大地六種十八相震動。出大音聲。諸天音樂不鼓自鳴。梵唄詠歌自然敷奏。諸天寶華同時而雨。正當恁麼時。塵沙諸佛。諸大菩薩。諸阿羅漢。天龍八部。諸鬼神等。各從他方而來。集會咸生歡喜。踊躍稱慶。同時發聲而作是言。善哉。希有大覺祖師。快說此法。我等悉來共作證明。證明卽不無如何。是此法良久。云雲有出山勢水無沒潤聲。恕中愍禪師開山散忌上堂。法不孤起。仗境方生。今

日是開山空照祖師入般涅槃之辰。山僧將不可說不可說恒河沙世界作一筵席。百億須彌山作一碗飯。百億香水海作一碗羹。聊陳供養。正與麼時。且將此筵席向什麼處鋪設。若向世界上鋪設。既此世界已成筵席。豈世界外別有世界耶。若向虛空中鋪設。虛空無實相。又作麼生鋪設。若一向與麼休去。又是顛預佛性。籠伺眞如。衆中莫有出來措置者麼。如無老僧自出手去也。豎拂子。恒河沙世界百億須彌山。百億香水海。華簇簇。錦簇簇。總向拂子頭上鋪設。不寬不隘。無欠無餘。大衆且道。空照祖師還肯受此供養也。無受與不受。卽且置你。道他卽今在什麼處安身立命。擊拂子。家家門前赫日月。太平不用將軍威。天目禮禪師宏智禪師忌日上堂。夜明簾外寶鑑臺。前元無兼帶。豈有偏圓。正恁麼時。畢竟誰居正位。古渡無人霜月冷。蘆花風靜鷺鷥眠。

了庵欲禪師開山忌上堂。平地上死人無數過得荆棘林。是好手。今朝三月十五。正是夏前春後。饒你不住兩頭當處也。成窠臼。拈拄杖。卽今慧禪師向拄杖



頭上吹無孔笛鼓沒絃琴非唯曼玉鏤金直是移星  
換斗卓拄杖喝一喝

嗣法師忌拈香法語

楊岐會禪師爲慈明忌日設齋衆集至眞前以兩手  
握拳安頭上以坐具畫一畫打一圓相便燒香退身  
三步作女人拜首座云休捏恠曰首座作麼生座云  
和尚休捏恠岐曰兔子喫牛奶第二座近前打一圓  
相便燒香亦退身三步作女人拜楊岐近前作聽勢  
第二座擬議楊岐打一掌曰者漆桶也亂做

晦堂心禪師南和尚忌云昔人去時是今日今日依  
前人不來今既不來昔不往白雲流水空徘徊誰云  
秤尺平直中還有曲誰云物理齊種蘆還得粟可憐  
馳逐天下人六六元來三十六

正堂辯禪師佛眼和尚忌拈香龍門和尚闌提潦倒  
不信佛法滅除禪道拶破毗盧向上關貓兒洗面自  
道好一炷沈香爐上然換手提曾空懊惱遂搖手曰  
休懊惱以坐具搭肩上作女人拜曰莫恠下房媳婦  
觸忤大人好

大慧杲禪師圓悟和尚大祥拈香指眞云者箇川蘿  
苴自來好打鬪闊處便入頭惡靜而喜動前年今日  
始歸家今日前年路不差乃顧示大衆云作麼生是  
不差底路要會麼一回飲水一回噎一瓣栴檀一盃  
茶便燒香

圓悟和尚忌拈香者箇草慈平昔強項氣壓諸方逞  
過頭底顛頂用格外底籠侗自言我能以木櫨子換  
天下人眼睛殊不知被不孝之子將斷貫索穿却鼻  
孔鼻孔索頭既在徑山手裏要教伊生也由徑山要  
教伊死也由徑山且道以何爲驗遂燒香云以此爲  
驗

應庵華禪師虎丘和尚忌拈香平生沒興撞著者無  
意智老和尚做盡伎倆湊泊不得從此卸却干戈隨  
分著衣喫飯二十年來坐曲条木懸羊頭賣狗肉知  
他有甚憑據雖然一年一度燒香日千古令人悵轉  
深

谷隱顯禪師仰山和尚忌拈香仰面不見天低頭不  
見地不知大仰來不來一炷栴檀表勤意

笑隱禪師。佛智和尚忌拈香者一著子。不從人得。豈假師傳。雖是久從此老。且無絲毫交涉。二十年前。空手把鋤頭。步行騎水牛。二十年後人從橋上過。橋流水不流。休休鳳樓不在。梧桐樹一度西風。一度愁。佛朗性禪師。全室和尚忌拈香。惟先師最不可不會。禪深肯我如此活埋人。便好驚面唾。冷地思量著。合笑不合哭。大眾今日以何爲先師作忌師拈香。便拜全室和尚忌拈香。今日先師忌辰。還有相知者麼。不免對衆敷理。一上中竺徑山太虛釘櫬。兩住天界水中捉月。此土西天。波波不歇。戴角披毛。再出來大千世界。廣長舌便燒香。

呆庵莊禪師。芥室和尚忌拈香云。巴陵三轉語。大殺誇張。楊岐女人拜徒。勞賣弄徑山。今日蘇此枯木。不是供養先師。只要天下衲僧。知有些子氣息。遂拈香召大眾云。且道是甚氣息。衆無語。師哭云。蒼天蒼天。雪巖欽禪師。無準和尚忌拈香。巴陵三轉語。大仰一甌茶。有恩成怨恨。無事是讐家。杜鵑啼血染山花。無準和尚忌拈香。成龍者升天。成蛇者鼠草。將謂隨

一切性任其所適。誰知憤憤悱悱。却成煩惱。集雲峰高日杲杲。

無準和尚忌拈香。盡道先師今日死。誰知今日是生朝。不知却有何憑據。紫栢黃檀一處燒。

高峯妙禪師。雪巖和尚忌拈香。昔年瞎却我眼。今朝穿却你鼻。冤冤相報。無休莫若。克己復禮。遂拈香以袖掩面作哭聲。復以坐具搭左肩上。作女人拜云。非惟和光同塵。免得遞相鈍置。

雪巖和尚忌拈香。巴陵設忌三轉語。西峰單單只一句。那一句。雪遂拈香云。逢人切忌錯舉。

雪巖和尚忌拈香。阿師示寂來。彈指恰入載。將謂入黃泉。面目儼然在大衆。面目既在拈起香云。莫是者箇麼。拈香云。認著。依前猶隔海。

雪巖和尚忌拈香。咄哉老賊。偷心未息。石灰布袋到處成跡。若謂子爲父隱。畢竟曲不藏直。今日因齋慶讚。未免乘時拈出。

中峰本禪師。丹陽大同庵高峯和尚遠忌拈香。臘月初一日。老和尚遠忌。新建大同庵也要效年例。曇華

處處開狹路難回避。如是展家風。曾不離世諦。且如何是物外相看底句。年年燒此一爐香。白雲不在青山外。

石屋琪禪師及庵和尚忌日。拈香有來由。沒巴鼻。建陽山西峯寺蒲團頭拾得底。無眼無耳。無頭無尾。道是一塊兜樓。嗅著又無香氣。家醜不可外揚。明人不作暗事。

及庵和尚忌拈香。沒與相逢處。西峯與建陽。不平多少事。盡在一爐香。

愚庵及禪師寂照忌拈香。今朝八月初四日。一句明。明道不得。合國人追不再來。千古萬古空相憶。徑塢雲深。西湖水碧。蘇蒼松古柏。作桺檀牛首之香。擷蘊藻蘋。繫爲酥酪醒酬之食。聊旌遠諱。斯臨倍覺感懷。疇昔非關義重恩深。口貴眼橫鼻直。一度秋風。一度愁地。久天長有何極。

寂照忌拈香。巴陵酬雲門之恩。只憑三轉語。儉生不孝。楊岐爲慈明設齋。特作女人拜義。出豐年徑山。今日先師忌辰。直是無可施設。茗碗薰爐。聊伸供養。庶

表不忘諸人。且道不忘箇什麼。便燒香。

無文璨禪師笑翁和尚忌。併供養無準癡絕和尚。以香指云。玷辱無用。是者老漢。落賺薦福。是者老漢。諸人若也不信。問取徑山兩翁看。

南石琇禪師熙怡和尚忌拈香。碁盤石斫破。腦門黑。竹筴掀翻。途轍殃及天下。師僧何止楚淮閩浙。恁麼傳持。臨濟宗炎炎六月。飄霜雪。

熙怡和尚忌拈香。巴陵下三轉語。苦瓜不堪待。客楊岐作女人拜家醜。何須外揚。徑山者裏。總不與麼。爐香碗茗。雖清淡也。勝蒿湯備禮儀。

了庵欲禪師保寧和尚忌拈香。出黃泉。又入黃泉。穴鼻無繩。不受牽倒。轉一枝無孔笛。蘆花明月滿前川。你諸人還知我老和尚落處麼。卷四大海水於舌端。不見涓滴。置微塵刹土於毛孔。囊括大千。總謂其嫌白雲之語。拙愛五祖之說。禪夫豈善用黑豆之活法。契鷲峯之正傳。以香扣爐云。相席打令。飲水思源。盤山會裏。翻筋斗到此。誰知普化顯。

天隱修禪師幻有和尚忌拈香。大明國裏。耆老漢兒。

孫滿地盡道。今日是忌日。設供山僧則不然。正是老漢大解脫底時節。諸人還知落處麼。若知得落處也。許你門拈一分香。便禮拜。

密雲悟禪師幻有和尚忌拈香當時巴陵爲雲門大師設忌有三轉語高峰爲雪巖和尚設忌只有一句。悟上座今日爲幻有和尚設忌一句也。無何以舉起。香云者是一句耶。是三句耶。插香云逢人切莫錯舉。弘覺恣禪師密老和尚忌辰拈香去秋燭剪邦溝月。今歲茶烹老范泉。太白峰高常在望。歸真誰道十三年。大眾還信得及麼。若信不及時。時時拈檀爐內。焚披襟試驗。觸體前。

笈庵問禪師磬山和尚忌拈香師指真云。若不是問上座。洎被者老漢埋沒一生。今日却要向人天衆前拈一分香。薰灼者老和尚鼻孔。何故父爲子隱。卽得子爲父隱。卽不得。

牧雲門禪師天童和尚忌拈香展具云。昨夜上單時。一陣肚裏痛。思量老和尚十年不侍奉。心有戚戚焉。合眼不成夢。尋常雖禮拜。將輕會博重新。更住鶴林。

却又無些供。只聽五更頭大雨風聲。送點滴在堦前。濕處全無空山鷄再四啼。堂牖何空洞。上了一杯茶。看看眉毛動。生平拄杖子。羅龍還打鳳。只今依舊在身傍。冷地知他用不用。三聲鼓了。整個黎頂禮而參。煩大家。

#### 嗣法師忌日提綱

五祖演禪師白雲忌上堂。去年正當恁麼時。多前年三件事。今年正當恁麼時。多去年七件事。者十件事。數不過者甚多。何也。去却七三存一事。是去年說是。今日急如箭。黑似漆。無言童子口吧吧。無足仙人撥。胃。趣乃云。交下座。

佛鑒懃禪師五祖周祥上堂。去年今日時。紅爐片雪飛。今日去年時。曹娥讀夜碑。末後一句子。佛眼莫能窺。白蓮峰頂上。紅日遶須彌。鳥啄珊瑚樹。鯨吞離水犀。太平家業在。千古襲楊岐。

龍門遠禪師東山和尚忌上堂。先師當年末後句。與人皮下挑出刺。譬如六月中。冰銷鎔處處皆相似。後來聽響各流傳。更加一二與三四箇中。孰是無耳。

人明見去來不生死。先師老和尚某奉侍日久。多蒙苦口提撕。追遠之誠。何可忘也。聊設小供。諸人且道。先師還來也。無若道來入滅十餘年。如何見得來的道理。若道不來。又用設齋作甚麼。道來也有諸訛。道不來也有諸訛。若爲得無諸訛去。還知得麼。三箇渾崙鐵餤餤。一雙無縫木餤頭。久立。

五祖忌上堂。趙州不見南泉。山僧不識五祖。甜瓜徹蒂自甜。苦瓠連根自苦。

夢庵信禪師。勝因戲魚靜和尚。忌上堂。斯辰七月四。老人圓寂日。陞座。繼餘風。特此酬慈訓。大法不流通。巨恩若爲報。全提知有據。豈敢惜眉毛。今對大眾前。未免揚家醜。豎起拂子云。還會麼。當時若謂無分付。如今拈出又何來。乃擊禪床一擊下座。

慧通日禪師。佛性和尚。忌上堂。三脚驢子弄蹄行。步步相隨不相到。樹頭驚起雙雙魚。拈來一老一不老。爲憐松竹引清風。其奈出門便是草。因喚檀郎識得渠。大機大用都推倒。燒香勘證見根源。糞掃堆頭拾得寶。叢林浩浩謾商量。勸君莫謗先師好。

密庵傑禪師。應庵和尚。忌上堂。劇劍鉞虛空。萬象鳴。曝曝。年年向斯辰。令人倍發惡。言者道子不談父德。雖然家醜也要外揚。者老和尚平生事。過頭底九百。自云著草鞋住院何苦。如蛇蛇惡窟。美則美矣。帶累不肖兒孫。依模脫出。贊歎者從他贊。上非非想。天毀謗者。謗到空輪水際。衆中莫有毀譽不動底麼。出來與華藏相見。有麼。有麼。良久。擲下拄杖。高聲云。侍者收取拄杖。

嗣法師翁忌拈香法語

愚庵及禪師圓悟大慧祖師同忌。拈香隻手不獨拍。單絲不成線。兩箇五百文。鬪湊合一貫。鷄啼白晝認。頻呼小玉。總墮聲塵。薰風南來。證諸條法身。何曾夢見橫說豎說。熾然說。卷百億香水海於廣長舌本。波瀾內空。外空。畢竟空。還有漏微塵國於事事無礙法界。臭皮襪炙地。薰天折竹。鉗雷掣電。燭瞎臨濟正法眼。滅碎東山鐵酸餤。陵滅宗風。忤逆孫終不隨他脚跟。轉香爇一爐茶。傾三奠。醖子撲落地。碟子成七片。



玉林琇禪師幻有師翁忌日設供師指眞云兀坐嘴  
盧都教人沒奈何箇老漢慣得其便者裏透得過的  
如龍得水似虎靠山有意氣時添意氣不風流處也  
風流而今大明國裏稱爲師翁後裔者不啻百千萬  
億究竟得大機顯大用堪爲嫡骨兒孫者能有幾人  
某上座初閱龍池語錄見師翁云世間多少不平之  
輩務要別尋一箇人與我老釋迦比勝負較優劣還  
知我釋迦如來是何等一箇面目麼某上座便於此  
喪身失命將謂師翁面目只如是後來呈似先師和  
尚受他許多惡辣鉗錘方知見與翁齊滅翁半德見  
過於翁方堪嗣續從此脚跟下自解作活計雖與師  
翁同條生不與師翁同條死師翁善爲隱語云人還  
知我釋迦如來是何等一箇面目令某小瞎禿最初  
祇見師翁殺人刀未見師翁活人劍今日某上座不  
妨顯示令見者聞者知我祖師門下亦有殺人刀亦  
有活人劍顧視左右云若有問如何是我師翁眞面  
目拈香云急著眼

嗣法師翁忌提綱

龍門遠禪師端師翁忌辰上堂昔人已乘白雲去此  
地空餘綠水流綠水一去不復返白雲千載空悠悠  
湖南舊說老楊岐失却金毛獅子兒江南江北無覓  
處龍門今日順風吹順風吹囉囉哩水急風高下釣  
磯

大慧杲禪師五祖師翁忌上堂山前一片閒田地元  
來記得在叉手叮嚀問祖翁只爲契券不分明幾度  
賣來還自買難爲牙保人爲憐松竹引清風喝一喝  
云乞兒見小利

掃歷代祖塔拈香法語

五祖演禪師入院五祖祖塔燒香以手指云當時與  
麼全身去今日重來記得無復云以何爲驗以此爲  
驗遂禮拜

天目禮禪師到靈隱松源和尚塔頭拈香云破沙盆  
提不起眼瞎耳聾門風委地昔年撞到東湖禪剎家  
私到底後來各自西東我又誰能管你一瓣兜樓拜  
塔前畢竟無人是嫡傳

山茨際禪師掃岳祖塔拈香師云耆老漢二百年來



在此藏身人天罔知佛祖難近。今日脚下兒孫到來。親遭看破。且道以何爲驗。顧左右插香。

弘覺恣禪師掃笑嚴祖塔。拈香黃金骨。瑣玉玲瓏鐵棘門。栽不計重。佛眼難窺吾祖意。兒孫若敢妄流通。拈香云。卽此用。離此用。蠅螟眼裏繡鴛鴦。烈焰爐中飛彩鳳。便燒。

### 掃歷代祖塔塔主請提綱

密雲悟禪師到玄墓掃萬峰寶藏二祖塔。請上堂。今日不肖兒孫。高陞遠祖之堂。不必更說偈言。覲面爲衆。舉揚慈著眼。莫思量。得便行真漢。子人間天上本無雙。卓拄杖下座。

箸庵問禪師到龍池掃祖塔萬如和尚請上堂。師云。昔年未見師翁。面問上座。却被師翁絆入葛藤窠裏。沒頭沒腦。及乎親見師翁。一回師翁却被問上座。絆入葛藤窠裏。沒頭沒腦。者段公案。正要向明眼人前判斷。今日旣親到師翁法窟承堂。頭法兄和尚爲衆推出。登師翁堂。踞師翁座。問上座。豈敢掩耳偷鈴。請諸仁者不悖慈悲。爲問上座判斷。看若判斷得諸仁。

者合喫問上座手中三十棒。若判斷不得。問上座合喫我堂頭法兄和尚手中三十棒。者兩頓棒。有一棒堪與佛祖爲師。有一棒堪與人天爲師。若也不甘自救。不了卓拄杖下座。

掃鶴林玄素禪師塔。請上堂。會卽不會。疑卽不疑。兩重公案。土上加泥。佛來也不著。著陀施妙藥。無你棲泊處。切忌隨流去。牛頭橫出一枝箇。是確然本據。問上座。於往昔劫中。不知與耆老宿有甚交涉。登臨披歷。遂感初心。今日到來。且道以何爲驗。卓拄杖復舉。當山法嗣徑山國一欽禪師。因馬祖令僧馳書到開緘。一見圓相。乃於圓相中著一點。却封回忠國師。聞云。欽師猶被馬師惑。後來雪竇明覺云。徑山被惑。且置。若將呈似國師。別作箇甚麼。伎倆免被惑去。有般道當時坐却便休。亦有云。但與畫破。若與麼。祇是不識羞。敢謂天下老師各具金剛眼睛。廣作神通變化。還免得麼。雪竇見處。也要諸人共知。祇者馬師當時畫出。早是自惑了也。師云。馬駒踏殺天下人。總出他圈。續未得雪竇自謂出一頭地。因甚也。掩耳偷鈴山。

僧今日因行掉臂略展風規不妨八字打開與諸人相見還知麼。藕穿池面爲荷葉。笋過東家作竹林。徑山盛禪師掃雲棲蓮大師塔塔主率衆護法請上堂師以如意畫圓相云。麼向上一路千聖不傳。末後牢關直須親到達磨大師親稟不立文字教外別傳。直指人心見性成佛之旨。特特來我東土初遇梁武帝不契。卽渡江於少林面壁。此時震旦義學相高。多滯名相間有學者扣達祖宗旨。皆是斥相指心中。有不能領略者。輒生嫉害。乃至六遭服毒。末遇神光斷臂于安心歸位之後。始付其衣鉢并授楞伽經。以爲印心嗣是東土一花五葉徧燦寰區。皆是親悟親證。始得使此真宗不墜也。或謂達祖既以不立文字直指人心。何復以楞伽爲印乎。此正明一切佛語皆以心爲宗旨。不特楞伽是離文字法如能親悟心印。則三藏十二部一切脩多羅皆是離文字爲宗旨也。達祖斥相指心。正以彼時教家執着名相不見心宗。斥者斥其執相也。非斥彼不當開闡教義也。如能悟此心宗。又何經律論觀淨諸教非直指之妙。心哉不

見我雲棲先大師最初發心。卽以生死大事而起疑情。剗染之後。卽徧參諸方尊宿。嘗于京師謁笑巖和尚求指示。笑巖曰。阿你三千里外來開示我。我有甚麼開示你。時大師言下有省。因過東昌聞譙樓鼓聲。乃悟其旨。作偈曰。二十年前事可疑。三千里外遇何奇。焚香擲戟渾如夢。魔佛空爭是與非。此後見法門師承大壞。參學無真。乃大權設教。開戒律闡教乘。標淨土而歸于心宗。世人不知大師悟證之繇。以大師乃教中國人。何必捏歸禪宗。以亂其統。又孰知大師乃先悟禪宗。而後開諸教海。收攝羣機。而歸正覺也。世間開戒闡教。標淨者甚多。未必皆悟道之後設施也。獨太師於悟心之後弘法。是以說戒戒卽金剛戒性也。設教教卽妙明真心也。立論論卽直剖宗旨也。標淨淨卽全提佛心也。輒近主法之人。孰能如大師眞參實悟。而後舉揚宗旨。振作玄機密用哉。今之參學會起二十年前可疑之事乎。曾有於三千里外一聞譙鼓而不疑乎。大疑大悟。小疑小悟。不疑不悟。如今人疑也未疑。安得有遇而且悟。此奇特乎。昔雲門

湛和尚或問中嘗載大師宗門機用甚悉如拈外道問佛空生宴坐公案云若於良久處欲望開迷陰覆萬里宴坐邊擬聞般若說竟多時既然如是鞭頭得指空裏飛花者是箇甚麼參又拈自性西方惟心淨土云若直指自性不但過此娑婆十萬億國土爲非也設箇自性已涉程途若實譚惟心不但寶蓮金地種種莊嚴爲非也說箇惟心早成垢穢你看大師如此起疑如此參悟如此拈提宗門向上機緣如此指示惟心淨土此豈與未悟心宗而代佛揚化敷文演義者所可比擬哉此正大師會通佛祖無門爲法門宗旨使戒律經教論議止觀淨業皆歸禪宗不立文字教外別傳之旨庶使諸家義學不墮名相不昧佛語以明心宗爲千聖不傳之密旨也此豈我後人強欲差排贊美大師而扭捏入禪宗者哉此蓋吾大師深念如來一代時教爲後世分門別戶互相矛盾之弊故于悟心之後密移一步始能會通佛語諸教而歸于無門法門之心宗也不然達祖只須傳心不必以教爲印也今日大師傳教而特會歸心宗真千古

一○此下  
有法藏歌

同心別傳無二也子小子舌短何足以舉揚萬一但稟承大師法蔭今敬入山掃拜靈塔幸諸大護法及闔山耆舊尊宿命登此座辭不獲免強爲贅疣誠慚愧無地罪過多端也還知此一舉揚底意旨麼覩到須彌莫問山旣遊大海休誇水下座

祖塔塔主請提綱

牧雲門禪師天童山掃塔請上堂太白峰頭千差坐斷清關橋下一脉常流雖爲列祖道場固是先師重扶家業山僧昔預此會法乳親嘗今日重來臺木拱矣可勝懷愴雖然須知恁麼中不恁麼砂盆未破堂構依然幸我堂頭法兄寅夕不倦流慈於此方廣座上劈開面門放出先師形相與諸人描邈直得鉢盂峰點頭玲瓏嚴起舞正恁麼時敲唱雙行主賓互換且如何道得恰好底句良久云妙舞會須誇徧拍三臺須是大家催

古雪詰禪師掃馬大師塔上堂頓鏡臺前打失孃生鼻孔滕王閣畔宏開選佛壇場踢殺天下英靈喚回空中野鴨掀翻窠堀截斷葛藤明大用顯大機電光

石火較猶遲。藏頭白海頭黑。鐵眼銅睛皆罔測。燈傳三十二葉道。播四海九州脚下。不肖兒孫。昔日親遭毒手。源遠流長。則且置到者裡。作麼生與祖師相見。喝一喝云。無縫塔中藏。不得森羅景裏見。全身

### 受業師忌拈香

筓庵問禪師。先受業法雨大師忌拈香。過橋遭擲。糞掃堆拾得明珠。擦背光生浴室裏。捱開漆桶。雖則父子同時。簡點起來。翻成分外。爭似我法雨老人。一生擔板坐斷。諸佛路頭。塊石孤松。高拳獨枕。若是今日。是死掘地討天。若道今日不死。開眼作夢。畢竟如何。作女人拜云。茶傾洞頂香。薰鷄蘇。

### 父忌提綱

玉林琇禪師。振陵太老師忌日上堂。山僧昔日。苾芻蒙先磬。山老和尚執刀三剃口。占有云。一子出家。九族昇天。若不昇天。佛有妄言。山僧出家來業已多載。且道先師今日何在。識得落處的。出衆相見。衆問話畢。師乃云。沙界通紅一團火。箇中毫髮不容存。森嚴明淨先翁面。普示人間子若孫。

### 母忌提綱

與化清禪師。母忌上堂。祖師門下佛法不存。善法堂前仁義休說。雖然如是。事無一向。竊聞哀哀父母。生我劬勞。欲報深恩。昊天罔極。髮膚身體。弗敢毀傷。此魯仲尼之孝也。輪轉三界中。恩愛不能捨棄。恩入無爲。眞實報恩者。故我大覺世尊。雪山苦行。摩竭成道。往初利天。爲母說法。此釋迦之孝也。得大解脫。運大神通。手擎金錫。掌拓龍孟。詣地獄門。卓然尋省。見其慈母。悲泣無量。此目連之孝也。作麼生是興化之孝。良久曰。興化今日不上天堂。不入地獄。於善法堂中。燈王座上。爲母說法。以報劬勞。且道我母。卽今在甚麼處。乃曰。我母生前足善緣。無勞問佛。定生天人間。上壽古今少。九十春秋減。一年下座。敢煩大衆。燒一炷香。以助山僧報孝。既是山僧之母。爲甚麼却煩諸人燒香。不見道。東家人死。西家人助哀。以手搥目曰。蒼天蒼天。

### 列祖提綱錄卷第六

列祖提綱錄卷第七

武林十八澗理安禪寺住持婁東行悅集

五參提綱住持○五參提綱僅集禪燈諸錄餘者浩繁不及具載

六祖能大師上堂謂衆曰。諸善知識。汝等各各淨心。聽吾說法。汝等諸人。自心是佛。更莫狐疑。外無一物。而能建立。皆是本心生萬種法。故經云。心生種種法生。心滅種種法滅。若欲成就種智。須達一相三昧一行三昧。若於一切處。而不住相。彼相中不生憎愛。亦無取舍。不念利益成壞等事。安閒恬靜。虛融澹泊。此名一相三昧。若於一切處。行住坐臥。純一直心。不動道場。眞成淨土。名一行三昧。若人具二三昧。如地有種。能含藏長養。成就其實。一相一行。亦復如是。我今說法。猶如時雨。溥潤大地。汝等佛性。譬諸種子。遇茲霑洽。悉得發生。承吾旨者。決獲菩提。依吾行者。定證妙果。

南陽忠國師上堂。禪宗學者。應遵佛語。一乘了義契。自心源。不了義者。互不相許。如獅子身中蟲。夫爲人師。若涉名利。別開異端。則自他何益。如世大匠斤斧。

不傷其手。香象所負。非驢能堪。

上堂。青蘿黃綠。直上寒松之頂。白雲淡泞。出沒太虛之中。萬法本閒。而人自鬧。

師與紫璘供奉論議。師陞座。奉曰。請師立義。某甲破師曰。立義竟。奉曰。是甚麼義。師曰。果然不見。非公境界。便下座。

南岳思禪師示衆曰。道源不遠。性海非遙。但向已求。莫從他覓。覓卽不得。得亦不眞。

扣氷古佛上堂。四衆雲臻。教老僧說箇甚麼。便下座。馬祖一禪。師上堂。汝等諸人。各信自心。是佛。此心卽是佛。心達磨大師。從南天竺國來。至中華傳上乘一心之法。令汝等開悟。又引楞伽經文。以印衆生心地。恐汝顛倒。不自信此一心之法。各各有之。故楞伽經以佛語心爲宗。無門爲法門。夫求法者。應無所求。心外無別佛。佛外無別心。不取善。不捨惡。淨穢兩邊。俱不依怙。達罪性空。念念不可得。無自性。故故三界唯心。森羅萬象。一法之所印。凡所見色。皆是見心。心不自心。因色故有。汝但隨時。言說卽事。卽理都無所礙。



菩提道果亦復如是。於心所生。卽名爲色。知色空故。生卽不生。若了此意。乃可隨時著衣喫飯。長養聖胎。任運過時。更有何事。

百丈海禪師上堂。靈光獨耀。迥脫根塵。體露真常。不拘文字。心性無染。本自圓成。但離妄緣。卽如如佛。盤山積禪師上堂。心若無事。萬法不生意。絕立機緣。應何立道。本無體。因體而立名。道本無名。因名而得號。若言卽心卽佛。今時未入玄微。若言非心非佛。猶是指蹤極。則向上一路。千聖不傳。學者勞形如猿捉影。

上堂。夫心月孤圓。光吞萬象。光非照境。境亦非存。光境俱亡。復是何物。禪德譬如擲劍揮空。莫論及之不及。斯乃空輪無迹。劍刃無虧。若能如是。心心無知。全心卽佛。全佛卽人。人佛無異。始爲道矣。上堂。禪德可中學。道似地擎山。不知山之孤峻。如石含玉。不知玉之無瑕。若如此者。是名出家。故導師云。法本不相礙。三際亦復然。無爲無事人。猶是金鎖難。所以靈源獨耀。道絕無生。大智非明。真空無迹。真如。

凡聖皆是夢言。佛及涅槃。竝爲增語。禪德直須自看。無人替代。

上堂。三界無法。何處求心。四大本空。佛依何住。塔環不動。寂爾無言。覲面相呈。更無餘事。珍重。楊岐叔禪師上堂。羣靈一源。假名爲佛。體竭形銷。而不滅。金流撲散。而常存。性海無風。金波自涌。心靈絕非。萬象齊照。體斯理者。不言而徧。歷沙界。不用而功。益玄化。如何背覺。反合塵勞。於陰界中。妄自囚執。馬頭藏禪師上堂。知而無知。不是無知。而說無知。南泉願禪師上堂。然燈佛道了也。若心相所思。出生諸法。虛假不實。何以故。心尙無有。云何出生。諸法猶如形影。分別虛空。如人取聲。安置篋中。亦如吹網。欲令氣滿。故老宿云。不是心。不是佛。不是物。且教你兄弟行履。據說十地菩薩。住首楞嚴三昧。得諸佛秘密法藏。自然得一切禪定。解脫神通妙用。至一切世界。普現色身。或示現成等正覺。轉大法輪。入涅槃。使無量入毛孔。演一句經。無量劫。其義不盡。教化無量億千衆生。得無生法。忍尙喚作所知。愚極微細所知。愚。



與道全乖大難大難珍重

上堂曰王老師自小養一頭水牯牛擬向溪東牧不免食他國王水草擬向溪西牧亦不免食他國王水草不如隨分納些些總不見得

上堂道箇如如是變了也今時師僧須向異類中行歸宗曰雖行畜生行不得畜生報師曰孟八郎漢又怎麼去也

上堂文殊普賢昨夜三更相打每人與二十棒趁出院去也趙州曰和尚棒教誰喫師曰且道王老師遇在甚處州禮拜

上堂王老師賣身去也還有人買麼一僧出曰某甲買師曰不作貴不作賤汝作麼生買僧無對

鹽官安國師上堂謂衆曰虛空爲鼓須彌爲椎甚麼人打得衆無對

歸宗常禪師上堂從上古德不是無知解他高尙之士不同常流今時不能自成立虛度時光諸子莫錯用心無人替汝亦無汝用心處莫就他覓從前祇是依他解發言皆滯光不透脫祇爲目前有物

上堂吾今欲說禪諸子總近前大衆近前師曰汝聽觀音行善應諸方所問如何是觀音行師乃彈指曰諸人還聞否曰聞師曰一隊漢向者裏覓甚麼以棒趁出大笑歸方丈

茱萸和尚上堂擎起一槩竹曰還有人虛空釘得槩麼時有靈虛上座出衆曰虛空是槩師擲下竹便下座

大梅常禪師上堂汝等諸人各自回心達本莫逐其末但得其本其末自至若欲識本唯了自心此心元是一切世間出世間法根本故心生種種法生心滅種種法滅且不附一切善惡而生萬法本自如如

黃檗運禪師上堂大衆雲集乃曰汝等諸人欲何所求以拄杖趁之大衆不散師却復坐曰汝等諸人盡是噇酒糟漢怎麼行脚取笑於人但見八百一十人處便去不可圖他熱鬧也老漢行脚時或遇草根下有一箇漢便從頂門上一錐看他若知痛痒可以布袋盛米供養他可中總似汝如此容易何處更有今日事也汝等既稱行脚亦須著些精神好還知道大

唐國內無禪師麼。時有僧問諸方尊宿。盡聚衆開化。爲甚麼却道無禪師。師曰。不道無禪祇是無師。闍黎不見馬大師。下有八十四人坐道場。得馬師正法眼者止三兩人。廬山歸宗和尚是其一。夫出家人須知有從上來事。分始得。且如四祖下牛頭橫說豎說。猶未知向上關捩子。有此眼目。方辨得邪正。宗黨且當人事。宜不能體會得。但知學言語。念向皮袋裏安著。到處稱我會禪。還替得汝生死麼。輕忽老宿入地獄。如箭我纔見汝入門來。便識得了也。還知麼。急須努力。莫容易事。持片衣口食空過一生。明眼人笑汝。久後總被俗漢箠將去。在宜自看。遠近是阿誰。面上事。若會即便會。若不會即散去。珍重。

香嚴端禪師上堂。僧問如何。是直截根源。師乃擲下拄杖。便歸方丈。

上堂語是謗寂。是誑語。寂向上有路。在老僧口門窄。不能與汝說得。便下座。

上堂問。正因爲甚麼無事。師曰。我不曾停留。乃曰。假饒重重剝得淨盡。無停留權時。施設亦是方便。接人。

若是那邊事。無有是處。

杭州天龍和尚上堂。大眾莫待老僧上來。便上來下去。便下去。各有華藏性海。具足功德。無礙光明。各各參取珍重。

龜山具禪師上堂。動容瞬目。無出當人一念淨心。本來是佛。仍說偈曰。心本絕塵。何用洗身。中無病豈求醫。欲知是佛非身。處明鑑高懸。未照時。

黃州安禪師上堂。言不落句。佛祖徒施玄韻。不墜誰人知得。

大慈中禪師上堂。山僧不解答話。祇能識病時。有僧出師。便歸方丈。

趙州諗禪師上堂。如明珠在掌。胡來胡現。漢來漢現。老僧把一枝草。爲丈六金身用。把丈六金身。爲一枝草用。佛是煩惱。煩惱是佛。僧問。未審是佛誰家煩惱。師曰。與一切人煩惱。曰。如何免得。師曰。用免作麼。上堂。金佛不度爐。木佛不度火。泥佛不度水。眞佛內裏坐。菩提涅槃。眞如佛性。盡是貼體衣服。亦名煩惱。實際理地。甚麼處著。一心不生。萬法無咎。汝但究理。

坐看三二十年。若不會截取老僧頭去。夢幻空華。徒勞把捉。心若不異萬法。一如既不從外得。更拘執作麼。如羊相似。亂拾物安向口裏。老僧見藥山和尚道。有人問著。但教合取狗口。老僧亦教合取狗口。取我是垢。不取我是淨。一似獵狗。專欲得物喫。佛法在甚麼處。千人萬人盡是覓佛漢子。於中覓一箇道人。無若與空王爲弟子。莫教心病最難醫。未有世界。早有此性。世界壞時。此性不壞。一從見老僧後。更不是別人。祇是箇主人公。若箇更向外覓。作麼正恁麼時。莫轉頭換腦。若轉頭換腦。卽失却也。僧問承師。有言世界壞時。此性不壞。如何。是此性師曰。四大五陰。曰此猶是壞底。如何。是此性師曰。四大五陰。

上堂。纔有是非紛然。失心還有答話分也。無僧舉似洛浦。浦扣齒又舉似雲居。居曰。何必僧同舉。似師師曰。南方大有人喪身失命。曰請和尚舉。師纔舉前語。僧指旁僧曰。若箇師僧喫却飯了。作恁麼語話。師休去。

上堂。正人說邪法。邪法悉皆正。邪人說正法。正法悉

皆邪。諸方難見易識。我者裏易見難識。

上堂。謂衆曰。我向行脚到南方火爐頭。有箇無賓主話。直至如今無人舉著。

上堂。至道無難。唯嫌揀擇。纔有言語。是揀擇。是明白。老僧不在明白裏。是汝還護惜也。無時有僧問。旣不在明白裏。護惜箇甚麼。師曰。我亦不知。僧曰。和尚旣不知。爲甚麼道不在明白裏。師曰。問事卽得。禮拜了退。別僧問。至道無難。唯嫌揀擇。是時人窠窟。否。師曰。曾有人問我。老僧直得五年分疎。不下。又問。至道無難。唯嫌揀擇。如何。是不揀擇。師曰。天上天下。唯我獨尊。曰。此猶是揀擇。師曰。田庫奴甚處。是揀擇。僧無語。

上堂。兄弟若從南方來者。卽與下載。若從北方來者。卽與上載。所以道。近上人問道。卽失道。近下人問道。卽得道。

上堂。兄弟莫久立。有事商量。無事向衣鉢下坐。窮理好。老僧行脚時。除二時粥飯。是雜用心處。除外更無別用心處。若不如是大遠在。

上堂。謂衆曰。你若一生不離叢林。不語五年十載。無

人喚你作啞漢。已後佛也不奈你。何你若不信。截取老僧頭去。

大茅和尚上堂。欲識諸佛師。向無明心內。識取欲識。常住不凋性。向萬物遷變處。識取。

陳尊宿上堂。我見百丈。不識好惡。大眾纔集。以拄杖一時打下。復召大眾。回首乃云。是甚麼。有甚共語處。又黃檗和尚亦然。復召大眾。回首乃云。月似彎弓。少雨多風。猶較些子。

上堂。裂開也在我。捏聚也在我。時有僧問。如何是裂。開師曰。三九二十七。菩提涅槃。真如解脫。卽心卽佛。我且與麼道。你又作麼生。曰。某甲不與麼道。師曰。餓子撲落地。碟子成七片。曰。如何是捏聚。師乃歛手而坐。

大隨真禪師上堂。此性本來清淨。具足萬德。但以染淨二緣而有差別。故諸聖悟之一向淨用。而成覺道。凡夫迷之一向染用。沒溺輪回。其體不二。故般若云。無二無二分。無別無斷故。

丹霞然禪師上堂。阿你渾家。切須保護一靈之物。不

是你造作名。邈得更說甚薦與不薦。吾往日見石頭。亦祇教切須自保護。此事不是你談話得。阿你渾家。各有一坐具地。更疑甚麼。禪可是你解底。物豈有佛。可成佛之一字。永不喜聞。阿你自看善巧方便。慈悲喜捨。不從外得不著方寸。善巧是文殊。方便是普賢。你更疑趨逐甚麼物。不用經求落空去。今時學者。紛紛擾擾。皆是參禪問道。吾此間無道可修。無法可證。一飲一啄。各自有分。不用疑慮。在在處處。有甚麼底。若識得釋迦卽老。凡夫是阿你。須自看取。莫一言引衆盲相將入火坑。夜裏暗雙陸。賽彩若爲生珍重。三平義忠禪師上堂。今時人出來盡學馳求造作。將當自己眼目。有甚麼相當。阿汝欲學麼。不要諸餘。汝等各有本分事。何不體取作麼心。憤憤口排排。有甚麼利益。分明向汝說。若要修行路。及諸聖建立化門。自有大藏教文在。若是宗門中事。宜汝切不得錯用心。僧問。宗門中還有學路也。無師曰。有一路滑如苔。曰。學人還攝得。否。師曰。不擬心。汝自看。馬頰山本空禪師上堂。祇者施爲動轉。還合得本來。

祖翁麼。若合得十二時中。無虛棄底道理。若合不得。喫茶說話。往往喚作茶話。在僧便問。如何免得不成。茶話去。師曰。你識得口也未。曰。如何是口。師曰。兩片皮也不識。曰。如何是本來祖翁。師曰。大眾前不要牽爺恃娘。曰。大眾忻然去也。師曰。你試點大眾性。看僧作禮。師曰。伊往往道一性一切性。在僧欲進語。師曰。孤負平生行脚眼。

本生禪師拈拄杖示衆曰。我若拈起。你便向未拈起時作道理。我若不拈起。你便向拈起時作主宰。且道老僧爲人在甚處。時有僧出曰。不敢妄生節目。師曰。也知閹黎不分外。曰。低低處平之有餘。高高處觀之不足。師曰。節目上更生節目。僧無語。師曰。拖鼻偷香空招罪犯。

夾山會禪師上堂有祖以來。時人錯會相承。至今以佛祖言句爲人師範。若或如此。却成狂人無智人去。他祇指示汝無法本。是道道無一法。無佛可成。無道可得。無法可取。無法可捨。所以老僧道目前無法意。在目前。他不是目前法。若向佛祖邊學。此人未具眼。

在何故皆屬所依。不得自在。在本祇爲生死茫茫。識性無自由。分千里萬里求善知識。須具正眼求脫。虛謬之見。定取目前生死爲復實。有爲復實。無若有人定得許。汝出頭上根之人。言下明道。中下根器。波波浪走。何不向生死中定當取何處。更疑佛疑祖。替汝生死。有智人笑汝。汝若不會。更聽一頌。勞持生死法。唯向佛邊求。目前迷正理。撥火覓浮漚。

上堂不知天曉。悟不由師。龍門躍鱗不墮漁人之手。但意不寄私緣。舌不親玄旨。正好知音。此名俱生話。若向玄旨疑去。賺殺閹黎。困魚止滌鈍。鳥棲蘆雲水。非閹黎閹黎。非雲水老僧。於雲水而得自在。閹黎又作麼生。

上堂聞中生解意。下丹青目前。卽美久蘊成病。青山與白雲從來不相到。機絲不挂梭頭。事文彩縱橫。意自殊嘉祥。一路智者知疏。瑞草無根。賢者不貴。

上堂金烏玉兔交互爭輝。坐却日頭。天下黯黑。上唇與下唇從來不相識。明明向君道。莫令眼顧著。何也。日月未足爲明。天地未足爲大。空中不運斤巧匠不



遺蹤見性不留佛。悟道不存師。尋常老僧道。目觀瞿曇。猶如黃葉。一大藏教。是老僧坐具。祖師玄旨。是破草鞋。寧可赤脚。不著最好。

上堂。我二十年住此山。未曾舉著宗門中事。有僧問承和尚。有言二十年住此山。未曾舉著宗門中事。是否。師曰。是僧便掀倒禪床。師休去。至明日。普請掘一坑。令侍者請昨日僧至。曰。老僧二十年說無義語。今日請上座打殺老僧。埋向坑裡。便請若不打殺老僧。上座自著打殺。埋在坑中。始得其僧。歸堂束裝。潛去。上堂。百草頭薦取老僧。開市裡識取天子。

上堂。眼不挂戶。意不停立。直得靈草不生。猶是五天之位。珠光月魄。不是出頭時。此間無老僧。五路頭無闍黎。

九峰虔禪師上堂。諸兄弟。還識得命麼。欲知命。流泉是命。湛寂是身。千波競涌。是文殊境界。一亘晴空。是普賢床榻。其次偈一句子。是指月於中事。是話月從上宗門中事。如節度使信旗相似。且如諸方先德。未建許多名目。指陳已前諸兄弟。約甚麼體格商量。到

者裏不假三寸試話。會看不假耳試聽。看不假眼試辨。白看所以道。聲前拋不出。句後不藏形。盡乾坤大地。都來是汝當人箇體。向甚麼處安眼耳鼻舌。莫但向意根下圖度。作解盡未來際。亦未有休歇去。所以洞山道。擬將心意學。玄宗大似西行。却向東珍重。涌泉欣禪師上堂。我四十九年在者裏。向自有時走作。汝等諸人。莫開大口。見解人多。行解人萬中無一箇。見解言語。總要知通。若識不盡。敢道輪回去。在爲何如此。蓋爲識漏未盡。汝但盡却。今時始得成立。亦喚作立中功。轉功就他去。亦喚作就中功。親他去。我所以道。親人不得。度渠不度。親人恁麼譬喻。尙不會薦取。渾崙底。但管取性亂動。舌頭不見洞山道。相續也大難。汝須知。有此事。若不知。有啼哭。有日在洛浦安禪師上堂。末後一句。始到牢關。鎖斷要津。不通凡聖。尋常向諸人道。任從天下樂欣欣。我獨不肯欲知上流之士。不將佛祖言教。貼在額頭上。如龜負圖。自取喪身之兆。鳳縈金網。移霄漢以何期。直須旨外明宗。莫向言中取。則是以石人機似汝也。解唱巴

歌汝若似石人雪曲也應和指南一路智者知疏  
牛頭微禪師上堂三世諸佛用一點伎倆不得天下  
老師口似圓擔諸人作麼生大不容易除非知有餘  
莫能知

勸潭牢禪師上堂僧問百丈捲席意旨如何師曰珍  
重便下堂

德山鑒禪師上堂若也於已無事則勿妄求妄求而  
得亦非得也汝但無事於心無心於事則虛而靈空  
而妙若毛端許言之本末者皆爲自欺何故毫釐繫  
念三塗業因瞥爾情生萬劫輻鎖聖名凡號盡是虛  
聲殊相劣形皆爲幻色汝欲求之得無累乎及其厭  
之又成大患終而無益

上堂我先祖見處卽不然者裏無祖無佛達磨是老  
臊胡釋迦老子是乾屎橛文殊普賢是擔屎漢等覺  
妙覺是破執凡夫菩提涅槃是繫驢橛十二分教是  
鬼神簿拭瘡疣紙四果三賢初心十地是守古塚鬼  
自救不了

巖頭嚴禪師上堂吾嘗究涅槃經七八年觀三兩段

義似衲僧說話又曰休休時有一僧出禮拜請師舉  
師曰吾教意如…字三點第一向西方下一點點開  
諸菩薩眼第二向西方下一點點諸菩薩命根第三  
向上方下一點點諸菩薩頂此是第一段義又曰吾  
教意如摩醯首羅壁開面門豎亞一隻眼此是第二  
段義又曰吾教意猶如塗毒鼓擊一聲遠近聞者皆  
喪此是第三段義時小巖上座問如何是塗毒鼓師  
以兩手按膝亞身曰韓信臨朝底巖無語

雪峰存禪師上堂南山有一條鼈鼻蛇汝等諸人切  
須好看長慶出曰今日堂中大人喪身失命雲門  
以拄杖攬向師前作怕勢有僧舉似立沙沙曰須是  
稜兄始得然雖如是我卽不然曰和尚作麼生沙曰  
用南山作麼

上堂此事如一片田地相似一任諸人耕種無有不  
承此恩力者立沙曰且作麼生是者田地師曰看沙  
曰是卽是某甲不與麼師曰你作麼生沙曰祇是人  
人底

上堂盡大地是箇解脫門把手拽伊不肯入時一僧

出曰。和尚怪某甲不得。又一僧曰。用入作甚麼。師便打。

陞座。衆集。定師輒出。木毬。玄沙遂捉來。安舊處。玄沙備禪師上堂。佛道閑曠。無有程途。無門解脫之門。無意道人之意。不在三際。故不可昇沈。建率弄真。非屬造化。動則起生死之本。靜則醉昏沉之鄉。動靜雙泯。卽落空亡。動靜雙收。瞞瞞。預佛性。必須對塵對境。如枯木寒灰。臨時應用。不失其宜。鏡照諸像。不亂光輝。鳥飛空中。不雜空色。所以十方無影像。三界絕行蹤。不墮往來機。不住中間意。鐘中無鼓響。鼓中無鐘聲。鐘鼓不相交。句句無前後。如壯士展臂。不藉他力。獅子遊行。豈求伴侶。九霄絕翳。何在穿通。一段光明。未曾昏昧。苦到者裏。體寂寂常的。的日赫。燄無邊表。圓覺空中。不動搖。吞燦乾坤。迥然照。夫佛出世者。元無出入。名相無體。道本如如。法爾天真。不同修證。祇要虛閑。不昧作用。不涉塵泥。箇中纖毫。道不盡。卽爲魔王眷屬。句前句後。是學人難處。所以一句當天。八萬門永絕。生死直饒得似秋潭月影。靜夜鐘聲。隨扣

擊。以無虧觸波瀾。而不散。猶是生死岸頭事。道人行處。如火銷冰。終不却成冰。箭既離弦。無返回勢。所以牢籠不肯住。呼喚不回頭。占聖不安排。至今無處所。若到者裏。步步登玄。不屬邪正。識不能識。智不能知。動便失宗。覺卽迷旨。二乘膽顫。十地魂驚。語路處絕。心行處滅。直得釋迦。掩室於摩竭。淨名杜口于毗耶。須菩提唱無說。而顯道。釋梵絕聽。而雨花。若與麼見前。更疑何事。沒棲泊處。離去來。今限約不得。心思路絕。不因莊嚴本來真淨。動用語笑。隨處明了。更無欠少。今時人不悟箇中道理。妄自涉事。涉塵處。處染著。頭頭繫絆。縱悟則塵境紛紜。名相不實。便擬凝心。斂念。攝事。歸空。閉目藏睛。纔有念起。旋旋破除。細想纔生。卽便遏捺。如此見解。卽是落空亡底。外道魂不散底。死人冥冥漠漠。無覺無知。塞耳偷鈴。徒自欺誑者。裏分別。則不然也。不是隈門。傍戶。句句現前。不得商量。不涉文墨。本絕塵境。本無位次。權名箇出家兒。畢竟無踪迹。眞如凡聖。地獄人天。祇是癡狂子之方虛空。尙無改變。大道豈有昇沉。悟則縱橫不離本際。若

到者裏凡聖也無立處。若向句中作意。則沒溺殺人。若向外馳求。又落魔界。只如向上。沒可安排。恰似焰爐不藏蚊蚋。此理本來平坦。何用剷除動靜。揚眉是真解脫道。不疆爲意。度建立乖真。若到者裏。纖毫不受指意。則差便是千聖出頭來也。安一字不得久立珍重。

長慶稜禪師上堂良久曰。莫道今夜較些子。便下座上堂。撞著道伴。交肩過一生參學事畢。

上堂淨潔打疊了也。却近前問我。覓我劈脊與你一棒。有一棒到你。你須生慚愧。無一棒到你。你又向甚麼處會。

鼓山晏國師上堂良久曰。南泉在日。亦有人舉要。且不識南泉。卽今莫有識南泉者麼。試出來對衆驗看。時有僧出禮拜。纔起。師曰。作麼生。僧近前曰。咨和尚。師曰。不才請退。乃曰。經有經師。論有論師。律有律師。有函有號。有部有帙。各有人傳持。且佛法是建立教禪道。乃止啼之說。他諸聖出興。蓋爲人心不等。巧開方便。遂有多門受疾。不同處方。還異在有破有。居空

叱空三思。既除中道。須遣鼓山。所以道句不當。機言非展。事承言者。喪滯句者。迷不唱言。前寧談句。後直至釋迦。掩室淨名。杜口大士。梁時童子。當日一問二問三問。盡有人了也。諸仁者。合作麼生。

明招謙禪師上堂。金鋒敵勝。罕遇知音。同死同生。萬中無一。尋言逐句。其數河沙。舉古舉今。滅胡種族。向上一路。啐啄猶乖。儒士相逢。握鞭回首。沙門所見。誠實苦哉。拋却真金。隨隊撮土。報諸稚子。莫謾波波。解得他玄。猶兼瓦礫。不如一擲。驚過太虛。祇者靈鋒。阿誰敢近。任君來箭。方稱丈夫。擬欲吞聲。不消一鏹。

羅漢琛禪師上堂。宗門玄妙。爲當祇恁麼也。更別有奇特。若別有奇特。汝且舉將來。看若無去。不可將兩箇字。便當却宗乘也。何者。兩箇字。謂宗乘教乘也。汝纔道著。宗乘便是。宗乘道著。教乘便是。教乘禪德。佛法宗乘。元來由汝口裏。安立名字。作取說取。便是也。斯須向者裏。說平說實。說圓說常。禪德汝喚甚麼作平實。把甚麼作圓常。傍家行脚。理須甄別。莫相埋沒。得些子聲色名字。貯在心頭。道我會解善能揀辨。汝

且會箇甚麼。揀箇甚麼。記得底是名字。揀辨得底是聲色。若不是聲色名字。汝又作麼生記持。揀辨風吹松樹。也是聲。蝦蟇老鴰叫。也是聲。何不那裏聽取。揀擇去。若那裏有箇意度模樣。祇如老師口裏。又有多少意度。與上座莫錯。卽今聲色。縱縱地爲當相。及不相。及若相。及卽汝靈性。金剛祕密。應有壞滅去也。何以如此。爲聲貫破汝耳色。穿破汝眼。因緣卽塞。却汝幻妄。走殺汝聲色。體爾不可容也。若不相。及又甚麼處得聲色來。會麼。相及不相。及試裁辨看。少間又道是圓常平實。甚麼人恁麼道。未是黃夷村裏漢。解恁麼說。是他古聖垂些子相助顯發。今時不識好惡。便安圓實道。我別有宗風。玄妙釋迦。佛無舌頭。不如汝些子。便恁麼點胸。若論殺盜淫罪。雖重猶輕。尙有欺時。此箇謗般若。瞎却衆生眼。入阿鼻地獄。吞鐵丸。莫將爲等閒。所以古人道。過在化主。不干汝事。珍重。安國球禪師上堂。我此間粥飯。因緣爲兄弟舉唱。終是不常欲得省要。却是山河大地。與汝發明其道。旣常亦能究竟。若從文殊門入者。一切無爲。土木瓦礫。

助汝發機。若從觀音門入者。一切音響。蝦蟇蚯蚓。助汝發機。若從普賢門入者。不動步而到。以此三門方便。示汝如將一隻折箸。攪大海水。令彼魚龍。知水爲命。會麼。若無智眼。而審諦之任。汝百般巧妙。不爲究竟。水陸儼禪師上堂。大衆集定。師下座。捧香爐。巡行大衆前。曰。供養十方諸佛。便歸方丈。龍濟修禪師上堂。具足凡夫法。凡夫不知具足聖人法。聖人不會聖人。若會卽是凡夫。凡夫若知卽是聖人。此兩語一理二義。若人辨得。不妨於佛法中有箇入處。若辨不得。莫道不疑好珍重。上堂。卷簾除却障。閉戶生空礙。祇者障與礙。古今無人會得。是障礙。不會不自在。潯山祐禪師上堂。夫道人之心。質直無僞。無背無面。無詐妄心。一切時中。視聽尋常。更無委曲。亦不閉眼塞耳。但情不附物。卽得從上諸聖。祇說濁邊過患。若無如許多惡覺情。見想習之事。譬如秋水澄淨。清淨無爲。澹泞無礙。喚他作道人。亦名無事人。時有僧問。



頓悟之人更有修否。師曰：若真悟得本，他自知時。修與不修，是兩頭語。如今初心雖從緣得，一念頓悟，自理猶有無始曠劫習氣，未能頓淨。須教渠淨除現業流識，卽是修也。不可別有法教渠修行，趣向從聞入理，聞理深妙，心自圓明，不居惑地。縱有百千妙義，抑揚當時，此乃得坐披衣，自解作活計，始得以要言之。則實際理地，不受一塵。萬行門中，不捨一法。若也單刀直入，則凡聖情盡，體露真常，理事不二，卽如如佛。上堂：僧出曰：請和尚爲衆說法。師曰：我爲汝得徹困也。僧禮拜。

上堂：仲冬嚴寒，年年事暑，運推移事。若何仰山進前叉手而立。師曰：我情知汝答者話，不得香嚴曰：某甲偏答得者。話師躡前問，嚴亦進前叉手而立。師曰：賴遇寂子不會。

上堂：今時人但直下體取，不會底，正是汝心。正是汝佛。若向外得一知一解，將爲禪道，且沒交涉。名運糞入，不名運糞出。汙汝心田，所以道不是道。

上堂：老僧百年後，向山下作一頭水牯牛。左脇下書

五字曰：潯山僧某甲。當恁麼時，喚作潯山僧。又是水牯牛。喚作水牯牛。又是潯山僧。畢竟喚作甚麼。卽得仰山出禮拜而退。雲居膺代曰：師無異號。資福實曰：當時但作此。○相拓呈之。新羅和尚作此。④拓呈之。又曰：同道者方知芭蕉徹作此。○相拓呈之。又曰：說也說了。也注也注了。也悟取好。乃述偈曰：不是潯山不是牛。一身兩號實難酬。離却兩頭應須道。如何道得出常流。

仰山寂禪師住東平時，潯山令僧送書并鏡與師。師上堂提起示衆曰：且道是潯山鏡，東平鏡。若道是東平鏡，又是潯山送來。若道是潯山鏡，又在東平手裏。道得則留取道不得則撲破去也。衆無語。師遂撲破便下座。

上堂：汝等諸人各自回光返照。莫記吾言。汝無始劫來，背明投暗，妄想根深，卒難頓拔。所以假設方便，奪汝麤識。如將黃葉止啼，有甚麼是處。亦如人將百種貨物與金寶作一鋪貨賣，擬輕重來較。所以道石頭是眞金鋪。我者裏是雜貨鋪。有人來覓鼠糞，我亦

拈與他來覓真金。我亦拈與他。時有僧問鼠糞。即不要請和尚真金。師曰。嚙齧擬開口。驢年亦不會。僧無對。師曰。索喚則有。交易不索喚。則無我。若說禪。宗身邊要一人相伴。亦無。豈況有五百七百家耶。我若東說西說。則爭頭向前。采拾如將空拳誑小兒。都無實處。我今分明向汝說聖邊事。且莫將心湊泊。但向自己性海。如實而修。不要三。明六。通。何以故此。是聖末邊事。如今且要識心。達本。但得其本。不愁其末。他時後日。自具去在。若未得本。縱饒將情學。他亦不得。汝豈不見。瀉山和尚云。凡聖情盡。體露。真常事理不二。即如如佛。

香巖閒禪師上堂。若論此事。如人上樹。口銜樹枝。脚不踏枝。手不攀枝。樹下忽有人問。如何是祖師西來意。不對他。又違他所問。若對他。又喪身失命。當恁麼時。作麼生。即得。時有虎頭招上座出。衆云。樹上即不問。未上樹時。請和尚道。師乃呵呵大笑。上堂。道由悟達。不在語言。況是密密堂堂。曾無間隔。不勞心意。暫借回光。日用全功。迷途自肯。

芭蕉清禪師上堂。拈拄杖示衆。曰。你有拄杖子。我與你拄杖子。你無拄杖子。我奪却你拄杖子。靠拄杖下座。

上堂。如人行次。忽遇前面萬丈深坑。背後野火來逼。兩畔是荊棘叢林。若也向前。則墮在坑塹。若也退後。則野火燒身。若也轉側。則被荊棘林礙當。與麼時。作麼生。免得。若也免得。合有出身之路。若免不得。墮身死漢。

上堂。我年二十八。到仰山。參見南塔。見上堂。曰。汝等諸人。若是箇漢。從娘肚裏出來。便作獅子吼。好麼。我於言下。歇得身心。便住五載。

鹿苑和尚上堂。展手曰。天下老和尚。諸上座。命根總在者裏。有僧出曰。還收得也。無師曰。天台石橋側。曰某甲不恁麼。師曰。伏惟和尚鑒。

芭蕉圓禪師上堂。三千大千世界。夜來被老僧都合成一塊。輒向須彌頂上。帝釋大怒。拈得撲成粉碎。諸上座。還覺頭痛也。無良久。曰。莫不識痛痒。好珍重。承天確禪師示衆。正令提綱。猶是捏窠。造僞佛法。祇

對特地謾罵上流問著卽參差答著卽交互大德擬向甚麼處下口然則如是事無一向權柄在手縱奪臨機有疑請問

資福邃禪師上堂隔江見資福利竿便回去脚根下好與三十棒況過江來時有僧纔出師曰不堪共語芭蕉徹禪師上堂眼中無翳空裏無花水長船高泥多佛大莫將問來我也無答會麼問在答處答在問處便下座

臨濟玄禪師上堂僧問如何是真佛真法真道乞師開示師曰佛者心清淨是法者心光明是道者處處無礙淨光是三卽一皆是空名而無實有如真正作道人念念心不間斷自達磨大師從西土來祇是覓箇不受人惑底人後遇二祖一言便了始知從前虛用功夫山僧今日見處與祖佛不別第一句中薦得堪與祖佛爲師若第二句中薦得堪與人天爲師若第三句中薦得自救不了僧便問如何是第一句師曰三要印開朱點窄未容擬議主賓分曰如何是第二句師曰妙解豈容無著問漚和爭負截流機曰如

何是第三句師曰但看棚頭弄傀儡抽牽全藉裏頭人乃曰大凡演唱宗乘一句中須具三玄門一玄門須具三要有權有實有照有用汝等諸人作麼生會示衆參學之人大須仔細如賓主相見便有言論往來或應物現形或全體作用或把機權喜怒或現半身或乘獅子或乘象王如有真正學人便喝先拈出一箇膠盆子善知識不辯是境便上他境上作模作樣便被學人又喝前人不肯放下此是膏盲之病不堪醫治喚作賓看主或是善知識不拈出物祇隨學人問處卽奪學人被奪抵死不肯放此是主看賓或有學人應一箇清淨境出善知識前知識辨得是境把得拋向坑裏學人言大好善知識知識卽云咄哉不識好惡學人便禮拜此喚作主看主或有學人披枷帶鎖出善知識前知識便與安一重枷鎖學人歡喜彼此不辨喚作賓看賓大德山僧所舉皆是辨魔揀異知其邪正

上堂有一人論劫在途中不離家舍有一人離家舍不在途中那箇合受人天供養

上堂一人在孤峰頂上無出身路一人在十字街頭亦無向背且道那箇在前那箇在後不作維摩詰不作傳大士珍重

示衆我有時先照後用有時先用後照有時照用同時有時照用不同時先照後用有人先用後照有法在照用同時驅耕夫之牛奪饑人之食敲骨取髓痛下針錐照用不同時有問有答立賓立主合水和泥應機接物若是過量人向未舉已前掇起便行猶較些子

上堂大衆夫爲法者不避喪身失命我于黃檗先師處三度問佛法的大意三度被打如蒿枝拂相似如今更思一頓誰爲下手時有僧出曰某甲下手師度與拄杖僧擬接師便打

興化獎禪師示衆我聞前廊下也喝後架裏也喝諸子汝莫盲喝亂喝直饒喝得興化向虛空裏却撲下來一點氣也無待我蘇息起來向汝道未在何故我未曾向紫羅帳裏撒珍珠與汝諸人去在胡喝亂喝作麼

三聖然禪師上堂我逢人卽出出則不爲人便下座灌溪閒禪師上堂曰我在臨濟爺爺處得半杓末山孃孃處得半杓共成一杓喫了直至如今飽不饑

上堂十方無壁落四畔亦無門露裸裸赤灑灑無可把便下座

幽州空和尚上堂衆集有僧出曰擬問不問時如何師曰噯僧便喝師曰因僧又喝師拈拄杖僧曰瞎師拋下拄杖曰今日失利僧曰草賊大敗便歸衆師以手向空點一點曰大衆還有人辨得麼若有辯得者出來對衆道看師良久曰頂門上眼也鑒不破便下座

南院頌禪師上堂赤肉團上壁立千仞僧問赤肉團上壁立千仞豈不是和尚道師曰是僧便掀倒禪床師曰者瞎驢亂作僧擬議師便打

上堂諸方祇具啐啄同時眼不具啐啄同時用僧便問如何是啐啄同時用師曰作家不啐啄啐啄同時失曰此猶未是某甲問處師曰汝問處作麼生僧曰失師便打其僧不肯後於雲門會下聞二僧舉此話

一僧曰。當時南院棒折。那其僧忽契悟。

風穴沼禪師上堂。夫參學。眼目臨機。直須大用。現前勿自拘於小節。設使言前薦得。猶是滯殼迷封。縱然句下精通。未免觸途狂見。應是從前依他作解。明珠兩岐。與你一時掃却。直教箇箇如獅子兒。吒呀地。哮吼一聲。壁立千仞。誰敢正眼覷著。覷著卽瞎却渠眼。時有僧問。如何是正法眼。師曰。卽便覷瞎。曰。覷瞎後如何。師曰。撈天摸地。

上堂。舉寒山詩曰。梵志死去來。魂識見閻老。讀盡百王書。未免受捶撻。一稱南無佛。皆以成佛道。僧問。如何是一稱南無佛。師曰。燈連鳳翅。當堂照月映娥眉。賴面看。

上堂。若立一塵家國。與盛野老。顰蹙不立一塵家國。喪亡野老安帖。於此明得。闍黎無分。全是老僧。於此不明。老僧却是闍黎。闍黎與老僧亦能悟却天下人。亦能瞎却天下人。欲識闍黎麼。右邊一拍者。裡是欲識老僧麼。左邊一拍者。裏是。

上堂。若是上上之流。各有證據。略赴箇程限。中下之

機。各須英俊。當處出生。隨處滅盡。如爆龜紋爆。卽成兆。不爆成鈍。欲爆不爆。直下便捏。

上堂。三千劍客。恥見莊周。赤眉橫肩。得無訛謬。他時變豹。後五日看珍重。

首山念禪師上堂。第一句薦得堪與佛祖爲師。第二句薦得堪與人天爲師。第三句薦得自救不了。時有僧問。如何是第一句。師曰。大用不揚。肩棒下須見血。曰。慈悲何在。師曰。送出三門外。問。如何是第二句。師曰。不打恁麼驢漢。曰。將接何人。師曰。如斯爭柰何。問。如何是第三句。師曰。解問無人答。曰。卽今祇對者是誰。師曰。莫使外人知。曰。和尚是第幾句薦得。師曰。月落三更。穿市過。問。維摩默然。文殊贊善。未審此意。如何。師曰。當時聽衆。必不如是。曰。旣不如是。維摩默然。又且如何。師曰。知恩者少。負恩者多。乃曰。若論此事。實不甚一箇元子脚便下座。

上堂。三要得親切。第一莫將問來問。還會麼。問在答處。答在問處。汝若將問來問。老僧在汝脚底。汝若擬議。卽沒交涉。時有僧出禮拜。師便打僧便問。挂錫幽



巖時如何師曰錯僧曰錯師又打

汾陽昭禪師上堂謂衆曰汾陽門下有西河獅子當門踞坐但有來者即便毆殺有何方便入得汾陽門見得汾陽人若見汾陽人者堪與祖佛爲師不見汾陽人盡是立地死漢如今還有人入得麼快須入取免得孤負平生不是龍門客切忌遺點額那箇是龍門客一齊點下舉起拄杖曰速退速退珍重

上堂先聖云一句語須具三玄門一玄門須具三要阿那箇是三玄三要底句快會取好各自思量還得穩當也未古德已前行脚聞一箇因緣未明中間直下飲食無味睡臥不安火急決擇莫將爲小事所以大覺老人爲一大事因緣出現于世想計他從上行脚不爲遊山翫水看州府奢華片衣口食皆爲聖心未通所以驅馳行脚決擇深奧傳唱敷揚博問先知親近高德益爲續佛心燈紹隆祖代與崇聖種接引後機自利利他不忘先跡如今還有商量者麼有卽出來大家商量僧問如何是接初機底句師曰汝是行脚僧曰如何是辯衲僧底句師曰西方日出卽曰

參寥子

如何是正令行底句師曰千里特來望舊面曰如何是立乾坤底句師曰北俱盧洲長粳米食者無貪亦無瞋乃曰將此四轉語驗天下衲僧纔見你出來驗得了也問如何是學人著力處師曰嘉州打大象曰如何是學人轉身處師曰陝府灌鐵牛曰如何是學人親切處師曰西河弄獅子乃曰若人會此三句已辯三玄更有三要語在切須薦取不是等閒與大衆頌出三玄三要事難分得意忘言道易親一句明明該萬象重陽九日菊花新

上堂凡一句語須具三玄門每一玄門須具三要。有照有用。或先照後用。或先用後照。或照用同時。或照用不同。時先照後用。且要共你商量。先用後照。你也須是箇人。始得照用。同時你作麼生。當抵照用不同時。你又作麼生。湊泊。

上堂汾陽有三訣。衲僧難辨別。更擬問如何。拄杖蘸頭。喫時有僧問。如何是三訣。師便打。僧禮拜。師曰。爲汝一時。頌出第一訣。接引無時。節巧語不能詮。雲綻青天月。第二訣。舒光辨賢哲。問答利生心。拔却眼中

楔第三訣西國胡人說濟水過新羅北地用鑛鐵復  
曰還有人會麼會底出來通箇消息要知遠近莫祇  
怎麼記言記語以當平生有甚麼利益不用久立珍  
重

上堂謂衆曰夫說法者須具十智同真若不具十智  
同真邪正不辯縑素不分不能與人天爲眼目決斷  
是非如鳥飛空而折翼如箭射的而斷弦斷弦故射  
的不中翼折故空不可飛弦壯翼牢空的俱徹作麼  
生是十智同真與諸上座點出一同一質二同大事  
三總同參四同真志五同徧普六同具足七同得失  
八同生殺九同音吼十同得入又曰與甚麼人同得  
入與阿誰同音吼作麼生是同生殺甚麼物同得失  
阿那箇同具足是甚麼同徧普何人同真志孰能總  
同參那箇同大事何物同一質有點得出底麼點得  
出者不吝慈悲點不出來未有參學眼在切須辯取  
要識是非面目見在不可久立珍重

葉縣省禪師上堂宗師血脉或凡或聖龍樹馬鳴天  
堂地獄鑊湯爐炭牛頭獄卒森羅萬象日月星辰他

方此土有情無情以手畫一畫云俱入此宗此宗門  
中亦能殺人亦能活人殺人須得殺人刀活人須得  
活人句作麼生是殺人刀活人句道得底出來對衆  
道看若道不得卽孤負平生珍重

上堂良久曰夫行脚禪流直須著忖參學須具參學  
眼見地須得見地句方有相親分始得不被諸境惑  
亦不落于惡道畢竟如何委悉有時句到意不到妄  
緣前塵分別影事有時意到句不到如盲摸象各說  
異端有時意句俱到打破虛空界光明照十方有時  
意句俱不到無目之人縱橫走忽然不覺落深坑  
神鼎譚禪師上堂覺洞山曰貪嗔癡太無知賴我今  
朝識得伊行便打坐便槌分付心王子細推無量劫  
來不解脫問汝三人知不知師曰古人怎麼道神鼎  
則不然貪嗔癡實無知十二時中任從伊行卽往坐  
卽隨分付心王擬何爲無量劫來元解脫何須更問  
知不知

谷隱聰禪師示衆第一句道得石裏迸出第二句道  
得挨拶將來第三句道得自救不了

上堂。五白貓兒爪距。獐獐來堂上。絕處行分明。上樹安身法。切忌遺言許外生。作麼生是許外生。底句莫錯舉。

廣慧璉禪師上堂。臨濟兩堂首座相見。同時下喝。諸人且道。還有賓主也。無若道有。祇是箇瞎漢。若道無。亦是箇瞎漢。不有不無。萬里崖州。若向者裡道得也。好與三十棒。若道不得。亦與三十棒。衲僧家到者裏。作麼生出得。山僧圈襪去良久。曰。苦哉。蝦蟆蚯蚓。跳上三十三天。撞著須彌山。百雜碎。拈拄杖曰。一隊無孔鐵鎚。速退速退。

三交嵩禪師上堂。文殊仗劍。五臺橫行。唐明一路把斷。妖訛三世諸佛。未出教乘。網底游魚。龍門難渡。垂釣四海。祇釣獐龍。格外玄談。爲求知識。若也舉揚。宗旨須彌。直須粉碎。若也說佛說祖。海水便須枯竭。寶劍揮時。毫光萬里。放汝一路通方。說話把斷咽喉。諸人甚處出氣。

石霜圓禪師上堂。一切諸佛及諸佛阿耨多羅三藐三菩提法。皆從此經出。乃豎起拄杖曰。者箇是南源。

拄杖子。阿那箇是經。良久曰。向下文長。付在來日。喝一喝下座。

上堂。先寶應曰。第一句薦得。堪與祖佛爲師。第二句薦得。堪與人天爲師。第三句薦得。自救不了。道吾則不然。第一句薦得。和泥合水。第二句薦得。無繩自縛。第三句薦得。四稜著地。所以道起也。海晏河清。行人避路。住也。乾坤失色。日月無光。汝輩向甚麼處出氣。如今還有出氣者麼。有卽出來。對衆出氣。看如無道。吾爲汝出氣去也。乃噓一聲。卓拄杖下座。

上堂。道吾打鼓。四大部洲同參。拄杖橫也。挑括乾坤大地。鉢盂覆也。蓋却恒沙世界。且問諸人。向甚麼處安身立命。若也知得。向北俱盧洲喫粥喫飯。若也不知。長連上床喫粥喫飯。

上堂。一喝分賓主。照用一時行。要會箇中意。日午打三更。遂喝一喝曰。且道是賓是主。還有分得者麼。若也分得。朝打三千。暮打八百。若也未能。老僧失利。上堂。夫宗師者。奪貧子之衣珠。究達人之見處。若不如是。盡是和泥合水。漢良久曰。路逢劍客須呈劍。不

是詩人莫獻詩喝一喝

上堂我有一言絕慮忘緣巧說不得祇要心傳更有一語無過直舉且作麼生是直舉一句良久以拄杖畫一畫喝一喝

上堂面西行向東北斗正離宮道去何曾去騎牛臥牧童珍重

上堂春生夏長即不問你諸人脚跟下一句作麼生道良久曰華光寺主便下座

上堂藥多病甚網細魚稠便下座

示衆以拄杖擊禪床一下云大衆還會麼不見道一擊忘所知更不假修持諸方達道者咸言上上機香嚴恁麼悟去分明悟得如來禪祖師禪未夢見在且道祖師禪有甚長處若向言中取則悞賺後人直饒棒下承當孤負先聖萬法本閒唯人自闢所以山僧居福嚴祇見福嚴境界晏起早眠有時雲生碧嶂月落寒潭青聲鳥飛鳴般若臺前娑羅花香散祝融峰畔把瘦筇坐磐石與五湖禪子時話玄微灰頭土面住與化祇見與化家風迎來送去門連城市車馬聯

闌漁唱瀟湘猿啼嶽麓絲竹謳謠時時入耳復與四海高人日談禪道歲月都忘且道居深山住城郭還有優劣也無試道看良久云是處是慈氏無門無善財

上堂祖師心印一印印空一印印水一印印泥如今還有印不著者麼試向脚跟下道將一句來設你道得個儻分明第一不得行過衲僧門下且道衲僧有甚麼長處良久曰人王三寸鐵偏地是刀鎗喝一喝卓拄杖下座

上堂天已曉鼓已響衆臻齊合掌如今還有不合掌者麼有即尼乾歡喜無則瞿曇惡發久立珍重

上堂北山南南山北日月雙明天地黑大海江河盡放光逢著觀音問彌勒珍重

瑯邪覺禪師上堂奇哉十方佛元是眼中花欲識眼中花元是十方佛欲識十方佛不是眼中花欲識眼中花不是十方佛於此明得過在十方佛於此未明聞起舞獨覺臨粧珍重

上堂欲知常住身當觀爛壞體欲知常住性當觀拄

杖子拄杖子吞却須彌須彌吞却拄杖子。衲僧到者裡若也擬議。劍梁落膊。輪降款鐵作胸襟。到海隅擊禪床下座。

上堂。見聞覺知俱爲生死之因。見聞覺知正是解脫之本。譬如獅子反擲南北東西。且無定止。汝等諸人若也不會。且莫孤負釋迦老子。吽。

上堂。山僧今日爲諸人說破明眼衲僧。莫去泥裡打坐珍重。

上堂。天高莫測。地厚寧知。白雲片片。嶺頭飛。綠水潺潺。下急東浦。西沒一句。卽不問你生前殺後一句。作麼生道。良久曰。時寒喫茶去。

上堂。阿呵呵。是甚麼開口。是合口。過輕舟。短掉。汎波心。簑衣笠笠。從他破。咦。

上堂。剪除狂寇。掃蕩攪搶。猶是功勳邊事。君臣道合。海晏河清。猶是法身邊事。作麼生是衲僧本分事。良久曰。透網金鱗。猶滯水迴塗。石馬出紗籠。上堂。承言須會。宗勿自立規矩。若人下得通方句。我當刎頸而謝之。

上堂。拈起拄杖曰。山僧有時一棒作箇漫天網。打俊鷹快鷂。有時一棒作箇布絲網。擺蝦撈蝦。有時一棒作金毛獅子。有時一棒作蝦蟇。蚯蚓。山僧打你一棒。且作麼生商量。你若縑素得出。不妨拄杖頭上眼開。照四天下。若也未然。從教立在古屏畔。待使丹青入畫圖。

上堂。擊水魚頭痛。穿林宿鳥驚。黃昏不擊鼓。日午打三更。諸禪德。既是日午爲甚。却打二更。良久曰。昨見垂楊絲。今逢落葉黃。

上堂。進前卽死。退後卽亡。不進不退。又落在無事之鄉。何故。長安雖樂。不是久居。

上堂。山僧因看華嚴金獅子章。第九由心回轉。善成門。又釋曰。如一尺之鏡。納重重之影象。若然者。道有也得道。無也得道。非亦得道。是亦得道。雖然如是。更須知有拄杖頭上一竅。若也不會。拄杖子穿燈籠。入佛殿。撞著釋迦。磕倒彌勒。露柱拊掌呵呵大笑。你且道。笑箇甚麼。卓拄杖下座。

上堂。拈拄杖曰。盤山道向上一路。滑南院道壁立千



一乃「前古集卷之九」  
仞嶮臨濟道石火電光鈍琅邪有定乾坤底句各各  
高著眼高著眼卓拄杖下座

列祖提綱錄卷第七

列祖提綱錄卷第八

武林十八澗理安禪寺住持婁東行悅集

五參提綱

大愚芝禪師上堂大愚相接大雄孫五湖雲水競頭  
奔競頭奔有何門擊箭寧知枯木存枯木存一年還  
曾兩度春兩度春帳裏珍珠撒與人撒與人思量也  
是慕西秦

上堂一擊響玲瓏喧轟宇宙通知音纔側耳項羽過  
江東與麼會恰認得驢鞍橋作阿爺下頷

上堂豎窮三際橫遍十方拈起也帝釋心驚放下也  
地神膽戰不拈不放喚作甚麼自云蝦蟇

上堂三世諸佛不知有狸奴白牯却知有乃拈起拂  
子云狸奴白牯總在者裡放光動地何謂如此兩段

同難偏

不同

上堂大洋海底排班立從頭第二鬢毛斑爲甚麼不  
道第一鬢毛斑要會麼金藥銀絲成玉露高僧不坐  
鳳凰臺

上堂衆集乃曰爲衆竭力禍出私門便下座

示衆擎起香合云明頭合暗頭合道得天下橫行若  
道不得且合却下座

上堂沙裏無油事可哀翠巖嚼飯餒嬰孩他時好惡  
知端的始覺從前滿面埃擊禪床下座

法華舉禪師上堂釋迦不出世達磨不西來佛法偏  
天下談玄口不開

上堂鐘鳴鼓響鵲噪鴉鳴爲你諸人說般若講涅槃  
了也諸人還信得及麼觀音菩薩向諸人面前作大  
神通若信不及却往他方救苦救生去也

上堂開口又成增語不開口又成剩語乃曰金輪天  
子勅草店家風別

上堂三世諸佛口挂壁上天下老和尚作麼生措手  
你諸人到諸方作麼生舉山僧怎麼道也是久日樺

來唇喝一喝

上堂古者道我若一向舉揚宗教法堂裏草深一丈不可爲闍黎鎖却僧堂門去也雖然如是也是烏龜陸地弄塵行

上堂語漸也返常合道論頓也不留朕迹直饒論其頓返其常也是抑而爲之

浮山遠禪師上堂諸佛出世建立化門不離三身智眼亦如摩醯首羅三目何故一隻水泄不通縈素難辨一隻大地全開十方通暢一隻高低一顧萬須齊瞻雖然若是本分衲僧陌路相逢別具通天正眼始得所以道三世諸佛不知有狸奴白牯却知有且道狸奴白牯知有箇甚麼事要會麼深秋簾幙千家雨落日樓臺一笛風

寶應昭禪師上堂十二時中許你一時絕學卽是學佛法不見阿難多聞第一却被迦葉擯出不得結集方知聰明博學記持憶想向外馳求與靈覺心轉沒交涉五蘊殼中透脫不過順情生喜違情生怒蓋覆深厚自纏自縛無有解脫流浪生死六根爲患衆苦

所逼無自由分而被妄心於中主宰大丈夫兒早構取好喝一喝曰參

上堂寶應門風險入者喪全身作麼生是出身一句若道不得三十年後

達觀穎禪師示衆曰纔涉唇吻便落意思盡是死門俱非活路直饒透脫猶在沉淪莫教孤負平生虛度此世要得不孤負平生麼拈拄杖卓一下曰須是莫被拄杖瞞始得看看拄杖子穿過你諸人髑髏蹣跚入你鼻孔裏去也又卓一下

上堂山僧門庭別已改諸方轍爲文殊拔出眼裏楔教普賢休嚼口中鐵勸人放開髑髏蛇手與汝斫却緊驢橛駐意擬思量喝曰捏捏參

上堂山僧平生意好相撲祇是無人搭對今日且共首座搭對捲起袈裟下座索首座相撲座纔出師曰平地上喫交便歸方丈

上堂三世諸佛是奴婢一大藏教是涕唾良久曰且道三世諸佛是誰奴婢乃將拂子畫一畫曰三世諸佛過者邊且道一大藏教是誰涕唾師乃自唾一唾

上堂秤錘井底忽然浮老鼠多年變作牛慧空見了拍手笑三脚糊猴差異猴

上堂五千教典諸佛常談八萬塵勞衆生妙用猶未是金剛眼睛在如何是金剛眼睛良久曰瞎

上堂大衆集定有僧纔出禮拜師曰欲識佛性義當觀時節因緣僧便問如何是時節因緣師便下座

上堂諸方釣又曲餌又香奔湊猶如蜂抱王因聖者裏釣又直餌又無猶如水底捺葫蘆舉拄杖作釣魚勢曰深水取魚長信命不曾將酒祭江神擲拄杖下座

大寧寬禪師上堂少林妙訣古佛家風應用隨機卷舒自在如拳作掌開合有時似水成漚起滅無定動靜俱顯語嘿全彰萬用自然不勞心力到者裏喚作順水放船且道逆風舉棹誰是好手良久曰弄潮須是弄潮人喝一喝曰珍重

上堂無念爲宗無住爲本真空爲體妙有爲用所以道盡大地是真空徧法界是妙有且道是甚麼人用得四時運用日月長明法本不遷道無方所隨緣自

在逐物昇沉此土他方入凡入聖雖然如是且道入鄉隨俗一句作麼生道良久曰西天梵語此土唐言雲峰悅禪師上堂竿木隨身逢場作戲然雖如是一手不獨拍衆中莫有作家禪客本分衲僧出來共相唱和有麼時有僧出禮拜師曰依稀似曲纔堪聽又被風吹別調中便下座

上堂普賢行文殊智補陀巖上清風起睹驢趨隊過新羅吉獠舌頭三千里

上堂拈起拄杖曰掌鉢孟向香積世界爲甚麼出身無路挑日月於拄杖頭上爲甚麼有眼如盲直得風行草偃響順聲和無纖芥可留猶是交爭底法作麼生是不交爭底法卓拄杖下座

上堂教中道種種取捨皆是輪回未出輪回而辨圓覺彼圓覺性卽同流轉若免輪回無有是處你等諸人到者裏且作麼生辨圓覺良久曰荷葉團團圓似鏡菱角尖尖尖似錐以拂擊禪床

大乘遵禪師上堂上來又不問下去又不疑不知是不是是卽也大奇便下座

仁壽珍禪師上堂明明無悟有法卽迷日上無雲麗  
天普照眼中無翳空本無花無智人前不得錯舉參  
翠巖眞禪師上堂先德道此事如爆龜文爆卽成兆  
不爆成鈍爆與不爆直下便捏上藍卽不然無固無  
必虛空走馬旱地行船南山起雲北山下雨遂拈拄  
杖曰拄杖子變作天大將軍巡歷四天下有守節不  
守節有戒行無戒行一時奏與天帝釋乃喝一喝曰  
丈夫自有衝天志莫向如來行處行卓一下

上堂舉龍牙頌曰學道如鑽火逢煙未可休直待金  
星現歸家始到頭神鼎曰學道如鑽火逢煙卽便休  
莫待金星現燒腳又燒頭師曰若論頓也龍牙正在  
半途若論漸也神鼎猶少悟在於此且復如何諸仁  
者今年多落葉幾處掃歸家

上堂臨陣抗敵不懼生死者將軍之勇也入山不懼  
虎兇者獵人之勇也入水不懼蛟龍者漁人之勇也  
作麼生是衲子之勇拈拄杖曰者箇是拄杖子拈得  
把得動得三千大千世界一時搖動若拈不得把不  
得動不得文殊自文殊解脫自解脫參

上堂舉僧問巴陵如何是道陵曰明眼人落井又問  
寶應如何是道應曰五鳳樓前又問首山如何是道  
山曰脚下深三尺此三轉語一句壁立千仞一句陸  
地行船一句賓主交參諸人莫有揀得者麼出來道  
看如無且行羅漢慈破結賊改行菩薩慈安衆生故  
行如來慈得如相故

武泉政禪師上堂黃梅席上海衆千人付法傳衣確  
坊行者是則紅日西昇非則月輪東上參

雙峰回禪師上堂南番人汎船塞北人搖擲波斯入  
大唐須彌山作舞是甚麼說話

道吾眞禪師上堂古今日月依舊山河若明得去十  
方薄伽梵一路涅槃門若明不得謗斯經故獲罪如  
是

上堂獅子兒哮吼龍馬駒踴跳古佛鏡中明三山孤  
月皎遂作舞下座

上堂舉洞山道五臺山上雲蒸飯佛殿塔前狗尿天  
剎竿頭上煎鑊子三箇糊獮夜簸錢老僧卽不然三  
面狸奴腳踏月兩頭白牯手擎煙戴冠碧兔立庭栢

脫殼烏龜飛上天老僧葛藤盡被汝諸人覷破了也  
洞山老人甚是奇特雖然如是祇行得三步四步且  
不過七跳八跳且道諸記在甚麼處老僧今日不惜  
眉毛一時布施良久曰叮嚀損君德無言真有功任  
從滄海變終不爲君通

上堂古人道認著依前還不是實難會土宿領下髭  
鬚多波斯眼深鼻孔大甚奇怪倏然透過新羅界  
上堂山前麥熟廬陵米價鎮州蘿蔔更有一般良久  
曰時挑野菜和根煮旋斫生柴帶葉燒

上堂普化明打暗打布袋橫撒豎撒石室行者踏確  
因甚忘却下脚

上堂舉僧問首山如何是佛山曰新婦騎驢阿家牽  
師曰手提巴鼻腳踏尾仰面看天聽流水天明送出  
路傍邊夜靜還歸茅屋裏

百丈政禪師上堂巖頭和尚用三文錢索得箇妻祇  
解撈蝦攪蜆要且不解生男育女直至如今門風斷  
絕大衆要識叢公妻麼百丈今日不惜唇吻與你諸  
人注破蓬鬢荊釵世所稀布裙猶是嫁時衣

大潯乾禪師上堂山花似錦文殊撞著眼睛幽鳥綿  
蠻觀音塞却耳際諸仁者更思量箇甚麼昨夜三更  
睡不著翻身捉得普賢貶向無生國裏一覺直至天  
明今朝又得與諸人相見說夢噫是甚麼說話卓拄  
杖下座

廣法源禪師上堂若論此事切莫道著道著即頭角  
生有僧出曰頭角生也師曰禪事曰某甲罪過師曰  
龍頭蛇尾伏惟珍重

定慧信禪師上堂若識般若即被般若縛若不識般  
若亦被般若縛識與不識拈放一邊却問諸人如何  
是般若體參堂去

上堂泥蛇咬石鼈露柱啾啾叫須彌打一棒闍老呵  
呵笑參

上堂鶯聲闌蟬聲急入水鳥龜頭不濕鶯鷺飛入蘆  
花叢雪月交輝俱不及吟

姜山方禪師上堂穿雲不渡水渡水不穿雲乾坤把  
定不把定虛空放行不放行橫三豎四乍離乍合將  
長補短即不問汝諸人飯是米做一句要且難道良



久曰私事不得官酬

上堂不是道得道不得諸方盡把爲奇特寒山燒火滿頭灰笑罵豐干者老賊

白鹿端禪師上堂摩騰入漢肉上剋瘡僧會來吳眼中添屑達磨九年面壁鬼魅之由二祖立雪求心翻成不肖汝等諸人到者裏如何吐露若也道得海上橫行若道不得林間獨臥以拄杖擊禪床一下

福嚴宗禪師上堂世尊周行七步舉足全乖目顧四方觸途成滯金襴授去殃及兒孫玉偈傳來挂人唇吻風幡悟性未離色塵鉢水投針全成管見祖師九年面壁不見纖毫盧公六代傳衣圖他小利江西一喝不解慎初德嶠全施未知護末南山鼈鼻謾指蹤由北院枯松徒彰風彩雲門顧鑒落二落三臨濟全提錯七錯八若說君臣五位直如紙馬過江更推賓主交參恰似泥人澡洗獨超象外且非捉兔走鷹混迹塵中未是蛟猪之狗何異逃坑墮壘正是避溺投置如斯之解正在常途出格道人如何話會豈不見陶潛俗子尙自觀事見機而今祖室子孫不可皮下

無血喝一喝

淨因臻禪師上堂拈拄杖曰柳栗木杖子善能談佛祖聾人既得聞瘧人亦解語指白石爲玉點黃金爲土便恁麼會去他家未相許不相許莫莽爾南街打鼓北街舞

衡嶽能禪師上堂宗風纔舉萬里雲收法令若行千峰寒色須彌頂上白浪滔天大海波中紅塵滿地應思黃梅昔日少室當年不能退已讓人遂使春糠答志斷臂酬心何似衡嶽者裏山畚粟米飯一桶沒鹽羹苦樂共住隨高就低且不是南頭買貴北頭賣賤直教文殊稽首迦葉攢眉龍樹馬鳴吞聲飲氣目連驚子且不能爲甚如此諦觀法王法法王法如是石佛忠禪師上堂點時不到皂白未分到時不點和泥合水露柱踉跳入燈籠裡卽且從他汝眉毛因甚麼却拖在脚跟下直饒於此明得也是糊獮戴席帽於此未明何異曲膳穿靴然雖如此笑我者多晒我者少

大潯詰禪師上堂古佛道昔於波羅柰轉四諦法輪

墮坑落壘今復轉最妙無上大法輪土上加泥如今  
還有不歷階梯獨超物外者麼良久曰出頭天外看  
誰是箇中人

上堂阿剌剌是甚麼翻思當年破竈墮杖子忽擊著  
方知孤負我以拄杖擊香臺一下曰墮墮

上堂捫空追響勞汝精神夢覺覺非復有何事德山  
老人在汝諸人眉毛眼睫上諸人還覺麼若也覺去  
夢覺覺非若也未覺捫空追響終無了期直饒向者  
裏個儻分明猶是梯山入貢還有獨超物外者麼良  
久曰且莫詐明頭

上堂白雲澹泞水注滄溟萬法本閒復有何事所以  
道也有權也有實也有照也有用諸人到者裏如何  
履踐良久曰但有路可上更高人也行

上堂山僧本無積畜且得粥足飯足困來即便打眠  
一任東卜西卜

上堂古德道一釋迦二和三佛陀自餘是甚麼碗  
脫丘慧光卽不然一釋迦二和三佛陀總是碗脫  
丘諸人還知慧光落處麼若也知去許你具鐵眼銅

睛若也不知莫謂幾經風浪險扁舟曾向五湖遊  
上堂拈起拄杖曰一塵纔起大地全收卓一下曰妙  
喜世界百雜碎且道不動如來卽今在甚麼處若人  
識得可謂不動步而登妙覺若也未識向諸人眉毛  
眼睫裏涅槃去也又卓一下

上堂拈起拄杖曰智海拄杖或作金剛王寶劍或作  
踞地獅子或作探竿影草或不作拄杖用諸人還相  
委悉麼若也委悉去如龍得水似虎靠山出沒卷舒  
縱橫應用如未相委大似日中逃影

普融平禪師上堂山僧不會佛法爲人總沒來由或  
時半開半合或時全放全收還如萬人叢裏冷地掉  
箇石頭忽然打著一箇方知觸處周流

上堂舉盤山示衆曰似地擎山不知山之孤峻如石  
含玉不知玉之無瑕古人恁麼說話大似抱賊叫屈  
智海門下人人慷慨生擒虎兇活捉獐龍眼裏著得  
須彌山耳裏著得大海水遂拈拄杖曰不是向人誇  
伎倆丈夫標致合如斯卓拄杖下座

慶善隆禪師上堂花簇簇錦簇簇鹽醬年來事事足  
留得南泉打破鍋分付沙彌煮晨粥晨粥一任諸人  
喫洗鉢盂一句作麼生會多少人疑著

香山淵禪師上堂酒市魚行頭頭寶所鴉鳴鵲噪一  
一妙音卓拄杖曰且道者箇是何佛事狼籍不少

上堂香山有箇話頭彌滿四大神洲若以佛法批判  
還如認馬作牛諸人既不作佛法批判畢竟是甚麼  
道理擊拂子無鑄鑊子不厭動搖半夜枕頭要須摸  
著下座

無相真禪師上堂欲明向上事須具頂門眼若具頂  
門眼始契出家心既契出家心常具頂門眼要會頂  
門眼麼四京人著衣喫飯兩浙人飽暖自如通玄峰  
頂香風清花發蟠桃三四株

黃龍南禪師上堂橫吞巨海倒卓須彌衲僧面前也  
是尋常茶飯行脚人須是荆棘林內坐大道場向和  
泥合水處認取本來面目且作麼生見得遂拈拄杖  
曰直饒見得未免山僧拄杖

上堂說妙談玄乃太平之姦賊行棒行喝爲亂世之

英雄英雄姦賊棒喝玄妙皆爲長物黃蘗門下總不  
用著且道黃蘗門下尋常用箇甚麼喝一喝  
上堂撞鐘鐘鳴擊鼓鼓響大衆慙懃問訊同安端然  
合掌者箇是世法那箇是佛法咄

上堂有一人朝看華嚴暮觀般若晝夜精勤無有暫  
暇有一人不參禪不論義把箇破席日裏睡於是二  
人同到黃龍一人有爲一人無爲安下那一箇即是  
良久曰功德天黑暗女有智主人二俱不受

上堂心王不妄動六國一時通罷拈三尺劍休弄一  
張弓擊禪床下座

上堂道遠乎哉觸事而真聖遠乎哉體之卽神乃拈  
拄杖曰道之與聖總在歸宗拄杖頭上汝等諸人何  
不識取若也識得十方刹土不行而至百千三昧無  
作而成若也未識有寒暑兮促君壽有鬼神兮妬君  
福

上堂半夜捉烏鷄驚起梵王睡毗嵐風忽起吹倒須  
彌山官路無人行私酒多人喫當此之時臨濟德山  
開得口張得眼有棒有喝用不得汝等諸人各自尋

取祖業契書莫認驢鞍橋作阿爺下領

上堂舉大珠和尚道身口意清淨是名佛出世身口意不淨是名佛滅度也好箇消息古人一期方便與你諸人計箇入路既得箇入路又須得箇出路登山須到頂入海須到底登山不到頂不知宇宙之寬廣入海不到底不知滄溟之淺深既知寬廣又知淺深一踏踏翻四大海一擲擲到須彌山撒手到家人不識鵲噪鴉鳴栢樹間

上堂千般說萬般喻祇要教君早回去去何處良久云夜來風起滿庭香吹落桃花三五樹

上堂拈拄杖曰橫拈倒用撥開彌勒眼睛明去暗來敲落祖師鼻孔當是時也目連驚子飲氣吞聲臨濟德山呵呵大笑且道笑箇甚麼咄

黃龍心禪師上堂大凡窮生死根源直須明取自家一片田地教伊去處分明然後臨機應用不失其宜祇如鋒芒未兆已前都無是箇非箇譬爾爆動便有五行金土相生相尅胡來漢現四姓雜居各任方隅是非鋒起致使玄黃不辨水乳不分疾在膏肓難爲

救療若不當陽曉示窮子無以知歸欲得大用現前便可頓忘諸見諸見既盡昏霧不生大智洞然更非他物珍重

上堂擊禪床曰一塵纔舉大地全收諸人耳在一聲中一聲偏在諸人耳若是摩霄俊鶻便合乘時止灤困魚徒勞激浪

上堂不與萬法爲侶卽是無諍三昧便恁麼去爭奈絃急則聲促若能向紫羅帳裏撒珍珠未必善因而招惡果

上堂有句無句如藤倚樹且任諸人點頭及乎樹倒藤枯上無衝天之計下無入地之謀靈利漢者裏著得一隻眼便見七縱八橫舉拂子曰看太陽溢目萬里不挂片雲若是覆盆之下又爭怪得老僧

上堂若也單明自己不悟目前此人有眼無足若悟目前不明自己此人有足無眼據此二人十二時中常有一物蘊在胷中物既在胷不安之相常在目前既在目前觸途成滯作麼生得平穩去祖不言乎執之失度必入邪路放之自然體無去住

上堂良工未出玉石不分巧治無人金沙混雜還言  
無師自悟底麼出來辨別看乃舉拂子曰且道是金  
是沙良久曰見之不取思之千里

上堂有時開門待知識知識不來過有時把手上高  
山高山人不顧或作敗軍之將向闔黎手裡拱手歸  
降或爲忿怒那吒敲骨打髓正當恁麼時還有同聲  
相應同氣相求底麼有則向百尺竿頭進取一步如  
無少室峰前一場笑具

上堂心同虛空界示等虛空法證得虛空時無是無  
非法便恁麼休去停櫈把纜且向灣裏泊船若據衲  
僧門下天地懸隔且道衲僧門下有甚長處御栗橫  
擔不顧人直入千峰萬峰去

上堂一不向二不開翻思南嶽與天台堪笑白雲無  
定止被風吹去又吹來

上堂過去諸佛已滅未來諸佛未生正當現在佛法  
委付黃龍放行則恍恍惚惚其中有物把住則杳杳  
冥冥其中有精且道放行即是把住卽是竿頭絲線  
從君弄不犯清波意自殊

上堂虎頭主角人難措石火電光須密布假饒烈士  
也應難惜底那能善回互手擎日月背負須彌擲向  
他方其中衆生不覺不知其中衆生騎驢入諸人眼  
裏諸人亦不覺不知會麼將此身心奉塵刹是則名  
爲報佛恩

上堂一漚未發古帆未征風信不來無人舉擢正當  
恁麼時水脈如何辨的君不見雲門老垂手處落落  
清波無透路又不見華亭叟泄天機夜深空載月明  
歸莫怪相逢不相識從教萬古漫漫黑

上堂馬祖陞堂百丈卷席後人不善來風盡道不留  
朕迹殊不知桃華浪裏正好張帆七里灘頭更堪垂  
釣如今必有辯浮沉識深淺底漢試出來定當水脉  
看如無且將漁父笛閒向海邊吹

上堂風蕭蕭兮木葉飛鴻鴈不來音信稀還鄉一曲  
無人吹令余拍手空遲疑

上堂鏡像或謂有攬之不盈手鏡像或謂無分明如  
儼圖所以取不得舍不得不可得中祇麼得還會麼  
不作維摩詰又似傅大士



上堂夫立道者不可以設功得聖智者不可以有心知真諦者不可以存我會至功者不可以營事爲古人一期應病與藥則不可若是丈夫漢出則經濟天下不出則卷而懷之爾若一向聲和響順我則排斥諸方爾若示現酒肆姪坊我則孤峰獨宿且道甚處是黃龍爲人眼

雲居祐禪師上堂過去諸如來更不再勸現在諸菩薩放過卽不可未來修學人謾他一點不得所以教中道若人欲了知三世一切佛應觀法界性一切惟心造雖然如是雲居門下正是金屑落眼

上堂凡見聖見春雲掣電眞說妄說空花水月懺憶長髭見石頭解道紅爐一點雪擊禪床下座

上堂龜毛爲箭兔用爲弓那吒忿怒射破虛空虛空撲落傾湫倒嶽牆壁瓦礫放光明歸依如來大圓覺擊禪床下座

上堂月色和雲白松聲帶露寒好箇眞消息憑君子細看黃龍先師和身放倒還有人扶得起麼祖禪不了殃及兒孫擊禪床下座

上堂一切聲是佛聲以拂子擊禪床曰梵音深遠令人樂聞又曰一切色是佛色乃拈起拂子曰今佛放光明助發實相義已到之者頂戴奉行未到之者應如是知應如是信擊禪床下座

黃檗勝禪師上堂臨濟喝德山棒留與禪人作模範歸宗磨雪峰毬此箇門庭接上流若是黃檗卽不然也無喝也無棒亦不推磨亦不輓毬前面是案山背後是主山塞却你眼睛拶破你面門於此見得不得轉地盡未來際不向他求若見不得醍醐上味醍醐成毒藥

上堂寂兮寥兮蟾蜍皎皎下空谷寬兮廓兮曦光赫赫流四海曹谿路上勦絕人行多子塔前駢闐如市直饒者裏薦得個儻分明未是衲僧活計大丈夫漢須是向黑暗獄中敲枷打鎖餓鬼隊裏放火奪漿推倒慈氏樓折却空王殿靈苗瑞草和根拔滿地從教荊棘生

開元琦禪師上堂虛空無內外事理有短長頤則成菩提逆則成煩惱燈籠常瞌睡露柱亦懊惱大道在

目前更於何處討以拂子擊禪床

上堂四面亦無門十方無壁落頭髮鬆耳卓朝箇箇男兒大丈夫何得無繩而自縛且道透脫一句作麼生道良久曰踏破草鞋赤脚走

福嚴感禪師上堂古佛心祇如今若不會苦沉吟秋雨微微秋風颯颯乍此乍彼若爲酬答沙岸蘆華青黃交雜禪者何依良久曰割

雲蓋智禪師上堂緊峭離水軌踏破湖湘月手把鐵蒺藜打破龍虎穴翻身倒上樹始見無生滅却笑老瞿曇彈指超彌勒

上堂昨日高山看釣魚步行騎馬失却驢有人拾得略脫去重賞千金一也無若向者裏薦得不著還草鞋錢

上堂舉趙州問僧向甚麼處去曰摘茶去州曰閒師曰道著不著何處摸索背後龍鱗面前驢脚翻身筋斗孤雲野鶴阿呵呵

報慈英禪師上堂師擲下拄杖却召大眾曰拄杖吞却祖師了也教甚麼人說禪還有人教得也無喝一

喝

保寧璣禪師上堂春雨微微百事皆宜禾苗發秀蔬菜得時阿難如合掌迦葉亦攢眉直饒靈山會上拈華微笑筭來猶涉離微爭似三家村裏老翁深耕淺種各知其時有事當面便說誰管瞬目揚眉更有一般奇特事末後一著更須知擊拂子下座

四祖演禪師上堂主山吞却案山尋常言論拄杖子普該塵刹未足爲奇光境兩忘復是何物良久曰劫火洞然毫末盡青山依舊白雲中

清隱源禪師上堂先師初事棲賢謁泐潭澄歷二十年宗門奇奧經論玄要莫不貫穿及因雲峰指見慈明則一字無用遂設三關語以驗學者而學者如葉公畫龍龍現卽怖

積翠永庵主示衆山僧住庵來無禪可說無法可傳亦無羞珍異寶祇收得續火柴頭一箇留與後人令他煙燄不絕火光長明遂擲下拂子時有僧就地拈起吹一吹師便喝曰誰知續火柴頭從者漢邊煙消火滅去乃拂袖歸庵僧吐舌而去

黃龍新禪師上堂深固幽遠無人能到釋迦老子到不到若到因甚麼無人若不到誰道幽遠

上堂祖師心印狀似鐵牛之機去卽印住住卽印破祇如不去不住印卽是不印卽是金果早朝猿摘去玉華晚後鳳銜歸

上堂行脚高人解開布袋放下鉢囊去却藥忌一人所在須到半人所在須到無人所在也須親到

上堂拗折拄杖將甚麼登山渡水拈却鉢盂匙箸將甚麼喫粥喫飯不如向十字街頭東卜西卜忽然卜著是你諸人有彩若卜不著也怪雲巖不得

上堂文殊騎獅子普賢騎象王釋迦老子足躡紅蓮且道黃龍騎箇甚麼良久曰近來年老一步是一步上堂清珠下於濁水濁水不得不清念佛投於亂心亂心不得不佛佛既不亂濁水自清濁水既清功歸何所良久曰幾度黑風翻大海未曾聞道釣舟傾上堂有時破二作三有時會三歸一有時三一混同有時不落數量且道甚麼處是黃龍爲人處良久曰珍重

渤潭清禪師上堂舉浮山遠和尚云欲得英俊麼仍須四事俱備方顯宗師蹊徑何謂也一者祖師巴鼻二具金剛眼睛三有獅子爪牙四得諸僧殺活拄杖得此四事方可縱橫變態任運卷舒高聳人天壁立千仞儻不如是守死善道者敗軍之兆何故棒打石人實論實事是以到者裏得不修江耿耿大野雲凝綠竹含煙青山鎖翠風雲一致水月齊觀一句該通已彰殘朽師曰黃龍今日出世時當末季佛法澆漓不用祖師巴鼻不用金剛眼睛不用獅子爪牙不用殺活拄杖祇有一枝拂子以爲蹊徑亦能縱橫變態任運卷舒亦能高聳人天壁立千仞有時逢強卽弱有時遇實卽賤拈起則群魔屏迹佛祖潛蹤放下則合水和泥聖凡同轍且道拈起好放下好竿頭絲線從君弄不犯清波意自殊

雙峰齊禪師上堂拈拄杖曰橫拈倒用諸方虎步龍行打狗撐門雙峰掉在無事甲裏因風吹火別是一家以拄杖靠肩顧視大衆喚作無事得麼良久曰刀尺高懸著眼看誌公不是閒和尚卓拄杖一下

開先瑛禪師上堂談玄說妙譬如畫餅充饑入聖超凡大似飛蛾赴火一向無事敗種焦芽更若馳求水中捉月以拂子一拂云適來許多見解拂却了也作麼生是諸人透脫一句良久曰鐵牛不喫欄邊草直向須彌頂上眠以拂子擊禪床

上堂彎石鞏弓架輿化箭運那羅延力定爍迦羅眼不射大雄虎不射藥山鹿不射雲巖獅子不射象骨欄猴且道射箇甚麼良久曰放過一著

法雲杲禪師上堂西來祖意教外別傳非大根器不能證入其證入者不被文字語言所轉聲色是非所迷亦無雲門臨濟之殊趙州德山之異所以唱道須明有語中無語無語中有語若向者裏薦得可謂終日著衣未嘗挂一縷絲終日喫飯未嘗較一粒米直是呵佛罵祖有甚麼過雖然如是欲得不招無間業莫謗如來正法輪下座

上堂拈拄杖曰歸宗會斬蛇禾山解打鼓萬象與森羅皆從者裏去擲下拄杖曰歸堂喫茶  
湛堂準禪師上堂太陽門下日日三秋明月堂前時

時九夏洞山和尚祇解夜半捉烏鷄殊不知驚起隣家睡寶峰相席打令告諸禪德也好冷處著把火咄上堂古人道不看經不念佛看經念佛是何物自從識得轉經人舉拂子曰龍藏聖賢都一拂以拂子拂一拂曰諸禪德正當恁麼時且道雲巖土地向甚麼處安身立命擲下拂子以兩手握拳叩齒曰萬靈千聖千聖萬靈

上堂混元未判一氣岑寂不聞有天地玄黃宇宙洪荒日月盈昃秋收冬藏正當恁麼時也好箇時節耐雪峰老漢却向虛空裏打橄欖三箇木毬直至後人構占不上便見瀉山水牯牛一向膽大心癡長沙大蟲到處較人家猪狗雖然無禮難容而今放過一著孝經序云朕聞上古其風樸略山前華堯民解元且喜尊候安樂參

上堂僧問教中道若有一人發真歸源十方虛空悉皆消殞未審此理如何師遂展掌點指曰子丑寅卯辰巳午未一羅二土三水四金五太陽六太陰七計都今日計都星入巨蟹宮寶峰不打者鼓笛使下座

上堂大道縱橫觸事現成雲開日出水綠山青拈拄杖卓一下曰雲門大師來也說道觀音菩薩將錢買胡餅放下手元來却是饅頭大眾雲門祇見錐頭利不見鑿頭方寶峰卽不然擲下拄杖曰勿於中路事空王策杖須還達本鄉昨日有人從淮南來不得福建信却道嘉州大象吞却陝府鐵牛喝一喝曰是甚說話笑倒雲居土地

上堂祖師關捩子幽隱少人知不是悟心者如何舉似伊喝一喝曰是何言歟若一向恁麼達磨一宗掃土而盡所以大覺世尊初悟此事便開方便門示真實相普令南北東西維上下郭大李二鄧四張三同明斯事雲巖今日不免倣古去也擊拂子曰方便門開也作麼生是真實相良久云十八十九痴人夜走

示衆拈拄杖曰衲僧家竿木隨身逢場作戲倒把橫拈自有意思所以昔日藥山和尚問雲巖曰聞汝解弄獅子是否巖曰是山曰弄得幾出巖曰弄得六出山曰老僧亦解弄巖曰和尚弄得幾出山曰老僧祇

弄得一出巖曰一即六六卽一山便休大眾藥山雲巖鈍置殺人兩子父弄一箇獅子也弄不出若是準上座祇消得自弄搜得來拈頭作尾拈尾作頭轉兩箇金時攫幾釣鐵爪吼一聲直令百里內猛獸潛蹤滿空裏飛禽亂墜準上座未弄獅子請大眾高著眼先做箇定場擲下拄杖曰箇中消息子能有幾人知壽寧資禪師上堂諸方五日一參壽寧日日陞座莫怪重說偈言過在西來達磨上士處處逢渠後學時時蹉過且道蹉過一著落在甚麼處舉起拂子曰一片月生海幾家人上樓

寶華鑑禪師上堂月圓伏惟三世諸佛狸奴白牯各起居萬福時中淡薄無可相延切希寬抱老水牯牛近日亦自多病多惱不甘水草遇著暖日和風當下和身便倒教渠拽耙牽犁直是搖頭擺腦可憐萬頃良田一時變作荒草

三祖宗禪師上堂架梯可以攀高雖升而不達河漢鑄鐵可以掘鑿雖利而不能到風輪其器者費功其謀者益妄不如歸家坐免使走塵壤大眾那箇是塵



壞祖佛禪道

黃龍清禪師上堂三世諸佛不知有恩無重報狸奴白牯却知有功不浪施明大用曉全機絕踪跡不思議歸去好無人知衝開碧落松千尺截斷紅塵水一溪

洞山言禪師上堂吾心似秋月碧潭清皎潔無物堪比倫敦我如何說寒山子勞而無功更有箇拾得道不識者箇意修行徒苦辛恁麼說話自救不了尋常拈糞箕把帚帶掣風掣顛猶較些子直饒是文殊普賢再出若到洞山門下一時分付與直歲燒火底燒火掃地底掃地前廊後架切忌撓匙亂飭豐干老人更不饒舌參退喫茶

上堂一生二二生三遍捺不住廓周沙界德雲直上妙峰善財却入樓閣新婦騎驢阿家牽山青水綠桃華紅李花白一塵一佛土一葉一釋迦乃合掌曰不審諸佛子今晨改旦季春極喧起居輕利安樂行否少間專到上寮問訊不勞久立

上堂臘月二十日一年將欲盡萬里未歸人大衆總

是他鄉之客還有返本還源者麼擊拂子曰門前殘雪日輪消室內紅塵遣誰掃

太平安禪師上堂有利無利莫離行市鎮州蘿蔔極貴廬陵米甚賤爭似太平者裏時豐道泰商賈駢闐白米四文一升蘿蔔一文一束不用北頭買賤西頭賣貴自然物及四生自然利資王化又爭生說箇佛法道理良久云勸君不用鑄頑石路上行人人口似碑褒親瑞禪師上堂有佛世界以一塵一毛而作佛事令見一法者具足一切法故權爲架閣有佛化內以忘言寂嘿爲大佛事使其學者離一切相卽名諸佛故好與三下火抄有佛土中以黃花翠竹而爲佛事令觀相者見色卽空故且付與彌勒有佛寶刹以法空爲座而示佛事裨其行者不著佛求故勘破了勾下有佛道場以四事供養而成佛事使知足者斷異念故可與下載有佛妙域以一切語言三昧作其佛事令隨機入者不捨動靜故爲渠裝載大衆且道於中還有優劣也無良久曰到者須知是作家參褒親諡禪師上堂新羅打鼓大宋上堂庭前栢子問

話燈籠露柱著忙香臺拄杖起作舞臥病維摩猶在床者老漢我也識得你病休訝郎當咄

兜率恩禪師上堂落落魄魄是有居郭莽莽箇箇何今何古不重已靈休話佛祖扭定釋迦鼻孔揭却觀音耳朵任他雪嶺輾毬休管禾山打鼓若是本色衲僧終不守株待兔參

建隆慶禪師上堂始見新歲倏忽早是二月初一天氣和融擬舉箇時節因緣與諸人商量却被帝釋梵王在門外柳眼中努出頭來先說偈言裊裊颺輕絮且逐風來去相次走綿毬休言道我絮當時撞著阿修羅把住云任你絮忽逢西風吹渭水落葉滿長安一句作麼生道於是帝釋縮頭入柳眼中良久曰參兜率悅禪師上堂始見新春又逢初夏四時若箭兩曜如梭不覺紅顏翻成白首直須努力別著精神耕取自己田園莫犯他人苗稼既然如是牽犁拽耙須是雪山白牛始得且道鼻孔在甚麼處良久曰叱叱上堂堂居物外度清時牛上橫將竹笛吹一曲自幽山自綠此情不與白雲知慶快諸禪德翻思范蠡謾

泛滄波因念陳搏空眠太華何曾夢見溟得高名實未神遊閒漂野跡既然如此具眼禪僧莫道龍安非他是已好

上堂無法亦無心無心復何捨要真盡屬真要假全歸假平地上行船虛空裏走馬九年面壁人有口還如啞參

上堂夜夜抱佛眠朝朝還共起起坐鎮相隨語嘿同居止欲識佛去處祇是語聲是諸禪德大小傳大士祇會抱橋柱澡洗把纜放船印板上打將來模子裏脫將去豈知道本色衲僧塞除佛祖窟打破玄妙門跳出斷常坑不依清淨界都無一物獨奮雙拳海上橫行建家立國有一般漢也要向百尺竿頭凝然端坐泊乎翻身之際捨命不得豈不見雲門大師道知是般事拈放一邊直須擺動精神著些筋骨向混沌未剖已前薦得猶是鈍漢那堪更於他人舌頭上啞澹滋味終無了日諸禪客要會麼剔起眉毛有甚難分明不見一毫端風吹碧落浮雲盡月上青山玉一團喝一喝下座

崇覺空禪師上堂十方無壁落四面亦無門淨躲躲  
赤灑灑沒可把遂舉拂子曰灌溪老漢向十字街頭  
逞風流賣惺惺道我解穿珍珠解玉版過亂絲卷筒  
絹姪坊酒肆瓦合與臺虎穴魔宮那吒忿怒遇文王  
興禮樂逢桀紂逞干戈今日被崇覺覷見一場懺懺  
長靈卓禪師上堂曰三千劍客獨許莊周爲甚麼跳  
不出良醫之門多病人因甚麼不消一劑已透關者  
更請辯看

光孝清禪師上堂殺父殺母佛前懺悔殺佛殺祖不  
消懺悔爲甚麼不消懺悔且得冤家解脫

雪峰空禪師上堂一拳拳倒黃鶴樓一趨趨翻鸚鵡  
洲有意氣時添意氣不風流處也風流俊哉俊哉快  
活快活一似十七八歲狀元相似誰管你天誰管你  
地心王不妄動六國一時通罷拈三尺劍休弄一張  
弓自在自在快活快活恰似七八十老人作宰相相  
似風以時雨以時五穀植萬民安豎起拄杖曰大衆  
者兩箇并山僧拄杖子共作得一箇請僧到雪峰門  
下但知隨例餐餽子也得三文買草鞋喝一喝卓拄

杖下座

兜率照禪師上堂兜率都無伎倆也數諸方榜樣五  
日一度陞堂起動許多龍象禪道佛法又無到此將  
何供養須知達磨西來分付一條拄杖乃拈起曰所  
以道你有拄杖子我與你拄杖子你無拄杖子我奪  
你拄杖子且道那箇是賓句那箇是主句若斷得去  
卽途中受用若斷不得且世諦流布乃拋下拄杖  
雲巖遊禪師上堂馬祖一喝百丈蹉過臨濟小厮兒  
向糞掃堆頭拾得一隻破草鞋胡喝亂喝師震聲喝  
曰喚作胡喝亂喝得麼

上堂象骨輓毬能已盡玄沙斫牌伎亦窮還知麼火  
星入袴口事出急家門

上堂舉梁山曰南來者與你三十棒北來者與你三  
十棒然雖與麼未當宗乘後來琅琊和尚道梁山好  
一片真金將作頑鐵賣却琅琊則不然南來者與你  
三十棒北來者與你三十棒從教天下貶剝師拈曰  
一人能舒不能卷一人能卷不能舒雲巖門下一任  
南來北來且恁麼過驀然洗面摸著鼻頭却來與你

三十

上堂曰可冷月可熱衆魔不能壞眞說作麼生是眞說初三十一中九下七若信不及雲巖與你道破萬人齊指處一鴈落寒空

普賢素禪師上堂兵隨印轉三千里外絕煙塵將逐符行二六時中淨裸裸不用鐵旗鐵鼓自然草偃風行何須七縱七擒直得無思不服所謂大丈夫秉慧劍般若鋒兮金剛燄非但能摧外道心早曾落却天魔膽正恁麼時且道主將是甚麼人喝一喝

育王謹禪師上堂文殊智普賢行多年曆日德山棒臨濟喝亂世英雄汝等諸人穿僧堂入佛殿還知險過鐵圍關麼忽然踏著釋迦頂顛磕著聖僧額頭不免一場禍事

上堂我若說有你爲有礙我若說無你爲無礙我若橫說你又跨不過我若豎說你又跳不出若欲叢林平怙大家無事不如推倒育王且道育王如何推得倒去召大衆曰著力著力復曰苦哉苦哉育王被人推倒了也還有路見不平拔劍相爲底麼若無山僧

不免自倒自起擊拂子下座

道場林禪師上堂有漏筵籬無漏木杓庭白牡丹檻紅芍藥因思九年面壁人到頭不識者一著且道作麼生是者一著以拄杖擊禪床下座

道場慧禪師上堂鍾馗醉裏唱涼州小妹門前祇點頭巡海夜叉相見後大家拍手上高樓大衆若會得去鎖却天下人舌頭若會不得將謂老僧別有奇特天童樸禪師上堂觀音巖玲玲瓏瓏太白石丁丁東西園菜蠟似不堪食東谷花發却無賴紅且道是祖意教意途中受用世諦流布若辨不出雪峰覆却飯桶若辨得出甘贊禮拜蒸籠參

上堂德山入門便棒臨濟入門便喝臨濟喝處德山棒頭耳聾德山棒時臨濟喝下眼瞎雖然一搨一擡就中全生全殺遂喝一喝卓拄杖一下云敢問諸人是生是殺良久云君子可入

龍華高禪師上堂象王行獅子住赤脚崑崙眉卓豎寒山拾得笑呵呵指點門前老松樹且道他指點箇甚麼忽然風吹倒時好一堆柴

提綱錄卷第八

列祖提綱錄卷第九

武林十八澗理安禪寺住持婁東行悅集

五參提綱

楊岐會禪師上堂舉古人一轉公案布施大眾良久  
曰口祇堪喫飯

上堂踏著秤錘硬似鐵瘧子得夢向誰說須彌頂上  
浪滔天大洋海裏遭火熬參

上堂楊岐一要千聖同妙布施大眾拍禪床一下云  
果然失照參

上堂楊岐一句急著眼巖長連床上拈匙把筯

上堂拈拄杖云一卽一切一切卽一畫一畫云山河  
大地天下老和尚百雜碎作麼生是諸人鼻孔良久  
云劍爲不平驢寶匣藥因救病出金餅喝一喝卓一

下

上堂楊岐無旨的種田博飯喫說夢老瞿曇何處覓  
蹤跡喝一喝拍禪床一下

上堂薄福住楊岐年來氣力衰寒風凋敗葉猶喜故  
人歸囉囉哩拈上死柴頭且向無煙火

上堂雲蓋是事不如說禪似吞栗蒲若向此處會得  
佛法天地懸殊

上堂擲下拄杖曰釋迦老子著跌偷笑雲蓋亂說雖  
然世界坦平也是將勤補拙

示衆云身心清淨諸境清淨諸境清淨身心清淨還  
知楊岐老人落處麼河裏失錢河裏撿

白雲端禪師上堂鳥有雙翼飛無遠近道出一隅行  
無前後你衲僧家尋常拈匙放箸盡道知有及至上

嶺時爲甚麼却氣急不見道人無遠慮必有近憂

上堂乾坤之內宇宙之間中有一寶秘在形山大衆  
眼在鼻上脚在肚下且道實在甚麼處良久云人面  
不知何處去桃華依舊笑春風

上堂古者道將此深心奉塵刹是則名爲報佛恩圓  
通則不然時挑夜菜和根煮旋斫生柴帶葉燒

上堂江月照松風吹到者裏還有漏網者麼良久曰

皇天無親

上堂入林不動草入水不動波入鳥不亂行大衆者  
箇是把纜放船底手脚且道衲僧家合作麼生以手



拍禪床曰掀翻海嶽求知已撥亂乾坤見太平

上堂忌口自然諸病滅多情未免有時勞資居動便成違順落得清閒一味高雖然如是莫謂無心云是道無心猶隔一重關

示衆云泥佛不度水木佛不度火金佛不度爐真佛內裏坐大衆趙州老子十二劑骨頭八萬四千毛孔一時拋向諸人懷裏了也圓通今日路見不平爲古人出氣以手拍禪床云須知海嶽歸明主未信乾坤陷吉人

上堂釋迦老子有四弘誓願云衆生無邊誓願度煩惱無盡誓願斷法門無量誓願學佛道無上誓願成法華亦有四弘誓願饑來要喫飯寒到卽添衣困時伸脚睡熱處愛風吹

上堂古人留下一言半句未透時撞著鐵壁相似忽然一日虧得透後方知自己便是鐵壁如今作麼生透復曰鐵壁鐵壁

上堂若端的得一回汗出便向一莖草上現瓊樓玉殿若未端的得一回汗出縱有瓊樓玉殿却被一莖

草葢却作麼生得汗出去自有一雙窮相手不會容易舞三臺

上堂絲毫有趣皆能進畢竟無歸若可當逐日退身行與盡忽然得見本爺孃作麼生是本爺孃乃云萬福便下座

示衆云如我按指海印發光拈起拄杖云山河大地水鳥樹林情與無情今日盡向法華拄杖頭上作大獅子吼演說摩訶大般若且道天台南嶽說箇甚麼法門南嶽說洞上五位修行君臣父子各得其宜莫守寒巖異草青坐却白雲宗不妙天台說臨濟下三玄三要四料揀一喝分賓主照用一時行要會箇中意日午打三更廬山出來道你兩箇正在葛藤窠裏不見道欲得不招無間業莫謗如來正法輪大衆據此三箇漢見解若上衲僧秤子上稱一箇重八兩一箇重半斤一箇不直半分錢且道那箇不直半分錢良久云但願春風齊著力一時吹入我門來卓拄杖下座

保寧勇禪師上堂山僧二十餘年挑囊負鉢向寰海

之內參善知識十數餘人自家竝無箇見處有若頑石相似參底尊宿亦無長處可相利益自此一生作箇百無所解底人幸自可憐生忽然被業風吹到江寧府無端被人上當推向十字路頭住箇破院作粥飯主人接待南北事不獲已隨分有鹽有醋粥足飯足且怎麼過時若是佛法不曾夢見

上堂侍者燒香罷師指侍者曰侍者已爲諸人說法了也

上堂看看山僧入拔舌地獄去也以手拽舌云阿哪阿哪

上堂相罵無好言相打無好拳大眾直須怎麼始得一句句切害一拳拳著實忽然打著箇無面目漢也不妨暢快殺人

上堂秋風涼松韻長未歸客思故鄉且道誰是未歸客何處是故鄉良久曰長連床上有粥有飯

上堂天上無彌勒地下無彌勒打破太虛空如何尋不得垂下一足曰大眾向甚麼處去也

上堂若說佛法供養大眾未免眉鬚墮落若說世法

供養大眾入地獄如箭射去此二途且道保寧今日當說甚麼三寸舌頭無用處一雙空手不成拳

上堂古人底今人用今人底古人爲古今無背面今古幾人知哪嗚呼一九與二九相逢不出手

上堂有手脚無背面明眼人看不見天左旋地右轉拍膝曰西風一陣來落葉兩三片

上堂風鳴條雨破塊曉來枕上鶯聲碎蝦蟇蚯蚓一時鳴妙德空生都不會都不會三箇成群四箇作隊窈窕窈窕飄飄飄飄向南北東西折得梨華李華一佩兩佩

上堂智不到處切忌道著道著則頭角生大眾頭角生了也是牛是馬

上堂夜靜月明水清魚現金鈎一擲何處尋蹤提起拄杖曰歷細歷細

示衆云有箇漢怪復醜眼直鼻藍錢面南看北斗解使日午金烏啼夜半鐵牛吼天地旋山河走羽族毛群失其所守直得文殊普賢出此沒彼七縱八橫千生萬受薰然逢著箇黃面瞿曇不惜眉毛再三與伊

上堂若要七縱八橫見老和尚打鼓陞堂七十三八

上堂有佛處不得住換却你心肝五臟無佛處急走  
過鴈過留聲三千里外逢人不得錯舉出門便錯恁

麼則不去也種粟却生豆摘楊華摘楊華不覺日又夜爭教人少年

上堂悟了同未悟歸家尋舊路一字是一字一句是一句自小不脫空兩歲學移步湛水生蓮華一年生一度

上堂幸然無一事行脚要參禪却被禪相惱不透祖師關如何是祖師關把火入牛欄

上堂山僧昨日入城見一棚傀儡不免近前看或見端嚴奇特或見醜陋不堪轉動行坐青黃赤白一一見了仔細看時元來青布幔裏有人山僧忍俊不禁乃問長史高姓他道老和尚看便了問甚麼姓大衆山僧被他一問直得無言可對無理可伸還有爲山僧道得麼昨日那裏落節今日者裏拔本

上堂說佛說法拈槌豎拂白雲萬里德山入門便棒臨濟入門便喝白雲萬里然後恁麼也不得不恁麼也不得恁麼不恁麼總不得也則白雲萬里忽有箇漢出來道長老你恁麼道也則白雲萬里者箇說話喚作矮子看戲隨人上下三十年後一場好笑且道

笑箇甚麼笑白雲萬里

示衆祖師道吾本來茲土傳法救迷情一花開五葉結果自然成達磨大師信脚來信口道後代兒孫多成計較要會開花結果處麼鄭州梨青州棗萬物無過出處好

示衆十方諸佛六代祖師天下善知識皆同者箇舌頭若識得者箇舌頭始解大脫空便道山河大地是佛草木叢林是佛若也未識得者箇舌頭祇成小脫空自謾去明朝後日大有事在五祖恁麼說話還有實頭處也無自云有如何是實頭處歸堂喫茶去示衆每日起來拄却臨濟棒吹雲門曲應趙州拍擔仰山歛驅馮山牛耕白雲田七八年來漸成家活更告諸公每人出一隻手相共扶助唱村田樂粗羹淡飯且恁麼過何也但願今年蠶麥熟羅羅兒與一文

示衆舉德山和尚因僧問從上諸聖以何法示人山云我宗無語句亦無一法與人雪峰從此有省後有僧問雪峰云和尚見德山得箇甚麼便休去峰云我

當時空手去空手歸白雲今日說向透未過者有箇人從東京來問伊甚處來他却道蘇州來問伊蘇州事如何伊道一切尋常雖然如是謾白雲不過何故祇爲語音各別畢竟如何蘇州菱邵伯藕

雲蓋本禪師上堂高聲喚侍者侍者應諾師曰大衆集也未侍者曰大衆已集師曰那一箇爲甚麼不來赴參侍者無語師曰到卽不點

上堂滿口道不出句句甚分明滿目觀不見山山疊亂青鼓聲猶不會何況是鐘鳴喝一喝

上堂祖翁卓卓拳拳兒孫醒醒醒醒有處藏頭沒處露角借問衲僧如何摸索

上堂橫按拄杖曰牙如刀劍面如鐵眼放電光光不歇手把蒺藜一萬斤等閒敲落天邊月卓一下

上堂去者鼻孔遼天來者腳踏實地且道祖師意向甚麼處著良久曰長恨春歸無覓處不知流入此中來

上堂高臺巴鼻開口便是若也便是有甚巴鼻月冷風高水清山翠

上堂以楔出楔有甚休歇欲得休歇以楔出楔喝上堂頭戴須彌山腳踏四大海呼吸起風雷動用生五彩若能識得渠一任歲月改且道誰人識得渠喝一喝云田庫奴

壽聖文禪師上堂拈拄杖曰華藏木栴檀等閒亂拈出不是不惜手山家無固必點山山動搖攪水水波溢忽然把定時事執法律要橫不得橫要屈不得屈驀召大衆曰莫謂棒頭有眼明如日上面光生盡是漆隨聲敲一下

上堂一又一割著骨連皮一搥一擡粘手綴脚電光石火頭垂尾垂劈箭追風半生半死撞著磕著討甚眉毛明頭暗頭是何眼目總不恁麼正在半途設使全機未至涯岸直饒淨裸裸赤灑灑沒可把尙有廉纖山僧恁麼道且道口好作甚麼良久曰嘻留取喫飯

上方益禪師上堂拾得搬柴寒山燒火唯有豐干巖中冷坐且道豐干有甚麼長處良久曰家無小使不成君子



開福寧禪師上堂秋日耀長空秋江浸虛碧傷嗟門外人處處尋彌勒驀路忽擡頭相逢不相識諸禪德既是相逢爲甚麼不相識剪盡霜前竹臨溪不化龍上堂徧界不曾藏通身無影像相逢莫訝太愚痴曠劫至今無伎倆無伎倆少人知大抵還他肌骨好何須臨鏡畫蛾眉

大隨靜禪師上堂君王了了將帥惺惺一回得勝六國平寧

上堂舉臨濟參黃檗之語白雲端和尚頌云一拳拳倒黃鶴樓一趂趂翻鸚鵡洲有意氣時添意氣不風流處也風流師曰大隨卽不然行年七十老躑躅眼目精明耳不聾忽地有人欺負我一拳打倒過關東上堂自己田園任運耕祖宗基業力須爭悟須千聖頭邊坐用向三塗底下行

淨因成禪師上堂崑崙奴著鐵袴打一棒行一步爭似火中釣鼈日裏藏冰陰影門翻翻懸空縛殺麻繩

上堂鼻裏音聲耳裏香眼中鹹淡舌玄黃意能覺觸

身分別冰室如春九夏涼如斯見得方知男子身中入定時女子身中從定出葵花隨日轉犀紋翫月生香楓化老人蜨蠅成蝶蠅若也不知苦哉佛陀耶許你具隻眼

萬壽素禪師上堂僧問劫火洞然大千俱壞未審者箇還壞也無大隋曰壞修山主曰不壞未審孰是孰非師曰一壞一不壞笑殺觀自在獅子驚敵人狂狗盡逐塊復曰會麼曰不會師曰漆桶不快

泐潭英禪師上堂顧視大眾曰青山重疊綠水響潺潺遂拈拄杖曰未到懸崖處擡頭子細看卓一下上堂寶峰高士罕到巖前雪壓枯松倒嶺前嶺後野猿啼一條古路清風掃禪德雖然如是且道山僧拄杖長多少遂拈起曰長者隨長使短者隨短用卓一下

上堂顧視大眾曰石門巖嶮鐵關牢舉目重重萬仞高無角鐵牛衝得破毗盧海內作波濤且道不涉波濤一句作麼生道良久曰一句不遑無著問迄今猶作野盤僧

文殊道禪師上堂獅子嘯呻象王哮吼雲門北斗裏  
藏身白雲因何喚作手三世諸佛不能知狸奴白牯  
却知有且道作麼生是他知有底事要打梨花蛺蝶  
飛風吹柳絮毛毬走

龍華初禪師上堂曰鷄見便鬪犬見便齧殿上鴟吻  
終日相對爲甚麼却不喚便下座

育王裕禪師上堂曰德山入門便棒多向皮袋裡埋  
蹤臨濟入門便喝總在聲塵中出沒若是英靈衲子  
直須足下風生超越古今途轍拈拄杖卓一下喝一  
喝曰祇者箇何似生若喚作棒喝瞋睡未醒不喚作  
棒喝未識德山臨濟畢竟如何復卓一下曰總不得  
動著

上堂盡大地是沙門眼徧十方是自己光爲甚麼東  
弗于逮打鼓西瞿耶尼不聞南瞻部洲點燈北鬱單  
越暗坐直饒向箇裏道得十全猶是光影裏活計據  
拂子曰百雜碎了也作麼生是出身一路擲下拂子  
曰參

上堂動則影現覺則水生直饒不動不覺猶是秦時

轆轤鑽到者裏便須千差密照萬戶俱開毫端撥轉  
機輪命脉不沈毒海有時覺如湛水有時動若星飛  
有時動覺俱忘有時照用自在且道正恁麼時是動  
是覺是照是用還有區分得出底麼鐵牛橫古路觸  
著骨毛寒

上堂曰行時絕行跡說時無說蹤行說若到則壞生  
招箭行說未明則神鋒盡斷就使說無滲漏行不迷  
方猶滯殼漏在若是大鵬金翅奮迅百千由旬十影  
神駒馳驟四方八極不取次啗啄不隨處埋身且總  
不依倚還有履踐分也無刹刹塵塵是要津

上堂曰易填巨壑難滿漏卮若有操持了無難易拈  
却大地寬綽有餘放出纖毫礙塞無路忽若不拈不  
放向甚麼處履踐同誠共休戚飲水亦須肥

大潯泰禪師上堂推眞眞無有相窮妄妄無有形眞  
妄兩無所有廓然露出眼睛眼睛既露見箇甚麼曉  
日爍開巖畔雪朔風吹綻臘梅華

上堂寶劍拈來便用豈有遲疑眉毛剔起便行更無  
回互一切處騰今煥古一切處截斷羅籠不犯鋒鉞

亦非顧鑑獨超物外則且置萬機喪盡時如何八月  
秋何處熱

上堂涅槃無異路方便有多門拈起拄杖曰看看山  
僧拄杖子一口吸盡西江水東海鯉魚躡跳上三十  
三天帝釋忿怒把須彌山一搗粉碎堅牢地神合掌  
讚歎曰諦觀法王法法王法如是以拄杖擊禪床下  
座

上堂達得人空法空未稱祖佛家風體得全用全照  
亦非衲僧要妙直須打破牢關識取向上一竅如何  
是向上一竅春寒料峭凍殺年少

上堂渺渺遼遼十方該括坦坦蕩蕩絕形絕相目欲  
視而睛枯口欲談而詞喪文殊普賢全無伎倆臨濟  
德山不妨提唱龜吞陝府鐵牛地敵嘉州大象嚇得  
東海鯉魚直至如今肚脹噎

上堂開口有時非開口有時是應言及細語皆歸第  
一義釋迦老子碗鳴聲達磨西來屎臭氣唯有山前  
水牯牛身放毫光照天地

上堂得念失念無非解脫是甚麼語話成法破法皆

名涅槃料掉沒交涉智慧愚痴通爲般若顛預佛性  
菩薩外道所成就法皆是菩提猶較些子然雖如是  
也是楊廣失駱駝

上堂欲識佛去處祇者語聲是咄傳大士不識好惡  
以昭昭靈靈教壞人家男女被誌公和尚一喝曰大  
士莫作是說別更道看大士復說偈曰空手把鋤頭  
步行騎水牛人從橋上過橋流水不流誌公呵呵大  
笑曰前頭猶似可末後更愁人

上堂憶昔遊方日獲得二種物一是金剛鎚一是千  
聖骨持行宇宙中氣岸高突兀如是三十年用之爲  
準則而今年老矣一物知何物擲下金剛鎚擊碎千  
聖骨拋向四衢道不能更惜得任意過浮生指南將  
作北呼龜以爲鼈喚豆以爲粟從他明眼人笑我無  
繩墨

護國元禪師威音王已前者一隊漢錯七錯八威音  
王已後者一隊漢落二落三而今者一隊漢坐立儼  
然且道是錯七錯八落二落三還定當得出麼舉拂  
子曰呸呸

上堂野干鳴獅子吼張得眼開得口動南星蹉北斗  
大衆還知落處麼金剛階下蹲神龜火裏走

靈隱遠禪師上堂舉僧問睦州以一重去一重卽不  
問不以一重去一重時如何州曰昨日栽茄子今朝  
種東瓜師曰問者善問不解答答者善答不解問山  
僧今日向饑鷹爪下奪肉猛虎口裏橫身爲你諸人  
說箇樣子登壇道士羽衣輕呪力難窮法轉新拇指  
破開天地暗蛇頭顛落鬼神驚

華藏民禪師上堂衆賣華兮獨賣松青青顏色不如  
紅筭來終不與時合歸去來兮翠藹中可笑古人恁  
麼道大似逃峰赴壑避溺投火爭如隨分到尺八五  
分饅頭邊討一箇半箇雖然如是保寧半箇也不要  
何故富嫌千口少貧恨一身多

中竺仁禪師上堂九十春光已過半養華天氣正融  
和海棠枝上鶯聲好道與時流見得麼然雖如是且  
透聲透色一句作麼生道金勒馬嘶芳草地玉樓人  
醉杏華天

華嚴覺禪師上堂舉石霜和尚遷化衆請首座繼踵

住持度侍者所問公案師曰宗師行處如火消冰透  
過是非關全機忘得喪盡道首座滯在一色侍者知  
見超師可謂體妙失宗全迷向背殊不知首座如鷲  
鷲立雪品類不齊侍者似鳳翥丹霄不繫金網一人  
高高山頂立一人深深海底行各自隨方而來同會  
九重城裏而今要識此二人麼豎起拂子曰龍臥碧  
潭風凜凜垂下拂子曰鶴歸霄漢背摩天

天寧思禪師上堂趨翻生死海踏倒涅槃岸世上無  
活人黃泉無死漢遂拈拄杖曰訥堂今日拄杖子有  
分付處也還有承當得者麼試出來擔荷看有麼有  
麼良久擲拄杖下座

上堂知有底也喫粥喫飯不知有底也喫粥喫飯如  
何直下驗得他有之與無是之與非邪之與正若驗  
不出參學事大遠在喝一喝下座

君山覺禪師上堂仰之彌高鑽之彌堅瞻之在前忽  
焉在後諸人還識得麼若也不識爲你註破仰之彌  
高不隔絲毫要津把斷佛祖難逃鑽之彌堅具體自  
然鳥啼花笑在碧巖前瞻之在前非正非偏十方坐

斷威鎮大千忽焉在後一場漏逗堪笑雲門藏身北斗咄

寶華顯禪師上堂曰喫粥了也頭上安頭洗鉢孟去爲蛇畫足更問如何自納敗闕良久高聲召大衆衆舉首師曰歸堂喫茶

南華曷禪師上堂此事最希奇不礙當頭說東鄰田舍翁隨例得一槩非唯質聲色亦乃應時節若問是何宗八字不著撇擊禪床下座

上堂日日說時時舉似地擎山爭幾許隴西鸚鵡得人憐大都祇爲能言語休思惟帶伴侶智者聊聞猛提取更有一般也大奇貓兒偏解捉老鼠

上堂以拄杖向空中攪曰攪長河爲酥酪蝦蟹猶自眼搭瞎卓一下曰變大地作黃金窮漢依前赤骨力爲復自家無分爲復不肯承當可中有箇漢荷負得行多少人失錢遭罪再卓一下曰還會麼寶山到也須開眼勿使忙忙空手回

龍牙才禪師上堂舉死心和尙小參曰若論此事如人家有三子第一子聰明智慧孝養父母接待往來

主掌家業第二子兇頑狡猾貪姪嗜酒倒街臥巷破壞家業第三子盲聾瘖瘂菽麥不分是事不能祇會喫飯三人中黃龍要選一人用更有四句死中有活活中有死死中常死活中常活將此四句驗天下衲僧師曰喚甚麼作四句三人姓甚名誰若也識得與黃龍把手並行更無纖毫間隔如或未然不免借水獻華去也三人共體用非用四句同音空不空欲識三人并四句金烏初出一團紅

蓬萊卿禪師上堂有句無句如藤倚樹且任諸方點頭及手樹倒藤枯上無沖天之計下無入地之謀靈利漢者裏著得一隻眼便見七縱八橫舉拂子曰看

看一曲兩曲無人會雨過夜塘秋水深上堂杜鵑聲裏春光暮滿地落花留不住琉璃殿上絕行蹤誰人解插無根樹舉拄杖曰者箇是無根底且道解開華也無良久曰祇因連夜雨又過一年春何山珣禪師上堂轆轤鑽住山斧佛祖出頭未輕與縱使醍醐滿世間你無寶器如何取阿呵呵神山打鑼道吾作舞甜瓜徹蒂甜苦瓠連根苦



谷山海禪師上堂一舉不再說已落二三相見不揚眉驪成造作設使動絃別曲告往知來見鞭影便行望刹竿回去脚跟下好與三十棒那堪更向者裏撮摩石火收捉電光工夫枉用渾閒事笑倒西來碧眼胡卓拄杖下座

龍翔珪禪師上堂萬機不到眼見色耳聞聲一句當陽頭戴天腳踏地你諸人祇知今日是五月初一殊不知金烏半夜忙忙去玉兔天明上海東以拂子擊禪床下座

上堂明明無悟有法卽迷諸人向者裏立不得諸人向者裏住不得若立則危若住則瞎直須意不停玄句不停意用不停機此三者旣明一切處不須管帶自然現前不須照顧自然明白雖然如是更須知有向上事久雨不晴咄

上堂僧問如何是祖師西來意師曰東家點燈西家暗坐曰未審意旨如何師曰馬便搭鞍驢便推磨禮拜師曰靈利衲僧祇消一箇遂曰馬搭鞍驢推磨靈利衲僧祇消一箇縱使東家明點燈未必西家暗

中坐西來意旨問如何多口阿師自招禍

雲居悟禪師上堂少林面壁懷藏東土西天歐阜陞堂充塞四維上下致使山巍巍而砥掌平水昏昏而常自清華非豔而結空泉風不搖而片葉零人無法而得咨問佛無心而更可成野蔬淡飯延時日任運隨緣道自靈畢竟如何日午打三更

黃龍忠禪師上堂張公喫酒李公醉子細思量不思議李公醉醒問張公恰使張公無好氣無好氣不如歸家且打睡

烏巨行禪師上堂佛說三乘十二分頓漸偏圓癡人面前不得說夢祖師西來直指人心見性成佛癡人面前不得說夢臨濟三玄雲門三句洞山五位癡人面前不得說夢南明怎麼道還免得遭人檢責也無所以古人道石人機似汝也解唱巴歌汝若似石人雪曲也應和還有和雪曲底麼若有喚來與老僧洗脚

上堂舉趙州示衆云老僧除却二時齋粥是雜用心處師曰今朝六月旦行者擊鼓長老陞堂你諸人總

來者裏雜用心

白揚順禪師上堂鷄啼曉月狗吠枯椿只可默會難入思量看不見處動地放光說不到處天地玄黃撫城尺六狀紙元來出在清江大衆分明話出人難見昨夜三更月到窻

上堂風吹茅茨屋脊漏雨打闌黎眼睛濕恁麼分明却不知却來者裏低頭立

歸宗寶禪師上堂且第一句如何道汝等若向世界未成時父母未生時佛未出世時祖師未西來時道得已是第二句且第一句如何道直饒你十成道得未免左之右之卓拄杖下座

護聖靜禪師上堂參學至要不出先南堂道最初句及末後句透得過者一生事畢儻或未然更與你分作十門各各印證自心還得穩當也未一須信有教外別傳二須知有教外別傳三須會無情說法與有情說法無二四須見性如觀掌中之物了了分明一田地穩密五須具擇法眼六須行鳥道立路七須文武兼濟八須摧邪顯正九須大機大用十須向異

類中行凡欲紹隆法種須盡此綱要方坐得者曲床子受得天下人禮拜敢與佛祖爲師若不到恁麼田地祇一向虎頭他時異日閻老子未放你在道場辯禪師上堂猛虎口邊拾得毒蛇頭上安排更不釘椿搖尾回頭別有生涯婆子被我勘破了大悲院裏有村齋

上堂淨五眼湧金春色晚得五力吹落碧桃華唯證乃知難可測卓拄杖曰一片何人得流經十萬家上堂三祖道但莫憎愛洞然明白當時老僧若見便與一擱且道是憎邪愛邪近來經界稍嚴不許謾名挾佃

上堂舉僧問投子大死底人却活時如何子曰不許夜行投明須到師曰我疑千年蒼玉精化爲一片秋水骨海神欲護護不得一旦鰲頭忽擎出教忠光禪師上堂有句無句如藤倚樹放憨作麼及乎樹倒藤枯句歸何處情知汝等諸人卒討頭鼻不著爲甚如此祇爲分明極艱令所得遲東林顏禪師上堂欲識諸佛心但向衆生心行中識

取欲識常住不凋性但向萬物遷變處會取還識得麼欲得不招無間業莫謗如來正法輪

上堂仲冬嚴寒三界無安富者快樂貧者饑寒不識玄旨錯認定盤何也牛頭安尾上北斗面南看

上堂一滴滴水一滴滴凍天寒人寒風動搖動雲門扇子踣跳上三十三天築著帝釋鼻孔東海鯉魚打一棒雨似盆傾不出諸人十二時中尋常受用

上堂圓通門戶八字打開若是從門入得不堪共語須是入得無門之門方可坐登堂裏所以道過去諸如來斯門已成就現在諸菩薩今各入圓明未來參學人當依如是法從上諸聖幸有如此廣大門風不能繼紹甘自鄙棄穿窬牆壁好不丈夫敢問大眾無門之門作麼生入良久云非唯觀世音我亦從中證上堂客舍久留連家鄉夕照邊簷懸三月雨水沒兩湖蓮錢漏燒燈盞柴生滿竈煙已忘南北念入望盡平川

中際能禪師上堂萬古長空一朝風月不可以一朝風月昧却萬古長空不可以萬古長空不明一朝風

月且如何是一朝風月人皆畏炎熱我愛夏日長熏風自南來殿閣生微涼會與不會切忌承當

薦福休禪師上堂言發非聲是箇甚麼色前不物莫亂針錐透過禹門風波更險咄

龜峰光禪師上堂數日暑氣如焚一箇渾身無處安著思量得也是煩惱人者箇未是煩惱更有已躬下事不明便是煩惱所以達磨大師煩惱要爲諸人吞却又被咽喉小要爲諸人吐却又被牙齒礙取不得捨不得煩惱九年若不得二祖不惜性命往往轉身無路煩惱教死所謂祖禪不了殃及兒孫後來蓮華庵主到者裏煩惱不肯住南岳思大師到者裏煩惱不肯下山更有臨濟德山用盡自己查察煩惱鉢盂無柄龜峰今日爲他閒事長無明爲你諸人從頭點破卓拄杖一下曰一人腦後露腮一人當門無齒更有數人鼻孔沒半邊不勞再勸你諸人休向者裏立地瞋睡殊不知家中飯糲鍋子一時失却了也你若不信但歸家檢點看

開善謙禪師上堂壁立千仞三世諸佛措足無門是

則是太殺不近人情放一線道十方利海放光動地  
是則是爭奈和泥合水須知通一線道處壁立千仞  
壁立千仞處通一線道橫拈倒用正按傍提電激雷  
奔崖頽石裂是則是猶落化門到者裏壁立千仞也  
沒交涉通一線道也沒交涉不近人情和泥合水總  
沒交涉只者沒交涉也則沒交涉是則是又無佛法  
道理若也出得者四路頭管取乾坤獨步且獨步一  
句作麼生道莫怪從前多意氣他家曾踏上頭關

上堂洞山麻三斤將去無星秤子上定過每一斤恰  
有一十六兩二百錢重更不少一釐正與趙州殿裏  
底一般祇不合被大愚鋸解秤鎚却教人理會不得  
如今若要理會得但問取雲門乾屎橛

育王光禪師上堂七手八腳三頭兩面耳聽不聞眼  
覷不見苦樂逆順打成一片且道是甚麼路逢死蛇  
莫打殺無底籃子盛將歸

昭覺辯禪師上堂毫釐有差天地懸隔隔江人唱鷓  
鴒詞錯認胡笳十八拍要會麼欲得現前莫存順逆  
五湖煙浪有誰爭自是不歸歸便得

國清機禪師上堂單明自己樂是苦因趣向宗乘地  
獄劫住五日一參三八普說自揚家醜更若問理問  
事問心問性克由巨耐若是英靈漢窺藩不入據鼎  
不啻便於未有生佛以前轉得身却於今時大官路  
上捷行闊步終不向老鼠窟草窠裏頭出頭沒若也  
根性陋劣要去有滋味處較嚼遇著義學阿師遞相  
錮鑊直饒說得雲興雨現也是蝦蟆化龍下梢依舊  
喫泥喫土堪作甚麼

上堂無隔宿恩可參臨濟禪有肯諾意難續楊岐派  
窮斯煎餓斯炒大海祇將折箸攪你死我活猛火然  
鐺煮佛喋怎麼作用方可撐門拄戶更說聲和響順  
形直影端驢年也未夢見

焦山體禪師上堂舉臨濟示衆四喝公案乃召衆曰  
者箇公案天下老宿拈掇甚多第恐皆未盡善焦山  
不免四稜著地與諸人分明註解一徧如何是踞地  
獅子咄如何是金剛王寶劍咄如何是採竿影草咄  
如何是一喝不作一喝用咄若也未會拄杖子與焦  
山吐露看卓一下曰笑裏有刀又卓一下曰毒蛇無

眼又卓一下曰忍俊不禁又卓一下曰出門是路更有一機舉話長老也理會不得

疎山本禪師上堂久雨不晴戊在丙丁通身泥水露出眼睛且道是甚麼眼睛卓拄杖曰林間泥滑滑時叫兩三聲

楚安方禪師上堂達磨祖師在脚底踏不著兮提不起子細當頭放下看病在當時誰手裏張公會看脉李公會使藥兩箇競頭醫一時用不著藥不相投錯錯喫茶去

西禪需禪師上堂句中意意中句須彌竿于巨川句刻意意刻句烈士發乎狂矢任待牙如劍樹口似血盆徒逞詞鋒虛張意氣所以淨名杜口早涉繁詞摩竭掩關已揚家醜自餘瓦棺老漢巖頭大師向羌峰頂上拏風鼓浪甃弄神變脚跟下好與三十且道過在什麼處良久云機關不是韓光作莫把冒濫當等閒

上堂懶翁懶中懶最懶懶說禪亦不重自己亦不重先賢又誰管你地又誰管你天物外翛然無箇事日

上三竿猶更眠

東禪岳禪師上堂達磨來時此土皆知梵語及乎去後西天悉會唐言若論直指人心見性成佛大似羚羊挂角獵犬尋蹤一意乖疎萬言無用可謂來時他笑我不知去後我笑他唐言梵語親分付自古齋僧怕夜茶

上堂僧問如何是初日分以恒河沙等身布施師曰從苗辨地因語識人曰如何是中日分復以恒河沙等身布施師曰築著磕著曰如何是後日分亦以恒河沙等身布施師曰向下文長付在來日復曰一轉語如天普蓋似地普擎一轉語舌頭不出口一轉語且喜沒交涉要會麼慚愧世尊面赤不如語直大小岳上座口似磑盤今日爲者問話僧講經不覺和註脚一時說破便下座

上堂啞却我口直須要道塞却你耳切忌踉蹌過昨日有人從天台來却道泗洲大聖在洪州打坐十字街頭賣行貨是甚麼斷根草鞋尖簷席帽

西禪淨禪師上堂若欲正提綱直須大地荒欲來衝



雪刃未免露鋒鏑當恁麼時釋迦老子出頭不得卽不問你諸人祇如馬鑑裏藏身又作麼生話會

上堂善鬪者不顧其首善戰者必獲其功其功旣獲坐致太平太平旣致高枕無憂罷拈三尺劍休弄一張弓歸馬于華山之陽放牛于桃林之野風以時而雨以時漁父歌而樵人舞雖然如是堯舜之君猶有化在爭似乾坤收不得堯舜不知名渾家不管興亡事偏愛和雲占洞庭

薦福本禪師上堂高揖釋迦不拜彌勒者與三十拄杖何故爲他祇會步步登高不會從空放下東家牽犁西家拽耙者與三十拄杖何故爲他祇會從空放下不會步步登高山僧恁麼道還有過也無衆中莫有點檢得出者麼若點檢得出須彌南畔把手共行若點檢不出布袋裏老鴉雖活如死

上堂釋迦掩室於摩竭淨名杜口於毗耶須菩提唱無說而顯道釋梵絕視聽而雨華大衆者一隊不唧啾漢無端將祖父田園私地結契各據四至界分方圓長短一時花墜了也致令後代兒孫千載之下上

無片瓦蓋頭下無卓錫之地博山當時若見十字路頭掘箇無底深坑喚來一時埋却免見遞相鈍置何謂如此不見道家肥生孝子國霸有謀臣

靈巖性禪師上堂勘破了也放過一著是衲僧破草鞋現修羅相作女人拜是野狐精魅打箇圓相虛空裏下一點是小兒伎倆攔腮贈掌拂袖便行正是業識茫茫無本可據直饒向黑豆未生已前一時坐斷未有喫靈巖拄杖分敢問大衆且道爲人節文在甚麼處還相委悉麼自從春色來嵩少三十六峰青至今

淨慈禪師上堂世尊不說說迦葉不聞聞卓拄杖曰水流黃蘗來何處牛帶寒鴉過遠村

上堂舉已庵先師道坐佛床斫佛脚不敬東家孔夫子却向他鄉習禮樂師曰入泥入水卽不無先師爭奈寒蟬抱枯木泣盡不同頭卓拄杖曰灼然有不同頭底淨慈向升子裏禮汝三拜

上堂三世諸佛無中說有箇蕩拾花針六代祖師有裏尋無猿猴探水月去此二途如何話會儂家不管

興亡事盡日和雲占洞庭

昭覺淵禪師上堂曰鎔瓶盤釵釧作一金攪酥酪醒  
翻成一味如是賓主道合內外安和五位君臣齊透  
四種料揀一串放行則細雨濛濛秋風颼颼把住則  
空空如也誰敢正眼覷著且道放行爲人好把住爲  
人好復曰等閒一似秋風至無意凉人人自凉

華藏權禪師上堂禪禪無黨無偏迷時千里隔悟在  
口皮邊所以僧問石霜如何是禪霜云顛顛又僧問  
睦州如何是禪州云猛火著油煎又僧問首山如何  
是禪山云猢猻上樹尾連顛大衆道無橫徑立處孤  
危此三大老行聲前活路用劫外靈機若以衲僧正  
眼檢點將來不無優劣一人如張良入陣一人如項  
羽用兵一人如孔明料敵若人辨白得可與佛祖齊  
肩雖然如是忽有箇衲僧出來道長老話作兩橛也  
適來道道無橫徑無黨無偏而今又却分許多優劣  
且作麼生祇對還委悉麼把手上山齊著力咽喉出  
氣自家知

大鴻鑑禪師上堂木落霜空天寒水冷釋迦老子無

處藏身折東籬補西壁撞著不空見菩薩請示念佛  
三昧也甚奇怪却向道金色光明雲參退喫茶去  
承天連禪師上堂拈拄杖曰諸供養中法供養最勝  
所謂法供養者山供養水水供養山僧堂供養佛殿  
佛殿供養僧堂諸人供養老僧老僧供養諸人良久  
曰供養已畢念普供養眞言老僧忘却且教拄杖子  
念與諸人卓一下云靜處薩婆訶

竺原元禪師示衆諸方爲人抽釘拔楔解粘去縛我  
者裏爲人添釘著楔加繩加縛了送向深潭裏待他  
自去理會

隱靖岑禪師上堂今朝八月初五如事分明爲舉嶺  
頭漠漠秋雲樹底鳴鳩喚雨昨夜東海鯉魚吞却南  
山猛虎雖然有照有用畢竟無賓無主唯有文殊普  
賢住住我識得你

列祖提綱錄卷第九

列祖提綱錄卷第十

武林十八澗理安禪寺住持婁東行悅集

五參提綱

洞山价禪師上堂還有不報四恩三有者麼衆無對  
又曰若不體此意何超始終之患直須心心不觸物  
步步無處所常無間斷始得相應直須努力莫閒過  
日

上堂有一人在千人萬人中不肯一人不向一人你  
道此人具何面目雲居出曰某甲參堂去

雲居膺禪師上堂舉先師道地獄未是苦向此衣線  
下不明大事却是最苦師曰汝等既在者箇行流十  
分去九不較多也更著些子精彩便是上座不屈平  
生行脚不孤負叢林古人道欲得保任此事須向高  
高山頂立深深海底行方有些子氣息汝若大事未  
辦且須履踐立途

上堂得者不輕微明者不賤用識者不咨嗟解者無  
厭惡從天降下則貧窮從地涌出則富貴門裏出身  
易身裏出門難動則埋身千丈不動則當處生苗一

言迴脫獨拔當時言語不要多多則無用處

上堂如人將三貫錢買箇獵狗祇解尋得有蹤跡底  
忽遇羚羊挂角莫道蹤跡氣息也無僧向羚羊挂角  
時如何師曰六六三十六曰挂角後如何師曰六六  
三十六僧禮拜師曰會麼曰不會師曰不見道無蹤  
跡

上堂孤迴迴峭嶮嶮僧出問曰某甲不會師曰面前  
案山子也不會

上堂僧家發言吐氣須有來由莫將等閒者裏是甚  
麼所在爭受容易凡問箇事也須識些子好惡若不  
識尊卑良賤不知觸犯信口亂道也無利益傍家行  
脚到處覓相似語所以尋常向兄弟道莫怪不相似  
恐同學太多去第一莫將來將來不相似言語也須  
看前頭八十老人入場屋不是小兒嬉不是因循事  
一言參差卽千里萬里難爲取攝蓋爲學處不著力  
敲骨打髓須有來由言語如鉗如夾如鉤如鎖須教  
相續不斷始得頭頭上具物物上明豈不是得妙底  
事一種學大須子細研窮直須諦當的的無差到者

裏有甚麼蹣跚處有甚麼擬議處向去底人常須慘悚戢翼始得若是知有底人自解護惜終不取次十度發言九度休去爲甚麼如此恐怕無利益體得底人心如臘月扇子直得口邊釀出不是強爲任運如此欲得恁麼事須是恁麼人既是恁麼人不愁恁麼事恁麼事卽難得

上堂汝等諸人直饒學得佛邊事早是錯用心不見古人講得天花落石點頭亦不干自己事自餘是甚麼閒擬將有限身心向無限中用如將方木逗圓孔多少諸訛若無恁麼事饒你攢花簇錦亦無用處未離情識在一切事須向者裏及盡若有一毫去不盡卽被塵累豈況更多差之毫釐過犯山嶽不見古人道學處不立盡是流俗閨閣中物捨不得俱爲滲漏直須向者裏及取及去及來併盡一切事始得無過如人頭頭上了物物上通祇喚作了事人終不喚作尊貴將知尊貴一路自別不見道從門入者非寶棒上不成龍知麼

疎山仁禪師上堂病僧咸通年前會得法身邊事咸

通年後會得法身向上事雲門出問如何是法身邊事師曰枯椿曰如何是法身向上事師曰非枯椿曰還許某甲說道理也無師曰許曰枯椿豈不是明法身邊事師曰是曰非枯椿豈不是明法身向上事師曰是曰祇如法身還該一切也無師曰法身周徧豈得不該門指淨瓶曰祇如淨瓶還該法身麼師曰闍黎莫向淨瓶邊覓門便禮拜

青林虔禪師上堂祖師門下烏道玄微功窮皆轉不究難明汝等諸人直須離心意識參出凡聖路學方可保任者不如是非吾子息

白水仁禪師上堂老僧尋常不欲向聲前色後鼓弄人家男女何故且聲不是聲色不是色僧問如何是聲不是聲師曰喚作色得麼曰如何是色不是色師曰喚作聲得麼僧作禮師曰且道爲汝說答汝話若向者裏會得有箇入處

龍牙遁禪師上堂夫參玄人須透過視佛始得新豐和尚道祖佛言教似生冤家始有參學分若透不得卽被祖佛謾去僧問祖佛還有謾人之心也無師曰

汝道江湖還有礙人之心也無乃曰江湖雖無礙人之心爲時人過不得江湖成礙人去不得道江湖不礙人祖佛雖無礙人之心爲時人透不得祖佛成礙人去不得道祖佛不礙人若透得祖佛過此人過却祖佛若也如是始體得佛祖意方與向上人同如未透得但學佛學祖則萬劫無有出期僧曰如何得不被祖佛謾去師曰道者直須自悟去始得

乾峯和尚上堂法身有三種病二種光須是一一透得始解歸家穩坐須知更有一竅在雲門出問庵內人爲甚麼不知庵外事師呵呵大笑門曰猶是學人疑處師曰子是甚麼心行門曰也要和尚相委師曰直須與麼始解穩坐門應喏喏

上堂舉一不得舉二放過一著落在第二雲門出衆曰昨日有人從天台來却往徑山去師曰典座來曰不得普請便下座

欽山邃禪師上堂橫按拄杖顧視大衆曰有麼有麼如無欽山唱菩薩蠻去也囉囉哩哩使下座

金峯志禪師上堂老僧二十年前有老婆心二十年

後無老婆心僧問如何是二十年前有老婆心師曰問凡答凡問聖答聖曰如何是二十年後無老婆心師曰問凡不答凡問聖不答聖

襄州蘊禪師上堂琉璃殿上光輝而日日無私七寶山中晃耀而頭頭有據泥牛運步木馬嘶聲野老謳歌樵人舞袖太陽路上古曲立音林下相逢更有何事

梁山觀禪師上堂垂釣四海祇釣獐龍格外玄機爲尋知己

太陽立禪師上堂嵯峨萬仞鳥道難通劍刃輕水誰當履踐宗乘妙句語路難陳不二法門淨名杜口所以達磨西來九年面壁始遇知音大陽今日也大無端珍重

上堂諸禪德須明平常無生句妙玄無私句體明無盡句第一句通一路第二句無賓主第三句兼帶去一句道得獅子嚙呻二句道得獅子返擲三句道得獅子踞地縱也周徧十方擒也一時坐斷正當恁麼時作麼生通得箇消息若不通得箇消息來朝更獻



楚王看

上堂撒手那邊千聖外祖堂少室長根芽鷺倚雪巢  
猶自可更看白馬人蘆花

上堂夜半烏鷄抱鵝卵天明起來生老鷄鵝毛鷺嘴  
鷺鷥身却共烏鷄爲侶伴高入煙霄低飛柳岸向晚  
歸來子細看依稀恰似雲中鴈

藥山昱禪師上堂山河大地日月星辰與諸上座同  
生三世諸佛與諸上座同參三藏聖教與諸上座同  
時還信得及麼若也信得及陝府鐵牛吞却乾坤雖  
然如是被法身礙却轉身不得須知有出身之路作  
麼生是諸上座出身之路道道良久曰若道不得永  
沉苦海珍重

投子青禪師上堂召大眾曰若論此事如鷺鳳冲霄  
不留其迹羚羊挂角那覓手蹤金龍不守於寒潭玉  
兔豈棲於蟾影其或主賓若立須威音世外搖頭問  
答言陳仍立路旁提爲唱若能如是猶在半途更若  
凝眸不勞相見

上堂默沉陰界語落深坑擡著則天地懸殊棄之則

千生萬劫洪波浩渺白浪滔天鎮海明珠在誰收掌  
良久卓拄杖曰百雜碎

上堂孤村陋店莫挂瓶孟祖佛玄關橫身直過早是  
蘇秦觸塞求路難回項羽臨江何逃困命諸禪德到  
者裏進則落於天魔退則沉於鬼趣不進不退正在  
死水中諸仁者作麼生得平穩去良久曰任從三尺  
雪難壓寸靈松

芙蓉楷禪師上堂晝入祇陀之苑皓月當天夜登靈  
鷲之山太陽溢目烏鷄似雪孤鴈成群鐵狗吠而凌  
霄泥牛鬪而入海正當恁麼時十方共聚彼我何分  
古佛場中祖師門下大家出一隻手接待往來知識  
諸仁者且道成得箇甚麼事良久曰刺裁無影樹留  
與後人看

上堂纔陞此座已涉塵勞更乃凝眸自彰瑕玷別傳  
一句勾賊破家不失本宗狐狸戀窟所以真如凡聖  
皆是夢言佛及衆生竝爲增語到者裏回光返照撒  
手承當未免寒蟬抱枯木泣盡不回頭

上堂喚作一句已是埋沒宗風曲爲今時通途消耗

所以借功明位用在體處借位明功體在用處若也  
體用雙明如門扇兩開不得向兩扇上著意不見新  
豐老子道峯巒秀異鷗不停機靈木迢然鳳無依倚  
直得功成不處電火難追擬議之間長途萬里

上堂拈拄杖曰者裏薦得盡是諸佛建立邊事直饒  
東涌西沒卷舒自在也未夢見七佛已前消息須知  
有一人不從人得不受教詔不落階級若識此人一  
生參學事畢薦召大眾曰更若凝眸不勞相見

上堂良久曰青山常運步石女夜生兒便下座

枯木成禪師上堂燈籠忽爾笑哈哈如何露柱亦懷  
胎天明生得白頭女至今遊蕩不歸來者冤家好歸  
來黃花與翠竹早晚爲誰栽

上堂知有佛祖向上事方有說話分諸禪德且道那  
箇是佛祖向上事有箇人家兒子六根不具七識不  
全是大闡提無佛種性逢佛殺佛逢祖殺祖天堂收  
不得地獄攝無門大眾還識此人麼良久曰對面不  
仙陀睡多饒寐語

上堂歸元性無二方便有多門但了歸元性何愁方

便門諸人要會歸元性麼露柱將來作木杓旁人不  
肯任從伊要會方便門麼木杓將來作露柱撐天拄  
地也相宜且道無落方便門一句作麼生道三十年  
後莫教錯舉

寶峯照禪師上堂古佛道我初成正覺親見大地衆  
生悉皆成正覺後來又道深固幽遠無人能到因沒  
見識漢好龍頭蛇尾便下座

上堂過去諸佛已入涅槃了也汝等諸人不應追念  
未來諸佛未出于世汝等諸人不要妄想正當今日  
你是何人參

上堂伯夷隘柳下惠不恭君子不由也二邊不立中  
道不安時作麼生拈拄杖曰鴛鴦繡出從君看不把  
金針度與人

上堂太陽門下妙唱彌高明月堂前知音蓋寡不免  
舟橫江渚掉舉清波唱慶堯年和清平樂如斯告報  
普請承當擬議之間白雲萬里

上堂本自不生今亦無滅是死不得底樣子當處出  
生隨處滅盡是活生受底規模大丈夫漢直須處生

死流臥荊棘林俯仰屈伸隨機施設能如是也無量方便莊嚴三昧大解脫門蕩然頓開其或未然無量煩惱一切塵勞獄立面前塞却古路

上堂古人道墮肢體黝聰明離形去智同于大道正當恁麼時且道是甚麼人刪詩書定禮樂還委恁麼禮云禮云玉帛云乎哉樂云樂云鐘鼓云乎哉

石門易禪師上堂皓月當空澄潭無影紫微轉處夕陽輝彩鳳歸時天欲曉碧霄雲外石笋橫空綠水波中泥牛駕浪懷胎玉兔曉過西岑抱子金鷄夜棲東嶺於斯明得始知夜明簾外別是家風空王殿中聖凡絕跡且道作麼生是夜明簾外事還委恁麼正值秋風來入戶一聲砧杵落誰家

大洪遂禪師上堂召大眾一拳拳倒黃鶴樓一踏踏翻鸚鵡洲慣向高樓驟玉馬曾於急水打金毬然雖恁麼爭奈有五色絲條擊手脚三鐺金鎖鎖咽喉直饒鎚碎金鎖割斷絲條須知更有一重礙汝在且道如何是那重還會麼善吉維摩談不到目連鷲子看如盲

長蘆了禪師上堂上孤峯頂過獨木橋驚直恁麼行猶是時人脚高脚低處若見得徹不別尸身偏十方未入門常在屋裏其或未然趁涼搬取一轉柴

上堂道得第一句不被拄杖子瞞識得拄杖子猶是途路中事作麼生是到地頭一句

上堂處處覓不得祇有一處不覓自得且道是那處良久曰賊身已露

上堂苔封古徑不墮虛凝霧鎖寒林肯彰風要鉤針穩密孰云漁父棲巢祇麼承當自是平常快活還有具透關眼底麼良久直饒聞早便歸去爭似從來不出門

上堂幻化空身卽法身遂作舞云見麼見麼恁麼見得過橋村酒美又作舞云見麼見麼恁麼不見隔岸野花香

上堂還有不被玄妙汙染底麼良久曰者一點傾四海水已洗脫不下

上堂窮微喪本體妙失宗一句截流淵玄及盡是以金針密處不露光鑑玉線通時潛舒異彩雖然如是

猶是交互雙明且道巧拙不到作麼生相委良久曰  
雲蘿秀處青陰合巖樹高低翠鎖深

上堂轉功就位是向去底人玉韞荊山貴轉位就功  
是却來底人紅爐片雪春功位俱轉通身不滯撒手  
亾依石女夜登機密室無人掃正恁麼時絕氣息一  
句作麼生相委良久曰歸根風墮葉照盡月潭空  
天童覺禪師上堂黃閣簾垂誰傳家信紫維帳合暗  
撒珍珠正恁麼時視聽有所不到言詮有所不及如  
何通得箇消息去夢回夜色依稀曉笑指家風爛熳  
春

上堂心不能緣口不能議直饒退步荷擔切忌當頭  
觸諱風月寒清古渡頭夜船撥轉瑠璃地

上堂空劫有真宗聲前問已躬亦窮新活計清白舊  
家風的的三乘外寥寥一印中却來行異類萬派自  
朝東

大洪預禪師上堂舉船子囑夾山曰直須藏身處無  
蹤跡無蹤跡處莫藏身吾在藥山三十年祇明此事  
今時人爲甚麼却造次丹山無彩鳳寶殿不留冠有

時慙有時癡非我途中爭得知

治平潤禪師上堂優游實際妙明家轉步移身指落  
霞無限白雲猶不見夜乘明月出蘆花

眞如會禪師上堂空劫中事自肯承當日用全彰有  
何滲漏正好歸家穩坐任他雪覆青山不留元字挂  
懷誰顧波翻水面且道正不立玄偏不附物一句如  
何舉似機絲不挂梭頭事文彩縱橫意自殊

智通深禪師上堂來不入門去不出戶來去無痕如  
何提唱直得古路苔封羶羊絕迹蒼梧月鏤丹鳳不  
棲所以道藏身處沒蹤跡沒蹤跡處莫藏身若能如  
是去住無依了無向背還委恁麼而今分散如雲鶴  
你我相忘觸處立

雪竇宗禪師上堂人人有箇鼻孔唯有善權無鼻孔  
爲甚麼無二十年前被人掣落了也人人有兩箇眼  
睛唯有善權無眼睛爲甚麼無被人木楔子換了也  
人人有箇髑髏唯有善權無髑髏爲甚麼無借人作  
屎杓了也遂召大眾曰鼻孔又無眼睛又無髑髏又  
無諸人還識善權麼若也不識是諸人埋沒善權其

或未然更聽一頌澗底泥牛金貼面山頭石女著眞紅繫驢橛上生芝草不是雲鬪香爐峰

淨慈暉禪師上堂巢知風穴知雨甜者甜兮苦者苦不須計較作思量五五從來二十五萬般施設到平常此是叢林飽參句諸人還委悉麼野老不知堯舜力鑿鑿打鼓祭江神

上堂谷之神樞之要裏許旁參回途得妙雲雖動而常閒月雖晦而彌照賓主交參正偏兼到十洲春盡花凋殘珊瑚樹林日杲杲

上堂皮膚脫落絕方隔明了身心一物無妙入道寰深靜處玉人端馭白牛車妙明田地達者還稀識情不到唯證方知白雲兒靈靈自照青山父卓卓常存機分頂後光智契劫前眼所以道新豐路兮峻仍敲新豐洞兮湛然沃登者登兮不動搖游者游兮莫忽速亭堂雖有到人稀林泉不長尋常木諸禪德向上一著尊貴難明瑠璃殿上不稱尊翫翠簾前還合併正與麼時針線貫通眞宗不墜合作麼生施設滿頭白髮離巖谷半夜穿雲入市鄽

上堂舉傳大士法身頌云空手把鋤頭步行騎水牛人從橋上過橋流水不流雲門大師道諸人東來西來南來北來各各騎一頭水牯牛來然雖如是千頭萬頭祇要識取者一頭師曰雲門尋常乾爆爆地錐割不入到者裏也解拖泥帶水諸人祇今要見者一頭麼天色稍寒各自歸堂

上堂舉風幡話師曰風幡動處著得箇眼却是上座風幡動處失却箇眼卽是風幡其或未然不是風幡不是心衲僧徒自強錐針巖房雨過昏煙淨臥聽涼風生竹林

瑞巖恭禪師上堂春風楊柳眉春禽弄百舌一片祖師心兩處俱漏泄不動步還家習漏顛消滅暗投玉線芒曉貫金針穴深固實幽遠無人孰辨別慚愧可憐生頭頭皆合轍不念阿彌陀南無乾屎橛無智癡人前第一不得說

雲門偃禪師上堂我事不獲已向你諸人道直下無事早是相埋沒了也更欲踏步向前尋言逐句求覓解會千差萬別廣設問難贏得一場口滑去道轉遠



有甚麼休歇時此事若在言語上三乘十二分教豈是無言語因甚麼更道教外別傳若從學解機智得祇如十地聖人說法如雲如雨猶被呵責見性如隔羅縠以此故知一切有心天地懸殊雖然如此若是得底人道火何曾燒口終日說事未嘗挂著唇齒未嘗道著一字終日著衣喫飯未嘗觸著一粒米挂一縷絲雖然如此猶是門庭之說也須是實得甚麼始得若約衲僧門下句裏呈機徒勞佇思直饒一句下承當得猶是瞌睡漢時有僧問如何是一句師曰舉止堂三乘十二分教橫說豎說天下老和尚縱橫十字說與我拈針鋒許說底道理來看甚麼道早是作死馬醫雖然如此且有幾箇到此境界不敢望汝言中有響句裏藏鋒瞬目千差風恬浪靜伏惟尚饗

上堂諸兄弟盡是諸方參尋知識決擇生死到處豈無尊宿垂慈方便之詞還有透不得底句麼出來舉看待老漢與你大家商量有麼有麼時有僧出擬伸問次師曰去去西天路迢迢十萬餘便下座

上堂因聞鐘聲乃曰世界與麼廣濶爲甚麼鐘聲披

七條

上堂舉一則語教汝直下承當早是撒尿著汝頭上也直饒拈一毫頭盡大地一時明得也是剜肉作瘡雖然如此汝亦須是實到者箇田地始得若未切不得掠虛却須退步向自己根脚下推尋看是箇甚麼道理實無絲毫許與汝作解會與汝作疑惑況汝等各各當人有一段事大用現前更不煩汝一毫頭氣力便與祖佛無別自是汝諸人信根淺薄惡業濃厚突然起得許多頭角擔鉢囊千鄉萬里受屈作麼且汝諸人有甚麼不足處大丈夫漢阿誰無分獨自承當得猶不著便不可受人欺謾取人處分纔見老和尚開口便好把特石驀口塞便是屎上青蠅相似鬬啖將去三箇五箇聚頭商量苦屈兄弟古德一期爲汝諸人不柰何所以方便垂一言半句通汝入路知是般事拈放一邊自著些子筋骨豈不是有少許相親處快與快與時不待人出息不保入息更有甚麼身心別處閒用切須在意珍重

上堂佛法也太煞有祇是舌頭短良久曰長也

上堂一言纔舉千車同轍該括微塵猶是化門之說若是衲僧合作麼生若將佛意祖意者裏商量曹谿一路平沈還有人道得麼道得底出來僧問如何是超佛越祖之談師曰餬餅曰者裏有甚麼交涉師曰灼然有甚麼交涉乃曰汝等諸人沒可作了見人道著祖意便問超佛越祖之談汝且喚甚麼作佛喚甚麼作祖且說超佛越祖底道理看問箇出三界汝把將三界來看有甚麼處聞覺知隔礙著汝有甚麼聲塵色法與汝可了了箇甚麼碗以那箇爲差殊之見他古聖不奈何橫身爲物道箇舉體全真物物觀體不可得我向汝道直下有甚麼事早是相埋沒了也汝若實未有入頭處且獨自參詳除却著衣喫飯屙屎送尿更有甚麼事無端起得如許多般妄想作甚麼更有一般底如等閒相似聚頭學得箇古人話路識性記持妄想卜度道我會佛法了也祇管說葛藤取性過時更嫌不稱意千鄉萬里拋却父母師長作者去就者般打野樵漢有甚麼死急行脚去以拄杖趲下

上堂故知時運澆漓代千像季近日師僧北去言禮文殊南去謂遊衡嶽恁麼行脚名字比丘徒消信施苦哉苦哉問著黑漆相似祇管取性過時設有三箇兩箇狂學多聞記持話路到處覓相似語句印可老宿輕忽上流作薄福業他日閻羅王釘釘之時莫道無人向你說若是初心後學直須擺動精神莫空記人說處多虛不如少實向後祇是自賺有甚麼事近前

上堂我看汝諸人二三機中尙不能搆得空披衲衣何益汝還會麼我與汝註破久後到諸方若見老宿舉一指豎一拂子云是禪是道拽拄杖打破頭便行若不如此盡落天魔眷屬壞滅吾宗汝若實不會且向葛藤社裏看我尋常向汝道微塵刹土中三世諸佛西天二十八祖唐土六祖盡在拄杖頭上說法神通變現聲應十方一任縱橫汝還會麼若不會且莫掠虛然雖如此且諦當實見也未直饒到此田地也未夢見衲僧沙彌在三家村裏不逢一人驚拈拄杖畫一畫曰總在者裏又畫一畫曰總從者裏出去也

珍重

上堂聞聲悟道見色明心遂舉起手曰觀世音菩薩將錢買餠餅放下手曰元來祇是饅頭

上堂乾坤之內宇宙之間中有一寶秘在形山拈燈籠向佛殿裏將三門來燈籠上作麼生自代曰逐物意移又曰雲起雷興

上堂拈拄杖曰凡夫實謂之有二乘析謂之無緣覺謂之幻有菩薩當體卽空衲僧家見拄杖便喚作拄杖行但行坐但坐不得動著

上堂函蓋乾坤曰機銖兩不涉世緣作麼生承當衆無對自代曰一鏃破三關

上堂諸和尚子莫妄想天是天地是地山是山水是水僧是僧俗是俗良久曰與我拈案山來僧便問學人見山是山水是水時如何師曰三門爲甚麼騎佛殿從者裏過曰恁麼則不妄想去也師曰還我話頭來

上堂你若不相當且覓箇入頭處微塵諸佛在你舌頭上三藏聖教在你脚跟底不如悟去好還有悟得

底麼出來對衆道看

示衆盡十方世界乾坤大地以拄杖畫云百雜碎三乘十二分教達磨西來放過卽不可若不放過不消一喝

示衆真空不壞有真空不異色僧便問作麼生是真空師曰還聞鐘聲麼曰此是鐘聲師曰驢年夢見麼上堂平地上死人無數過得荊棘林者是好手時有僧出曰與麼則堂中第一座有長處也師曰蘇嚕蘇嚕

上堂拈拄杖曰拄杖子化爲龍吞却乾坤了也山河大地甚麼處得來

示衆大用現前不存軌則時有僧問如何是大用現前師拈起拄杖高聲唱曰釋迦老子來也

上堂要識祖師麼以拄杖指曰祖師在你頭上踉蹌要識祖師眼睛麼在你脚跟下又曰者箇是祭鬼神茶飯雖然如此鬼神也無厭足

上堂光不透脫有兩般病一切處不明面前有物是一又透得一切法空隱隱地似有箇物相似亦是光

不透脫又法身亦有兩般病得到法身爲法執不忘已見猶存坐在法身邊是一直饒透得法身去放過卽不可子細點檢將來有甚麼氣息亦是病

德山密禪師上堂我有三句語示汝諸人一句箇蓋乾坤一句截斷衆流一句隨波逐浪作麼生辯若辯得出有參學分若辯不出長安路上鞦韆地

上堂與麼來者現成公案不與麼來者垛生招箭總不與麼來者徐六擔板迅速鋒鎚猶是鈍漢萬里無雲青天猶在

上堂舉臨濟示衆曰恁麼來者恰似失却不恁麼來者無繩自縛十二時中莫亂斟酌會與不會都盧是錯分明與麼道一任天下人貶剝師曰古鏡濶一丈屋梁長三尺是汝鉢鎖子濶多少

洞山初禪師上堂言無展事語不投機承言者喪滯句者迷還得麼你衲僧分上到者裏須具擇法眼始得祇如洞山恁麼道也有一場過且道過在甚麼處南臺遵禪師上堂從上宗乘合作麼生提綱合作麼生言論佛法兩字當得麼真如解脫當得麼雖然如

是細不通風大通車馬若約理化門中一言纔啓震動乾坤山河大地海晏河清三世諸佛說法現前於此明得古佛殿前同登彼岸無事珍重

覺華照禪師上堂總似今日老胡有望然燈佛不如閻黎總似今日老胡絕望閻黎不如然燈佛于此明得大地微塵諸佛西天二十八祖唐土六祖天下老宿一時拈來山僧拄杖頭上轉妙法輪於此明不得百千諸佛穿你鼻孔西天二十八祖透過你髑髏還知麼若不知山僧與你指出良久曰山河大地有甚麼過久立珍重

五祖戒禪師上堂佛病祖病一時與諸禪德拈向三門外諸禪德還拈得山僧病也無若拈得山僧病不妨見得佛病祖病珍重

智門祚禪師上堂一法若有毗盧墮在凡夫萬法若無普賢失其境界正當恁麼時文殊向甚麼處出頭若也出頭不得金毛獅子腰折幸好一盤飯莫待糝椒薑

上堂山僧記得在母胎中有一則語今日舉似大眾

諸人不得作道理商量還有人商量得麼若商量不得三十年後不得錯舉

上堂雪峯輓毬羅漢書字歸宗斬蛇大隨燒畚且道明甚麼邊事還有人明得麼試道看若明不得所以道斬蛇須是斬蛇手燒畚須是燒畚人瞥起情塵生妄見眼裏無筋一世貧

洞山聰禪師上堂教山僧道甚麼卽得古卽是今今卽是古所以楞嚴經道松直棘曲鵠白烏玄還知得麼雖然如是未必是松一向直棘一向曲鵠便白烏便玄洞山道者裏也有曲底松也有直底棘也有玄底鵠也有白底烏久立

上堂晨鷄報曉靈粥後便天明燈籠猶睡露柱却惺惺復曰惺惺直言惺惺歷歷直言歷歷明朝後日莫認奴作郎珍重

洞山寶禪師上堂總恁麼風恬浪靜那裏得來忽遇洪波浩渺白浪滔天當恁麼時覓箇水手也難得衆中莫有把柁者麼衆無對師曰賺殺一船人

上方岳禪師上堂旋收黃葉燒青煙竹榻和衣半夜

眠粥後放參三下鼓孰能更話祖師禪便下座  
育王坦禪師上堂千花競發百鳥啼春是向上句諸佛出世知識與慈是向下句作麼生是不涉二途句若識得頂門上出氣若識不得土牛耕石田擊禪床下座

金山新禪師上堂世間所貴者和氏之璧隋侯之珠金山喚作驢屎馬糞出世間所貴者眞如解脫菩提涅槃金山喚作屎沸碗鳴且道恁麼說話落在甚麼處故不是取舍心重信邪倒見諸人要知麼猛虎不顧几上肉洪爐豈鑄囊中錐

雲居舜禪師上堂唯一堅密身一切塵中現蝦蟇蚯蚓各有窟穴烏鵲鳩鵲亦有窠巢正當與麼時爲甚麼人說法良久曰方以類聚物以群分

上堂三峽道無別朝朝祇麼說僧繇會寫眞鎮府出鑛鐵

上堂不長不短不小不大此箇道理是誰境界咄上堂聞說佛法兩字早是汚我耳目諸人未跨雲居門脚跟下好與三十棒雖然如是也是爲衆竭力



上堂舉夾山道闢市門頭議取天子百車頭上薦取老僧雲居卽不然婦搖機札兒弄口喝喝

上堂諸方有弄蛇頭撥虎尾跳大海劍刃裏藏身雲居者裏寒天熱水洗脚夜間脫襪打睡早朝旋打行纏風吹籬倒喚人夫劈篾縛起

上堂雲居不會禪洗脚上床眠冬瓜直饒個瓠子曲彎彎

育王璉禪師上堂文殊寶劍得者爲尊乃拈拄杖曰淨因今日恁麼直得千聖路絕雖然如是猶是矛盾相攻不犯鋒鎚如何運用良久曰野蒿自發空臨水江燕初歸不見人參

上堂太陽東昇爍破大千之暗諸人若向明中立猶是影響相馳若向暗中立也是藏頭露影漢到者裏作麼生吐露良久曰逢人祇可三分語未可全拋一片心參

上堂世法裏面迷却多少人佛法裏面醉却多少人祇如不迷不醉是甚麼人分上事

上堂言鋒纔擊義海交深若用徑截一路各請歸堂

上堂應物現形如水中月遂拈起拄杖曰者箇不是物卽今現形也且道月在甚麼處良久曰長空有路還須透潭底無蹤不用尋擊香臺下座

上堂白日東上白日西落急如投壺閃寥廓神龍一舉透無邊纖鱗猶向泥中躍靈燄中休湊泊三歲孩童髮四角參

上堂良久舉起拳頭曰握拳則五嶽倒卓展手則五指參差有時把定佛祖關有時拓開千聖宅今日者裏相呈且道作何使用拍禪床曰向下文長付在來日

承天簡禪師上堂夫遮那之境界衆妙之玄門知識說之而莫窮善財酌之而不竭文殊體之而寂寂普賢證之以重重若也隨其法性如雲收碧漢本無一物若也隨其智用如花開春谷應用無邊雖說偏恒沙乃同遵一道且問諸人作麼生是一道良久曰白雲斷處見明月黃葉落時聞擣衣參

上堂莫離蓋纏莫求佛祖去此二途以何依怙江淹夢筆天龍見虎古老相傳月不跨五參

上堂一刀兩段埋沒宗風獅子翻身拖泥帶水直饒坐斷十方不通凡聖脚跟下好與三十

上堂拈一放一妙用縱橫去解除玄收凡破聖若望本分草料大似磨輞作鏡衲僧家合作麼生良久曰實

九峯韶禪師上堂山僧說禪如虻蟻吐油捏著便出若不捏著一點也無何故祇爲不曾看讀古今因緣及預先排疊勝妙見知等候陞堂便磨唇捋鬚將粥飯氣熏炙僧人凡有一問一答蓋不得已豈獨山僧看他大通智勝如來默坐十劫無開口處後因諸天梵天及十六王子再三勸請方始說之却不是秘惜祇爲不敢埋沒諸人山僧既不埋沒諸人不得道山僧曾陞座參

西塔殊禪師上堂黃梅席上數如麻句裏呈機事可嗟直是本來無一物青天白日被雲遮參

慧力文禪師上堂建山寂寞坐倚城郭無味之談七零八落以拄杖敲香臺下座

雲居億禪師上堂馬祖纔陞堂雄峯便卷席春風一

陳來滿地花狼籍便下座

玉泉皓禪師示衆曰一夜雨霽烹打倒蒲萄棚知事頭首行者人力拄底拄撐底撐撐拄拄到天明依舊可憐生

天聖道禪師上堂不從一地至一地寂滅性中寧有位釋迦稽首問然燈仁者何名爲受記便下座

天衣懷禪師上堂須彌頂上不扣金鐘畢鉢殿中無人聚會山僧倒騎佛殿諸人反著草鞋朝遊檀特暮到羅浮拄杖針筒自家收取

上堂衲僧橫說豎說未知有頂門上眼時有僧問如何是頂門上眼師曰衣穿瘦骨露屋破看星眠

上堂大衆集定乃曰上來道箇不審能銷萬兩黃金下去道箇珍重亦銷得四天下供養若作佛法話會滴水難消若作無事商量眼中著屑且作麼生卽是良久曰還會麼珍重

上堂夫爲宗師須是驅耕夫之牛奪饑人之食遇賤卽貴遇貴卽賤驅耕夫之牛令他苗稼豐登奪饑人之食令他永絕饑渴遇賤卽貴握土成金遇貴卽賤

變金成土老僧亦不驅耕夫之牛亦不奪饑人之食  
何謂耕夫之牛我復何用饑人之食我復何餐我也  
不握土成金也不變金作土何也金是金土是土玉  
是玉石是石僧是僧俗是俗古今天地古今日月古  
今山河古今人倫雖然如此打破大散關幾箇迷逢  
達磨

上堂鴈過長空影沉寒水鴈無遺蹤之意水無留影  
之心若能如是方解向異類中行不用續鳧截鶴夷  
嶽盈掣放行也百醜千拙收來也掣掣拳拳用之則  
敢與八大龍王鬪富不用都來不直半分錢參

上堂龔饒常干世界鼻孔摩觸家風芭蕉聞雷開葵  
花隨日轉諸仁者芭蕉聞雷開還有耳麼葵花隨日  
轉還有眼麼若也會得西天卽是此土若也不會七  
九六十三收

上堂靈源絕朕普現色身法離斷常有無堪示所以  
道塵塵不見佛刹刹不聞經要會靈山親授記畫見  
日夜見星良久曰若到諸方不得錯舉參

上堂夜來寒霜凜冽黃河凍結陝府鐵牛腰折盡道

女媧煉石補天爭奈西北一缺如今欲與他補却又  
恐大地人無出氣處且留者一竅與大地人出氣參  
上堂虛明自照不勞心力上士見之鬼神茶飯中下  
得之狂心頓息更有一人切忌道著

上堂光透日月明暗不收智出聖凡賢愚不歷所以  
道不用低頭思量難得良久曰是甚麼

上堂青蘿賣綠直上寒松之頂白雲淡泞出沒太虛  
之中何似南山起雲北山下雨若也會得甜瓜徹蒂  
甜若也不會苦瓠連根苦

上堂無邊刹境自他不隔于毫端且道妙喜世界不  
動如來說甚麼法十世古今始終不離於當念祇如  
威音王佛最初一會度多少人若是通方作者試爲  
道看良久曰行路難行路難萬仞峯頭君自看

上堂枯桑知天風海水知天寒金色頭陀兒處不眞  
鷄足山中與他看守衣鉢三千大喻八百小喻大似  
泥裏洗土塊四十九年三百六十餘會摩竭提國猶  
較些子德山臨濟雖然丈夫爭似劉賓國王一刀兩  
段如今若有箇人鼻孔遼天山僧性命何在良久曰

太平本是將軍致不許將軍見太平喝一喝下座  
法昌遇禪師上堂汝若退身千尺我便當處生芽汝  
若覲面相呈我便藏身露影汝若春池拾磔我便撒  
下明珠直得水洒不著風吹不入如箇無孔鐵鎚相  
似且道法昌還有爲人處也無良久曰利刀割肉瘡  
猶合惡語傷人恨不銷

上堂春山青春水綠一覺南柯夢初足攜筇縱步出  
松門是處桃英香馥郁因思昔日靈雲老三十年來  
無處討如今競愛摘楊花紅香滿地無人掃

上堂拈起拄杖曰我若拈起你便喚作先照後用我  
若放下你便喚作先用後照我若擲下你便喚作照  
用同時忽然不拈不放你向甚麼處卜度直饒會得  
個儻分明若遇臨濟德山便須腦門著地且道伊有  
甚麼長處良久曰曾經大海休誇水除却須彌不是  
山

上堂夜半烏鷄誰捉去石女無端遭指注空王令下  
急搜求唯心便作軍中主雲門長驅瀉山隊伍列五  
位槍旗布三玄戈弩藥山持刀青原荷斧石鞮彎弓

禾山打鼓陣排雪嶺長蛇兵屯黃檗飛虎木馬帶毛  
烹泥牛和角羹賞三軍犒師旅打葛藤分露布截海  
鷗摩橫山簾土擊玄關除微路多少平人受辛苦無  
邊利海競紛紛三界聖凡無覓處無覓處還知否昨  
夜雲收天宇寬依然帶月歸高樹

雲居元禪師上堂寒寒風撼竹聲乾水凍魚行灘林  
疎鳥宿難早是嚴霜威重那堪行客衣單休思紫陌  
山千朵且擁紅爐火一攢放下茱萸空中竹櫪倒却  
迦葉門前利竿直下更云不會筭來也太無端參

智海逸禪師上堂憶得老僧年七歲時于村校書處  
得一法門超情離見絕妙絕玄爰自染神逾六十載  
今日輒出普告大眾若欲傳持宜當諦聽遂曰寒原  
耕種罷牽犢負薪歸此夜一爐火渾家身上衣諸禪  
德逢人不得錯舉

上堂古者道接物利生絕妙外甥終是不肖他家自  
有兒孫將來應用恰好諸禪德還會麼菜園牆倒晴  
方築房店籬穿雨過修院宇漏時隨分整兒孫大小  
盡風流

慧林照禪師上堂頭圓像天足方似地古貌稜層丈  
夫意氣趨倒須彌踏翻海水帝釋與龍王無著身處  
乃拈拄杖曰却來拄杖上回避咄任汝神通變化究  
竟須歸者裏以拄杖卓一下

法雲秀禪師上堂看風使帆正是隨波逐浪截斷衆  
流未免依前滲漏量才補職寧越短長買帽相頭難  
得恰好直饒上不見天下不見地東西不辯南北不  
分有甚麼用處任是純鋼打就生鐵鑄成也須額頭  
汗出總不恁麼如何商量良久曰赤心片片誰知得  
笑殺黃梅石女兒

上堂山僧不會巧說大都應箇時節相喚喫碗茶湯  
亦無祖師妙訣禪人若也未相諳踏著秤鎚硬似鐵  
上堂秋雲秋水青山滿目者裏明得千足萬足其或  
未然道士倒騎牛參

上堂寒雨細朔風高吹沙走石扳木鳴條諸人盡知  
有且道風作何色若識得去許你具眼若也不識莫  
怪相瞞參

上堂少林九年冷坐却被神光覷破如今玉石難分

祇得麻纏紙裏還會麼笑我者多晒我者少

上堂衲僧家高揖釋迦不拜彌勒未爲分外祇如半  
偈亡軀一句投火又圖箇甚麼良久曰彼彼住山人  
何須更說破

長蘆夫禪師上堂召衆曰江山遠檻宛如水墨屏風  
殿閣凌空麗若神仙洞府森羅萬象海印交參一道  
神光更無遮障諸人還會麼良久曰寥寥天地間獨  
立望何極參

梵言首座示衆南陽國師道說法有所得斯則野干  
鳴說法無所得是名獅子吼師曰國師恁麼道大似  
掩耳偷鈴何故說有說無盡是野干鳴諸人要識獅  
子吼麼咄

開元孜禪師上堂衲僧家向針眼裡藏身稍寬大海  
中走馬甚窄將軍不上便橋勇士徒勞挂甲晝行三  
千夜行八百卽不問不動步一句作麼生道若也道  
得觀音勢至文殊普賢祇在目前若道不得直須撩  
起布裙緊峭草鞋參

上堂寒空落落大地漫漫雲生洞口水出高原若也



把定則十方世界恍然若也放行則東西南北坦然  
茫茫宇宙人無數一箇箇鼻孔遶天且問諸人把定  
卽是放行卽是還有人斷得麼若無人斷得三門外  
有兩箇大漢一箇張眉握劍一箇努目揮拳參

明因贊禪師上堂橫按拄杖曰若恁麼去直得天無  
二日國無二王釋迦老子飲氣吞聲一大藏教如蟲  
蝕木設使鑽仰不及正是無孔鐵鎚假饒信手拈來  
也是殘羹餒飯一時吐却方有少分相應更及墮在  
空亡依舊是鬼家活計要會麼雨後始知山色翠事  
難方見丈夫心卓拄杖下座

西臺辯禪師上堂舉臨濟無位真人語乃召大眾曰  
臨濟老漢尋常一條脊梁硬似鐵及乎到者裏大似  
日中迷路眼見空花直饒道無位真人是乾屎橛正  
是泥龜曳尾其僧祇知季夏極熱不知仲冬嚴寒若  
據當時合著得甚麼語塞斷天下人舌頭西臺祇恁  
麼休去又乃眼不見爲淨不免出一隻手狼籍去也  
臨濟一擔西臺一堆一擔一堆分付阿誰從教撒同  
諸方去笑殺當年老古錘

中際遵禪師上堂咄咄咄井底嗽嗽是何物直饒三  
千大千也祇是箇鬼窟咄

上堂昨夜四更起來呵呵大笑不歇幸然好一覺睡  
霜鐘撞作兩橛

上堂禾山普化忽顛狂打鼓搖鈴戲一場劫火洞然  
宜羨茗嵐風大作好乘涼四蛇同篋看他弄二鼠侵  
藤不自量滄海月明何處去廣寒宮殿白銀床咄

上堂八萬四千深法門門門有路超乾坤如何箇箇  
踏不著祇爲蜈蚣太多脚不唯多脚亦多口釘着鐵  
舌徒增醜拈椎豎拂泥洗泥揚眉瞬目籠中鷄要知  
佛祖不到處門掩落花春鳥啼

大中隆禪師上堂法無異法道無別道時時逢見釋  
迦處處撞著達磨放步卽交肩開口卽敲破不敲破  
大小大

上堂夫欲智拔先須定動卓拄杖曰噉囉嚙嚙喇娑  
婆訶歸堂喫茶

上堂觸境無滯底爲甚麼擡頭不起田地穩密底爲  
甚麼下脚不得譬如天王賜與華屋雖獲大宅要因

門入乃曰門邊樊噲踏開真主出巨靈擡手錦鱗噴  
參

資壽巖禪師上堂雲生谷口月滿長川樵父斫深雲  
漁翁釣沙島到者裏便是吳道子張僧繇無你下手  
處良久曰歸堂問取聖僧參

上堂乾坤肅靜海晏河清風不鳴條雨不破塊春生  
夏長秋收冬藏者箇是世間法作麼生是佛法良久  
曰欲得不招無間業莫謗如來正法輪

本覺一禪師上堂折半列三人人道得去一拈七亦  
要商量正當今日雲門道底不要別作麼生露得箇  
消息良久曰日月易流

地藏恩禪師上堂豎起拳曰或時爲拳復開曰或時  
爲掌若遇衲僧有功者賞遂放下曰直是土曠人稀  
相逢者少

上堂雨後鳩鳴山前麥熟何處牧童兒騎牛笑相逐  
更把短笛橫吹風前一曲兩曲參

道場印禪師上堂韶石渡頭舟橫野水汾陽浪裏棹  
撥孤煙雲月無私谿山豈異一言合轍千里同風敢

問諸人作麼生是同風底句良久曰八千子弟今何  
在萬里山河屬帝家

法雲白禪師上堂離婁有意白浪徒以滔天罔象無  
心明珠忽然在掌以手打一圓相召大眾曰還見麼  
良久曰看卽有分

上堂拈拄杖示衆曰山僧住持七十餘日未曾拈動  
者箇而今不免現些小神通供養諸人遂卓拄杖下  
座

元豐滿禪師上堂堪作梁底作梁堪作柱底作柱靈  
利衲僧便知落處落拈拄杖曰還知者箇堪作甚麼  
打香臺一下曰莫道無用處復打一下曰參

招提滿禪師上堂六塵不惡還同正覺馬上誰家白  
面郎穿花折柳垂巾角夜來一醉明月樓呼盧輸却  
黃金宅臂鷹走犬歸不歸蛾眉皓齒嘆無力此心能  
有幾人知黃頭碧眼非相識囉囉哩拍手一下下座  
長蘆和禪師上堂一二三四五六碧眼胡僧數不足  
泥牛入海過新羅木馬追風到天竺天竺茫茫何處  
尋補陀巖上問觀音普賢拍手呵呵笑歸去來兮秋

水深

資福明禪師上堂資福別無所補五日一參擊鼓何曾說妙談玄祇是麤言直語甘草自來甜黃連依舊苦忽若鼻孔撩天逢人切忌錯舉參

雲峯塔禪師上堂休去歇去一念萬年去寒灰枯木去古廟香爐去一條白練去大衆古人見處如日暉空不著二邊豈墮陰界堪嗟後代兒孫多作一色邊會山僧卽不然不休去不歇去業識茫茫去七顛八倒去十字街頭浩浩地聲色裏坐臥去三家村裏盈衢塞路荆棘裏游戲去刀山劍樹劈腹剜心鑊湯爐炭皮穿骨爛去如斯舉唱大似三歲孩兒覓繡毬上堂僧問如何是西來意師曰築著額頭磕著鼻意旨如何師曰驢馳馬載曰向上還有事也無師曰朝到西天暮歸唐土曰謝師答話師曰大乘研郎當僧退師乃曰僧問西來意築著額頭磕著鼻意旨又如何驢馳并馬載朝到西天暮歸唐大乘恰似研郎當何故沒量大人被語脉裏轉却遂搥掌大笑下座雪竇寧禪師上堂百川異流以海爲極森羅萬象以

空爲極四聖六凡以佛爲極明眼衲子以拄杖子爲極且道拄杖子以何爲極有人道得山僧兩手分付儻或未然不如閒倚禪床畔留與兒孫指路頭

開先宗禪師上堂一不做二不休捩轉鼻孔捺下雲頭禾山解打鹽官鼓僧繇不寫戴嵩牛廬陵米投子油雪峯依舊覓雙毬夜來風送衡陽信寒鴈一聲霜月幽

九座窳禪師上堂九座今日向孤峯絕頂駕一隻鐵船截斷天下人要津教他揮篙動棹不得有箇錦標子且道在甚麼人手裏拈拄杖曰看看向道是龍剛不信等閒奪得始驚人

中竺妙禪師上堂去年梅今歲柳顏色馨香喝一喝良久曰若不得者一喝幾乎道著依舊且道道著後如何眼睛突出

列祖提綱錄卷第十

列祖提綱錄卷第十一

武林十八湖理安禪寺住持婁東行悅集

五參提綱

清涼益禪師上堂大衆立久乃謂之曰祇麼便散去還有佛法道理也無試說看若無又來者裏作麼若有大市裏人叢處亦有何須到者裏諸人各曾看還源觀百門義海華嚴論涅槃經諸多策子阿那箇教中有者箇時節若有試擊看莫是怎麼經裏有怎麼語是此時節麼有甚麼交涉所以道微言滯於心首嘗爲緣慮之場實際居于目前翻爲名相之境又作麼生得翻去若也翻去又作麼生得正去還會麼莫祇恁麼念策子有甚麼用處

上堂曰出家人但隨時及節便得寒即寒熱即熱欲知佛性義當觀時節因緣古今方便不少不見石頭和尚因看肇論云會萬物爲己者其唯聖人乎他家便道聖人無已靡所不已有一片言語喚作參同契末上云竺土大僊心無過此語也中間也祇隨時說話上座今欲會萬物爲自己去蓋爲大地無一法可

見他又囑云光陰莫虛度適來向上座道但隨時及節便得若也移時失候即是虛度光陰於非色中作色解上座于非色中作色解即是移時失候且道色作非色解還當不當上座若恁麼會便是沒交涉正是癡狂兩頭走有甚麼用處上座但守分隨時過好珍重

上堂盡十方世界皎皎地無一絲頭若有一絲頭即是一絲頭

天台韶國師上堂古聖方便猶如河沙祖師道非風幡動仁者心動斯乃無上心印法門我輩是祖師門下客合作麼生會祖師意莫道風幡不動汝心妄動莫道不撥風幡就風幡道取莫道風幡動處是甚麼有云附物明心不須認物有云色即是空有云非風幡動應須妙會如是解會與祖師意旨有何交涉既不許如是會諸上座便合知悉若於者裏徹底悟去何法門而不明百千諸佛方便一時測了更有甚麼疑情所以古人道一了千明一迷萬惑上座豈是今日會得一則明日又不會也莫是有一分向上事難

會有一分下劣凡夫不會如此見解設經塵劫祇自勞神乏思無有是處

上堂毛吞巨海海性無虧纖芥投鋒鋒利無動見與不見會與不會唯我知焉乃有頌曰暫下高峰已顯揚般若圓通遍十方人天浩浩無差別法界縱橫處處彰珍重

上堂僧問承古有言若人見般若即被般若縛若人不見般若亦被般若縛既見般若爲甚麼却被縛師曰你道般若見甚麼曰不見般若爲甚麼亦被縛師曰你道般若甚麼處不見乃曰若見般若若名般若若不見般若亦不名般若且作麼生說見不見所以古人道若欠一法不成法身若剩一法不成法身若有一法不成法身若無一法不成法身此是般若之真宗也諸上座相共證明令法久住國土安寧珍重

上堂古者道如何是禪三界綿綿如何是道十方浩浩因甚麼道三界綿綿何處是十方浩浩底道理要會麼塞却眼塞却耳塞却舌身意無空闕處無轉動處上座作麼生會橫亦不得豎亦不得縱亦不得奪

亦不得無用心處亦無施設處若如是會得始會法門絕揀擇一切言語絕滲漏曾有僧問作麼生是絕滲漏底語向他道口似鼻孔甚好上座如此會自然不通風去如識得盡十方世界是金眼眼睛無事珍重

上堂僧問天下太平大王長壽如何是王師曰日曉月明日如何領會師曰誰是學人乃曰天下太平大王長壽國土豐樂無諸患難此是佛語古不易今不遷一言可以定古定今會取好諸上座佛法不是者箇道理要會麼言發非聲色前不物始會天下太平大王長壽久立珍重

清涼欽禪師上堂且住得也久立專官及諸大眾今日相請動重此箇殊功比喻何及所以道未了之人聽一言祇者如今誰動口便下座立倚拄杖而告衆曰還會麼天龍寂聽而雨華莫作須菩提童子盡將去且怎麼信受奉行

上堂某甲本欲居山藏拙養病過時柰緣先師有未了底公案出來與他了却時有僧問如何是先師未



了底公案師便打曰祖禪不了殃及兒孫曰過在甚麼處師曰過在我殃及你

百丈恒禪師上堂乘此寶乘直至道場每日勞諸上座訪及無可祇延時寒不用久立却請回車珍重上堂諸上座適來從僧堂裏出來脚未跨門限便回去已是重說偈言了也更來者裏不可重重下切脚也古人云參他不如自參所以道森羅萬象是善財之宗師業惑塵勞乃普賢之境界若恁麼參得與善財同參若不肯與麼參却歸堂向火參取勝熱婆羅門珍重

永明潛禪師上堂佛法顯然因甚麼却不會諸上座欲會佛法但問取張三李四欲會世法則參取古佛叢林無事久立

報慈言導師上堂凡行脚人參善知識到一叢林放下瓶鉢可謂行菩薩道能事畢矣何用更來者裏畢論眞如涅槃此是非時之說然古人有言譬如披沙識寶沙礫若除眞金自現便喚作常住世間具足僧寶亦如一味之雨一般之地生長萬物大小不同甘

辛有異不可道地與雨有大小之名也所以道方即現方圓即現圓何以故爾法無偏正隨相應現喚作對現色身邊見麼若不見也莫閒坐地

羅漢仁禪師上堂報恩者裏不曾與人揀話今日與諸上座揀一兩則話還願樂麼諸上座鶴脰長鳬脰短甘草甜黃檗苦恁麼揀辨還恁麼意麼諸上座莫是血脉不通泥水有隔麼且莫錯會珍重

報恩則禪師上堂諸上座盡有常圓之月各懷無價之珍所以月在雲中雖明而不照智隱惑內雖眞而不通無事久立

歸宗眞禪師上堂諸上座見聞覺知祇可一度祇如會了是見聞覺知不是見聞覺知要會麼與諸上座說破了也待汝悟始得久立珍重

棲賢圓禪師上堂出得僧堂門見五老峰一生參學事畢何用更到者裏來雖然如此也勞上座一轉了也珍重

五雲逢禪師上堂諸上座捨一知識參一知識盡學善財南遊之式樣且問上座祇如善財禮辭文殊擬

登妙峰謁德雲比丘及到彼所何以德雲却於別峰相見夫教意祖意同一方便終無別理彼若明得此亦昭然諸上座即今簇著老僧是相見是不相見此處是妙峰是別峰脫或從此省去可謂不孤負老僧亦常見德雲比丘未嘗利那相捨離還信得及麼

瑞鹿先禪師上堂大凡參學未必學問話是參學未必學揀話是參學未必學代語是參學未必學別語是參學未必學捻破經論中奇特言語是參學未必捻破祖師奇特言語是參學若于如是等參學任你七通八達于佛法中儻無見處喚作乾慧之徒豈不聞古德道聰明不敵生死乾慧豈免苦輪諸人若也參學應須真實參學始得行時行時參取立時立時參取坐時坐時參取眠時眠時參取語時語時參取默時默時參取一切作務時一切作務時參取既向如是等時參且道參箇甚人參箇甚麼語到者裏須自有箇明白處始得若不如是喚作造次之流則無究了之旨

保明誠禪師上堂如爲一人衆多亦然珍重

堯峰暹禪師上堂冬去春來樓閣門開若也入得不用徘徊諸上座還向者裏入得也未若也入得所以古人道是處是彌勒無門無善財若也入之未得自是諸上座狂走更不忉忉久立珍重

功臣如禪師上堂呂大衆曰還知道聖僧同諸人到者裏麼既勞尊降焉敢稽留久立珍重

#### 晚參提綱

百丈海禪師每上堂有一老人隨衆聽法一日衆退唯老人不去師問曰汝是何人老人答曰某非人也於過去迦葉佛時曾住此山因學人問大修行人還落因果也無某對曰不落因果遂五百生墮野狐身今請和尚代一轉語貴脫野狐身師曰汝問老人曰大修行人還落因果也無師曰不昧因果老人于言下大悟作禮曰某已脫野狐身住在山後敢乞依亡僧津送師令維那白推告衆食後送亡僧大衆聚議一衆皆安涅槃堂又無病人何故如是食後師領衆至山後巖下以杖挑出一死野狐乃依法火爇師至晚上堂舉前因緣黃藥便問古人錯祇對一轉語墮

五百生野狐身轉轉不錯合作箇甚麼師曰近前來向汝道藥近前打師一掌師拍手笑曰將謂胡鬚赤更有赤鬚胡

藥山儼禪師晚參上堂衆集師曰今日請決疑上座在甚麼處其僧出衆而立師下禪床把住曰大衆者僧有疑便與一推却歸方丈

趙州諗禪師晚參今夜答話去也有解問者出來時有僧便出禮拜師曰比來拋輒引玉却引得箇整子臨濟玄禪師一日謂普化克符二上座曰我欲於此建立黃蘗宗旨汝且成禪我二人珍重下去三日後普化却上來問和尚三日前說甚麼師便打三日後克符上來問和尚前日打普化作甚麼師亦打至晚小參曰有時奪人不奪境有時奪境不奪人有時人境兩俱奪有時人境俱不奪

德山鑒禪師晚參示衆曰今夜不答話問話者三十棒時有僧出禮拜師便打僧曰某甲話也未問和尚因甚麼打某甲師曰汝是甚麼人曰新羅人師曰未跨船舷好與三十棒

睦州陳尊宿晚參謂衆曰汝等諸人還得箇入頭處也未若未得箇入頭處須覓箇入頭處若得箇入頭處已後不得孤負老僧時有僧出禮拜曰某甲終不敢孤負和尚師曰早是孤負我了也又曰明明向人道尙自不會何況蓋覆將來又曰老僧在此住持不曾見箇無事人到來汝等何不近前時有一僧方近前師曰維那不在汝自領去三門外與二十棒曰某甲過在甚麼處師曰枷上更著扭

汾陽昭禪師爲并汾苦寒乃罷夜參有異比丘振錫而至謂師曰會中有大士六人柰何不說法言訖而去師密記以偈曰胡僧金錫光爲法到汾陽六人成大器勸請爲敷揚

仙宗玘禪師久不上堂大衆入方丈參師曰今夜與大衆同請假未審還給假也無若未聞給假卽先言者資珍重

漳州羅漢院守仁禪師晚參師曰物物本來無處所一輪明月印心池使歸方丈

五祖演禪師晚參舉德山云今夜不答話問話者三

十棒衆中舉者甚多會者不少且道向甚處見德山  
有不顧性命嘗試出來道看若無山僧爲大衆與德  
山老人相見去也待德山道今夜不答話問話者三  
十棒但向伊道某甲話也不問棒也不喫你道還契  
他德山老人麼到者裏須是箇漢始得況某甲十有  
餘年海上參尋見數人尊宿自爲了當及到浮山會  
裏直是開口不得後到白雲門下較破一箇鐵酸齏  
直得百味具足且道謙子一句作麼生道乃曰華發  
雞冠媚早秋誰人能染紫絲頭有時風動頻相倚似  
向堦前鬪不休

古今晚參上堂示衆之語甚多此舉先宗大槩餘不及錄

#### 小參提綱四節

眞淨文禪師仰山結夏小參舉拂子云耶耶盡十方  
世界若凡若聖若僧若俗若草若木盡向拂子下成  
佛佛祖無前無後一時解脫還有不解脫者麼設有  
命若懸絲又撫掌云知音者少所以此箇事論實不  
論虛參須實參悟須實悟若纖毫不盡總落魔界豈  
不見古人道平地上死人無數過得荊棘林是好手  
如今人多得箇身心寂滅前後際斷一念萬年去

休去歇去似古廟裏香爐去冷湫湫地去便爲究竟  
殊不知却被此勝妙境界障礙自己正知見不能現  
前神通光明不得發露或又執箇一切平常心是道  
以爲極則天是天地是地山是山水是水僧是僧俗  
是俗大盡三十日小盡二十九此依草附木不知不  
覺一向迷將去忽然問他我手何似佛手便道是和  
尙手我脚何似驢脚便道是和尙脚人人盡有生緣  
處那箇是上座生緣處便道某是某州人是何言歟  
且莫錯會好凡百施爲要平常一路子以爲穩當定  
將去合將去更不敢別移一步怕墮坑落壑長時一  
似雙盲底人行路一條拄杖子寸步拋不得緊把著  
憑將去步步依依一日若道眼豁開頓覺前非拋却  
杖子撒開兩手十方蕩蕩七縱八橫東西南北無可  
不可豈可一向倚他門戶傍他行脚有甚快活自己  
畢竟如何不見雲門道而今天下老和尚多是師承  
學解露布葛藤印板上打來模子裏脫出當人若是  
明去何不一切臨時又不見臨濟云我者裏是活祖  
師西來意把來使用立處皆眞他不說古又如何今

又如何者語得那語不得那裏是虛者裏是實你與我拈出絲毫許實底道理來看此蓋當人眼不開自無見處一向承虛接響百般忌諱自纏自縛直饒與麼說當下忽然見得個儻分明去也是棺木裏證眼如今還有無師智自然智不與萬法爲侶者烜赫底丈夫漢醺醺斷斷千變萬化見我怎麼胡言漢語便好近前驚口攬拽下椅子擲向三門外喝散大衆豈不快哉還有麼良久若無且看老僧騎案山跳入你諸人眼睛裏七顛八倒呵佛罵祖去也喝一喝下座楚石琦禪師結夏小參眨上眉毛早踉蹌過開得口來已話墮祖師關板少人知徧界茫茫腳踏火聲前展演賺殺團黎句後商量翻成途轍一踢踢翻大海水一拳拳倒須彌山猶未是性躁漢在何況起模畫樣詐啞佯聾斷妄攀緣求眞解脫大似認觸作木買朱砂畫月驢年解休歇麼壽山不惜口業爲你諸人點破豎拂子云還見麼者箇是文殊門若從文殊門入者山河大地牆壁瓦礫教你背塵合覺擊拂子云還聞麼者箇是觀音門若從觀音門入者松風瀾響

鴉鳴鵲噪教你返本還源到箇裏證不動尊成無上覺更須知有頂門一竅還委悉麼麥秋晨氣潤槐夏午陰清復舉龐居士參馬大師不與萬法爲侶是什麼人大師云待汝一口吸盡西江水却向汝道師頌云蓋天蓋地一句子馬師盡力提不起好笑青原接石頭逢人但問廬陵米

結夏小參或有旃檀叢林旃檀圍繞或有荊棘叢林荊棘圍繞或有旃檀叢林荊棘圍繞汝等諸人橫擔拄杖緊峭芒鞋者邊那邊東去西去在那箇叢林中若在那旃檀叢林則是金毛獅子能縱能奪能殺能活若在那荊棘叢林則是狐狸野豸不能縱不能奪不能殺不能活隨群逐隊怖死貪生椎殺千箇萬箇有什麼罪過且如五種叢林交互圍繞時喚作金毛獅子又是狐狸野豸喚作狐狸野豸又是金毛獅子畢竟喚作什麼能縱不能縱能奪不能奪能殺不能殺能活不能活又如何定當若定當得出許你天下橫行若定當不出九旬無解脫之期百劫受沉淪之苦復舉僧問趙州如何是咬人



獅子州云皈依佛皈依法皈依僧莫咬老僧師云者僧也只是箇喋屎狗爲甚麼趙州一見便撒屎撒尿彩奔覲家

結夏小參摩竭陀國親行此令抵死要知換却性命設使懸崖撒手自肯承當絕後再甦欺君不得也是棺木裏瞠眼鳳山者裏無許多事尋常只是九十日爲一夏黃陳米飯苦益菜羹尊勝寺前疊疊青山不盡西興渡口茫茫白浪無窮行也任你行坐也任你坐出也任你出入也任你入卷舒自在彼此何拘却不許埋在聲色堆頭亦不許離他聲色總不與麼還作麼生錦衣公子貴林下道人高復有頌云拈却東山水上行薰風殿閣生微涼住山不費纖毫力自有  
人提折脚鐺

呆庵莊禪師結夏小參一心不生萬法無咎沙等諸人發志參禪早是不著便何況聽他繩床上老宿說玄說妙舉古舉今以當宗乘遠之遠矣卽今要與本地相應直須從前放下百不知百不會向生佛已前著一隻眼看是什麼忽然拶破虛空便見十方世界

盡是圓覺伽藍河處更有山河大地來山僧與麼道也是作死馬醫若是超宗越格底禪僧著著自有出身之路拈拄杖大衆中還有超宗越格底禪僧麼卓拄杖泥牛昨夜遭塗炭直至如今不見蹤

結制小參心如虛空界示等虛空法證得虛空時無是無非法從上佛祖莫不以此心法傳示將來作大佛事徑山只今以此心法爲大伽藍十方世界若聖若凡同一安居平等性智薰拈拄杖卓一下云過去諸如來斯門已成就現在諸菩薩今各入圓明未來修學人當依如是住觀音菩薩將錢買胡餅放下手却是餛飩卓拄杖一下復舉趙州勘婆子話頌云臺山路上婆子勘破須他趙州我道全無巴鼻人言亦有來由

恕中愍禪師結夏小參俊快底撩起便行似鷓鴣提鳩脚跟下好與三十槽懂底三搭不同如魚止滌腦門上不銖一錐古今天地古今日月古今人倫好不增一毫醜不減一毫以大圓覺爲我伽藍畫地爲牢刑名斯身心安居平等性智沉埋鬼窟塵慮尤多靈

嚴寺裏明日結夏今夜小參亦不說妙談玄亦不設期立限三條椽下七尺單前一任諸人橫眠倒臥渴飲饑餐管取心華發明照十方利其或情存限量墮在見聞他時後日有人索飯錢在莫言不道復舉世尊在摩竭陀國說法時白夏乃謂阿難曰諸大弟子人天四衆我常說法不生敬仰我今入因沙白室中坐夏九旬忽有人來問法汝代我說一切法不生一切法不滅言訖掩室而坐頌云白夏時將至垂慈勉進修人天不敬仰歲月自遷流法法無生滅頭頭有放收九旬聊掩室恩大實難酬

了庵欲禪師結夏小參季春已去孟夏到來禪僧分上不用安排豈不見道盡乾坤大地是沙門一隻眼盡乾坤大地是沙門全身何覺不圓何修不證所以大覺世尊二千年前靈山會上釘虛空中鐵橛開福山僧四月十五日與見前大衆駕平地上鐵船逆長風而把舷節清歌而扣舷卓拄杖云翡翠踏翻荷葉雨鷺鷥衝破竹林煙喝

荆叟珥禪師結夏小參我此一宗正令全提如暴風

卒雨鼓蕩無前石火電光追奔不及舉意卽迷源擡眸已蹉過不是目前法莫生種種心縱汝三種互修尅期取證第二頭第三首箇拄千撐轉見氣急殊不知觸體未具已眼先明呱呱地一聲千了百當然雖如是親證者萬無一二錯會者數有河沙

用彭俊禪師結夏小參結却布袋口三世諸佛六代祖師天下老和尚眼不得妄視耳不得妄聽口不得妄言足不得妄舉一禁禁住無絲毫走作謂之圓覺伽藍九旬禁制醋甕中虫子有什麼出頭分殊不知此道如淨日輪昇太虛空無幽不燭如塗毒鼓輕輕一搗聞者皆喪雖然只如道居有破有居空破空二幻既空中亦不立畢竟喚什麼作塗毒鼓喚什麼作淨日輪喝一喝大丈夫兒合自由信腳踏翻知見窟結夏小參世尊三昧迦葉不知迦葉三昧阿難不知阿難三昧商那和修不知商那和修三昧優波鞠多不知從上佛祖三昧既是各各不知且佛佛授受授箇什麼祖祖傳持傳箇什麼三月安居尅期取證證箇什麼東土禪僧還也奇特一箇箇氣宇如王擊碎

圓覺伽藍截斷平等性智妙用縱橫無是不是山僧  
三昧諸人總知諸人三昧山僧總知大眾且道所知  
三昧是何形段嚮拈拄杖卓一下智者聊聞猛提取  
莫待天明失却雞

古林茂禪師結夏病起小參歲月不可把玩老病不  
與人期山僧十數日來寒熱交攻正覓起處不得何  
故身相離敗心如幻故身相既離心亦如幻佛病祖  
病其體亦然五祖和尚云病來又病皮黏骨抖擻起  
來無一物行不成步語聲低鼻孔依然高突兀五祖  
老人與麼說話只能自病不能病人既不能病人當  
攢簇不得之時即不能普入衆生身中全衆生之病  
既不能全衆生之病則業識茫茫無本可據大眾九  
十日內同此安居動靜寒溫自宜保愛

結夏小參朱明啓候聖制斯臨四海高人罷搖金錫  
言無言而可及念無念以相應廓諸佛之妙明同十  
方而聚會所以龐居士到者裏破家散宅只守現成  
綿綿不漏絲毫直下斬釘截鐵道箇心空及第早是  
頭上安頭更言與他三世諸佛把手共行歷代祖師

同心同德大似三家村裏不識羞老婆東擦西抹要  
事人相似有什麼奇特處只如豁開戶牖萬里不挂  
片雲坐斷圓覺妙場不離平等性智一句作麼生道  
蒲團時倚無他事永日寥寥謝太平

結夏小參明當結制今夜小參舉一兩則古人機緣  
與諸人商量非惟截斷葛藤要且顯出各人自己參  
學眼目龐居士云十方同聚會箇箇學無爲此是選  
佛場心空及第歸龐居士也甚奇怪只是俗氣未除  
既是心空歸向什麼處去無爲又作麼生學然則一  
言易出駟馬難追若是德山臨濟門下棒折也未放  
過在所以山僧尋常與諸人道一切處不明面前有  
物直得觸目無滯達得一切法空正是面前去不盡  
底又不見雲門大師道平地上死人無數過得荊棘  
林是好手與麼說話大似將胡獼繫在露柱有甚快  
活既出得荊棘林又須入得荊棘林始得所謂入林  
不動草入水不動波然後縱橫得妙左右逢源轉地  
回天方有自由分只如者僧道與麼則堂中上座有  
長處也且道是出耶是入耶雲門云蘇嚧蘇嚧也是

折錐探地明眼漢到者裏若作佛法商量正是平地  
死人不作佛法商量坐在荊棘林裏三千里賣却布  
單特爲此事而來何曾夢見十方聚會遍佛場開長  
期百二十日諸人若善參詳明取生佛未具已前透  
頂透底便是沒量漢也阿呵呵也大奇搖扇取涼伸  
脚打睡三萬六千日自倒還自起咄咄

結夏小參法不孤起仗境方生明朝結制斯臨未舉  
西天法令今夜小參時至且開東山家筵囉囉招囉  
囉搖囉囉送義出豐年不是心不是佛不是物儉生  
不孝寸釘入木以大圓覺爲我伽藍一句當天八萬  
法門生死路絕恁麼會得九十日內自然水到渠成  
別有商量萬煨爐中試看花飛雪片正恁麼時如何  
明明百草頭邊事不比楊岐栗棘蓬

結夏小參教中道有大陀羅尼門名爲圓覺流出一  
切清淨菩提涅槃真如解脫咄云釋迦老子是什麼  
熱碗鳴聲把他三世諸佛所得秘要法門一時潑撒  
了也至於三七日中思惟是事掩室摩竭不措一辭  
亦是未了公案我此一衆善觀者不以眼善聽者不

以耳善言者不以言善迹者不以迹眼耳不有言迹  
俱忘能信自心悉皆是佛縱饒未信佛亦無殊麻三  
勒乾屎橛毀裏底亦不出此箇時節阿呵呵鐘樓上  
念讚床脚下種菜風動樹頭搖地肥茄子大喝一喝  
長連床上九十日內有粥有飯

結夏小參時節遷流結制忻逢於此日光陰倏忽工  
夫不到不方圓諸人既善參詳山僧宜加勉勵示諸  
佛慈悲之方便顯衲僧正令之全提佛來也打祖來  
也打粉骨碎身未足酬秦地不收漢地不管直入千  
峯萬峯去廓神機於未兆懸智照於無私如斯九十  
日中一一珠回玉轉雖然如是只如栢巖開粥度夏  
仰山種栗燒畚畢竟明什麼邊事卓拄杖云一舉四  
十九

結夏小參佛法無人說雖慧莫能了擊拂子云慶說  
剎說熾然說三世一切說釋迦彌勒文殊普賢登刀  
山入鑊湯飲洋銅吞熱鐵橫說豎說直說曲說窮盡  
未來無間歇是汝諸人十二時中還曾得聞也未若  
也聞得今夜人天衆前不妨露箇消息若也不聞亦

不欠少所以箇事在諸佛分上不增在衆生分上不減迷則常居凡下悟則卽爲聖賢到者裏便好放出金毛獅子哮吼一聲驚天動地豈不見雲門大師道盡十方世界乾坤大地以拄杖畫一畫云百雜碎了也三乘十二分教達磨西來放過卽不可若不放過不消一喝雲門只解步步登高不解隨機應變較之德山臨濟齊眉共矚同死同生截鐵斬釘能縱能奪何啻千里萬里且道臨濟德山有什長處不屬凡不屬聖不屬修不屬證不住有爲不住無爲黃河三千年一度清是汝諸人九十日內不得忘却平等性智擊拂子云雪峯道底

無文燦禪師結夏小參孟夏漸熱仲夏極熱自有天地以至于今無一絲毫許差別若有靈骨底衲僧纔出母胎便解知時識節去隨芳草歸逐落花具足見聞覺知受用見聞覺知無生可護無制可結雖然要會孟夏漸熱易晏會仲夏極熱難要會仲夏極熱易要會孟夏漸熱難難九日中君自看復學五祖結夏上堂結夏無可供養大衆作一家晏管顧諸

人遂舉手云囉囉招囉囉搖囉囉送莫怪空疎伏惟珍重師拈云老東山龍肝鳳髓百味具足爭奈美食不中飽人餐

結夏小參大華藏海渺無邊際江河溪澗流入其中咸失本名魚龍蝦蟇游泳其中咸失本性三世諸佛於中成等正覺一切衆生於中流浪生死現前大衆於中成就無功用學拈拄杖卓一下云開先拄杖子一口吸乾了也三世諸佛一切衆生現前大衆畢竟向什麼處行履良久云曹溪波浪如相似無限平人被陸沉復舉香嚴云去年貧未是貧今年貧始是貧去年貧尙有卓錫之地今年貧錫也無師拈云還會麼正孤著開先痒處

結夏小參實際理地不受一塵南瞻部洲本來清淨無端西天竺國有箇不識好惡底將一片爛麻皮結箇圈子安在平地經今二千餘年推不去拽不動遞代祖師大機大用如馬祖百丈正知正見如南陽大隨手段惡辣如德山臨濟眼目端正如趙州雲門也只是傍觀有分啞青天白日有恁麼事大唐國裏可



● 尚 賢 向

殺無人薦福雖則與他同路行且不與他同處宿今夏兄弟在此相聚遇飯喫飯遇茶喫茶熟則乘涼困則打睡九十日內第一不得道著解結二字道著貶尚饒湯爐炭地獄謹白復舉雲門問僧云今夏做什麼僧云和尚實問某甲卽道門云做賊人心虛師拈云雲門等閒致一問者僧便作佛法祇對克由耐耐不知者跛脚阿師當時打殺佛與狗子喫底棒在什麼處來夜間取首座

笑隱訢禪師結夏小參與麼與麼頭上安頭不與麼不與麼斬頭覓活德山小參不答話先行不到趙州小參要答話末後大過山僧尋常只管九十日爲一夏熱則取涼饑來喫飯有時白雲高臥聽月下之疎鐘有時村市邏齋振雲中之金錫不作佛法商量亦非世諦流布阿呵呵頭上一堆塵脚下三尺土鱸鱸齣齣且過時莽莽鹵鹵河沙數復舉百丈再參公案師云以機奪機以的破的百丈親遭三日顰黃檗後來驚吐舌延平劍合兮寧窺牛斗之光芒陶壁梭飛兮不戀風雲之舊迹堪笑禪流眼似眉座中誰是仙

陀客

南石禪師結制小參明日結制今夜小參摩霄俊鶻便合乘時止灤困魚徒勞激浪高亭隔江望見剡竿橫趨而去脚跟下好與三十玄沙築破脚指遂云達磨不來東土二祖不往西天頂門上猶欠一槌自餘央央庠庠莽莽鹵鹵堪作什麼北山今夜且放一線道學道猶如守禁城晝防六賊夜惺惺中軍主將能行令不動干戈致太平古人怎麼說話正是老婆心太切不辭帶水復拖泥雖然且道誰是中軍主將莫是見聞知覺底麼莫是語言動靜底麼且喜沒交涉若向者裏承當得去何翅白衣拜相善財入樓閣香巖聞擊竹靈雲見桃花總不出者箇時節阿呵呵一卽三三卽一牧羊海畔女貞花拒馬河邊望夫石石擊赤赤土畫簷箕從教眼暗暗復舉古德偈云護生須是殺殺盡始安居會得箇中意鐵船水上浮圓悟老祖云且道殺箇甚麼殺衆生物命是凡夫見解殺六賊煩惱是座主見解殺佛殺祖是大闡提人見解被僧分上畢竟殺箇什麼只知開口易不覺舌頭長

解制提綱

眞淨文禪師解夏小參有問話者麼乃以拂子擊禪床云天地造化有陰有陽有生有殺日月照臨有明有暗有隱有顯江河流注有高有下有壅有決明王治化有君有臣有禮有樂有賞有罰佛法住世有頓有漸有權有實有結有解結也四月十五十方法界是聖是凡若草若木以拂左邊敲云從者裏一時結舉拂子云總在拂子頭上還見麼乃喝云解也七月十五日十方法界若草若木乃聖乃凡以拂子右邊敲云從者裏一時解舉拂子云總在拂子頭上還見麼乃喝云祇如四月十五已前七月十五已後且道是解是結舉拂子云總在拂子頭上還見麼乃喝云諸高德此三喝中有一喝是金剛王寶劍有一喝是踞地獅子有一喝是探竿影草若人一一辨得始見臨濟大師道出常情黃檗被掌大愚遭築雖相去三二百年許你親爲嫡子然後大開不二妙門權諸祖道摧邪顯正扶宗立教整頓綱縱大知見耀大法眼不動本際決勝魔軍乃喝云更須知有一喝不作

一喝用到者裏須是具爍迦羅眼向未局已前薦提得去諸德且道提得箇什麼良久喝一喝下座圓悟勤禪師解夏小參年豐歲稔道泰時清唱太平歌樂無爲化護生旣滿蠟人愈永秋色澄澄金風拂拂正當恁麼時說什麼釋迦彌勒又殊普賢德山臨濟向上向下有事無事直下一時坐斷直得風颯颯地人人分上壁立千仞各各面前飛大寶光且不落黃緣一句作麼生道麓峯頭倒卓石笋暗抽枝密庵傑禪師解夏小參豎起拂子還見麼敲禪床云還聞麼只此見聞非見聞無餘聲色可呈君箇中若了全無事體用何妨分不分古人八字打開了也恁麼見得便見傑上座今夏九十日內入大光明藏中呼喚森羅萬象明暗色空情與無情上至非非想天下至空輪水際一切蠢動含靈盡向拂子頭上安居同時禁足不說佛不說祖不說玄不說妙不守蠟人永不憐鵝護雪只是應時應節不失其宜大盡三十日小盡二十九饑餐渴飲任運騰騰佛界不收魔界不攝直得皇風蕩蕩帝道平平野老謳謠漁人罷唱

而今一夏周畢驅遣各歸所止隨家豐儉長者長法身短者短法身逍遙自在任性方圓而無拘執衆中忽有箇衲僧出來道長老老我行腳走遍天下每見善知識小參曾說盡是攢花簇錦結角羅紋說得盛水不漏或大機大用驅耕夫牛奪饑人食呵叱列祖擠排先聖如風雷電捲看者不容眨眼今夜如此提持全無巴鼻全無滋味如蚊子上鐵牛相似直是無下嘴處也令人疑著到者裏如何對他卽是棒將去得麼喝將去得麼莫是跳下禪床歸方丈得麼不然別將兩轉新鮮語答將去得麼如斯理論盡是諸方用過底藥方非但起人膏肓之疾不得益令增他重病旣總不與麼如何卽是而今向佛祖說不到處天下老和尚颺下不用底對他非唯對他且要聞者見者蕩盡胸中禪道佛法知見人人如獅子王吒沙地哮吼一聲壁立萬仞若他道使人疑著只對他道大疑之下必有大悟復舉僧問雲門大師初秋夏末前程有人問未審對他道什麼門云大衆退後僧云過在什麼處門云還我九十日飯錢來師云平如鏡

面嶮若刀山者僧有破牢關底機謀雲門善用不戰屈人兵底手段雖然如是鼻孔在靈隱手裏

雪巖欽禪師解夏小參無解無結猶是空中釘橛有修有證何異捕風捉月所以龍興一夏百二十日只與現前清衆早眠晏起淡飯麤茶如三家村裏田舍翁翠翠波波只與麼過不敢將一絲毫叢林規矩束縛諸人是汝諸人便與麼撒手撒脚拂踐得去十二時中不妨七穿八穴東倒西樞逆順卷舒縱橫自在擊拂子云白雲更在青山外復舉瀉山問仰山子一夏不上來仰云鋤得一片畚種得一籬粟瀉云子可爲不虛過仰云和尚如何瀉云日中一食夜後一宿仰云和尚亦不虛過道了乃吐舌瀉云寂子何得自傷已命師拈云瀉山與仰山是則子傳父業足可觀光逗到下稍又却遞相矛盾可謂父不父子不子矣龍興今夏亦無所作亦不空過且道與古人是同是別井底蟾蜍吞却月

解夏小參九旬禁足東廊上西廊下灼然寸步不移休夏自恣據此堂坐此座不妨走盡天下恁麼見得

猶是露布葛藤未具透關眼在且作麼生是透關眼  
有向天地未形以前生佛既興以後知得落處者麼  
若有道林三百六十骨節從頂至踵被伊一時獻透  
其或未然後五日到諸方且居門外

解夏小參九旬禁足三月護生逗到功成行滿依前  
日午三更龍困水風恬浪靜願巡橋霧鎖雲橫去者  
自去住者自住坐者自坐行者自行因甚如此杖頭  
縱有通霄路且共扶持折脚鐘復舉夾山和尚示衆  
云關市門頭識取天子百草頭上薦取老僧與麼說  
話正是妄認前塵分別影事若是端拱垂衣孤峯獨  
宿未夢見在汝等諸人要見夾山麼還識仰山麼豎  
拂子云一狀領過

楚石琦禪師解夏小參諸仁者百了千當名爲無事  
人若到諸方管取明窓下安排永祚者裏放過即不  
可何謂如此百了千當底猶在半途豈不見圓悟和  
尚道以世諦法接人去落在世諦法中以祖佛機接  
人去落在祖佛機中以向上拈提接人去落在向上  
拈提中以恁麼恁麼接人去落在恁麼恁麼中以不

恁麼不恁麼接人去落在不恁麼不恁麼中以總不  
恁麼總不恁麼接人去落在總不恁麼總不恁麼中  
直饒萬里無片雲青天也須契棒當知此事不從他  
處得來我王庫內無此刀此刀不離王庫內末後一  
句始到牢關把斷要津不通凡聖九十日末後句作  
麼生道朱夏火雲燒碧洞清秋危露滴金盤復舉僧  
問雲門樹凋葉落時如何門云體露金風師云者僧  
若道箇謝師答話雲門大師管取有理難伸山僧即  
不然樹凋葉落時如何拈起拄杖纔佇思打下法堂  
免致諸方簡點

解夏小參金風扇野素月流天遠水平鋪纖雲盡捲  
是處蟬聲噪晚連山木葉驚秋明明無覆藏歷歷絕  
滲漏高不在絕頂富不在福嚴樂不在天堂苦不在  
地獄諸仁者只如生死交謝寒暑迭遷解結相尋光  
陰似箭無位真人畢竟向什麼處安著披簪側笠千  
峯外別水澆蔬五老前復舉翠巖夏末示衆云一夏  
已來爲兄弟說話看翠巖眉毛在麼保福云作賊人  
心虛長慶云生也雲門云關師頌云傑出叢林是翠

嚴舌元不動爲誰談如今且喜眉毛在鐵額銅頭總未語

解夏小參報恩一夏說的諸人一夏參的須知說的不道一字參的不資一法不道一字說而無說不資一法參而無參參而無參真參說而無說真說所以道十方同聚會箇箇學無爲此是選佛場心空及第歸大丈夫不可受人處分也心空及第歷歷爲賤成佛作祖愛聖憎凡總不與麼無繩自縛直下如獅子兒哮吼一聲狐狼野豕一時屏跡如塗毒鼓一擊遠近聞者皆喪九旬制滿又作麼生尋常恰似秋風至無意涼人人自涼復舉洞山與密師伯參鄂州哲禪師哲問曰闍黎近離什麼處山云湖南哲云觀察使姓什麼山云不得他姓哲云名什麼山云不委他名哲云還治事否山云自有廊幕在哲云還出入否山云不出入哲云豈不出入洞山拂袖便行明日哲入僧堂云昨日對二闍黎一轉語不穩今請二闍黎道若道得開粥相待過夏速道速道山云大尊貴生師云要會尊貴麼報恩不開者兩片皮諸人向什麼處

摸索

解夏小參平地上喫交郎當不少脚跟下嗟過笑殺旁觀卽心卽佛非心非佛此地無銀二兩俗人沽酒三升更有不啣啗底風前月下幾度沈吟海角天涯一生流浪西天以蠟人爲驗我者裏以竹筴爲驗喚作竹筴則觸不喚作竹筴則背速道速道擬議不來劈脊便棒復舉長慶云淨潔打疊了也却近前就我覓我劈脊與你一棒有一棒到你你須生慚愧無一棒到你你又向什麼處會雪竇云雪竇卽不然淨潔打疊了也直須近前我劈脊與你一棒有一棒到你你卽受屈無一棒到你與你平出但與麼會師云衆中商量道坐在淨潔地上必須打疊近前覓的喫棒有分覓的是病棒卽是藥所以雪竇云有一棒到你你卽受屈無一棒到你與你平出杜撰禪和如麻似粟殊不知二大老一箇掘地爲坑一箇夷井塞竈皆欲坐致太平爭奈反招怪笑毗婆尸佛早留心直至如今不得妙

解夏小參臨濟宗風直須辨主若不辨主有眼如盲



所以道不容擬議斬全身始得名爲主中主靈鋒寶劍常露現前擬犯鋒銳橫屍萬里一等擔拄杖行脚還曾辨得主麼你若辨得主見他禪床上老漢纔開口動舌背却法堂著草鞋便行較有些子衲僧氣息但與麼軟嫩嫩地無骨頭相似見人說有便著有說無便著無十二時中全沒主宰將什麼敵他生死消他信施埋沒自己屈辱先宗無過此人纔方結制又見解夏日復一日歲復一歲待闔老子徵飯錢遲了何不及早回頭仔細尋思看是什麼道理觸體常干世界鼻孔摩觸家風萬里神光頂後相直下會得轉凡成聖只在片時其或未熟換手提曾去在復學外道問佛昨日說何法公案師頌云行盡江南數十程曉風殘月入華清朝元關上西風急都入長楊作雨聲

恕中愠禪師解夏小參達磨不來東土二祖不往西天水長船高泥多佛大翠巖一夏與兄弟東語西話唐喪光陰靈巖只管九十日爲一夏驚護雪蟻人冰鐵彈子者一火絡索總拈來拋向背後日不待火而

熱月不待風而涼三家村裏臭老婆全無伎倆十字街頭醉翁子太殺風流目機銖兩底有甚數粘牙綴齒底有什數

解夏小參安居制滿一念萬年布袋頭開百了千當天南地北無非圓覺妙場溪東溪西總是國王水草與麼與麼勦得一片畚種得一籬粟不與麼不與麼日中一餐夜後一寢與麼不與麼不與麼却與麼拈出倚天長劍截斷露布葛藤直得上無攀仰下絕已躬常光現前壁立萬仞正與麼時是汝諸人還知者箇消息麼若也未知未免向淨潔地上拋沙撒土去也世尊初生下時一手指天一手指地周行七步目顧四方乃云天上天下惟我獨尊豈不是者箇消息西天四七東土二三或行棒或行喝或堂前鞦韆或室中安水豈不是者箇消息自餘麻三斤乾屎橛庭前栢樹子後園驢喫草趙州勘婆話百丈野鴨話雖則三頭兩面萬別千差豈不總是者箇消息如斯理論俯狗機宜明眼人前是什寐語不見道向上一路千聖不傳學舌勢形如猿捉影鷲拈拄杖卓一卓云

百雜碎沒窠臼拈得鼻孔失却口擬欲將身北斗藏  
應須合掌南辰後復說偈云夏罷抽單何處去勸君  
權息此時心諸方爐韛如灰冷少室門庭似海深若  
要悟明超佛祖莫將知解當冒際惺惺石畔堪行樂  
共聽松風演正音

呆庵莊禪師解夏小參絕頂寥寥亂山蟲蠹不離當  
處卽是道場何假對揚方稱佛事更說什麼長期短  
期尅念攝念摩竭提國早涉繁辭毗耶離城翻成利  
語只如瀉山問仰山云子一夏作得箇什麼蝦爲子  
屈仰山云鉏得一片畬種得一籬粟有什共語處瀉  
云子一夏可謂不空過何不與伊本分草料仰問瀉  
云和尚一夏作得箇什麼不妨賣箇瀉云日間一餐  
夜間一寢隨摸搜漢仰云和尚一夏可謂不空過互  
相欺瞞今夜忽有人問徑山一夏作箇什麼只向他  
道步步踏著實地且道是空過不空過拈拄杖畫一  
畫云鷗有九臯難翥翼馬無千里謾追風  
解夏小參目前無法法外無心心法俱忘理事交徹  
上無攀仰下絕已躬頭頭顯示眞機物物全彰妙用

如我按指海印發光汝暫舉心塵勞先起釋迦老子  
滿面慚惶汝但外息諸緣內心無喘心如牆壁乃可  
入道達磨大師一場漏逗大抵叢林以小參爲家教  
汝等諸人每日著衣喫飯有什麼過七旬夏滿不妨  
去住自由老僧住持事繁更不叨叨嘮嘮擊拂子知  
恩者少負恩者多復舉翠巖夏末示衆云一夏與兄  
弟東語西話看翠巖眉毛在麼師云一夏東語復西  
話翠巖方便苦無多眉毛打失渾閒事爭免全身入  
草窠

列祖提綱錄卷第十一

列祖提綱錄卷第十二

武林十八澗理安禪寺住持婁東行悅集

解制提綱

了庵欲禪師解夏小參昔本不曾結今也何須解解  
結本無心無縛無脫者恁麼恁麼森羅萬象徹底孤  
危大地山河通上嶮峻不恁麼不恁麼太陽門下日

日三秋明月堂前時時九夏恁麼中有不恁麼不恁麼中却恁麼一切智通無障礙拈燈籠來佛殿裏將山門安燈籠上敢問大衆九十日內還得相應也未其或未然山僧却有箇方便薦拈拄杖卓一下云西風一陣來落葉兩三片復舉明招行脚時到泉州與教坦和尚處坦謂云行脚高士一人所在亦須到半人所在亦須到明招便問一人所在卽不問如何是半人所在坦無語後來却令小師問明招如何是半人所在招云你要識半人所在麼也只是箇弄泥團漢應庵和尚拈云我獨眼龍果然只具一隻眼今日忽有衲僧問如何是半人所在劈脊便棒更問如何是一人所在便與趣出何故一不做二不休師云等是弄泥團漢應庵老人較些子復成一頭舉似大衆與教提持不受謾明招隨例弄泥團棒頭有眼明如日要識眞金火裏看

小參萬里無寸草出門便是草嘉州大象驀翻身陝府鐵牛驚絕倒逢人不出賣狗懸羊打破鏡來天荒地老是則金沙混雜非則玉石俱焚不有本分錯錯

難明向上一竅卓拄杖云一曲少林無孔笛從來多是逆風吹

小參秋風涼秋夜長三期已滿作麼商量以字不成八字不是黃牛角指天四脚垂過鼻我首座出世也我首座牧牛也我首座行脚也我首座來也是法住法位世間相常住威音已前道得正是第二句還我第一句來擊拂子云三要印開朱點窄未容擬議主賓分復舉僧問雲門秋初夏末前程忽有人問作麼祇對門云大衆退後僧云過在什麼處門云還我九十日飯錢來師云者僧貪程太速雲門薄處先穿有問本覺只向道十里長亭五里短堠過在什麼處勸君更盡一杯酒西出陽關無故人

小參長期短期日面月面一毛端上乾坤石火光中閃電你有拄杖子與你拄杖子你無拄杖子奪却你拄杖子人平不語水平不流山僧三十年前海上參尋只是遇茶喫茶遇飯喫飯寒則向火熱則取涼朝悠悠莫悠悠不知白盡少年頭逗到被人推出住山人把人杓柄寧免顛頭曉侗有時半夜穿針有時空中

覓縫若非現前尊衆戮力贊成便見將東作西指南  
爲北草滿法堂苔封古屋所以今夏堂中兄弟雖曰  
不多盡是諸方羅籠不住呼喚不回底漢掃除異見  
稠林拈却佛病祖病那更永福禪師在此輔車與唇  
齒相似卓拄杖云一曲少林無孔笛逆風吹了順風  
吹

古林茂禪師解夏小參秋初夏末東去西去萬里無  
寸草處去出門便是草擬向什麼處去古人事不獲  
已開却通天大路又謂之清淨大寂滅海與諸人同  
出同入初無私毫差別彼我之相直下會得九十日  
內功不浪施明朝自恣之辰一任東去西去只不得  
向萬里無寸草處去何故蓋爲諸人未曾踏著者一  
路子所以前頭大有事在雪峯云盡大地是解脫門  
把手拽不入雲門云盡大地是解脫門枉作佛法會  
却一處不通兩處失功兩處不通觸途成滯山僧道  
盡大地是解脫門過去未來現在三世諸佛盡在裏  
許汝諸人亦在裏許拈拄杖云拄杖子亦在裏許且  
道還有不在裏許者麼良久喝一喝云空將未歸意

說向欲行人

解夏小參九十日長期告滿二千年舊話重圓然則  
修證在人本無處所無縛無脫不卽不離於此證中  
畢竟無證段之與活盡屬菩提生與不生俱名般若  
南天台北五臺一切智智清淨無二無二分無別無  
斷故拈須彌山秤作十二兩海神知貴不知價拽占  
波國共新羅鬪額王毋書下雲旗翻看看古岸何人  
把釣竿復舉古人道九旬禁足魚遊網三月安居鳥  
入籠生殺盡時蠶作繭如何透得者三重師卓拄杖  
云將成九仞之山不進一簣之士

解夏小參一夏九十日明朝事方畢修證旣無功光  
陰盡虛擲雖然如是便與麼去也不孤負諸人豈不  
見昔有老宿一夏不與兄弟說話有僧云不敢望和  
尙說佛法得聞正因兩字也得老宿云若是正因一  
字也無道了卽箇云適來無端與麼道隔壁老宿聞  
云好一釜羹被兩顆鼠糞污却老宿牢關把斷水泄  
不通者僧不善其機上他鈎線若不得隔壁老宿與  
他註破幾乎虛度一生雖然且道者僧還肯也無後

來雪竇和尚拈云誰家鍋裏無一顆兩顆入水方見  
長人山僧與麼告報也是官路販私鹽是汝諸人須  
是皮下有血始得畢竟如何不因夜來鴈爭見海門  
秋復舉先育王夜參云少室無門戶如何便得通夜  
深寧耐立聽我話西東師召大眾云也有權也有實  
也有照也有用只是不得恁麼會珍重

解夏小參五祖和尚云一卽三三卽七牧羊海畔女  
貞花拒馬河邊望夫石石擊赤赤土畫簸箕從教眼  
瞤眇五祖老人雖則大啓玄關要且無佛法道理保  
寧一夏與兄弟東語西話句句字字盡是透頂醍醐  
夏末秋初東去西去切不得孤負老僧何故千年田  
八百主甜瓜甜苦瓠苦坐斷上頭關超出佛與祖復  
舉文殊三處度夏迦葉白椎欲擯出卽見有無量世  
界一一世界有一一佛一一文殊一一迦葉世尊問  
迦葉云汝欲擯那箇文殊迦葉罔然師云大小迦葉  
有頭無尾畢竟如何西天令嚴久立

解制小參時光易失解夏斯臨砌畔蛩吟林間蟬噪  
金風扇野黃葉飄空只此見聞更無餘事直得九旬

之內無絲毫虛棄之功歷劫無明當下冰消瓦解向  
上更有事在露出獅子爪牙其間別有商量未免當  
門按劍所以古人道譬如鴈過長空影沉寒水鴈無  
遺踪之意水無留影之心只者靈鋒阿誰敢擬太陽  
門下日日三秋諸人若善參詳管取功成果滿正與  
麼時如何萬機罷盡龜藏六一性圓明鶴出籠

解夏小參三月安居尅期取證一念未生前拈却佛  
祖病是汝諸人二六時中還得相應也未若未得相  
應九十日飯錢放過也不妨只是不得道見保寧來  
豈不見雲門大師道直得盡乾坤大地無纖毫過患  
猶是轉句不見一色始是半提更須知有全提時節  
大小雲門舉話也不了臨濟云有一人常在途中不  
離家舍有一人常在家舍不離途中那一箇合受人  
天供養恁麼說話猶在半途既在途中說什麼家舍  
既在家舍便須忘却途中所謂道人行處如湯銷冰  
箭旣離絃無返回勢有底道途中卽是家舍家舍卽  
是途中與麼見解也未夢見臨濟汗臭氣在不如他  
興化道我在南方行脚一遭拄杖頭不曾攬著一箇



會佛法的却有衲僧氣息簡事如擊石火閃電光攆得攆不得未免喪身失命其間一箇半箇轉得身吐得氣當頭坐斷不受差排脚跟下推勘得來未免黑洞洞地良久云休休著甚來由春了夏夏了秋秋了冬無事晚來江上望三三兩兩釣漁翁

南石琇禪師解制小參諸方提唱貴在出格纔陞堂小參便要舉入門便棒入門便喝話望州亭與汝相見話隔江招手話見僧便面壁話直使龍睛鵝眼莫能窺顛驚子目連安能湊泊謂有宗師手段高則高矣妙則妙矣其柰法道衰微利根者少正如方木逗圓竅安能脗合徑山相席打令看風使帆不惜帶水拖泥一任諸方笑怪久參上士不在多言晚進初機莫嫌苦口出家人棄捨父母不顧奉養已爲不孝是名教之罪人矣期在悟明心地續佛慧命廣度衆生如是則非便報答今生父母養育以大孝直使累世父母冤親俱獲解脫豈小可哉若只區區碌碌今日三明日四戒律不能持禪定不能習甚至傷風化玷宗社非但爲名教罪人亦是法門之罪人矣一旦

生死來到將何抵敵捨此報身難逃淪墜古人謂牢獄未是苦地獄未是苦袈裟下失却人身是爲苦也藥石之言可不銘佩衆中忽有一箇出來道長老長老好合取臭口山僧只得向明窓下安排何故近代三吳并百越箇般作略眼中稀復舉九峯虔禪師因僧問西天夏末有人得道此間夏末還有得道者麼九峯云有僧云何者是九峯云頭戴午夜月腳踏黃金地今日忽有問徑山此間夏末有人得道麼徑山但答云無忽更問云何謂無便向他道箇箇眉毛橫眼上人人鼻孔大頭垂且道九峯是徑山是便下座笑隱訢禪師解夏小參萬機不到百市千重一句全提七穿八穴萬里無寸草出門便是草瀏陽洞山前不遑郵後不迭店中峯明日解制今夜一彩兩賽去也拈拄杖畫一畫云透過一字關撼碎三玄耍狸奴白牯笑不休露柱燈籠皆踴跳因甚如此一家有事百家忙復舉潞山示衆云行脚高士直須向聲色裏睡眠聲色裏坐臥始得疎山出問云如何是不落聲色句潞山豎起拂子疎山云此是落聲色句潞山便

歸方丈疎山不契遂辭香嚴嚴云何不且住疎山云某甲與和尚無緣嚴云有何因緣不契試舉看疎山遂舉前話嚴云某甲有箇話疎山云道什麼嚴云言發非聲色前不物疎山云元來此中有人乃囑香嚴云師兄向後有箇住處某甲却來相見爲山至晚問香嚴云問聲色話底矮閣黎在麼嚴云已去也爲山向子道什麼嚴云某甲亦曾對他來爲云試舉看嚴云言發非聲色前不物爲山云他道什麼香嚴云他深肯之爲山失笑云將謂者矮子有長處元來只在者裏此子向後設有住處近山無柴燒近水無水喫師云衆中商量盡道爲山用向上爪牙惜乎疎山失却一隻眼殊不知正是爲山失却一隻眼却被疎山勘破中峯恁麼道諸人還甘麼

用彰俊禪師解夏小參秋江清淺時白鷺和煙島本無迷悟人只要今日了既是本無迷悟又要了箇什麼好諸禪德頂門正眼照古照今腦後神光無內無外雖則人人本具各各現前其奈妄想執著不能了此茲值聖制將圓僧欲自恣便從今日了將去不妨

七穿八穴十字縱橫若了不去三十年後換手埵胸莫言不道

解夏小參解却布袋口拔脫拄杖根朝遊天台莫往南嶽是你諸人分上事有佛處不得住無佛處急走過亦是你諸人分上事山河無隔礙光明處處通普賢菩薩乘此光明現神通百變從象口入從象鼻出從象耳入從象眼出諸人還知麼若也知皇恩佛恩一時報畢若也不知便請還常住九十日飯錢來咄爾密洩禪師小參洞山云秋初夏末各各向東去西去直須萬里無寸草去有曰出門便是草有曰直得不出門亦是草洞山老祖與二尊宿忘却自家四大五臟盡力提持恐人入草今日東山解制臘節初臨春氣未至正值燒痕滿界衆兄弟直須向乾茅叢裏信手拈來寸寸瓊枝纓纓玉葉不妨和身臥在荊棘林中累地輓他十七八輓起來通身荊棘非但佛祖難親覩他舜若多神擬著則鮮血淋漓縱使臘月三十索債盈門難以近傍東山如是告報大似出客顯狂自露通身醜惡雖然也不錯舉

冬夜提綱

雪巖欽禪師冬夜小參并謝梅礪首座冬至月頭賣被買牛冬至月尾賣牛買被全提古佛規猷突出禪僧巴鼻可中一箇半箇不受人瞞纔聞舉著剔起眉毛囁叫吼地笑道二祖甘不丈夫斷臂求心埋沒自己殊不知深雪堆中自有礪底寒梅一樹清香旖旎卓拄杖云嗅得著只者是舉洞山道有一物黑似漆常在動用中動用收不得師云可煞自由過在什麼處師云兩手分付秦首座道過在動用中師云相隨去也若是護聖門下則不然有一物明似日不在動用中動用中無不得且道還有過也無若有箇漢出來道無山僧未免也拈出一顆斷江柑子聊陳薄供卓拄杖一下云莫怪空疎伏惟珍重

冬夜小參陽升陰伏漢宮添一線之長日暖霜明魯史書五雲之瑞直得飛雪谷發寒水光燄集雲峯抽石筍枝條君子道長小人道消鵬搏海運也九萬里而扶遙

高峯妙禪師冬至學僧問古德云一陽來復日長一

線未審佛法長多少古德云長一線後有古德云一線長師拈云就窠打劫還他三老本分鉗鎚若謂佛法短長端的未夢見在今日忽有人問西峰佛法長多少只向他道東西十萬南北八千

中峰本禪師冬至示衆乾三連坤六斷慈明揭堂上之榜文陽未復陰已消洞山撥座元之菓桌兩重公案皎如白晝千年活計瑩若澄潭金毛獅子擺脫鐵鎖而奮迅遊行踏碎東西天目玉角麒麟掣斷錦繩而軒昂步驟衝開前後溪山堅氷浮野水而不知春信寄寒梅而未覺夜後燈籠眼活朝來露柱心空共發揮却外風規同指點寰中節令諸禪德還知麼你若道年年冬至喫齋歲歲一陽聽法鐵酸餡鐵蒺藜互相拋擲牛尾拂牛皮鼓撩亂激揚任你鼓兩片唇皮向曲彖床上說向天也得說向地也得說得陰消陽長也得說得陽消陰長也得我只管一日鉢盂兩度濕冬至寒食百單五是固是矣你還知只箇不管底正是生死根株無常羈鎖正未曾透脫在所以道此宗難得其妙切須仔細用心古今多少伶俐人向

一色邊立定主宰一切處禪將去禪也禪得是你若不親向自己脚跟下卒地斷曝地折一回殊不知和箇禪底亦不曾脫他輪迴生死此事是博地凡夫立地便要向他佛祖頭上坐臥要於一刹那頃將他積劫根深蒂固底輪迴生死連底一翻翻轉是謂大事因緣豈口出耳入而能及之者哉如果未相應且不與人別求方便但只於十二時全身放下單單靠取箇所參話頭日亦然夜亦然行亦然坐亦然生亦然死亦然乃至上刀山入劍林亦皆然更不生第二念只麼純一無雜挨拶將去久久純熟和箇亦然底同時脫略心空及第其在斯焉正與麼時喚一陽作六陰也得喚六陰作一陽也得喚全消是長亦得喚全長是消亦得喚不長不消卽長卽消總得可謂真正衲子本色道流遇緣卽宗應時納祐又何一物能拘絆哉雖然還不喚今日作一陽來復得麼特別有消息時却來吐露久立

想中愠禪師冬至小參海寺荒涼巖巒攢拱門外寒潮浸月庭前古木號風人人眼見耳聞一一超今邁

古戢玄機於未兆藏冥運於卽化慈明揭榜堂前鬼門貼卦洞山寂退菓桌欺陷平人若非智眼洞明盡作奇特話會所以道參禪須透祖師關學道要窮心路絕心路不絕祖關不透未免受他寒暑變遷生死籠罩拈拄杖云此土西天十萬程冬至寒食一百五復舉瀉山示衆云仲冬嚴寒年年事暑運推移事若何仰山進前叉手立瀉山云我也知你答者話不得却問香巖你作麼生會香巖云某甲偏答得者話乃叉手進前立瀉山云賴遇寂子不會拈云瀉山將引二子向水枯雪老之時作一家讌熊掌駝峯下箸厭偃管絃鼙鼓聲徹雲霄遠近觀瞻莫不歆豔及乎分付家財依然却成吳越擊拂子當初只道茅長短斫却元來地不平

至節小參古佛心只于今明月照幽谷寒濤助夜砧先德與麼吐露可謂千鈞之弩要待勅敵發機萬斛之舟不爲坳堂瓶設若是滄溟上客閫外將軍振轉船頭踏翻射堞自然中的於機先豈用瞻風於五兩所以道譬如獅子王哮吼獅子兒聞之皆增勇健不

見洞山問與平云如何是古佛心與平云汝心便是洞山云雖然如是猶是某甲疑處與平云恁麼即問取木人去大衆者些子見不破踏不著饒伊辯如滿慈智如驚子未免癡狂外邊走今夜正當群陰剝盡一陽來復之時聊與諸人聚話片時敢問諸人且洞山與麼問與平與麼答莫是將錯就錯借路經過麼莫是真實相爲拳踢相赴麼如斯品論鄭州出曹門只如與平末後云恁麼即問取木人去此一轉語太煞慈悲多少人向者裏錯會有能於此撥開胸襟伸得口氣何止醍醐灌頂苟或未然陋巷不騎金色馬回來却著破襦衫

楚石琦禪師冬至小參垂萬里鈎駐千里馬駐布漫天網打衝浪錦鱗如大力魔王道我待一切衆生成佛盡衆生界空無有衆生名字我乃愛阿耨多羅三藐三菩提心廣額屠兒放下屠刀道我是千佛一數早是不唧啮更向長連床上坐長連床上臥眼眈瞪地殺不死羊相似萬年一念有什麼益不如泥猪疥狗却有出離之期明明向你道開口不在舌頭上要

急相應來日是書雲復舉臨濟道萬法是心光諸緣惟性曉本無迷悟人只要今日了師云既無迷悟了箇什麼從前汗馬無人識只要重論蓋代功愚庵及禪師冬至小參群陰欲去未去之際一陽欲生未生之時伐鼓以考鴻鐘會人天而提祖令今夜不說菩提涅槃真如解脫不說即心即佛非心非佛不是心不是佛不是物洞山撥退菓桌祭鬼神茶飯阿誰肯喫慈明揭榜堂前弄胡蝶家具笑殺傍觀叉手進前進前叉手奴見婢慙慙天寒人寒大家在者裏無孔鐵鎚魯公臺山書雲漢女宮中測日知時識節却堪持論自餘立機立境行棒行喝全鋒敵勝同死同生正按傍提橫來豎去和泥合水截鐵斬釘七十三八十四等是鬼家活計於諸人分上料掉沒交涉喝一年三百六十日四時八節春了夏夏了秋秋了冬不覺不知過了三百六十日明朝便是冬至前來許多絡索既是總用不著自己分上合作麼生喝點鐵化爲金玉易勸人除却是非難冬至因事小參千載南屏古道場目前無法可商量



群陰銷盡陽生也四海同瞻化日長如是則鐘鼓山林依舊太平氣象維新人人脚跟下輝大寶光箇箇頂門上開正法眼鵲噪鴉鳴深談實相收攝漁唱共演真乘當頭坐斷八面玲瓏正令全提十方通暢有時奪人不奪境有時奪境不奪人有人境兩俱奪有時人境俱不奪臨濟大師滿肚無明通身擔板要且費力不少居一切時不起妄念於諸妄心亦不息滅住妄想境不加了知於無了知不辨真實釋迦老子釘椿搖櫓抱橋柱洗浴有什快活處山前一片閒田地叉手叮嚀問祖翁幾度賣來還自買爲憐松竹引清風老東山雖則熟處難忘却較些子忽有箇衲僧出來道長老老恁麼也得不得恁麼也得喝和泥合水漢不見道時人住處我不住時人行處我不行不是與人難共住大都繇素要分明復喝一喝復舉僧問古德萬境來侵時如何德云莫管他師云萬境來侵莫管他情塵瞥起便周遮大圓寶鏡明如日漢現胡來等不差

古林茂禪師冬至小參霜凝冰凍陰極陽生日南長

至吾道大亨拈拄杖云拄杖子橫山河大地一齊橫拄杖子豎山河大地一齊豎拄杖子不橫不豎山河大地自山河大地燈籠自燈籠露柱自露柱所以道是法住法位世間相常住只如雲門大師道拈燈籠向佛殿裏將山門來燈籠上蝦蟆蹠跳上天蚯蚓驚過東海是常住耶非常住耶日東上月西沒循環三百六十幾箇解知窠窟窠窟不知絕毫絕釐庭前石笋抽條也會見高枝宿鳳雛復舉僧問靈雲如何是佛法大意雲云臨鵲拈井底種林檎僧云學人不曾雲云今年桃李貴一顆直千金大慧和尚云者箇公案自古至今無人拈出山僧不惜口業更爲註破臨鵲拈井底種林檎今年桃李貴一顆直千金師云大眾靈雲答者僧話且道與臨濟在黃檗問佛法的的大意三度喫六十拄杖是同是別若道是同法無同相若道是別佛法豈有兩般常愛大慧云我者裏說蚌蛤子禪開著口便見心肝五臟只者便是雖然也是大都城裏撮馬糞漢

冬至小參冬至一陽生寒食一百五葭管纔驚暖律

回嶺頭又見梅花吐時節不相饒昨日有人從燕京  
來說上都路上雪深一丈軍民馬匹凍死饑死動以  
萬計是汝諸人火爐頭打坐粥足飯足焉知有與麼  
事諸上座從上來事也須同前決擇古人拈一機示  
一境在你面前堆不前挽不後吞不下吐不出他時  
後日觸事面牆也道曾見保寧來即今三百六十骨  
節八萬四千毛竅明知是生死根本何曾昧却一絲  
毫許祖師云門門一切境回互不同互同時更相涉  
不爾依位住須彌山上踉蹌大洋海底橫行鍼眼裏  
躍出衝浪錦鱗冷灰中撥起亘天烈燄直得如是也  
只是三家村裏賣草鞋底相識有甚用處然則官不  
容針私通車馬山深水寒日上月下跛驢踏倒摘茶  
輪草庵卸下琉璃瓦卓拄杖喝一喝云德山臨濟來  
也

冬夜小參昨夜三更失却牛天明起來失却火東討  
西尋不見蹤元來賊是家親做是汝諸人還認得家  
親也無若也認得十二時中無纖毫過患不爲物轉  
不爲境礙不爲凡聖所纏不爲生死所縛隨分著衣

喫飯自然坐斷報化佛頭祖師云心隨萬境轉轉處  
實能幽隨流認得性無喜亦無憂既不爲物所轉不  
爲境所礙如何又說心隨萬境轉轉處實能幽大抵  
參禪須要究理而參即今山不可喚作水水不可喚  
作山俗不可喚作僧僧不可喚作俗須是隨他境轉  
始得忽然山不是山水不是水僧不是僧俗不是俗  
你面前無我我面前無你夾山云目前無關黎座上  
無老僧雲月是同溪山各異便是轉處實能幽也當  
知此性即是清淨廣大寂滅平等本際廓徹靈明通  
達萬法一切不疑本有之性無量劫來未曾變易陰  
消陽長冬去春來何曾昧却一絲毫許雖然如是也  
須實到者箇田地始得若也不實不要掠虛有佛處  
不得住無佛處急走過三千里外摘楊花開口不在  
舌頭上卓拄杖喝一喝復舉僧問徑山譚禪師掩息  
如灰時如何山云猶是時人公幹僧云幹後如何山  
云耕人田不種僧云畢竟如何山云禾熟不臨場應  
庵和尚云鳳閣香殘雪巢夜冷半窻明月和氣藹然  
正與麼時且道歸宗與徑山還有相見分也無見與

不見卽且置只如者僧與麼問還具眼也無其或未  
然雲藏無縫襖鳥宿不萌枝師云打鼓弄琵琶相逢  
兩會家九年人不識幾度過流沙

冬至小參冬至一陽生拄杖長丈二擊碎破沙盆大  
地載不起三世諸佛窺覷無門歷代祖師無提掇處  
如今衲僧家道我向陰陽未剖世界未立已前便知  
有向上巴鼻婢視聲聞奴呼菩薩驅逐南泉趙州輕  
忽德山臨濟把他從上老宿埋向大屎坑裏殊不知  
簡點將來正是依草附木精靈也未夢見衲僧汗臭  
氣在前三後三一九二九黃牛角向天火裏蘆花秀  
忽然發火河燒著帝釋鼻孔東海娑竭羅龍王惡  
發氣衝牛斗卓拄杖喝一喝

冬至小參一生二二生三三生萬物井底紅塵蔽日  
山頭白浪滔天翻身百草頭邊跳出劫初田地智不  
到處切忌道著入水見長人我宗無語句亦無一法  
爲人波斯入關市以思無思之智返思靈識之無窮  
釋迦老子與天帝釋相爭佛法甚闊雲門大師忍俊  
不禁來山僧拂子頭上呵呵大笑且道笑箇甚麼我

笑釋迦老子二千年前不善輪機甘心受屈當時若  
下者一著免致笑殺旁觀畢竟如何卓拄杖云寒山  
拾得

冬至重建寢堂小參豁開戶牖重新舊日規模當軒  
者誰坐斷聖凡途轍碧眼胡僧罔措釋迦彌勒猶是  
他奴燈籠露柱掀眉文殊普賢權作走使描不成畫  
不就撲落非他物花簇簇錦簇簇縱橫不是塵遠得  
便去山河并大地踏著便瞋全露法王身自古自今  
說玄說妙緇素不分者如稻麻竹葦就理就事變通  
逸格者能有幾人靈利漢沒窠臼知是般事便休且  
道知底是甚麼事寒來暑往陰極陽生庭前玉樹花  
開早也勝東山水上行卓拄杖喝一喝

冬至小參形與未質山河大地甚處得來名起未名  
無位真人突出難辨頂門上時時顯現眼睛裏處處  
縱橫舉拂子云看看德山臨濟來也有權也有實  
也有照也有用佛來也打祖來也打且道還曾打著  
也無豈不見興化道我在南方行脚一遭拄杖頭未  
曾撥著一箇會佛法底花根本豔虎體元斑子細簡

點將來也是死水裏浸却及到大覺被脫下衲衣痛打一頓却言我在大覺棒頭方始深明臨濟先師在黃檗喫棒底道理者箇便是打著底樣子所以精金百煉要須本分鉗鎚山僧七五年前也曾舉此話來有云興化氣字如王因甚向大覺棒頭方始發明臨濟在黃檗喫棒底道理我者裏拄杖子走遍四天下攪著一箇便是會佛法底他時後日免得遞相鈍置有底便道山僧只解扶強不能扶弱殊不知自有分付處兄弟時光可惜不易來此聚頭只知各邊那邊豈解知慚知愧古人小參謂之家教在今諸方大段不同須要起模畫樣方爲格外提持暨乎本分商量未免麻纏紙裏從上諸聖豈無方便爲人一千七百祖師機緣盡是控你諸人入處若要乾坤坐斷邊格超宗截鐵斬釘不通凡聖須是沒量大漢始得陰陽消長日月遷流燄燄冰河花開確磬大盡三十日小盡二十九總不干諸人分上事久立珍重用彰俊禪師冬至小參群陰欲剝未剝金烏冰得鶯團團一陽欲生未生玉兔凍得脚曲豈不可作佛法

商量不可作世諦流布便與麼會三世諸佛六代開士天下老和尚入地獄如箭不與麼會三世諸佛六代開士天下老和尚入地獄如箭與麼不與麼總不會天在一粒粟中海在一毫端上浮幢王華藏界總在眉毛眼睫間三世諸佛六代開士天下老和尚無逃遁影處當與麼時喚什麼作陰喚什麼作陽然雖如是事無一向雲黃山頂有片無陰陽地不萌枝上開不萌花無影樹頭結無影菓芳巖六合香噴大千爲復是神通妙用爲復是法爾如然拈拄杖畫一畫乾坤一合地胡餅日月兩輪天氣透冬節小參慈明揭榜上一畫長下三畫短弄假像眞玉泉布衲書千佛名書萬菩薩名弄巧得拙黃梅石女夜生兒兒子生孫市地普天總是臨濟種草所以雙林會中一箇箇頭頂天腳踏地陰陽不能移寒暑不能變當與麼時也無暑運推移亦無日南長至然固如是未可如是試請從一九頭數到犁耙出時咩咩前頭大有寒在喝一喝了庵欲禪師冬至小參前佛性命後佛紀綱總在者

裏把住則六陰充塞放行則一陽復生不說笋進石頭不說花開鐵樹只教行者擊鼓小參且免諸人家瞌睡委悉麼眼若不睡諸夢自除心若不異萬法一如拈須彌山秤作二兩東頭賣賤西頭賣貴任是本色衲僧到此也無辨處豈不見臨濟問黃檗佛法的的大意被打六十拄杖及至高安灘上便解知歸興化道我在南方行脚一遭拄杖頭未嘗撥著一箇會佛法底逗到大覺堂前卸下衲衣痛領一頓却言我於此時親見臨濟先師在黃檗喫棒底意旨諸禪德金鋒敵勝未是作家遺劍刻舟豈堪持論雖然若不藍田射石虎幾乎悞殺李將軍

冬至小參坐立儼然賓主歷然百千法門同歸方寸河沙妙德總在心源直得無邊刹境自他不隔於毫端十世古今始終不離於當念又說甚晷運推移日南長至禪之與道拈放一邊妙之與玄置之一處山僧不作佛法商量諸人不作世諦流布明朝起來淨洗了面大佛殿上禮拜燒香依舊只是尋常事例縣橋頭李八伯半醒半醉不覺起來呵呵大笑且道笑

箇什麼壁上安燈盞堂前置酒臺悶來打三碗何處得愁來復舉洞山冬夜撥退菓桌公案師云太阿橫案凜凜神威寶鑑當臺澄澄光彩只如撥退菓桌又作麼生雲自帝鄉去水歸江漢流

冬至小參朕兆未分陰陽已具乾坤既剖萬彙茲彰水肅霜清風高木落突出無位真人一箇箇面前孤迥迥地新羅國裏打鼓大唐國裏上堂洗面摸著鼻啜茶濕却觜七十三八十四把拄雪峯趙州放過德山臨濟倒著欄衫舞柘枝萬仞崖前恣遊戲喝一喝冬至小參天地闔闢陰陽消長衲僧門下有甚伎倆放下拂子拈起拄杖佛來魔來總與一棒從教靈山會上退席五千善法堂前草深一丈且貴正眼流通作箇人天榜棒所以五六年來雖則與諸人眉毛厮結其實水米無交明朝節屆書雲不免合水和泥打開東山家燕先舉雲門胡餅次烹趙州臘茶然後撥出洞山菓桌只如道有一物上拄天下拄地常在動用中動用中收不得且道是什麼物良久云麤餐易飽細嚼難饑復舉僧問風穴古曲無音韻如何和得



齊穴云木鷄啼子夜芻狗吠天明大慧和尚云者黃面浙子恁麼答話要做他臨濟兒孫也未得在或有問徑山古曲無音韻如何和得齊只向他道木鷄啼子夜芻狗吠天明師云前行不到末後太過要見條理始終須是金聲玉振聽取一頌木鷄啼芻狗吠兩箇老凍儂各長三尺咏古曲無音和得齊安用兒孫作臨濟喝一喝

小參六爻沈伏一氣潛回雖是死蛇解弄也活拈一機而機機普應用一法而法法全彰廓人天未證之門揭佛祖不傳之妙浮幢刹外把斷要津賢聖劫中位居第一有一句到你不萌枝上絲履層陰無一句到你無影樹頭花敷五葉別別細不容針大通車轍缺齒胡僧笑點頭衲僧眼裏添金屑喝一喝

舟中值冬至小參一道虛明總是自家田地初爻既兆全彰劫外乾坤無去來動靜之殊無取舍是非之異可以騎聲蓋色可以隨流入流可以泛華亭半葉之舟可以盡澤國煙波之勝不舉任公之釣非同濠上之遊擊拂子云劈口一橈已傷鹽醋離鈎三寸休

更回頭拍膝云永夜月明天在水鴈聲飛過白蘋洲無文燦禪師冬至小參丁一卓二道一句滴水冰生拋三放兩示一機崖崩石裂一切處解會不得一切處擬議不得所以寂子只解近前又手香嚴只解又手近前要會晷運推移日南長至未在拈拄杖云拄杖子從來死獍狢地今夜忍俊不禁踊躍出來將乾坤大地一時吞却了也若向者裏會得菓從無影樹頭結其或未然豆向寒灰爆出來復學玉泉和尚示衆云晷運推移布視赫赤不是不洗無來換替師拈云薦福當時若見即向他道少賣弄

冬至小參滴水冰生未可歇去崖崩石裂正好進程直饒會得一線長要且未會長一線直饒會得長一線要且未會一線長所以鄉談相似州縣不同開先則不然擾擾匆匆晨鷄暮鐘喚冬作夏喚夏作冬一線短長誰管得雪霜盡處是春風復舉僧問古德冬至後日長多少古德云長一線又問一古德日長多少古德云一線長師拈云一等共行山下路眼中各自別風煙

月江印禪師冬至若論此事眨上眉毛早已蹉過鐵  
馬驟水稜不涉唇吻道將一句來石牛欄古路戢立  
攬于未兆藏冥用於至化固是罕遇其人會萬物歸  
自己與天地而同根又是阿誰分上事諸方將謂仰  
山進前叉手香嚴叉手進前甚生極則殊不知大似  
楊廣失驢駝韓信臨朝底雲峯有年無德山寺荒涼  
幸而四海禪流來此相伴未免向八德池邊宏開瑤  
席紫羅帳裏暗撒真珠共慶書雲令節還委悉麼若  
教嫖毋臨明鏡也道不勞紅粉施拈拄杖卓一下  
石屋珙禪師冬節小參洞山撥退菓桌取舍未思玉  
泉不洗布視固執難斷福源等是箇般時節就中却  
也不同梅放孤標依舊暗香浮動線添寒影又逢佳  
景迎春燈籠裏帽水底吹笙露柱著衫雲中作舞是  
汝諸人還委悉麼一百五日清明更在寒食  
後

列祖提綱錄卷第十二

列祖提綱錄卷第十三

武林十八澗理安禪寺住持婁東行悅集

歲夜提綱

北禪賢禪師歲夜小參年窮歲盡無可與諸人分歲  
老僧烹一頭露地白牛炊黍米飯煮野菜羹燒槽枬  
火大家喫了唱村田樂何故免見倚他門戶傍他牆  
剛被時人喚作郎便下座

真淨文禪師除夜小參一年將盡夜萬里未歸人今  
夜一衆盡是他鄉之子因何不歸阿呵呵直饒使歸  
得歸得亦無家正是諸人歸處歸得麼君不聞龐居  
士云十方同聚會箇箇學無爲此是選佛場心空及  
第歸以拂子敲禪床便起

雲峰悅禪師小參舉百丈歲夜示衆曰你者一隊後  
生經律論固是不知也入衆參禪禪又不曾臘月三  
十日且作麼生折合去師曰灼然諸禪德去聖時遙  
人心澹泊看却今之叢林更是不得所在之處或聚  
徒三百五百浩浩地祇以飯食豐濃寮舍穩便爲旺  
化中間孜孜爲道者無一人設有十箇五箇走上走

下半青半黃會卽總道我會各各自謂握靈蛇之寶  
執骨知非泊手挨撈鞭逼將來直是萬中無一苦哉  
苦哉所謂般若叢林歲歲凋無明荒草年年長就中  
今時後生纔入衆來便自端然拱手受他別人供養  
到處菜不擇一莖柴不搬一束十指不沾水百事不  
干懷雖則一朝快意爭奈三塗累身豈不見教中道  
寧以熱鐵纏身不受信心人衣寧以洋銅灌口不受  
信心人食上座若也是去直饒變大地作黃金攪長  
河爲酥酪供養上座未爲分外若也未是至於滴水  
寸絲便須披毛戴角牽犁拽耙償他始得不見祖師  
道入道不通理復身還信施此是決定底事終不虛  
也諸上座光陰可惜時不待人莫待一朝眼光落地  
箇阻無一簣之功鐵圍陷百刑之痛莫言不道珍重  
大慧杲禪師除夜小參今夜喚明朝作來年明朝喚  
今夜作去歲既稱來年今夜合來既號去歲明朝合  
去來年今夜不見來去歲明朝定不去既不來又不  
去業識茫茫無本據大圓鏡裏絕纖塵箇中豈著閒  
家具是則是別又別燦迦晃破秋天月龐公不昧本

來身大似飛龍成跋鼈你諸人瞥不瞥靈利漢須看  
時節五九盡處又逢春衲僧腦後三斤鐵喝一喝  
密庵傑禪師歲夜小參年窮歲盡時或笑或顰眉飽  
者終日飽饑者終日饑惟有衲僧家不耕而食不蠶  
而衣孜孜矻矻如愚如癡忽聽忠言逆耳便見心動  
神疲禪和子禪和子不須疑或去或住總是父母未  
生時山僧怎麼告報未免鳳林叱之復舉頌云一年  
三百六十日今宵正是結交頭移身換步無多子六  
合清風來未休

雪巖欽禪師歲夜小參年來年去來不動乾坤歲  
舊歲新新舊一般時節蒼弁山風骨自露太湖水徹  
底無波冷冷落落哆哆和和門外雪消春水滑庭前  
玉立柱婆娑復舉北禪賢和尚烹露地白牛分歲公  
案師拈云活剝耕牛北禪是則好手其奈牆壁不牢  
被箇販私鹽漢子和賊捉敗天寧則不然今夜無可  
管顧諸人不免烹箇鋤角泥牛炊無米飯唱無聲曲  
與諸人分歲忽有箇漢出來道有公人索和尚筋角  
便與和聲一棒何故有功者賞

歲夜小參一言道盡萬法平沉一句全提千差合轍  
卽心卽佛非佛非心麻三斤乾屎橛我且與麼是汝  
諸人畢竟作麼生領解若能向未開口以前退步就  
已一踏踏著元來臘月三十日便是歲除夜更無奇  
特玄妙者也之乎乾坤一統清如鏡那箇男兒不丈  
夫

除夜上參歲舊年新夜暗晝明未嘗移易日遷月化  
山寺水緣依舊尋常小盡二十九大盡三十日也是  
鎮州蘿蔔漢地生薑休咬嚼沒商量梅花紙帳一爐  
香裊帳蒙頭春晝長復舉僧問古德年窮歲盡事如  
何德云東村王老夜燒錢師頌云春風陌上郎得錢  
隨手使貨物忽相當撞得恰好子

高峰妙禪師除夜小參一年三百六十日看看逗到  
今宵畢十箇有五雙參禪禪又不知學道道亦不識  
只者不知不識四字正是三世諸佛骨髓一大藏教  
根源伶俐漢纔聞學著如龍得水似虎靠山天上人  
間縱橫無碍然雖如是點檢將來猶是者邊底消息  
若謂那邊更那邊一著子直饒西天四七唐土二三

以至天下老古鍾敢保未徹在山僧與麼告報忽有  
箇漢子心憤憤口俳俳出來道高峰高峰你有什麼  
長處開得者般大口只向他道來年更有新條在惱  
亂春風卒未休

中峰本禪師除夜示衆四時與八節循環十二月今  
夜盡破除禪流瞥不瞥若瞥則陳年曆日不用檢尋  
不瞥則明日新條也須甄別東村王老化紙錢後巷  
竹聲俱爆裂窮神無地可送福運有天難接殿前枯  
木桢銀花庭際嫩條抽玉葉將謂陽春已發生子細  
看來盡是殘冬雪諸禪流還知今夜舊歲去不去明  
日新年來不來底消息麼如其未委往往以百年壽  
終喚作臘月三十夜地黑天昏胡鑽亂撞正此時也  
蒲團上生鐵脊骨尋常豎立不牢口唇邊無義味話  
平昔提掇不起況是年窮月盡日了時空再欲如之  
若何決定噬臍無及矣殊不知別有箇轉身路子直  
是奇特你但守取箇所參話不得放捨須信來朝更  
有新條在惱亂春風卒未休或謂傳燈錄一千七百  
單一人皆是言外知歸迎刃而解初不聞有做工夫

看話頭之說在此自年朝至歲暮其切切不絕口惟是說看話頭做工夫不但遠背先宗無乃以實法綴繫於人乎你說得也是一則老僧不具此驅耕奪食換斗移星之辣手其奈諸方不觀人之根性速於求人多是鑽腋插羽急欲其高飛遠舉奈何畫虎不成反類狗也此事大難其人謂看話頭做工夫固是不契直指單傳之旨然亦不曾賺人落草最是立腳穩當悟處親切縱使此心不悟但信心不退不轉一生兩生更無不獲開悟者如傳燈錄中許多言外知歸之士焉知其不自夙生腳踏實地做來古者謂未見有天生彌勒者是也幻人見解止於此耳若要一超直入不爲實法所綴明朝三百六十日又從頭起儘有光陰今夜權且收起葛藤珍重

藏叟珍禪師除夜小參舉僧問占德年窮歲盡時如何德云依舊孟春猶寒師曰占德怎麼答話只怕諸人忘却今日忽有人問年窮歲盡時如何拈棒便打待他道因甚麼打某甲卽向他道曰更要我道孟春猶寒那

石門剛禪師歲夜謝道德首座順侍者看病小參歲事除年華畢尊莫尊乎道貴莫貴乎德覺卽般若因順卽菩提佛當知種荳不生麻因果自然明歷歷然雖如是且道如何見得八福田中看病第一

石屋珙禪師除夜小參年亦窮月亦窮三十六旬窮伎倆破除全在五更鐘窮則變變則通尋常一樣窻前月纔有梅花便不同三條椽下禪和子囊亦空鉢亦空拾得斷麻穿破衲不知身在寂寥中惟有福源拄杖子不屬陰陽造化功了無春夏秋冬自古自今撐天拄地同行同坐嘯月吟風又誰管你江湖滾滾日月匆匆等閒靠在禪床角一片雲中挂黑龍

楚石琦禪師除夜小參善哉三下板知識盡來參旣善知時節吾今不再三諸仁者一舉更不再舉今已再舉一聞更不再聞今已再聞頭頭上明物物上了如理如事亘古亘今不是涅槃心亦非正法眼怎麼怎麼三世諸佛只言自知不怎麼不怎麼六代祖師無啓口處設使言前薦得猶爲滯礙迷封假饒句下精通未免觸途狂見今夜向紅爐上拾一點雪枯木



上糝些子花與你諸人赴箇時節殘燈隨臘盡爆竹  
送春來復舉盤山云向上一路千聖不傳慈明云向  
上一路千聖不然妙喜云向上一路熱盪鳴聲師云  
三大老盡力道只發明得向下一路若是向上一路  
聽年夢見麼

除夜小參作一句商量獅子吼野犴鳴不作一句商  
量野犴鳴獅子吼一時坐斷未許作家千里持來堪  
作何用盡乾坤大地無不說老婆禪爭知永祚若裏  
不打者鼓笛雲門大師云諸方老和尚道須知聲色  
外一段事者箇說話誑謔人家男女三間法堂裏獨  
自妄想未曾夢見我本師意旨在作麼生消他信施  
臘月三十日又須償他始得當時早有與麼說話如  
今是什麼時節師召大眾衆纔舉頭師便喝復舉藥  
山一日謂雲巖云與我喚沙彌來巖云和尚喚他作  
什麼山云我有箇折脚鐺子要伊提上挈下巖云與  
麼則與和尚出隻手去也師云見與師齊減師半德  
見過於師方堪傳授雲巖當時也欠一著待他道我  
有箇折脚鐺子要伊提上挈下抽身使出雪後始知

松栢操事難方見丈夫心

除夜小參未達境惟心起種種分別達境惟心已分  
別卽不生不生法中具足世間出世間法一立一切  
立一破一切破一放一切放一收一切收觀體全該  
當陽廓示方便喚作常住法身流出無邊諸三昧海  
文殊普賢大人境界德山臨濟向上提持此方他方  
齊成佛道有說無說俱轉法輪極三際爲一時統十  
方爲一剎二十四氣七古二候三百六十五日只在  
剎那悟之則當念圓明述之則永沉生死復舉保寧  
勇和尚示衆云世尊不說說迦葉不聞聞卓拄杖云  
水流黃葉來何處牛帶寒鴉過遠村師云青州梨鄭  
州棗大抵無過出處好

愚庵及禪師除夜小參僧問芻狗吠時天地合木鷄  
啼後祖燈輝一年光景今宵盡萬里更無人未歸見  
前一衆盡是他鄉之客卽今歲盡年窮如何得便歸  
家去師云閤黎家在什麼處進云僧問藥山學人擬  
欲歸鄉時如何山云汝父母徧身紅爛臥在荊棘林  
中汝歸何所意旨如何師云愁人莫向愁人說進云

僧云怎麼不歸去也山云切須歸去汝若歸去我示汝箇休糧方僧便請山云二時上堂不得咬破一粒米又且如何師云藥山老漢得恁老婆心切進云且那裏是他老婆心切處師云闍黎要問長老口啞那僧便退師云芻狗吠時天地合木鷄啼後祖燈輝一年光景今宵盡萬里更無人未歸好大衆古人與麼道只要你直下識取自家城廓免見倚他門戶傍他牆剛彼時人喚作郎久參先德不隔絲毫後學初機宜加審細豈不見僧問藥山學人擬欲歸鄉時如何山云汝父母偏身紅爛臥在荊棘林中汝歸何所僧云恁麼則不歸去也山云却須歸去汝若歸鄉我示汝箇休糧方僧便請山云二時上堂不得咬破一粒米若喚作箇休糧方正是還鄉曲謂是還鄉曲又道休糧方老藥山赤心片片惻物垂慈其奈十箇有五雙蹉過至竟不解知歸逗到彌勒下生轉見流離孤苦長沙和尚道我若舉揚宗教法堂上草深一丈事不獲已向諸人道盡十方世界是沙門一隻眼雪峯又道盡大地撮來如粟米大到者裏不敢望汝別懸

慧日獨振玄風但向古人鶻鼻布衫上知些子氣息一年三百六十日一日朝昏十二時東廊上西廊下穿僧堂入佛殿總是到家時節轉山河國土歸自己轉自己歸山河國土如壯士展臂不假他力天上人間縱橫自在苟或未然烏飛兔走臘盡春回明朝慶賀新陽各各又添一歲莫將有事爲無事爭是爭非空白頭

除夜小參時節易過大年夜警爾到來心地未明諸仁者急著精彩萬法是心光諸緣惟性曉本無迷悟人只要今日了蘇武牧羊海畔長日欣然李陵望漢臺邊終朝笑渡東村王老夜燒錢忙者自忙閒者閒東方甲乙木一則三三則一趙州東壁挂葫蘆觀音院裏有彌勒復舉浮山和尚除夜示衆云老矣聊隨粥飯緣浮山無法與人傳夜深各自歸堂去放下情懷且過年浮山老人與麼提唱美則美矣要且無爲人處徑塢輒磨一偈切希聽取海衆同居結淨緣少林消息本無傳寒來暑往誰相委荏苒浮生又一年古林茂禪師除夜小參黑蟻旋磨千里錯巴蛇吞象

三年覺海壇馬子大如驢潘閬倒騎擲角便與麼  
去知時識節歲盡年窮北禪烹露地白牛山僧也隨  
例顛倒直得神和道合賓主混融明朝慶賀新年各  
各起居輕利然雖如是只如多處添少處減趙州東  
壁挂葫蘆金剛手中八稜棒且道明甚麼邊事擊拂  
子云不是李將軍誰識南山虎

除夜小參天高地厚歲盡年窮水遠山長奔南走北  
途路之樂不如在家背負肩擔有何利益直得乾坤  
坐斷一念萬年未能轉向那邊正是陰界裏活計到  
者裏懸崖撒手自肯承當大用現前總不干山僧事  
賓頭盧尊者應供走遍四天下與你衲僧分上有甚  
交涉晝升兜率夜降閻浮釋迦老子鼻孔因甚麼在  
者裏卓拄杖云文殊普賢也不得草草喝一喝

除夜小參一年三百六十日爲汝諸人徹困了也今  
夜年窮歲盡更須不惜口業時節遷流人事消長物  
我混同古今不易天左旋地右轉日東上月西落家  
家門前火把子人人手裏明月珠拈却門前案子  
不妨潘閬倒騎驢復舉僧問古德云歲盡年窮時如

何德云東村王老夜燒錢師頌云東村王老夜燒錢  
出草菸菟角指天好是李將軍去後無人射得石頭  
穿

除夜小參諸佛不出世祖師不西來佛法遍天下談  
立口不開希有希有奇哉奇哉但得佛法遍一切處  
談立口不開總沒交涉山僧一年三百六十日不  
說諸佛出世不出世祖師西來不西來談立之口開  
不開佛法一切遍不遍卽今年窮歲盡從教笑殺旁  
觀直是無可與諸人說底諸人亦無聞底無說無聞  
周遍法界笑與不笑悉皆平等當明中有暗勿以暗  
相觀當暗中有明勿以明相遇驀拈拄杖云山河大  
地明暗色空總在山僧拄杖頭上若識得去拄杖亦  
不可得若也不識却還山僧自受用去也卓拄杖云  
家家門前火把子

除夜小參達磨遺下一隻履老盧把住諸祖衣家家  
門前赫日月太平不用將軍威逢佛殺佛逢祖殺祖  
逢羅漢殺羅漢眞淨老人自謂臨濟正傳黃龍的子  
七出八沒得大自由簡點將來正是無地頭漢金佛

不度爐木佛不度火泥佛不度水眞佛屋裏坐老趙  
州慈悲太殺曲設多方也是按牛頭喫草二大老相  
去數百餘年至提持綱要示小機關直是不隔一絲  
毫許山僧一年三百六十日未嘗不拈出箇一著子  
自是諸人根浮力淺不能踏步向前如就地彈雀相  
似雖然也不得容易了却卓拄杖喝一喝

除夜莊上歸小參把斷重關在途中不離家舍放開  
線路在家舍不離途中從茲劫劫波波只守舊時行  
履上無攀仰下絕已躬明眼人前一場笑具去年底  
今年底明年底後年底外後年底老東山將無作有  
賣弄風流直饒劈腹剜心何異守株待兔保寧者裏  
拆東籬補西壁赤心片片只爲諸人天寒歲晚莊上  
歸來古佛家風何曾欠少旃檀林葉葉清風滄海珠  
人人光彩便好刮龜毛於鐵牛背上截兔角於石女  
腰邊從教骨露皮穿且要與諸人分歲雖然且道與  
北禪相去多少擊拂子

除夜小參却物爲上逐物爲下敲骨打髓指鹿爲馬  
若作佛法商量入地獄如箭射豈不見臨濟在黃檗

三度問佛法的的大意三度被打與化於大覺棒頭  
深明黃檗意旨且道是什麼語話白雲從年頭數到  
年尾從上若佛若祖無一箇不是依草附木若盡令  
而行盡大地直須荒却所以道隨汝顛倒所欲卽今  
是臘月三十日明朝依舊慶賀新年山門頭佛殿裏  
禮拜燒香伏惟安置

除夜小參拈起一句便是陳年葛藤諸人聞得也多  
見亦不少可謂如人飲水冷暖自知雖不可以告人  
終難謾於自己者條活路千聖共行古往今來摧邪  
顯正無不從此眞實性中流出豈不見雲居舜老夫  
愛罵天衣懷和尚秀圓通爲之不平一日舜老夫上  
堂秀出問云豈不見圓覺經中道舜老夫云大眾久  
立便下座歸方丈秀圓通云者老漢通身是眼罵得  
懷和尚也所謂隔山見烟便知是火至臨機應變處  
如俊鷹快鷂搏擊自由諸人若善參詳管取頭正尾  
正勿謂今日不知又有來日今年不會更有來年不  
覺不知一歲又添一歲拈拄杖云拄杖子也添一歲  
卓拄杖云鰍跳不出斗

除夕小參年窮歲盡水肅霜寒門前爆竹聲喧堂上  
燈光晃耀是四序遷流之日當三陽未肇之時諸人  
簇簇上來山僧口喃喃地露柱燈籠爭光彩迦葉  
維衛共展神通諸佛無上妙門普請大家證入日不  
待火而熱須彌山上白浪滔天月不待風而涼畢鉢  
巖前清風滿座未有世界早有此性擺手入長安世  
界壞時此性不懷一舉四十九如斯舉唱足可流通  
其或根思尙遲便見和泥合水拍禪床云人窮不到  
金剛際未免區區役路途

恕中愍禪師除夜小參拈拄杖云先佛性命後佛紀  
綱總在者裏是汝諸人從年頭至年尾觸目遇緣隨  
處明了何曾昧却開山彥和尚云主人翁惺惺著好  
不丈夫更有德山臨濟棒喝交馳雖則雷奔電激爭  
柰蟄戶未開畫拄杖乙巳歲君所司時令所屬善惡  
一畫畫斷直得木人發笑石女謳歌微塵數佛一時  
現前無邊刹土不離掌握各請歸寮穩臥明朝起來  
慶賀新年見僧賀僧見俗賀俗見狸奴白牯賀狸奴  
白牯還知有不受賀者麼卓拄杖三級浪高魚化龍

癡人猶辱夜塘水復說偈云一年三百六日日日  
塵勞事不同今夜勸君都放下管教明取少林宗  
除夜小參靈山會上少室巖前的的相傳將錯就錯  
德山小參不答話鉤頭有餌趙州小參要答話秤尾  
無星七十三八十四策著磕著礙塞殺人看看今夜  
是年窮箇箇明朝添一歲靈不在已聖不慕他檢點  
將來是不是

月江印禪師除夕小參絕學無爲閒道人只管三十  
六旬爲一歲不懼生死老和尚任他臘月三十日到  
來如鐘在簾待扣則鳴似鏡臨臺物來斯照老僧行  
年在坎窮鬼擲揶揄囊無繫蟻之絲厨絕聚蠅之糝塵  
說利說熾然說無法可說內空外空畢竟空一切皆  
空凍鎖寒林燒盡丹霞木佛春回暖律喚醒陝府鐵  
牛萬人叢裏打謳儺百戲棚頭抽傀儡畢竟成箇什  
麼邊事擊拂子相逢不遇調羹手孤負梅花又一年  
南石琇禪師除夜小參不是心不是佛不是物千聖  
仰之莫及萬靈窺覷無門威音王已前風凜凜峭巍  
巍威音王已後淨裸裸赤灑灑臨濟喝下知歸了無



交涉德山棒頭取證且過一邊直饒總不恁麼終非  
本色衲僧所以道我若真正舉揚法堂前草深一丈  
事不獲已向道諸人盡大地是箇解脫門盡大地是  
箇光明藏盡大地是箇金剛眼若作恁麼會蘇盧悉  
喇不作恁麼會悉喇蘇盧恁麼不恁麼總拈却悉喇  
蘇盧蘇盧悉喇截斷三路葛藤放下舊年曆日管取  
百城草偃四海浪平還委恁麼如王寶劍絲王意揮  
斥縱橫得自由

除夜小參龍猛滿鉢水迦提擲下綉針德山隔江  
招手高亭橫趨而去朝鳴鐘暮擊鼓風動塵起鵲噪  
鴉鳴無一處不是者箇時節今當臘月三十夜敢問  
諸人還會會麼有際天之雲濤方可容吞舟之魚有  
九萬里風乃可負垂天之翼復舉僧問古德年窮歲  
盡時如何古德云家家門底野狐兒家家門底野狐  
兒帶句承言盡墮疑庾嶺老梅春獨早花開不待曉  
風吹

用彰俊禪師除夜小參爆竹聲前薦得餓狗喫牽黎  
椒盤頌裏悟來黑牛眠死水二俱不涉別有生機拈

却炙脂帽子脫却鶻鼻布衫脚跟下硬糾糾頂門上  
明皎皎總教作箇灑灑落落底沒量大解脫人陰陽  
不能變其實寒暑不能移其志日日是好日時時是  
好時又分什麼新年頭舊年尾雖然只如僧問古德  
年窮歲盡時如何德云東村王老夜燒錢可謂言中  
有嚮句裏呈機薦拈拄杖畫一畫一九二九相逢不  
出手三九二十七離頭吹筆鬚四九三十六夜眠如  
露宿住住若不喝住幾手數過正月初一

除夜小參一年將盡夜萬里未歸人咄寐語作麼卽  
今簇簇上來兀兀立地面面相看眼眼相對阿那箇  
是未歸人樓上已吹新歲角聽不出聲底分明聽取  
窻前猶點舊年燈見不超色底端的見來是箇皮下  
有血誰家竈裏無煙說什麼到與未到歸與未歸雖  
然否極泰來結交頭一句子也要諸人知委拈拄杖  
卓一下梅萼香傳春谷暖松風聲度夜堂寒

無文燦禪師除夜小參威音王已前有本曆日無七  
十二候無二十四氣以天荒地老爲一歲以松枯石  
爛爲一日山僧遊乾闥婆城遇舜若多神親手授受

叮嚀付囑後二千年當於薦福山中次第流布住院  
以來正月初一日親到臘月三十日更無工夫說著  
今夜幸遇歲除拈起普示大衆去也展兩手云寒來  
暑往日遷月移盡在者裏可中忽一箇出來道陳年  
曆日不勞拈出不特顯叢林有人亦表自己參學眼  
目雖然如是我更問你從來臘月三十日爲歲除夜  
今年因什麼却欠一日

了庵欲禪師除夜小參年窮歲盡黃梅石女子母團  
圓日往月來少室鐵牛嘗甘水草嶺南獨獠唱巴歌  
聲聲總是無生調好大衆九衢人靜大野風清燈籠  
與露柱爭光耐重對金剛踴跳也無玄也無妙快活  
須明者一簇擊拂子云昨日街頭賣杏花一年春事  
都來了喝一喝

除夜小參德山小參不答話人貧智短趙州小參要  
答話馬瘦毛長靈巖今夜小參有問卽答無問卽休  
終不將珍珠作豌豆羅却豈不見南泉和尚云王老  
師自小牧一頭水牯牛擬向溪東牧不免食他國王  
水草擬向溪西牧也不免食他國王水草不如隨分

納些些總不見得雖然如是未免笑破衲僧鼻孔且  
道衲僧有甚長處還委悉麼一年三百六十日一日  
還他十二時禪客相逢只彈指此心能有幾人知復  
舉道吾和尚云鋒刀上踴跳微塵裏走馬勞勞去復  
來箇是知音者師云眞點胸名不虛得檢點將來也  
只是三步四步未見七跳八跳在靈巖今夜分歲無  
可與諸人暖熱隨分也說四句燈籠拜露柱露柱拜  
燈籠明朝添一歲含笑舞春風

笑隱新禪師除夜小參山林城市喧寂何分世出世  
間聖凡不二所以道法隨法行法幢隨處建立茲山  
官寺先帝潛宮雖衲子於此安禪而官貴往來難遇  
前日講習賀正朝儀規行矩步無非佩玉腰金武略  
文韜總是麒麟獬豸又見攢花簇錦發揚出格風光  
鬼面神頭展演當行旂鼓直得張公喫酒李公醉鍾  
馮解舞十八拍金鷄唱曉石女遊春卽事全眞開舜  
若身中活眼借功明位現毗盧頂後神光一一蓋色  
騎聲一一超今邁古正與麼時如何是不涉見聞一  
句無目仙人能揣骨關市相逢把手驚

爲亡者對靈提綱

中峰本禪師爲瞿運使靈發卒哭藥師道場對靈小參大道只在目前要且目前難親欲識大道真體不離聲色言語只如都運相公昨自皇慶元年十二月二十六日捐館至今年四月初七日其一百日內數螺互應金石交宣豈非聲耶華菓姿陳香燈羅列豈非色耶遍演金經廣宣玉偈豈非言語耶且聲色言語觀體全彰却喚甚麼作大道若以聲爲大道聲自是聲若以色爲大道色自是色若以言語爲大道言語自是言語與麼分拚將來古人話似作兩橛者裏檢點得出便見我都運相公與藥師如來握手共遊於一十二重清淨願海以衆寶光明而作佛事俾盡大地衆生不越一念俱成正覺到者裏既無聲色可求亦何言語可取總只是箇大光明藏如其不委更爲下箇註脚良久云天共白雲曉水和明月流復舉石頭和尚問龐居士云子學道以來日用事作麼生居士呈偈曰日用事無別惟吾自偶諸頭頭非取舍處處沒張乖朱紫誰爲號丘山絕點埃神通并妙用

運水與搬柴且如何是日用事茲向第二門頭曲爲註脚去也眼見色是日用事耳聞聲是日用事鼻嗅香是日用事舌嚐味是日用事以至身覺觸意雜思是日用事乃至八萬四千諸塵勞應用等皆是日用事因甚麼說箇無別底道理雖則體用互陳萬塵交接一一皆是自心成就自心出生所以教中謂元依一精明分成六和合又云三界無別法惟是一心作以其見自心故雖一刹那項泛應群緣會入一心會無異致所以云無別也今之學道者往往向義路上以聰明之資一一領會自謂佛法無多子殊不知說箇自心早落情見於是龐居士謂惟吾自偶諸言偶諸二字直是註解不破穿鑿不入苟非具金剛正眼向聲色未彰已前一鑑鑑破物我未形之際一拶拶開自然頭頭上明物物上顯是謂偶諸者也其或未到者箇時節和箇偶諸俱成剩語所以云參須實參悟須實悟既到實參實悟之地則繁興大用舉必全真擬眨眼來劍去久矣者箇是老龐公棄家財於湘水跨諸祖門庭掠得些子汗臭氣便解如是發揮惟

我都運相公卽再世之龐居士也雖不效其棄家珍於水底却能轉爲布施利益種種救援攝護方便等事而亦不妨其孜孜在道之心以至啓手足之際屏去血味及與玩好諸欲因緣惟單單舉箇所參話頭泊然而逝豈非多生薰習般若培植菩提而有如是操略耶旣捐館已一百日內晝夜六時備陳佛事由是知相公雖天道人道皆不能以境緣攝取何則道念炳然豈肯爲功名富貴諸殊勝事業之籠絡其不至佛地決知其終不已也因記得都運相公昔於至元辛卯二月十九登天目叩先師先師握竹筴問曰相公爲遊山來爲佛法來公答云爲佛法來先師擲下竹筴曰會麼公云不會師曰不入虎穴爭得虎子本上座今日因齋慶讚重爲舉揚爲遊山來爲佛法來舌頭拖地爲佛法來將謂忘却擲下竹筴云會麼少賣弄不會明如杲日迅若怒雷不入虎穴爭得虎子醉後又添盃更有四句偈重爲註脚爲求佛法爲遊山口縫纈開落二二二重悲願海藥師燈現古優曇

爲趙承旨孟頫對戲小參大道在目前山是山水是  
水玄機超物表聖非聖凡非凡一念洞然萬緣廓爾  
水精宮秋容淡淡森羅萬象吞吐明月珠松雪齋灝  
氣沉沉屏几六牕交徹寶絲網無一物不彰至體無  
一事不演真乘莊周雖蝶悟枕邊敢保其當機罔措  
子韶固蛙閱月下未許其覲面施呈者一著子名不  
得狀不得卽其知處已陷情圍事亦然理亦然與麼  
會時早沉識海所以道神光獨耀萬古微猷入此門  
來莫存知解且不存知解底句如何指陳玉宇秋高  
無界限金闕春事政敷朕恭惟翰林學士承旨松雪  
居士趙公受知於九重聖主名聞於萬里黎元官一  
品未足謂公之榮爵萬鍾未足謂公之貴蓋其道超  
物表性徹立初空諸見於眼根了群情於意地者也  
某記大德甲辰歲首蒙公賢夫婦相延於武林官舍  
丁未秋訪公於雪城之新第至大戊申復會于西湖  
明年己酉再會於松雪齋凡一會聚與夫尺書往復  
未嘗不以本來具足之道未悟未明爲急務每論到  
至真切處悲泣垂涕不能自己此蓋出自真情遠從

多劫熏鍊純熟必期徹證不肯與泛泛者恃其辯聰漁獵聞見便以爲得也自佛法流布東土士大夫咨參扣問敲唱激揚莫盛於唐宋而尤盛於皇元往往滯於情解昧於識度求其真參實究者不曰無之窮其所因最初被箇本來具足不假外求之說一印印定次以聰明之資直下領過自以爲易不復究明不覺置之無事甲裏殊不知本來具足之說如麵在麥中飯居穀內或不加春炊磨磨之勞徒知具足之虛談終莫能得止饑之實效猶儒家論仁義亦豈心外之物故孟子謂我固有之矣非從外得也然不有眞履實踐之功顛沛造次孳孳不忘則亦徒有仁義之本心耳故吾佛祖謂本來具足猶古鏡之有光柰何失於護念其愛憎塵習不覺蒙蔽況是積生累劫未經磨治徒稱具足之有光終於鑑照之無補一箇所參話卽是磨鏡之良具正當磨時只知朝也磨暮也磨不必問鏡上之塵何日破除鏡內之光何時發現苟存此等待之心則愈障矣學佛之要惟憑一念但信得及處譬之磨鏡未有磨極而塵不消塵消而光

不現者故我相公與魏國夫人雖身抱冠世之奇才而不爲其所惑雖身嬰畢世之塵累而不爲其所障每於這參正念孜孜然兀兀然猶林下老衲寂爾忘緣未嘗少棄當知此箇正念不由教導不依勸請不因造作不屬方便乃是無量劫中於諸佛所深鍾菩提種子雖百千塵勞百千生死同時現前終莫能昧也此念既堅則其成佛作祖超生越死如壯士屈臂豈假他力人徒見公英聲茂實振耀古今而不知公六十九年凡施爲舉措莫不以積劫之事繫于眞情自餘皆借路經過遊戲施設爾既啓手足後人皆謂公之亡我獨見公精操正念獨抱天真於大寂滅大解脫法中與佛祖聖賢混合於一切智智清淨之表曾何古今彼此而有間隔此皆公深信本來具足不假外求之道其靈驗若此記得華嚴經偈有謂若人欲識佛境界當淨其意如虛空遠離妄想及諸取令心所向皆無礙謂佛境界者卽是本來具足不假外求之道是也原夫意根欲淨妄想欲離却不成本來具足矣但是所參之正念操之既精守之既密則其



意根不待淨而自淨妄想不待離而自離至一切處  
不爲一切法之所留礙其佛境界與松雪齋不卽不  
離無異無別古所謂千山勢倒巖邊止萬派聲歸海  
上消者是也又圓覺淨諸業障章中極言四相其四  
相之因首惟執我相我相既忘如樹根斷則枝葉不  
除而自凋矣故經云彼修道者不除我相是故不能  
入清淨覺還知我相麼佛境界是我相淨意根是我  
相乃至坐寶蓮華成等正覺入微塵裏轉大法輪是  
我相自有宗乘以來分科列段指性說心敲繩床搖  
塵拂縱橫放肆演唱激揚以至玉轉珠回神出鬼沒  
總不出者箇我相苟能除此我相之外安有所參之  
話所守之念所存之因所至之果直下如火聚大  
風輪雖佛祖到來亦須退縮有分到者裏無位真人  
倒跨洞庭山遊戲三萬六千頃太湖直上兜率天與  
彌勒大士指白雪爲青松荷葉團團似鏡配青松  
爲白雪菱角尖尖似錐混融物我以無痕超越死  
生而無作此說且置茲蒙大孝仲穆舍人以書入山  
謂先君問道二十年不料嬰此大變擬卒哭日內安

厝東衡臨壙一語乞爲舉似某以老病退臥巖穴惟  
我相公於湛寂光中自能照了今事不獲已勉爲對  
衆引些葛藤以慰孝誠記得唐陸亘大夫問南泉弟  
子家中有片石也曾坐也曾臥還鐫作佛得麼泉云  
得亘云莫不得麼泉云不得不得大衆陸亘大夫問  
處放去何處南泉和尚答時收來太儉須知問在答  
處答在問處狹路相逢了無回互雖然如是只如今  
日相公家中有一片石也不曾坐也不曾臥亦不要  
鐫作佛只要移置東衡原上蓋覆相公棺槨得與不  
得二俱屏除且道與陸亘大夫所見相去幾何良久  
云幻住忍俊不禁向無音韻中聊伸一偈南泉陸亘  
舌無筋圓覺華嚴語未真何似東衡原上月照空群  
象最相親

玉芝聚禪師陸母沈太安人小祥五臺昆季請對靈  
小參智度菩薩母善心誠實男二俱不生滅一體鏡  
中圓我聞太安人常誦普門品性淨入圓通光明照  
無盡舉拂子云還見麼觀音大士乘此光明向山僧  
拂子頭上轉大法輪直得無邊世界六種震動八萬

四千毘陀羅臂及諸清淨寶目一時普現交光映徹  
如寶絲網且道太安人六根既離六塵不偶如是神  
變又向甚麼處得來擲拂子云無口時時說無耳聞  
無歇夜半金烏飛不徹金剛腦門喫蒺藜海底泥牛  
眼流血

列祖提綱錄卷第十三

列祖提綱錄卷第十四

武林十八澗理安禪寺住持婁東行悅集

告香普說

圓悟勤禪師告香普說只者簡便承當得去如天普蓋似地普擎更不欠一毫頭亦無第二見設使盡無邊香水海塵塵刹刹一時穿却鼻孔也更不落別處儻或思量擬議卽沒交涉所以道一念不生前後際斷卽名爲佛若也涉思量作計校分能所作知解則千里萬里祖師門下直教見須實見悟須實悟證須實證諸人各各有一靈妙性確實而論才被拶著便脚忙手亂作麼生見得親信得徹桶底子脫去只爲從無始劫來妄想濃厚只在諸塵境界中元不曾踏著本地風光明見本來面目若是眞實人直下承當了知生本不生知死本不死向不生不死處千聖著眼覷不見千手大悲提不起而今兄弟若能返照更無第二人更不待山僧兩回三度不惜眉毛入泥入水何況拋沙撒土說心說性未免落七落八當面相謾去也豈不見破竈墮和尙聞古廟作孽遂領十八

弟子入山觀之全無神相唯見三間空屋一所泥竈遂以杖擊之云汝本泥土合成靈從何來聖從何起其竈乃颯颯而墮破竈墮云破也破也墮也墮也不覺紙錢後有一神人出云某甲乃竈神蒙師爲說無生法已得生天禮謝而去其十八弟子乃白師云某等皆久參侍和尙殊不蒙開示無生法今日竈神何幸和尙却爲伊說破竈墮云我只向伊道汝本磚瓦泥土合成靈從何來聖從何起其徒皆作禮破竈墮云破也破也墮也墮也其十八弟子悉皆省悟只如山僧卽今舉拂子且道與破竈墮是同是別遂云破也破也墮也墮也若也見得不唯不孤負破竈墮和尙亦乃不孤負從上祖師若也不見不唯孤負破竈墮和尙亦乃孤負自己知有此事不從他得所以道靈從何來聖從何起只如諸人見今身是父母血氣成就若於中識得靈明妙性則若凡若聖覓你意根了不可得便乃內無見聞覺知外無山河大地尋常著衣喫飯更無奇特所以道我若向刀山刀山自摧折我若向地獄地獄自消滅方知有如是靈通有如

是自在只如今禪僧家何不同光返照明教徹去若也未明得且向三根椽下七尺單前默默地究取不見雲門大師道你且東卜西卜忽然卜著也不定若也打開自己庫藏運出自己家財拯濟一切教無始妄想一時空索索地豈不慶快老僧往日爲熱病所苦死却一日觀前路黑漫漫地都不知何往獲再甦醒遂驚駭生死事便乃發心行腳訪尋有道知識體究此事初到大瀉參真如和尚終日面壁默坐將古人公案翻覆看及一年許忽有箇省處然只是認得箇昭昭靈靈驢前馬後只向四大身中作箇動用若被人拶著一似無見處只爲解脫坑埋却禪道滿肚於佛法上看卽有於世法上看卽無後到白雲老師處被他云你總無見處自此全無咬嚼分遂煩悶辭去心中疑情終不能安樂又上白雲再參先師便令作侍者一日忽有官員問道次先師云官人你不見小豔詩道頻呼小玉元無事只要檀郎認得聲官人却未曉老僧聽得忽然打破漆桶向腳跟下親見得了元不由別人方信乾坤之內宇宙之間中有一寶

秘在形山已至諸佛出世祖師西來只教人明此一件事若也未知只管作知作解瞠眉努目元不知只是捏目生華擔枷過狀何曾得自在安樂如紅鑪上一點雪去若打破了或喝或掌一切皆得然終不作此解方可放下人我擔子千休萬歇方可生死奈何不得也須是實到此箇田地始得若實到此便能提唱大因緣建立法幢與一切人抽釘拔楔解黏去縛如是揭千人萬人如金翅鳥入海直取龍吞如諸菩薩入生死海中撈擺衆生放在菩提岸上方可一舉一切舉一了一切了有時一喝如金剛王寶劍有時一喝如踞地獅子有時一喝如探竿影草有時一喝不作一喝用方可殺活自由布置臨時謂之我爲法王於法自在諸人既是挑囊負鉢徧參知議懷中自有無價之寶方向者裏參學先師常云莫學琉璃瓶子禪輕輕被人觸著便百雜碎參時須參皮可漏子禪任是向高峯頂上撲下亦無傷損劫火洞然我此不壞若是衲家本分漢遇著咬豬狗底手脚放下複子靠將去十年二十年管取打成一片且作麼生得

獨脫去須是入流人方知怎麼事

古林茂禪師告香普說學不顧卽差互擬思量何劫悟向上一路列在下風千聖不傳置之一處豎起拂子云看看雲門大師來也一句語具三句函蓋乾坤句截斷衆流句隨波逐浪句一時撒向諸人面前見汝不會又作死馬醫去也雖然也謾汝諸人不得忽若三句內三句外當頭一拶掣起便行三千里外築著磕著便見水底火發通上徹下是箇大解脫人何處更有許多不了事也雖然也須實到者箇田地始得古人垂一機示一境險峻處直是險峻奇特處直是奇特若佛若祖同一元由乃古乃今別無二致兄弟據實而論自己分上少箇甚麼自是從無量劫來妄想紛襲背覺合塵日漸月深不能回顧以致膠膠擾擾不得自由纔說自己分上一段奇特大事如存若亡縱有百千法門無量方便到你面前只成戲論不然則起心動念作意商量立主立賓說向上向下爲人不爲人諦當不諦當及手搏量不及計較不成便颺向無事甲中謂從上來事不過只是箇無孔鐵

錘但與麼承當將去到處亂呈懣袋更不受人決擇殊不知此事本來成現不假外求求而得之盡是鬼家活計德山和尚云汝但無心於事無事於心則虛而靈寂而妙若毫端許言之本末皆爲自欺何故毫釐繫念三途業因譬爾情生萬劫羈鎖聖名凡號盡是虛聲殊相劣形皆爲幻色汝欲求之得無累乎及其厭之又成大患終而無益者箇說話便是釋迦老子再出頭來經三大阿僧祇劫勤苦修習以至入雪山詣鹿苑轉無上法輪說三乘十二分教不過如此只如毫端不立本末都亡心佛衆生境智俱泯還成自欺否到者裏須是箇斬釘截鐵不顧危亡撒手懸崖不拘得失底然後向無功用大解脫場中拈出一機所謂金剛圈栗棘蓬使盡大地人吞透得過受用自在方可稱爲逸群種草向此門中與從上列祖把手共行始有相應分豈不見圓悟未離蜀時在講肆中已爲同輩所推及至出蜀時所至諸方無不盡其底蘊首謁眞如詰和尚欲呈所見詰云且歇去次日復往詰云昔有僧問睦州以一重去一重卽不問不



以一重去一重時如何睦州云昨日栽茄子今日種冬瓜汝靜思之悟遂靜默數月忽然有省卽以告詰詰詰之悟曰知客在門頭典座在廚下詰領之看他先輩出來究明此事大不容易直是先去佛祖頭上立地然後放身捨命就人決擇何以見得是他一念確實發起現行明知三乘十二分教皆是表顯之說如人說食終不能飽返照自己真實受用於一切處無纖毫滲漏方爲究竟豈是今日麻纏紙裏胡亂撐拄道我曾見前輩來更不肯退步就已揣摩還曾穩當也無後來圓悟又謁黃龍晦堂心禪師心云我此間要宗說俱通一處不明非吾眷屬只如獅子尊者被害白乳涌頸今人惟血出汝意云何悟云乳血果有異耶心曰安得同悟曰二物從何而有心曰傷汝膚乳何在悟曰待和尚一鋤成井我亦如是晦堂笑曰此後生亦可穿鑿可惜晦堂當時放過待他道待和尚一鋤成井我亦如是只向他道山僧功不浪施當時若下得者一著免得圓悟波波挈挈上人門戶如噪屎狗相似有甚用處又謁東林總和尚總曰路

逢達磨否悟曰今日獲瞻慈相總斥之曰汝狂矣悟私自謂此平實禪也次日復往總曰人人有一慧曰汝有之乎悟曰無總曰安得無悟曰在山南總可其語且道圓悟此語落在甚麼處東林既是落七落八圓悟未免頭上安頭則前所謂平實禪者語不誣矣是時叢林中有人不似今日雖在衆中頭白齒黃至竟不知祖師巴鼻是箇甚麼有一老宿聞知圓悟所歷諸方門戶機鋒峻捷辨說過人笑曰勤川子被禪道裂破肚皮矣何年得安樂耶者箇便是將圓悟推向萬丈深坑更擠以石然後要他甦醒起來自作活計圓悟聞之不覺負愧遂往龍舒謁太平演祖祖詬罵曰佛法大事豈口頭聲色所至哉若以機辨爲禪則臘月三十日涅槃堂裏爭奈孤燈獨照何悟色變而去至金山因故人有疾悟授以已見其人臨終狼狽萬狀悟曰吾輩極頭處今敗績矣古人到者裏論實不論虛只如圓悟平日所歷諸方宗匠之門有如是契證古人淵奧罔不窮盡因甚至演祖之室一旦如賊入空屋更無一物可稱其意後因入浙至蘇州

萬壽大病怖不自持平日見解亦無所用乃謂佛鑑曰太平老人所謂涅槃堂裏禪今日驗矣豈此老果有異於人乎不然則何銀山鐵壁如是之堅也由是還太平時演祖已遷海會祖曰汝來乎吾望汝久矣所謂欲識佛性義當觀時節因緣時節若至其理自彰山僧尋常嘗謂兄弟曰必欲究明此事因緣脗合自有其時但辦悠久真實身心自然相應看他圓悟豈不是因緣時節耶未幾爲侍者一日因官人相訪請問法要祖曰官人曾讀小豔詩乎頻呼小玉元無事只要檀郎認得聲若向者裏明得參學事畢圓悟聞之謂祖曰此兩句亦能發機乎祖應聲曰麻三斤纔道及麻字圓悟豁然大悟時有鷄正啼乃斥之曰汝亦會禪耶乃告祖曰今日喪却目前機去却曾中物矣祖大悅好兄弟末後一著始到牢關絕後再甦欺君不得便是全心卽佛全佛卽心一人發真歸源十方虛空悉皆消殞底時節也向年有一尊宿曾見前輩來一生住大院點曾不少嘗與兄弟室中舉話不原所自因演祖應聲對圓悟曰麻三斤纔道及麻

字圓悟忽然大悟而此尊宿不知古人舌頭落處將謂麻字便能發圓悟之機至舉話時只舉一麻字遞相印證直是好笑掩彩殺人如此敢稱宗匠更要與人舉話在當時演祖若舉到麻三兩字圓悟因時悟去後人室中依他作解亦只云麻三是何言歟所謂眼目不明錯認驢鞍橋作阿爺下領當知圓悟悟處在波而不在此也看他謂演祖曰此兩句亦能發機乎便是百了千當時節縱使演祖未開口曰麻三斤圓悟是時亦自如桶底子脫相似及至這箇麻三斤曾中礙膺之物豈不脫然者耶所謂宗師爲人但除其病不除其法聲前領旨猶迷顧鑑之端句後精通尙昧識情之表圓悟礙膺之物旣已脫然無著快活處時有鷄正啼乃斥之曰汝亦會禪耶者箇便是回乾轉坤千聖羅籠不住透頂透底獨步大方從上列祖企仰不及的樣子所謂靈光洞耀迥脫根塵體露眞常不拘文字自後演祖之門能大其家者若子若孫分光四海猶揭日月惟圓悟一人豈易事耶山中兄弟來此相聚固是不多皆江湖抱道之士旣不遠

數千里相尋而來不爲他事二六時中直須窮究高庵和尚云父母生汝身師友成汝志無饑寒之迫無征役之勞於此不堅確精進或辦道業他日何面目見父母師友乎然此事不在多知多解只要據實而論大衆會麼舉不顧卽差互坐斷上頭關截斷千差路更不著商量千聖齊却步喝一喝下座

夏前告香普說

古林茂禪師云向上一路千聖共行調達因甚麼入地獄達磨不來東土二祖不往西天玄沙因甚麼築破脚指打破虛空底人向甚處安著此是山僧適來對大衆前垂此三轉語諸人無不委知只是無一人向山僧未開口已前道得一句首座雖則下語終是曲順人情明眼人前一場笑具若是箇漢便好向者裏掀倒禪床喝散大衆拗折拄杖向三條椽下作箇灑灑落落無事人去豈不快哉旣無如是作略未免向第二義門爲諸人通一線路古人云諸佛未出世人人鼻孔遼天出世後杳無消息雖無消息要且謾諸人一點不得何也天不能蓋地不能載日月不能

照臨虚空不能包裹萬象不能覆藏通上徹下是箇大解脫人何處更有許多名字所以道處處真處處真塵塵盡是本來人真實說時人不識正體堂堂沒却身與麼說話還得相應也無兄弟白日青天有甚麼事從上佛祖立機立境千差萬別隱顯殊途只要你實證實悟於實證實悟處靠者一著子直是乾曝曝地所謂上無攀仰下絕已躬常光現前壁立萬仞豈不見大梅常禪師問馬大師如何是佛大師云卽心是佛大梅於言下大悟徑往大梅結庵二十年影不出山後有僧問和尚見馬大師得箇甚麼便住此山梅云大師向我道卽心是佛便向者裏住者箇豈不是實證實悟於實證實悟處靠者一著能信自心決定是佛更不別求僧云大師近日佛法又別了也梅云作麼生別僧云非心非佛梅云者老漢惑亂人家男女未有了日任他非心非佛我只卽心卽佛且道大梅具甚麼眼者些子說似人不得大智非名真空絕跡功多業熟職到威成如月印千江波隨衆水纔有是非紛然失心趙州和尚云至道無難惟嫌揀

擇纔有語言是揀擇是明白老僧不在明白裏是汝諸人還護惜也無時有僧便問和尚既不在明白裏護惜箇甚麼州云我亦不知僧云和尚既不知爲甚麼道不在明白裏州云問事即得禮拜了退有底便道趙州赤心片片爲物垂慈殊不知正是渾鋼打就生鐵鑄成他明明道老僧不在明白裏諸人還護惜也無既不可揀擇又不在明白裏自然頭頭上明物物上了當體解脫非離真而立處即真十二時中要你護惜不可放捨者僧也不易推究便問和尚既不在明白裏護惜箇甚麼州云我亦不知不妨頭正尾正僧云和尚既不知因甚麼道不在明白裏州云問事即得禮拜了退要識真金須經敏手後來雪竇和尚云趙州倒退三千雪竇可使一代宗師要且只知趙州放行不知趙州把定大凡參學須是頂門具眼自然不肯造次承當隨他顛倒巖頭云纔與麼便不與麼是句亦剗非句亦剗者箇喚作無功用大解脫門後有僧問至道無難惟嫌揀擇如何是不揀擇州云天上天下惟我獨尊一句合頭語萬劫繫驢橛僧

云此猶是揀擇州云田庫奴甚麼處是揀擇甜瓜徹帶甜苦瓠連根苦雪竇和尚頌云似海之深如山之固蚊蟲弄空裏猛風螻蟻撼於鐵柱揀兮擇兮當軒布鼓一時裂破雖然也是箇斬釘截鐵漢始得僧又問至道無難惟嫌揀擇是時人窠窟否州云曾有人問我直得五年分疎不下好與掀倒禪床雪竇頌云象王回旋獅子哮吼無義之談塞斷人口南北東西烏飛兔走是什麼說話也好與一拶後又僧問至道無難惟嫌揀擇纔有語言是揀擇和尚如何爲人州云何不引盡者話僧云某甲只念到者裏州云只者便是至道無難惟嫌揀擇孟八郎漢又與麼去雪竇頌云風吹不入水洒不濕虎步龍行神號鬼泣頭長三尺知是誰相對無言獨足立一對無孔鐵鎚者般說話諸人十二時中還曾窮究也未若未曾窮究切忌向者裏東卜西卜古人云却物爲上逐物爲下是他本色道流自然活潑潑地豈肯將古人機緣配在八識田中自作障礙雲門云拈得便用把得便撲在今諸方覓箇舉話底也難得好兄弟如斯理論意在

於何只要你向古人未肩已前千聖著眼不及處坐斷報化佛頭直是風凜凜地山僧自來愛與兄弟東語西話諸方聞得往往謂之密室傳授殊不知自有體裁纔見他開口便知得他心肝五臟何也爲他自已本分事上不曾嘆地一聲不能向古人未肩已前著得隻眼所以隨語生解縱使和盤托出擡向面前有甚交涉嘗記大慧和尚有云我便是參禪底精子山僧早年聞與麼道亦爲不平大抵參禪到啐地折墮地斷十方世界都盧是箇大解脫門動靜去來咳嗽掉臂無非盡是文殊普賢大人境界有甚麼精與不精後來因看大慧廣錄見他往荊南謁張無盡一段機緣方知古人言不虛發大慧一日與張無盡夜話無盡云老夫頃寓居江寧戒壇院因閱雪竇語至百丈再參馬祖因緣雪竇云大冶精金應無變色遂擲卷於地云審如是臨濟佛法豈有今日耶十數年來諸方往往以予聰明博記少有知余者公自江西法窟中來必辨優劣試與老夫言之大慧云公之所見正與眞淨死心符合近世得此機用獨二老耳無

盡云眞淨何謂大慧云眞淨頌云客情步步隨人轉有大風光不能現突然一喝雙耳聾那吒眼開黃鸞面無盡云死心何謂大慧云死心道我要問雪竇既是大冶精金因甚却三日耳聾還會麼從前汗馬無人識只要重論蓋代功無盡乃撫几云不因公舉爭知眞淨死心用處若非眞淨死心難顯雪竇馬祖由是相與禪悅法喜之樂者般說話久參先德想已見聞後學初機卒難洞曉山僧因行掉臂舉似一番百丈再參馬祖祖以目視繩床角拂子丈云卽此用離此用祖云你他後開兩片皮將何爲人百丈取拂子豎起祖云卽此用離此用丈挂拂於舊處祖震威一喝丈直得三日耳聾後來雪竇和尚拈云夫列其派者甚多究其源者極少總道百丈於喝下大悟還端的也無然刁刀相似魚魯參差若是明眼人護他一點不得只如馬祖道你他後開兩片皮將何爲人百丈豎起拂子爲復如蟲禦木啐啄同時諸人要會三日耳聾麼大冶精金應無變色敢問諸人大冶精金應無變色置而勿論只如張無盡投卷於地云審如



是臨濟佛法豈有今日耶意在於何如今衆中稍蘊  
知識者往往便道無盡大似作家宗師既會馬祖一  
喝百丈三日耳聾又須發明雪竇大治精金應無變  
色然後倒行逆施投卷於地所謂變通逸格向上提  
持是則固是據山僧見處又且不然張無盡滿肚文  
章要且不識朕聞上古其風樸略馬祖一喝百丈耳  
聾正是去却貼肉汗衫拈却髑髏前妄想雪竇云大  
治精金應無變色可謂本分草料死心眞淨據款結  
案未稱全提後來無盡亦有頌云馬師一喝大雄峯  
深入髑髏三日聾黃檗聞之驚吐舌江西從此立宗  
風依舊向語脉裏轉却山僧昔年送僧往南屏再參  
曾有頌云百丈參馬師伎倆俱已盡一喝三日聾當  
機須猛省若謂大治金正是佛祖病所以無盡翁掩  
卷未肯信妙喜天人師今古眼目正雲庵與死心提  
掇事已定敲唱既雙行節拍頗相應一舉便知音撫  
膝始加敬更有云云不能盡舉山僧自來鄱陽未嘗  
不與兄弟切切提撕終是未曾拈出者一著子古人  
有十度發言九度休去之說在今豈不然乎若是眞

正本色道流未嘗虧欠僧問趙州狗子還有佛性也  
無州云無到者裏提撕也提撕不得拈出也拈出不  
得擬要發言向甚處下口縱使休去還休得麼五祖  
和尚云趙州露刃劍寒霜光燄燄更擬問如何分身  
作兩段大慧和尚云參學人向露刃劍上著得隻眼  
便是百了千當還丹一粒點鐵成金至理一言轉凡  
成聖更欲多言恐無利益珍重

月江印禪師夏前告香普說鐘樓上念讚床脚下種  
菜荊棘林中是什麼人行履兩箇泥牛鬪入海無位  
眞人因甚額頭汗出達磨不來東土二祖不往西天  
祖師鼻孔長多少山僧適來垂此三轉語若不是堂  
中第一座具人天眼目出來證明未免一場懣懣須  
知衲僧頂額上一著子如十日並照輝天鑑地耀古  
騰今何曾有一絲毫許障礙得他所以大覺世尊初  
生下來便道天上天下惟我獨尊已是明明白白地  
說向諸人了也一大藏教一千七百陳爛葛藤總是  
爲蛇畫足後代兒孫承虛接響不能一刀截斷致使  
三百五百闊浩浩地者邊商量那邊卜度莫不隨他

脚跟後轉若是英靈上士如金翅擘海直取龍吞千人萬人羅籠不住做箇滅胡種草豈不快哉何用山僧向曲柔床上搖唇鼓舌說黃道黑成得甚麼事今時兄弟出來多是覓佛覓法覓道覓菩提涅槃真如解脫不肯退步向衣線下嘿嘿體究何不放教身心蕩蕩地閒閒地胷中不留一箇元字脚久久自然相應若是人我山高是非鋒起爲五欲八風之所搖求其到大安樂大休歇之地不亦難乎設有一箇半箇向彌伽前認得箇昭昭靈靈底便道彌伽佩一面古鏡狸奴有萬里神光有底連得古人些子殘光剩影便道不離當處常湛然覓卽知君不可見似則也似是則未是有底但於理性上明得來聲色中透得去謂之綿綿密密不漏絲毫純是真空更無別法如斯見解未出常情勘證將來白雲萬里所以道向上一路千聖不傳學者勞形如猿捉影只如靈山會上世尊拈一枝花是時百萬之衆智如鷲子辯若滿慈尙乃茫然不知落處直饒金色頭陀破頭微笑也未夢見教外別傳意旨在缺齒老胡十萬里得得西來面

壁九年二祖禮三拜起來依位而立喚作汝得吾髓且莫誑諱別人好自餘德山臨濟趙州雲門天下老和尚用盡自己查勘總是平地生堆無風浪起點檢將來各人脚跟下好與爛搥一頓免見教壞人家男女兄弟若非真正要了辨生死大事拚得十年二十年工夫全身放下靠著本色宗匠與之決擇如金在鑛中入其爐鞴受其鉗鎚千鍛萬煉去其鑛穢則金之本體自然現前又如清淨摩尼寶珠處塵勞中忽遇智人指出去其塵垢則珠之本體光明頓然發現而此金珠乃是當人本有之體非假外求但經敏手煅煉磨瑩出來則其本地風光何曾欠少不見靈雲和尚三十年做工夫一日見桃花豁然契悟乃有頌云三十年來尋劍客幾回落葉又抽枝自從一見桃花後直至於今更不疑且道不疑箇什麼舉似潯山懶安和尚潯山云從緣入者永無退失冬瓜印子又舉似玄沙沙云諦當甚諦當敢保老兄未徹在一手不獨拍兩手鳴擗擗東山五祖云說甚未徹更參三十年始得利動君子雪竇頌云本無迷悟數如麻獨

許靈雲是作家借問遍參諸祖客不知何處見桃花  
金屑雖貴落眼成翳山僧亦曾有一頌桃花開日好  
風光引得遊人煞著忙剎客不知何處去令人長憶  
謝三郎靈雲住後長生問云混沌未分時如何雲云  
露柱懷胎生云分後如何雲云如片雲點太清生云  
未審太清還受點也無雲不對生云怎麼則舍生不  
來也雲亦不對生云直得純清絕點時如何雲云猶  
是真常流注生云如何是真常流注雲云似鏡常明  
生云向上還有事也無雲云有生云如何是向上事  
雲云打破鏡來與汝相見還識靈雲麼金藏慣調會  
百戰鐵鞭多力恨無雙又有香嚴和尚在潞山會不  
一日潞山問云聞子在百丈先師處問一答十問十  
答百只今向父母未生已前道將一句來香嚴忙然  
無對將平生所閱底文字檢尋並無一言可以酬對  
遂歎云畫餅不可充饑屢請潞山爲設破潞山云我  
若向汝說他日眼開罵我去在香嚴云此生不學佛  
法且作個常行粥飯僧看他大力量人只著一箇全  
身放下千佛出世也不柰何如今只討一箇常行粥

飯僧也無討處直抵南陽卓庵一日芟除草木瓦礫  
擊竹作聲豁然大悟畢竟悟箇什麼且道與靈雲見  
桃花相去多少一對無孔鐵鎚蓮蹄沐浴焚香遙拜  
潞山曰和尚大悲恩逾父母當時若爲我說破豈有  
今日事耶者漢和骨頭一時換了仍述一偈云一擊  
忘所知更不設修持動容揚古路不墮悄然機處處  
無踪跡聲色外威儀諸方達道者咸言上上機將謂  
有多少奇特徑詣潞山具陳所解潞山云今日方知  
吾不汝欺也何不與本分草料一日仰山問云聞師  
弟有悟道頌試舉看香嚴遂舉前偈仰山云此是閒  
時構置底未爲極則太煞減人威光香嚴再舉一偈  
云去年貧未足貧今年貧始足是貧去年貧有卓錫之  
地今年貧雖也無不聞夜來鴈爭見海門秋仰山云  
如來彈許你會祖師禪未夢見在鐵蒺藜轉弄轉  
危香嚴又呈一偈吾有一機瞬目視伊若也不會別  
喚沙彌白雪陽春不同調仰山云且喜師弟會祖師  
禪孟八郎漢又怎麼去香嚴住後示衆云知人在千  
尺懸崖口啣樹枝手無所攀脚無所踏樹下有人問

西來意不答則違他所問若答他則喪身失命當恁麼時如何卽是香巖旁若無人發此一問不妨奇特時有虎頭上座云上樹卽不問未上樹請和尚道也好一拶香巖呵呵大笑若人知得此笑笑須三十年雪竇拈云樹上道卽易樹下道卽難老僧上樹也置將一問來懸羊頭賣狗肉殊不知香巖坐籌帷幄之中決勝千里之外虎頭上座也贊他大胆向饑鷹爪下分餐猛虎口中奪食若不是作家宗匠泊被打破蔡州還識香巖麼三千劍客今何在獨許莊周致太平你兄弟家出一叢林入一保社險草瞻風尋師訪道還曾如靈雲真到不疑之地一回麼還如香巖一擊忘所知麼有底道聲色頭上坐聲色頭上臥有底道聲不是聲色不是色有底道聞聲悟道見色明心有底道青青翠竹總是真如鬱鬱黃花無非般若如斯理論闍羅老子未放你過在巖頭和尚云若欲播揚大教一一從自己胷中流出將來與我蓋天蓋地去始得山僧蓋尸此席無補宗門現前一衆總是碩德耆年諸方龍象挽向上古風規舉行叢林盛典非

圖後來有所見聞亦使法道不致寂寥諸人既具鐵眼銅睛山僧安敢妄通消息適來所舉數則因緣總是古人煎過藥查嚼了殘飯有甚麼滋味可以呌啖雖然忽於無滋味中蹉口嚙却舌頭也難得山僧更與汝舉箇古話僧問馬大師云和尚爲甚麼道卽心卽佛大師云只爲止兒啼僧云啼止後如何大師云非心非佛僧云除此外如何指示大師云不是心不是佛不是物今時兄弟才見舉箇卽心卽佛便把作尋常說話才舉箇麻三斤乾屎橛丈林山下竹筴鞭以至釣絲絞水鋸解秤椎新婦騎驢阿家牽三脚驢子弄蹄行如此之類便作玄妙奇特商量若作玄妙奇特商量入地獄如箭射若作平常說話入地獄如箭射佛鑑懃和尚頌云美如西子離金闕嬌似楊妃倚玉樓猶把琵琶半遮面不令人見轉風流者箇頌子作平常說話得麼作玄妙奇特商量得麼又北山隆和尚頌云卽心卽佛有木有竹屋便好非心非佛不襪不冠身自由不是心不是佛不是物閒倚闌干立清曉紅芭蕉引碧牽牛者箇頌子作平常說話得

麼作玄妙奇特商量得麼又霍山昭和尙云卽心卽佛嘉眉果闡懷裏有狀非心非佛筠袁虔吉頭上挿筆不是心不是佛不是物漳泉福建頭匾似扇只可聞名不可見面者箇頌子作平常說話得麼作玄妙奇特商量得麼具眼禪流試定當看諸人二六時中忽然一拳打破虛空方知三世諸佛寐語何山寐語久立衆慈伏惟珍重

### 中夏普說

古林茂禪師中夏普說心不附物意不停玄大智非名真空絕跡是汝諸人十二時中向甚處措足直下無事墮在見聞覺知纔涉安排未免依草附木兄弟據實而論盡十方世界有甚麼物與汝爲緣爲對三乘十二分教達磨西來直指人心見性成佛增一絲毫不得及至颺向他方世界無依無欲離相離名無去無來不生不滅也減一絲毫不得九霄絕翳何用穿通一道神光未嘗昏昧所以恁麼也得不恁麼也得恁麼不恁麼總得如王寶劍執敢當鋒擬欲擡頭橫屍萬里古人垂一機示一境至痛快爲人處直是

透頂透底情生智隔想變體殊情未生時隔箇甚麼此亦是一期方便控你入處爲你未曾及到者箇田地所以有佛有法有玄有妙有向上向下者邊那邊自作障礙曠大劫來不得自由況此事豈是你亦肉團上心識搏量底事心若無事萬法不生意絕玄微纖塵何立雲門云直得觸目無滯達得名身句身一切法空山河大地是名名亦不可得喚作三昧性海俱備猶是無風雨市之波直得忘知於覺覺卽佛性喚作無事人更須知有向上一竅若教山僧向上論量直是無啓口處諸人到者裏亦無立地分三千里外道絕人荒善法堂前草深一丈豈是分外何故立機立境不是向上事揚眉瞬目不是向上事豎拂敲床不是向上事棒喝交馳賓主互換不是向上事只要你從前伎倆一時截斷脚跟下空牢牢地如水上葫蘆一切處拘絆不著然後將古人機緣密切提撕畢竟是箇甚麼道理僧問雲門如何是佛門云乾屎橛明如果日寬若太虛大地山河全彰海印一明一切明一見一切見一了一切了兄弟時竟可惜不易



來此聚頭直須辦一片真實身心空教徹去者箇喚作生死大事不是你越口快圖衣食銜銜利底生活排却十年五年不出僧堂門無人道你不會古來尊宿擔荷此事大不容易不知歷涉多少艱難汾陽參七十餘員善知識具大眼目只有一二自餘之輩不在言也近來一等兄弟智識不明於自己本分事上無參學分不能體究却去冊子上做工夫要資談柄錯了也拋却真金去尋瓦礫有甚用處夾山未見船子時看他所得豈是尋常一日上堂僧問如何是法身答云法身無相如何是法眼答云法眼無瑕可謂金不博金水不洗水泊乎被道吾一笑便乃手忙脚亂且道那裏是他未盡善處下座問道吾云適來答者僧話上座因甚發笑請爲我說瞻風撥草爲法求人須是者漢始得道吾云不道不是只是未有師在盲人指路豈免旁觀夾山因道吾所指徑往華亭去訪船子早是七花八裂了也船子問云大德住何寺山云寺則不住住則不似鷺池鷺嶺海殿庵園甚處有者箇消息船云不似又不似箇甚麼山云不是目

前法船云甚處學得來山云非耳目之所能到如印印泥如印印空如印印水須是怎麼人方明怎麼事船云一句合頭語萬劫繫驢鐵壁银山萬仞高船云垂絲千尺意在深潭離釣三寸于何不道金剛圈栗棘蓬吞者十萬八千透者如麻似粟山擬開口被船子一篙打下水中鞭長不及馬腹山纔上船船云道道山擬開口船又打得也得也山因此有省水中點頭三下俊哉俊哉船云竿頭絲線從君弄不犯清波意自殊寧可截舌不犯國諱山遂問拋綸擲釣師意如何船云絲懸絲水浮定有無之意一箇研郎富一箇福建子山云語帶玄而無路舌頭談而不談何不領取前話船云釣盡江波錦鱗始遇用盡自己心笑破他人口山乃掩耳不特慎初亦能護末然猛虎不食伏肉坐井豈能觀天當時道吾密之三寸夾山未免擔板過却大凡參學須實眼正者般說話豈是你長連床上妄想計較得來山僧十三上爲僧未嘗去村院裏過夏遇著本色宗匠有師友處即便放下身心相與體究二十年來把人杓柄不知費了多少

鹽醋捱到楚水東頭依舊波波挈挈一點也謾諸人  
不得雲門云盡十方世界乾坤大地以拄杖畫一畫  
云百雜碎了也三乘十二分教達磨西來放過卽不  
可若不放過不消一喝大衆會麼名不得狀還非千  
年常住一朝僧楚鷄不是丹山鳳喝一喝下座

告香  
不獨  
在夏前中夏住持入院人事定庫司備香首座領衆  
愚請爲衆告香然後開室古法未預告香不許入室

### 檀越特請普說

大慧杲禪師秦國太夫人請普說僧問圓覺經道譬  
如清淨摩尼寶珠映於五色色未現時珠在甚麼處  
師云圓覺經何曾恁麼道進云未審作麼生會師云  
圓覺經不曾恁麼道更會甚麼進云畢竟如何師云  
靜處薩婆訶問胡張三黑李四卽不問嘉州大象鼻  
孔長多少師云長二百來丈進云得恁麼耶當師云  
你川僧自合知進云爲甚麼被陝府鐵牛吞却師云  
誰恁麼道進云高高處觀之不足低低處平之有餘  
師云你試向不高不低處道看進云險師云者箇猶  
是高低處處進云有意氣時添意氣師云草賊大敗  
乃云今日是秦國太夫人計氏法眞慶誕之辰謹施

淨財遠詣當山修設清淨禪衆香齋仍命山野陞于  
此座爲衆普說舉揚般若所願進道無魔色身安樂  
此是秦國太夫人意旨者婆子平生行履處川僧無  
有不知者唯魯子僧未知今日因齋慶讚舉似大衆  
見說者婆子三十左右歲時先太師捐館微猷與相  
公尙幼卓卓立身凜然有不可犯之色東隣西舍望  
風知畏極力教二子讀書處事極有家法尋常微猷  
與相公左右侍奉不教坐亦不敢坐其嚴毅如此相  
公常說今日做官皆是老母平昔教育所致所得俸  
資除逐日家常菜飯外老母盡將布施齋僧用祝吾  
君之壽常有無功受祿之嫌聞先師歸蜀受渠供養  
不少只是未知參禪微猷與相公却於先師處各有  
發明向謙禪在他家微猷與相公親向謙道老母修  
行四十年只欠者一著公久侍徑山和尙多所聞見  
且留公早晚相伴說話蓋某兄弟子母分上難爲開  
口見說每日與謙相聚手一味激揚此事一日問謙  
徑山和尙尋常如何爲人謙云和尙只教人看狗子  
無佛性話竹篋子話只是不得下語不得思量不得

向舉起處會不得去開口處承當狗子還有佛性也無無只恁麼教人看渠遂諦信日夜體究每常愛看經禮佛諫云和尚尋常道要辦此事須是輟去看經禮佛誦呪之類且息心參究莫使工夫間斷若一向執著看經禮佛希求功德便是障道候一念相應了依舊看經禮佛乃至一香一華一瞻一禮種種作用皆無虛棄盡是佛之妙用亦是把本修行但相聽信決不相誤渠聞諫言便一時放下專專只是坐禪看狗子無佛性話問去冬忽一夜睡中驚覺乘興起來坐禪學話驀然有箇歡喜處近日諫歸秦國有親書并作數頌來呈山僧其間一頌云逐日看經文如逢舊識人勿言頻有礙一舉一回新山僧常常爲兄弟說參得禪了凡讀看經文字如去自家屋裏行一遭相似又如與舊時相識底人相見一般今秦國此頌乃暗合孫吳你看他是箇女流宛有丈夫之作能了大丈夫之事諫禪昨日上來告山僧子細說些禪病且與秦國結大衆般若緣山僧向他道禪有甚麼病可說禪又不曾患頭疼又不曾患脚痛又不曾患耳

聾又不曾患眼暗只是參禪底人參得差別證得差別用心差別依師差別因此差別故說名爲病非謂禪有病也如何是佛卽心是佛有甚麼病狗子還有佛性也無無有甚麼病喚作竹筴則觸不喚作竹筴則背有甚麼病如何是佛麻三斤有甚麼病如何是佛乾屎橛有甚麼病你不透了纔作道理要透便千里萬里沒交涉也擬心湊泊他擬心思量他向舉起處領略擊石火閃電光處會者箇方始是病世醫拱手然究竟不干禪事趙州云要與空王爲弟子莫教心病最難醫記得舍利弗問月上女曰汝於今者行何乘也爲行聲聞乘爲行辟支佛乘爲行大乘月上女答曰舍利弗汝旣問我行何乘者我今還問舍利弗惟願隨意答我如舍利弗所證法者爲行聲聞乘爲行辟支佛乘爲行大乘舍利弗言非也月上女所以者何然彼法者無可分別亦無言說非別非一亦非衆多月上女曰舍利弗是故不應分別諸法一相異相無別異相於諸相中無有可住師云舍利弗恁麼問月上女怎麼答且道與秦國太夫人所證之法

相去幾何還有人斷得麼試出來斷看如無且向葛藤裏薦取所以道夫參學者須參活句莫參死句活句下薦得永劫不忘死句下薦得自救不了你諸人每日上來下去寮舍裏喫茶喫湯莊上搬鹽搬麵僧堂裏行益長廊下擇菜後園裏擔糞磨坊下推磨當恁麼時佛眼也覷你不見且道是死句是活句是不死不活句試定當看直饒定當得出也永免在三句裏豈不見僧問南泉和尚卽心是佛又不得非心非佛又不得師意如何泉云你但信卽心是佛便了更說甚麼得與不得只如大德喫飯了從東廊上西廊下不可總問人得與不得也者裏若識得南泉方不被三句所使便使得三句既使得三句始與南泉同一眼見同一耳聞同一鼻嗅同一舌嘗同一身觸同一意思更無差別只爲你執藥爲病舊病未除新病復作却被死句活句使得來七顛八倒將他古人徑截處一時紆曲了且那箇是古人徑截處我更爲你舉一兩則只如南泉道牽牛向谿東放不免食他國王水草牽牛向谿西放不免食他國王水草不如

隨分納些些總不見得者箇公案有多少人錯斷如何是納些些底道理便道著衣喫飯有甚麼難向驢前馬後教活計且莫謗他南泉好你既錯會者箇定又錯會黃檗道汝等諸人盡是噇酒糟漢恁麼行脚何處有今日還知大唐國裏無禪師麼時有僧出云只如諸方匡徒領衆又作麼生檍云不道無禪只是無師者箇話頭便是箇禍胎莫道未悟者錯會直饒悟得徹頭徹尾大法不明也覷他黃檗不見只如黃檗道不道無禪只是無師你如何理會衆中商量道人分上誰不丈夫豈假師承噉酒糟便是咬言語言語乃古人糟粕也且喜沒交涉欲得不招無間業莫謗如來正法輪豈不見潯山舉此語問仰山云黃檗意作麼生仰山云鶻王搥乳素非鴨類潯山云此實難辨只如潯山仰山恁麼問答又作麼生商量到者裏須是箇人始得既不會者箇便將庭前栢樹子麻三斤乾屎橛踞解秤鎚之類盡爲糟粕既錯會者箇定又錯會洞山問巖首座佛眞法身猶若虚空應物現形如水中月作麼生說箇應底道理巖云如驢

觀井山云道則大殺道只道得八成蟾云和尚作麼生山云如井觀驢諸方商量道如驢觀井是有迹如井觀驢是無迹又喚作忘情拂迹且喜沒交涉要且不是者箇道理既錯會者箇定又錯會南嶽和尚道譬牛駕車車若不行打車卽是打牛卽是馬祖聞舉忽然大悟而今禪和家理會道牛喻心車喻法但只明心法自明矣但只打牛車自行矣且喜沒交涉若恁麼馬祖驢年也不能得悟去者老漢始初將謂佛可以坐得成禪可以坐得悟一向坐地等南嶽和尚知其不凡故將輒去他庵前磨祖云和尚磨輒作甚麼南嶽云磨作鏡祖云磨輒豈得成鏡南嶽云磨輒旣不成鏡坐禪豈得成佛馬祖被他動一動心中熱忙便問如何卽是只者裏鼻孔索頭便在南嶽和尚手裏了也所以道欲識佛性義當觀時節因緣南嶽和尚知他時節已至卽向他道汝學坐禪爲學坐佛若學坐禪禪非坐臥若學坐佛佛非定相於無住法不應取捨汝若坐佛卽是殺佛若執坐相非達其理一時籍沒了他家計却更要他納物事教他無所從

出始肯捨命討箇死處命旣捨了便解問如何用心卽合無相三昧南嶽云汝學心地法門如下種子我說法要譬彼天澤汝緣合故當見其道又問道非色相云何能見南嶽云心地法眼能見乎道無相三昧亦復然矣祖云有成壞否南嶽云若以成壞聚散而見道者非也馬祖於是泮然無疑所謂不入虎穴不得虎子悟了若不過人十箇有五雙杜撰決定爲人不得諸人要識悟了逼人者麼只者馬祖便是樣子也馬祖旣得法直往江西建立宗旨一日南嶽和尚曰道一在江西說法總不見打箇消息來遂囑一僧云汝去待他上堂便問作麼生看他道甚麼記取來其僧依教去見上堂便出問作麼生祖云自從胡亂後三十年不曾少鹽醬師召大眾云祖師門下穿人鼻孔底盡從者一句子來你道者一句子從甚麼處來從打牛打車處來你若會得者箇便會得臺山路上婆子每有僧問臺山路向甚麼處去婆云驀直去僧纔行婆云好箇阿師却恁麼去趙州聞得云侍我去勘過者婆子趙州去見婆子亦如是問婆子亦如



是答歸來謂衆云臺山路上婆子被老僧勘破了也諸人還會麼竇中天子勅塞外將軍令但恁麼看取山僧昔年理會不得曾請益一杜撰長老爲山僧註解云者僧纔問臺山路向甚麼處去便被婆子勘破了也婆云薰直去僧便行正是隨聲逐色如何不被勘破又道纔開口便勘破了也今日思量直是叵耐山僧爲你說破若會得趙州道臺山路上婆子被老僧勘破了也便會婆子道好箇阿師却恁麼去山僧嘗頌云天下禪和說勘破爭知趙州已話墮引得兒孫不丈夫人人點過冷地臥此頌甚分明切不得錯會既錯會者箇定又錯會睦州喚僧大德僧回首州云擔板漢曾有箇禪頭舉者話問僧你作麼生會纔見僧開口便云果然擔版且喜沒交涉雪竇拈云睦州只具一隻眼者僧喚既回頭因甚却成擔版晦堂云雪竇亦只具一隻眼者僧一喚便回爲甚不成擔版者兩箇老漢可與睦州把手共行若是箇靈利漢纔聞舉著眼似銅鈴終不向者裏打之透既不會者箇定又錯會百丈野狐話便道不落也是不昧也是

只是當時答此話不合帶疑所以墮野狐謂野狐性多疑故且喜沒交涉既錯會者箇定又錯會祖師云不是風動不是旛動仁者心動山僧亦曾請益一箇長老意旨如何長老將衫袖搖作風動勢云是甚麼苦哉苦哉慚惶殺人鈍置殺人有者道不是風動不是旛動定是心動山僧尋常問學者不是風動不是旛動不是心動作麼生者裏豈容眨眼既錯會者箇定又錯會文殊是七佛之師爲甚麼出女子定不得罔明菩薩爲甚麼出得女子定衆中商量道杓柄在女子手裏且喜沒交涉既錯會者箇定又錯會雪峯道望州亭與汝相見了也烏石嶺與汝相見了也僧堂前與汝相見了也如今諸方商量道作麼生是望州亭相見處更道南頭買賤北頭賣貴烏石嶺相見意旨如何便道石頭大底大小底小僧堂前相見又作麼生便道歸堂喫茶去且喜沒交涉自餘邪解不可勝數山僧尋常亦問學者望州亭與汝相見了也烏石嶺與汝相見了也僧堂前與汝相見了也作麼生者箇便是金剛圈栗棘蓬你如何吞如何透你要

識能吞能透者麼豈不見保福問鵝湖僧堂前且置望州亭烏石嶺甚麼處相見鵝湖驟步歸方丈保福便入僧堂汾陽和尚頌曰望州烏石與堂前相見相知幾萬千唯有鵝湖并保福此時相見解推遷此頌分明爲你說了也既不會者箇定又錯會玄沙道諸方總道接物利生或遇三種病人來合作麼生接思盲者拈鎚豎拂他又不見患聾者語言三昧他又不聞患啞者教伊說又說不得若接此人不得佛法無靈驗師顧視大眾云要識玄沙麼平生心膽向人傾相識還如不相識當時地藏和尚在座下便出來道某甲有口不啞有眼不盲有耳不聾和尚作麼生接師云非父不生其子玄沙呵呵大笑師云笑裏有刀山僧有時舉此話問學者有來依樣畫葫蘆也道某甲有口有耳有眼和尚作麼生接山僧向他道咬人屎橛不是好狗又却去不得既錯會者箇定又錯會香嚴道如人上樹口銜樹枝手不攀枝脚不蹋樹樹下有人問西來意不對則違他所問若對又喪身失命師云好與玄沙一坑埋却山僧昔年曾請益一箇

尊宿未審香嚴意旨如何遂以拂子柄銜在口中緊閉却眼便作銜樹枝勢搖手擺脚祇對山僧師乃彈指云如此者亦是當年馳聲走譽底和尚作者般去就其餘作怪不在言也你要會麼但只作一句看我先爲你說莫見道作一句看便向舉起處會舉了便會了且不是者箇道理是甚麼道理如人上樹口銜樹枝手不攀枝脚不蹋樹樹下有人問西來意不對則違他所問若對又喪身失命如何者裏間不容髮當時香嚴會中只有箇虎頭上座領得香嚴意便出來爲香嚴出氣云上樹即不問未上樹請和尚道師云雖得一場榮利却一雙足香嚴呵呵大笑師云鐵作面皮又云回天輪轉地軸後來雪竇拈云樹上道即易樹下道即難老僧上樹也致將一問來雪竇雖爲虎頭上座出氣爭奈蹉過香嚴今時有般謬漢聞雪竇恁麼道便引洞山語云但能莫觸當今諱也勝前朝斷舌才謂香嚴立此箇問頭喻如一團火相似不可觸雖然如此不可斷却言句有問如何是佛麻三斤如何是祖師西來意庭前栢樹子又且何妨你不

妨會得好不見汾陽和尚頌曰香巖樹示多人要引同袍達本真師云依實供通擬議却從言下覓喪身失命數如塵師云不是苦心人不知汾陽爲你開天路雲散長空月色新師云閒言語雖然如是若向者裏提得一生參學事畢既提不得定又錯會百丈問潞山五峯雲巖云併却咽喉唇吻作麼生道潞山云却請和尚道百丈云我不辭向汝道恐已後喪我兒孫五峯云和尚也須併却百丈云無人處祈願望汝雲巖云和尚有也未百丈云喪我兒孫衆中商量道百丈大似抱贓叫屈掩耳偷鈴三子怎麼祇對大家走入荒草裏且喜沒交涉向你道此事決定不在言語上既不在言語上當怎麼時合作麼生我早是與你說了也既錯會者箇定又錯會德山道今夜不答話問話者三十棒時有僧出禮拜德山便打僧云某甲話也未問爲甚打某甲山云你是甚處人僧云新羅人山云未蹋船舷好與三十棒後來法眼云大小德山話作兩橛圓明云大小德山龍頭蛇尾雪竇拈云二老宿雖善裁長補短捨重從輕要見德山亦

未可何故德山大似握閫外威權有當斷不斷不招其亂底劍要識新羅僧麼只是撞著露柱底箇瞎漢衆中商量道某甲話也未問便好打德山不打却問你是甚處人者裏便是話作兩橛龍頭蛇尾處且喜沒交涉又道者僧若是作家纔見他問你是甚處人便好掀倒禪床他既不能却被德山道未蹋船舷好與三十棒者裏是當斷不斷不招其亂底劍所以雪竇云要識新羅僧麼只是撞著露柱底箇瞎漢且喜沒交涉禪若是怎麼地會得時更不消悟也聰明靈利底一時隨語生解解註將去便了我且問你怎麼解註得一時有下落了生死到來却如何支遣而今分明向你道者些閒言長語便是出生死底徑路你莫去徑路上栽荆棘掘屎窖或有箇衲僧出來道和尚現在者裏栽荆棘掘屎窖也不是却作麼生祇對山僧有箇推托處且如何推托聽取一偈女流中有大丈夫示現其身化其類以戒定慧解脫法攝彼貪欲瞋恚癡雖處於中作佛事如風行空無所依過去未來及現在塵沙諸佛及菩薩異口同音發是言

善哉奇特世希有心源清淨無憂喜不作無喜無憂  
想逢場作戲隨世緣而於世緣無所著六月火雲燒  
碧空雷聲忽震三千界銷除熱惱獲清涼是彼丈夫  
誕時節我說此偈助光明普施法界諸女人喝一喝

列祖提綱錄卷第十四

苑廬提綱錄卷第十五

武林十八澗理安禪寺住持婁東行悅集

檀越特請普說

大慧杲禪師錢計議請普說僧問昔日僧問楊岐和  
尚如何是佛答云三脚驢子弄蹄行未審意旨如何  
師云天上天下沒蹤跡進云只如威音王已前是甚  
麼人騎師云威音王已後是甚麼人騎僧擬議師便  
喝乃云威音王已前三脚驢兒踴跳威音王已後楊  
岐老人絕消息既絕消息却因甚麼三脚驢兒踴跳  
若也於斯明得方知威音王已前三脚驢兒果然踴  
跳若明不得楊岐老人一生受屈正當恁麼時如何

是雪屈一句喝一喝云泊合弄險復云蘊聞上座今  
日代子虛來請爲衆普說老漢曰說箇甚麼卽得聞  
曰請和尚拈出楊岐金剛圈栗棘蓬布施大衆又曰  
如忠國師大珠和尚說法諸方大有疑其拖泥帶水  
不徑截說義理禪願和尚疏決眞僞解大衆疑惑此  
亦是請普說檀越之意老漢曰諾所以大覺世尊初  
悟此事在摩竭提國三七日內無下口處自云我寧  
不說法疾入於涅槃信知說法之難豈同容易尋念  
過去佛所行方便力然後起道樹詣鹿苑隨衆生根  
器說一大藏教末後收因結果却云始從鹿野苑終  
至跋提河於是二中間未曾說一字只者便是楊岐  
所謂金剛圈栗棘蓬也直是難吞難透到者裏直下  
承當得了大法未明亦奈何不得敢問諸人何者名  
爲大法金剛圈如何透栗棘蓬却如何吞不見巖  
頭道若將實法繫綴人土亦銷不得況十方信施耶  
諸佛出世祖師西來無非只爲你諸人作箇證明底  
主宰而已若有法可傳可授則諸佛慧命豈到今日  
故祖師云心地隨時說菩提亦只寧事理俱無礙當

生卽不生若會得此四句卽透得金剛圈吞得栗棘蓬不須要明大法大法自明矣以至古人差別異旨因緣心性玄妙大法若明纔舉起時便會得恰如磁石見鐵相似輕輕一引便動須是舉一明三日機銖兩點著南邊動北邊舉起時便明得而今諸方有數種邪禪大法若明只者邪禪便是自己愛用家具好擊石火閃電光一棒一喝底定不愛說心說性者只愛機鋒俊快謂之大機大用好說心說性底定不愛擊石火閃電光一棒一喝者只愛絲來線去謂之綿綿密密亦謂之根脚下事殊不知正是箇沒用處弄泥團底漢看他前輩大法明底尊宿用處轉轉地如南陽忠國師大珠和尚是也唯楊文公具眼修傳燈錄時將忠國師大珠和尚列在馬祖下諸尊宿之右將廣語所有言句盡入其中六祖下收忠國師語最多爲他家活大門戶大法性寬波瀾闊難湊泊遮般法難說他禪備衆體如三喚侍者話喚作說老婆禪拖泥帶水得麼一日喚侍者侍者應諾如是三喚侍者三應師云國師三喚侍者何曾有辜負侍者三

應甚麼處是辜負處國師曰將謂吾辜負汝誰知汝辜負吾師云平地起骨堆復云叢林中喚作國師三喚侍者話自此便有一絡索唯雪竇見透古人骨髓云國師三喚侍者點卽不到師云灼然侍者三應到卽不點師云却不恁麼將謂吾辜負汝誰知汝辜負吾謾雪竇不得師云誰道復召大家云好箇謾雪竇不得雖然如是雪竇亦謾妙喜不得妙喜亦謾諸人不得諸人亦謾露柱不得玄沙云侍者却會雪竇云停囚長智師云兩彩一賽雲門道作麼生是國師辜負侍者處會得也是無端雪竇云元來不會師云雪峯道底雲門又云作麼生是侍者辜負國師處粉骨碎身未報得雪竇云無端無端師云垛生招箭法眼云且去別時來雪竇云謾我不得師云却是法眼會與化云一盲引衆盲雪竇云端的瞎師云親言出親口弘覺徵問僧云甚處是侍者會處僧云若不會爭解恁麼應覺云汝少會在又云若於此見得去便識玄沙師云慚惶殺人翠巖芝云國師侍者總欠會在師云猶較些子投子云抑逼人作麼雪竇云垛根漢



師云理長即就復云唯有趙州多口阿師下箇得註脚令人疑著僧問國師三喚侍者意旨如何州云如人暗中書字字雖不成文彩已彰雪竇使喝師云且道者一喝在國師侍者分上在趙州分上隨後喝一喝復云若不是命根五色索子斷如何透得者裏過雪竇云若有人問雪竇雪竇便打也要諸方檢點師云作賊人心虛雪竇復有一頌云師資會遇意非輕師云此語有兩負門無事相將草裏行師云普州人送賊負汝負吾人莫問師云放待冷來看任從天下競頭爭師云即今休去便休去若覓了時無了時復云你要求玄妙解會只管理會國師三喚侍者話那裏是國師辜負侍者處那裏是侍者辜負國師處有甚麼交涉鵝王擇乳素非鴨類者箇便是國師用劍刃上事爲復只者些子爲復別更有在一日問紫璘供奉甚麼處來奉曰城南來國師曰城南章作何色奉曰作黃色國師乃問童子城南章作何色童子曰作黃色國師曰只者童子亦可簾前賜紫對御談玄你道國師說老婆禪拖泥帶水得麼爲復只者些子

爲復別更有在一日肅宗帝請看戲國師曰檀越有甚心情看戲法雲圓通禪師曰且道國師在甚處著到妙喜敢問諸人且道圓通禪師在甚處著到於斯見得三老相去不遠肅宗帝又問如何是十身調御國師直拔向他道檀越踢毗盧頂上行更問甚麼十身調御諸人要見忠國師麼只在你眼睛裏開眼也蹉過合眼也蹉過既在眼睛裏爲甚麼却蹉過妙喜怎麼道亦蹉過不少你更看他箇無情說法話老漢尋常不曾說今日已是不識好惡不避口業盡情爲諸人抖擻爲他雪屈且不得作義理會僧問如何是古佛心國師曰牆壁瓦礫是師云怎麼答話若玄妙解路心不絕命根不斷大法不明決定不敢如此四楞塌地一棒一喝一挨一拶擊石火閃電光却易者般說話却難入作前所謂家活大門戶大法性寬波瀾闊命根斷方能如是僧曰牆壁瓦礫豈不是無情國師曰是僧曰無情還解說法否國師曰常說熾然說無間歇僧曰某甲爲甚麼不聞國師曰汝自不聞不可妨他聞者也僧曰未審甚麼人得聞國師曰

諸聖得聞僧曰和尚還聞否國師曰我不聞僧曰和尚既不聞爭知無情解說法國師曰賴我不聞我若聞則齊於諸聖汝即不聞我說法僧曰怎麼則衆生無分也國師曰我爲衆生說不爲諸聖說僧曰衆生聞後如何國師曰即非衆生師云奇哉你看他轉轉地不滯在一隅不負他來問賴我不聞我若聞則齊於諸聖汝即不聞我說法你喚作郎當得麼不是得諸佛諸祖心髓如何轉得你莫喚作無得失者箇是無得失中有得失有得失中無得失喚作入泥入水騎賊馬趕賊隊借婆叢于拜婆年難奈何又僧問發心出家本擬求佛未審如何用心即得成佛國師曰無心可用即得成佛師云者僧難容恰如箇鼠黏子相似者箇老子輭頭又撞著者僧輭頭黏住便問無心可用阿誰成佛國師曰無心自成佛成佛亦無心僧曰佛有大不可思議爲能度衆生若也無心阿誰度衆生國師曰無心是真度生若見有生可度者卽是有心宛然生滅僧曰今既無心能仁出世說許多教跡豈可虛言國師曰佛說教亦無心僧曰說法

無心應是無說國師曰說卽無無卽說僧曰說法無心造業有心否國師曰無心卽無業今既有業心卽生滅何得無心僧曰無心卽成佛和尚卽今成佛未國師曰心尙自無誰言成佛若有佛可成還是有心有卽卽有漏何處得無心僧曰既無佛可成和尚還得佛用否國師曰心尙自無用從何有僧曰茫然都無莫落斷見否國師曰本來無見阿誰道斷僧曰本來無見莫落空否國師曰無空可落僧曰有可墮否國師曰空既是無墮從何立僧曰能所俱無忽有人持刀來取命爲是有是無國師曰是無僧曰痛否國師曰痛亦無僧曰痛既無死後生何道國師曰無死無生亦無道僧曰既得無物自在饑寒所逼若爲用心國師曰饑卽喫飯寒卽著衣僧曰知饑知寒應是有心國師曰我問汝有心心作何體段僧遲疑良久覓心與饑寒體段了不可得遂依實供通曰心無體段國師曰汝既知無體段卽是本來無心何得言有僧曰山中逢見虎狼如何用心國師曰見如不見來如不來彼卽無心惡獸不能加害僧曰寂然無事獨

脫無心名爲何物國師曰名金剛大士師喝一喝云  
好人不肯做却要屎裏臥僧曰金剛大士有何體段  
國師曰本無形段師云何不早恁麼道僧曰既無形  
段喚何物作金剛大士國師曰喚作無形段金剛大  
士僧曰金剛大士有何功德國師曰一念與金剛相  
應能滅宛伽沙劫生死重罪得見宛伽沙諸佛其金  
剛大士功德無量非口所說非意所陳假使宛伽沙  
劫住世說亦不可得盡者僧當下大悟如睡夢覺如  
蓮華開似者般底便是金剛圈栗棘蓬你若吞不得  
透不得不見古人行履處定起謗無疑透得者裏方  
能作大舟航不著此岸不著彼岸不住中流善知識  
下得者般脚手入得者般窠窟方始爲得人師家若  
不具許多差別眼目如心性解路上得箇入處底定  
不愛擊石火閃電光却愛着般說話又却錯做實法  
會了如一機一境一棒一喝上得箇入處底定不愛  
着般說話又是錯會了眞所謂所見不同互有得失  
教中所謂菩薩見水如甘露天人見水如琉璃凡夫  
見水是冰餓鬼見水如膿血是也或有箇愛高禪底

衲子出來道妙喜有如是等見耶即向他道逢人但  
恁麼學所以正法眼藏中收僧問忠國師古德云青  
青翠竹盡是法身鬱鬱黃華無非般若有人不許云  
是邪說亦有信者云不思議不知若爲國師曰此蓋  
普賢文殊境界非諸凡小而能信受皆與大乘了義  
經意合故華嚴經云佛身充滿於法界普現一切群  
生前隨緣赴感靡不周而恒處此菩提座翠竹既不  
出於法界豈非法身乎又般若經云色無邊故般若  
亦無邊黃華既不越於色豈非般若乎深遠之言不  
省者難爲措意又華嚴座主問大珠和尚曰禪師何  
故不許青青翠竹盡是法身鬱鬱黃華無非般若珠  
曰法身無像應翠竹以成形般若無知對黃華而顯  
相非彼黃華翠竹而有般若法身故經云佛眞法身  
猶若虛空應物現形如水中月黃華若是般若般若  
卽同無情翠竹若是法身翠竹還能應用座主會麼  
主曰不了此意珠曰若見性人道是亦得道不是亦  
得隨用而說不滯是不見性人說翠竹著翠竹  
說黃華著黃華說法身滯法身說般若若不識般若所

以皆成諍論師云國師主張青青翠竹盡是法身直主張到底大珠破青青翠竹不是法身直破到底老漢將一箇主張底將一箇破底收作一處更無拈提不敢動著他一絲毫要你學者具眼透國師底金剛圈又吞大珠底栗棘蓬具眼者辨得出不具眼者未必不笑宗杲雖參圓悟和尚打失鼻孔元初與我安鼻孔者却得湛堂和尚只是爲人時下刃不緊若是說禪病無人過得嘗思教中有一段因緣殃崛摩羅要千人指頭作華冠然後登王位已得九百九十九指唯少一指要斷其母指填數佛知其緣熟故往化之殃崛纔舉意欲下刀取母指時忽聞振錫聲遂捨其母指而問佛教化一指曰既是瞿曇在此望施我一指頭滿我所願纔舉刀世尊拽脫便去世尊徐行殃崛急趕不上乃高聲叫曰住住世尊曰我住久矣是汝不住殃崛忽然感悟投佛出家佛却令持鉢至一長者門其家婦人正值產難長者曰瞿曇弟子汝爲至聖當有何法能免產難殃崛曰我乍入道未知此法待我回問世尊却來相報及返具事白佛佛告

殃崛汝速去報言我自從賢聖法來未曾殺生殃崛當便奉佛語往彼告之其婦得聞卽免產難師云者裏使棒使喝掀倒禪床引經教說理事擊石火閃電光夜半捉烏雞得麼因請益湛堂和尚纔舉起此話湛堂曰你爬著我痒處者話是金屎法不會如金會得如屎曰豈無方便湛堂曰我有箇方便只是你割地不會曰望和尚慈悲湛堂曰殃崛云我乍入道未知此法待問世尊未到佛座下他家生下兒子時如何我自從賢聖法來未曾殺生殃崛持此語未至他家已生下兒子時如何老漢當時理會不得後因在虎丘看華嚴經至菩薩登第七地證無生法忍云佛子菩薩成就此忍卽時得入菩薩第八不動地爲深行菩薩難可知無差別離一切相一切想一切執著無量無邊一切聲聞辟支佛所不能及離諸諍諍寂滅現前譬如比丘具足神通得心自在次第乃至入滅盡定一切動心憶想分別悉皆止息此菩薩摩訶薩亦復如是住不動地卽捨一切功用行得無功用法身口意業念務皆息住於報行譬如有人夢中見

心以通已

身墮在大河爲欲度故發大勇猛施大方便以大勇猛施方便故即便寤寤既寤寤已所作皆息菩薩亦爾見衆生身在四流中爲救度故發大勇猛起大精進以勇猛精進故至此不動地既至此以一切功用靡不皆息二行相行皆不現前此菩薩摩訶薩菩薩心佛心菩提心涅槃心尙不現起況復起於世間之心師云到者裏打失布袋湛堂爲我說底方便忽然現前方知真善知識不欺我真箇是金剛圈須是藏識明方能透得又有箇尊宿喚作洛浦和尚久爲臨濟侍者濟每稱美之謂之臨濟門下一隻箭子便是欺負人游歷罷直往夾山頂卓菴經年夾山知乃修書遣僧馳到洛浦接得便坐却再展手索僧無對浦便打曰歸去舉似和尚僧回舉似夾山山曰者僧看書三日內必來若不看書此人教不得師云古人喚作撈攬人不知書中有甚閒言長語洛浦却吞他鉤線三日內果來夾山預令人伺其出菴便燒其居師云只者便是金剛圈浦不顧師云成佛作祖須是者般漢直造夾山方丈不禮拜乃當面叉手而立山曰

雞棲鳳巢非同類出去浦曰自遠趨風乞師一接山曰目前無罣礙此間無老僧浦便喝山曰住住且莫草草忽忽雲月是同谿山各異截斷天下人舌頭卽不無闍黎爭教無舌人解語師云洛浦却低頭思量者一道眞言理會不得被夾山劈脊便打穿了鼻孔遂承嗣夾山後來示衆道末後一句始到牢關把斷要津不通凡聖須知上流之士不將佛祖見解貼在額頭上如靈龜負圖自取喪身之本師云他悟後便解明他者一道眞言者些子藥頭不問雲門下臨濟下曹洞下法眼下瀉仰下大法若不明各宗其宗各師其師各父其父各子其子只管理會宗旨熱大不緊老漢在衆中時嘗請益一尊宿禪門中說有語中無語無語中有語尊宿爲我引證云有語中無語路逢死蛇莫打殺無底籃子盛將歸喚者箇作有語中無語又喚作無語中有語如何是有語中無語路逢死蛇莫打殺如何是無語中有語無底籃子盛將歸只者一句便具此兩義路逢死蛇莫打殺是無語中有語無底籃子盛將歸乃是有語中無語謂既是



死蛇更不消打殺又云如何是同中有異驚鷺立雪非同色如何是異中有同明月蘆華不似他我如此說時你便會得了却齊得甚麼事似者般底莫要學大法明後舉一絲毫便一時會得恰似殃福摩羅因緣湛堂說底方便我乍入道也使不著佛有神通也使不著既使不著因甚麼生下兒子若向者裏見得釋迦老子卽是殃福摩羅殃福摩羅卽是釋迦老子若也不會釋迦自釋迦殃福自殃福不干產難人家事乃合掌云卽將上來舉揚般若所有一言一句契佛契祖底功德奉爲計議錢公薦室安人呂氏伏願出此沒彼常爲般若之親姻捨身受身永作菩提之眷屬召大衆云還委悉麼若欲直下便休去莫記我今說底喝一喝下座

傳經幹請普說師云經幹道友妙喜初不相識去歲經由衡陽特來相訪一見便如故人蓋爲信得此段大事因緣及何以故豈不見華嚴會上智首菩薩問文殊師利菩薩言佛子菩薩云何得無過失身語意業等事文殊答以善用其心則獲一切勝妙功德爲

說行住坐臥四威儀中一百四十大願謂之無濁亂清淨行大功德此功德皆從信地而發故文殊普爲已發信心者作不請友以偈問賢首菩薩曰我今已爲諸菩薩說佛往修清淨行仁亦當於此會中演暢修行勝功德賢首菩薩以偈答之其中曰以法威力現世間則獲十地十自在亦是說初發心從信地起之義末後善財到毗盧樓閣前彌勒爲說一百二十種菩提心亦是此義其中有一種喻曰如獅子王哮吼獅子兒聞皆增勇健餘獸聞之卽皆鼠伏佛獅子王菩提心吼應知亦爾諸菩薩聞增長功德有所得者聞皆退散亦是此義既有信根卽是成佛基本忽地與現行相應便證阿耨多羅三藐三菩提如釋迦老子初在正覺山前舉頭見明星出現忽然悟道遂乃歎曰奇哉一切衆生具有如來智慧德相但以妄想執著而不證得謂上至十方諸佛下至六道四生含蠢蠢動於我悟處以平等印一印印定更無差別你看黃面老子纔悟了便見得如此廣大然後與慈運悲於生死海不著此岸不著彼岸不住中流而能

運載此岸衆生到於彼岸不住生死中流者箇道理亦不出自家信種所以無盡居士著海眼經題說佛成就云始覺合本之謂佛他雖是箇俗人然却見得徹識得根本謂始覺時從明星上起信忽然覺悟自性本來是佛大地有情更無差別無盡喚作始覺合本覺方始成佛參禪人能恁麼辨白得了然後休歇身心識取本來面目不要癡心古聖得了便於得處滅却生滅心亦不住在寂滅地謂之寂滅現前於寂滅地獲二殊勝一者上合十方諸佛與佛如來同一慈力二者下合六道衆生與諸衆生同一悲仰前所云與慈悲救拔惡道是也衆生爲不覺故輪轉生死先覺之士若無慈悲如何得衆生界空信知佛恩難報今日經幹道友請妙喜普說不獨爲先考承事追修而已要與現前一衆說些禪病故柳子厚以天台教爲司南言禪病最多誠哉是言天台智者之教以空假中三觀攝一切法教人把本修行禪無文字須是悟始得妙喜自十七歲便疑著此事恰恰參十七年方得休歇未得已前常自思惟我今已幾歲不

知我未託生來南閩浮提時從甚麼處來心頭黑似漆竝不知來處既不知來處即是生大我百年後死時却向甚麼處去心頭依舊黑漫漫地不知去處既不知去處即是死大謂之無常迅速生死事大你諸人還曾恁麼疑著麼現今坐立儼然孤明歷歷地說法聽法賓主交參妙喜簾兩片皮牙齒敲磕臍輪下鼓起粥飯氣口裏怛怛怛在者裏說說者是聲此聲曾在諸人觸體裏諸人觸體同在妙喜聲中者箇境界他日死了却向甚麼處安著既不知安著處則撞入驢胎馬腹亦不知生快樂天宮亦不知禪和子尋常於經論上收拾得底問著無有不知者士大夫向九經十七史上學得底問著亦無有不知者雖却文字絕却思惟問他自家屋裏事十箇有五雙不知他人事却知得如此分曉如是則空來世上打一遭將來隨業受報畢竟不知自家本命元辰落著處可不悲哉所以古人到者裏如救頭然尋師決擇要得心地開通不疑生死然有學而知之者有生而知之者那箇是學而知之者如僧問趙州學人乍入叢林

乞師指示州云你喫粥了也未僧云喫粥了州云洗鉢盂去僧於言下忽然大悟當下休歇便知生死去處妙喜常說不易者僧有力量趙州將一百二十斤擔子一送送在他肩上者僧荷得一氣走一百二十里更不同頭如將梵位直授凡庸心裏便怙怙地裏得慈力運得悲願此是學而知之者那箇是生而知之者如趙州作沙彌時同本師行脚到南泉值南泉臥次本師禮拜了趙州方禮拜南泉問云近離甚處州云近離瑞像泉云還見瑞像麼州云瑞像則不見面前只見臥如來南泉遂起問你是有主沙彌無主沙彌州云是有主沙彌泉云那箇是你主若是如今禪和家便近前彈指打箇圓相喝一喝拍一拍拂袖便行放出者般惡氣息你看他趙州緩緩地近前道孟春猶寒伏惟和尚尊候萬福泉乃喚維那云此沙彌別處安排次日却來問如何是道南泉也不行棒也不下喝也不談玄也不說妙也不牽經也不引論也不舉古人公案亦不說事亦不說理只實頭向他道平常心是道爲他趙州已理會得平常心了便却

問還假趣向也無泉云擬向即乖州云不擬爭知是道泉云道不屬知不屬不知知是妄覺不知是無記若真達不疑之道猶如太虎廓然蕩豁豈可於中彊是非耶趙州於言下千了百當南泉道道不屬知不屬不知圭峯謂之靈知荷澤謂之知之一字衆妙之門黃龍死心云知之一字衆禍之門要見圭峯荷澤則易要見死心則難到者裏須是具超方眼說似人不得傳與人不得所以圓悟先師說趙州禪只在口唇皮上難奈他何如善用兵者不齧糧行就你水草糧食又殺了你有一秀才問佛不違衆生願是否州云是才云弟子欲就和尙手中乞取拄杖得否州云君子不奪人所好才云某甲不是君子州云老僧亦不是佛又一僧問如何是祖師意州乃敲禪床脚僧云莫只者便是否州云是則脫取去又一僧問諸方盡向口裏道和尙如何示人州以脚跟打火爐示之僧云莫便是也無州云恰認得老僧脚跟又僧問如何是趙州州云東門南門西門北門僧云某甲不問者箇州云你問我趙州響又僧問如何是道州云牆

外底僧云某甲不問者箇道州云你問那箇道僧云某甲問大道州云大道通長安你不得作無事會不得作玄妙會不得作奇特會不得作平常會趙州不在無事上不在玄妙上不在奇特上不在平常上畢竟在甚麼處具眼者辨取者老漢有時云未出家被菩提使出家後使得菩提汝諸人被十二時使老僧使得十二時又云佛之一字吾不喜聞佛之一字尙不喜聞達磨灼然是甚老臊胡十地菩薩是擔糞漢等妙二覺是破凡夫菩提涅槃是繫驢橛十二分教是鬼神簿拭瘡膿紙四果三賢初心十地是守古塚鬼你既不到者箇田地是事理會不得也學人纔走大步便把一句子禪要祇對人且不是者箇道理所以妙喜室中常問禪和子喚作竹筴則觸不喚作竹筴則背不得下語不得無語不得思量不得卜度不得拂袖便行一切總不得你便奪却竹筴我且許你奪却我喚作拳頭則觸不喚作拳頭則背你又如何奪更饒你道箇請和尙放下著我且放下著我喚作露柱則觸不喚作露柱則背你又如何奪我喚作山

河大地則觸不喚作山河大地則背你又如何奪有箇舟峯長老云某看和尙竹筴子話如籍沒却人家財產了更要人納物事妙喜曰你譬喻得極妙我真箇要你納物事你無從所出便須討死路去也或投河赴火拚得命方始死得死了却緩緩地再活起來喚你作菩薩便歡喜喚你作賊漢便惡發依前只是舊時人所以古人道懸崖撒手自肯承當絕後再甦欺君不得到者裏始契得竹筴子話復說偈云佛之一字尙不喜有何生死可相關當機覲面難回互說甚楞嚴義八還

悅禪人請普說僧問臨濟示衆云有時奪人不奪境有時奪境不奪人有時人境兩俱奪有時人境俱不奪如何是奪人不奪境師云三千里外絕諸訛進云如何是奪境不奪人師云拔出眼中楔進云臨濟道照日發生鋪地錦嬰孩垂髮白如絲未審與和尙答底是同是別師云咬人屎橛不是好狗進云王令已行天下徧將軍塞外絕煙塵時如何師云適來猶自可而今更郎當問十方薄伽梵一路涅槃門未審王

氏今日是生耶是死耶師云生耶死耶進云今古應無墜分明在目前師云抽却腦後箭進云只如十二時中不依倚一物人來師還接否師云喚甚麼作一物進云不可重說偈言師云礙塞殺人乃云生耶死耶非得非失不道不道有理有事若向有理有事處得箇入處只在教乘裏頭出頭沒若於非得非失處得箇入處敢保諸人十二時中未有安身立命處既未有安身立命處則不知王氏落處若知得王氏落處卽知自己安身立命處且道王氏卽今是生耶是死耶是不生耶是不死耶若道不生爭奈死何若道不死爭奈生何若道亦生亦死又是戲論說若道非生非死又是相違說直饒離四句絕百非直下如明鏡當臺明珠在掌胡來現胡漢來現漢當人各各脚跟下淨保保明歷歷生死如夢幻空華去來如浮雲水月猶未是徹頭處縱饒如實見得昔日之生本不曾生今日之滅本不曾滅亦是無夢說夢何以故生而不生鏡裏之形滅而不滅水中之月正當恁麼時那裏是王氏出身處若委悉得去王氏只今與諸人

把手共行同入如來大寂滅海其或未然有寒暑兮促君壽有鬼神兮妬君福復云者箇是近悅上座爲母王氏請妙喜老漢說法底意旨且法作麼生說不見道法不可見聞覺知若行見聞覺知是則見聞覺知非求法也見聞覺知既不可以入道莫是不見不聞不覺不知便是麼良久高聲云更是箇甚麼妙喜盡力說只說得到者裏此事決定不在言語上所以從上諸聖次第出世各各以善巧方便切切怛怛唯恐人泥在言語上若在言語上一大藏教五千四十八卷說權說實說有說無說頓說漸豈是無言說因甚麼達磨西來却言單傳心印不立文字語言直指人心見性成佛因何不說傳立傳妙傳言傳語只要當人各各直下明自本心見自本性事不獲已說箇心說箇性已大段狼籍了也若要拔得生死根株盡切不得記我說底縱饒念得一大藏教如餅瀉水喚作運糞入不名運糞出却被者些子障却自己正知見不得現前自己神通不能發現只管弄目前光影理會禪理會道理會心理會性理會奇特理會玄妙



大似掉棒打月枉費心神如來說爲可憐愍者古人凡有一言半句設一箇金剛圈栗棘蓬教伊吞教伊透若是箇英靈獨脫出情塵超理性者金剛圈栗棘蓬是甚麼弄糊獮家具祭鬼神茶飯蓋你不能一念緣起無生只管一向在心意識邊作活計纔見宗師動口便向宗師口裏討玄討妙却被宗師倒翻筋斗自家本命元辰依舊不知落處脚跟下黑漫漫依前只是箇漆桶只如適來上座問奪人不奪境一段話只知冊子上念將來如法答他又理會不得問一段未了又問一段恰如村人打傳口令相似我今不惜口業爲你諸人葛藤註解一徧臨濟一日示衆云有時奪人不奪境有時奪境不奪人有時人境兩俱奪有時人境俱不奪會麼良久左右顧視便下座者箇便是金剛王寶劍我昨日說底將蜈蚣毒蛇蝎子并諸雜毒貯在一甕裏你試將手就中拈一箇不毒底出來看若拈得出不妨於此事有少分相應若拈不出自是你根性遲鈍夙無靈骨也怪妙喜不得臨濟當時道者幾句閒言長語面目現在自是你不會看

得出你若領得此意自從胡亂後三十年不少鹽醬鐘樓上念讚床脚下種菜之類不著問人一一自知下落古人垂箇方便豈是閒開口須知爛泥裏有刺當時有箇克符道者理會得臨濟意便出來問如何是奪人不奪境臨濟當時不知那裏得許多閒言長語鬪湊得恰好便道煦日發生鋪地錦嬰孩垂髮白如絲諸人還會麼煦日發生鋪地錦是境嬰孩垂髮白如絲是人此兩句一句存境一句奪人克符又作頌曰奪人不奪境緣自帶聲訛師云有甚麼聲訛擬欲求玄旨思量反責麼師云誣人之罪曬珠光燦爛蟾桂影婆娑師云何不早恁麼道覲面無差互還應滯網羅師云依稀似曲纔堪聽又被風吹別調中此頌大槩在曬珠光燦爛蟾桂影婆娑之上蓋此兩句是境學者問不奪境擬欲求玄旨思量反責麼大意只是不可思量擬議思量擬議者人也蹉却覲面相呈一著子卽被語言網羅矣克符此頌專明煦日發生鋪地錦所以有曬珠光燦爛蟾桂影婆娑之句乃是存境而奪人故曰覲面無差互還應滯網羅奪人

之義醍醐毒藥一道而行具眼者方能辨別又問如何是奪境不奪人答云王令已行天下徧將軍塞外絕煙塵師云王令已行天下徧是奪了境將軍塞外絕煙塵是存人而不奪頌曰奪境不奪人尋言何處眞師云也須閒處作隄防問禪禪是妄究理理非親師云好事不如無日照寒光澹山遙翠色新師云資兒思舊債直饒玄會得也是眼中塵師云自起自倒你要會日照寒光澹山遙翠色新麼此兩句是境直饒玄會得也是眼中塵便奪了也其餘人境兩俱奪人境俱不奪盡是依語就學家問處答又問如何是人境兩俱奪答云并汾絕信獨處一方便有人境兩俱奪面目頌曰人境兩俱奪從來正令行師云已落第二不論佛與祖那說聖凡情師云買石得雲饒擬犯吹毛劍還如值木盲師云識法者懼進前求妙會特地斬精靈師云前箭猶輕後箭深正令既行不留佛祖到者裏進之退之性命都在師家手裏如吹毛劍不可犯其鋒又問如何是人境俱不奪答云王登寶殿野老謳歌頌曰人境俱不奪思量意不偏師云

會麼是法住法位主賓言不異師云世間相常住問答理俱全師云添一毫不得減一毫不得蹋破澄潭月師云猶有者箇在穿開碧落天師云勞而無功不能明妙用師云動著卽錯淪溺在無緣師云却依舊處著者箇是適來上座請益底公案謂之四料揀你若要分明理會得臨濟意但向他當時垂示處看如何看山僧有時奪人不奪境有時奪境不奪人有時人境兩俱奪有時人境俱不奪若恁麼便是你若作山僧有時奪人不奪境有時奪境不奪人有時人境兩俱奪有時人境俱不奪便不是了也所以五祖師翁有言如何是祖師西來意庭前栢樹子恁麼會便不是了也如何是祖師西來意庭前栢樹子恁麼會方始是你諸人還會麼者般說話莫道你諸人理會不得妙喜也自理會不得我此門中無理會得理會不得蚊子上鐵牛無你下觜處須信古人垂慈則有法無法不垂慈道眼未開大法未明豈免向他人口裏覓禪覓道覓玄覓妙覓得了唯恐人知及至說時又恐說盡了末後無可說者箇是無限量底法你以

有限量心擬窮他落處且莫錯只如世尊在靈山會上百萬衆前拈華普示獨迦葉破顏微笑何曾怕人知又何曾密室裏傳授來我者裏禪許你衆人聞不許你衆人會如上所解註者四料陳你諸人齊聞齊會了臨濟之意果如是乎若只如是臨濟宗旨豈到今日你諸人聞妙喜說得落將謂止如此我實向你道此是第一等惡口若記著一箇元字脚便是生死根本也你諸人諸方學得底玄中又玄妙中又妙是甚麼屎禪一向壓在皮袋裏將謂實有甚麼事莫錯諸上座你真箇要參妙喜禪盡將諸方學得底掃向他方世界百不知百不會虛却心來共你理會復說偈云無諸比丘名近悅爲母王氏請普說妙喜便登曲条床切切怛怛恣饒舌從來法本難言詮不假思量與分別說甚地獄及天堂四聖六凡俱泯絕縱有魔王欲作難金剛寶劍當頭截王氏養子要參禪只者一念永不滅彈指頓明諸法門釋迦彌勒齊超越還如塗毒鼓當軒一擊聞之皆腦裂無邊煩惱悉蠲除夙業舊殃蕩沃雪末後一句爲重宣凝然萬里一

條鐵喝一喝下座

孫通判請普說師云說法不應時總是非時語所以道未雖兜率已降王宮未出母胎度人已畢李長者著華嚴論乃云此經決定是佛成道十日後說初於正覺山前從定而起因見明星忽然悟道便見自己本來面目信知時節若至其理自彰妙喜常思無量居士者一箇人不知幾百生中學般若來今生如此得大受用所註清淨海眼經說六成就謂如是我聞一時佛在云理無不如之謂是事無不是之謂如自來不曾有人如此說蓋爲他見徹釋迦老子骨髓所以取之左右逢其原佛初生下一手指天一手指地云天上天下惟我獨尊所以云三界獨尊之謂我所謂我者非人我之我如孟子所謂萬物皆備於我也心動十方之謂聞蓋世間人皆以耳聞一切音聲唯普賢菩薩乃以心聞故經云心聞洞十方生于大因力多之所宗之謂一旦如現前一千大衆從首座數起自一而之百自百而之千所以言一者多之所宗也一之所起之謂時者箇時便是妙心居士請妙喜

爲大衆說法之時也當知此時能該括十方三世乃至塵沙諸佛六道四生若凡若聖若草若木若有情若無情乃以拂子擊禪床一下云盡向者裏成正覺無出此時也又云始覺合本之謂佛言以如今始覺合於本覺往往邪師輩以無言默然爲始覺以威音王那畔爲本覺固非此理旣非此理何者是覺若全是覺豈更有迷若謂無迷爭奈釋迦老子於明星現時忽然便覺知得自家本命元辰元來在者裏所以言因始覺而合本覺如禪和家忽然摸著鼻孔便是者箇道理然此事人人分上無不具足昨日因與妙心居士說令叔尙書文章學問可謂儒林宗工但聞於此道自以爲難往往士大夫只知所謂佛者千劫學威儀萬劫修相好乃至三大阿僧祇劫修而後成云何博地凡夫現行無明爲富貴所折困何時與道相應纔作是念是於心意識中便推出一座須彌山一障障了道眼不能明見本地風光本來面目正所謂所知不是障是障障所知近世士大夫多作此見如韓子蒼與某在臨川鼻孔厮拄著半年亦不自

信每言此一段事吾輩但知歸向則可如何便要入手亦是自作障礙或者更錯會先佛所言大通智勝佛十劫坐道場佛法不現前不得成佛道謂佛道之難成如此殊不知一念普觀無量劫無去無來亦無住如是了知三世事超諸方便成十力釋迦老子纔瞥地後便言奇哉一切衆生具有如來智慧德相但以妄想執著而不證得所謂妄想執著者正說著今時士大夫病痛先德所以指示一切人脚跟下無不圓成無不具足故有父不可以傳子臣不可以獻君之說蓋使自證自悟匪從人得所以不壞假名而談實相肇法師云寂兮寥兮寬兮廓兮分兮別兮上則有君下則有臣父子親其居尊卑異其位起教叙其因然後國分其界人部其家各守其位豈非是法住法位世間相常住者耶佛不云乎應以佛身得度者卽現佛身而爲說法應以宰官身乃至長者居士婆羅門比丘比丘尼身得度者悉現其身而爲說法又曰應眼時若千日萬象不能逃影實應耳時若幽谷大小音聲無不足法門旣如此殊勝奈何學者多不

萬一  
向此時節領覽乃爾自生退屈正是不信自殊勝甘  
爲下劣人若是靈利漢便向者裏提得去方知道一  
塵纔起大地全收一毛頭獅子百億毛頭現千頭萬  
頭但識取一頭且那箇是一頭不見南臺和尚聞版  
聲有頌云善哉三下版知識盡來參既善知時節吾  
今不再三復以拂子擊禪床一下云適來所謂盡向  
者裏成等正覺是真實義所以詔國師云如來於一  
切處成等正覺於刀山劍樹上成等正覺於鑊湯鑪  
炭裏成等正覺於棒下成等正覺於喝下成等正覺  
然雖如是如人飲水冷煖自知豈不見善財童子至  
毗盧者那大樓閣前舉體投地從地而起作是念言  
此大樓閣是解空無相無願者之所住處是於一切  
法無分別者之所住處是以一劫入一切劫以一切  
劫入一劫而不壞其相者之所住處是以一佛入一  
切佛以一切佛入一佛而不壞其相者之所住處乃  
至不著一切世間窟宅者之所住處何謂世間窟宅  
便是於無上道自作障難者若執一切世間窟宅不  
能捨離則吾輩所謂長老亦莫住院一向杜絕世

故乃可得行此道如此則是壞世間相而談實相何  
道之有常愛東坡爲文章庶幾達道者也縱使未至  
於道而語言三昧實近之矣人謂是五祖戒和尚後  
身而不知以何因緣中忘此意第亦暫時不著便者  
觀其作維摩畫像讚從始至終不死在言下其詞曰  
我觀衆工工一師人持一藥療一病風勞欲寒氣欲  
煖肺肝胃腎更相剋挾方儲藥如丘山卒無一藥堪  
施用有大醫王拊掌笑謝遣衆工病隨愈言其醫王  
遣去衆醫曰爾輩用藥都無是處衆工既去其病隨  
愈或問醫王君以何藥而病捐乎曰不出衆工之所  
用者但彼不善用耳故曰問大醫王以何藥還是衆  
工所用者我觀三十二菩薩各以意談不二門而維  
摩詰默無語三十二義一時墮我觀此義亦不墮維  
摩初不離是說者箇雖是死蛇解弄却活若彼三十  
二人所論真箇負墮時卽是無言勝有言情知古人  
之意決不如此所以立箇喻云譬如油蠟作燈燭不  
以火點終不明忽見默然無語處三十二說皆光燄  
佛子若讀維摩經當作是念爲正念我觀維摩方丈



室能受九百萬菩薩三萬二千師子座皆悉容受不  
迫窄經中所載此是維摩居士不思議大解脫神通  
之力所以借座燈王取飯香積斷取妙喜世界如陶  
家輪如持鍼鋒舉一粟葉蓋真實之理不可以智知  
不可以識識故曰又能分布一鉢飯壓飽十方無量  
衆斷取妙喜佛世界如持鍼鋒一粟葉云是菩薩不  
思議住大解脫神通力我觀石子一處土麻鞋破帽  
露兩肘能使筆端出維摩神力又過維摩詰若言此  
畫無實相毗耶城中亦非實佛子若見維摩像應作  
是觀爲正觀此是東坡說底禪豈不是言語到若非  
前世熏習得來爭解怎麼道所以妙喜之意亦欲尙  
書公於此事信得及妙心居士請持此語舉歸似令  
叔恐因妙喜之言直下信得及異日忽然噴地一發  
便乃截生死流據祖佛位做箇出世間沒量大人始  
不負妙喜相期之意妙心居士近日畫得入定觀音  
且以妙喜昔年所作讚題其上蓋在衡陽時因道友  
蘭庭彥所請當年信意一筆寫成與維摩讚言語雖  
不同大意相似曰世間種種音聲相衆以耳聽非目

觀一切音聲須以耳聽觀音却以眼觀故曰唯此大  
士眼能觀如何見得曰瞋目諦觀爲佛事到者裏便  
轉了曰於眼境界無所取眼境界既取不得即眼界  
寂滅眼界既寂滅不可耳界不寂滅所以云耳鼻舌  
身意亦然善哉心洞十方空六根互顯如是義觀音  
菩薩以眼聞而普賢菩薩以心聞即此是互顯之義  
所謂互顯者眼處作耳處佛事耳處作鼻處佛事鼻  
處作舌處佛事舌處作身處佛事身處作意處佛事  
於意界中作無量無邊廣大佛事得怎麼受用自在  
了眼依舊觀色耳依舊聽聲乃至鼻舌身意一一依  
本分故曰眼色耳聲鼻嗅香身觸意思無差別邇來  
所謂是法住法位世間相常住是也當以此觀如是  
觀取此爲實成妄想到者裏又轉了曰若離妄想取  
實法展轉惑亂失本心本心既失隨顛倒不見大士  
妙色身云何顛倒眼見色隨色轉耳聞聲隨聲轉是  
謂衆生顛倒迷已逐物以逐物故不見大士妙色身  
無眼耳鼻舌身意此乃教有明文眼耳鼻等既無其  
體互顯之義依何而立故曰互顯之義亦寂滅亦無

大士妙色身亦無種種音聲相佛子能作如是觀永離世間生死苦大凡文字須教說得行若說不行不成文章適來因論時節因緣所以說善財方立于樓閣之前早已讚歎許多殊勝之事然未能得入乃白彌勒菩薩言唯願大聖開樓閣門令我得入時彌勒菩薩前詣樓閣彈指出聲其門即開命善財入善財心喜入已還閉閉時如何便是觀音人流亡所底消息然後善財於樓閣中見百億四天下百億兜率陀天一皆有彌勒菩薩降神誕生遊行七步觀察十方現爲童子居處宮殿爲一切智出家苦行降伏諸魔成等正覺梵王勸請轉正法輪升天宮殿而演說法劫數壽量衆會莊嚴所淨國土所修行願住持教法皆悉不同善財非但見彌勒菩薩一周佛事又自見其身住彼一切諸如來所亦見於彼一切衆會一切佛事以海印三昧一印印定更無秋毫以爲透漏既見如是無量殊勝一切莊嚴自在境界已彌勒菩薩即攝神力入樓閣中又彈指作聲告善財言善男子起法性如是此是菩薩知諸法智因緣聚集所現

之相如是自性如幻如夢如影如像悉不成就爾時善財聞彈指聲從三昧起於此時節忽然打失布袋然後彌勒示以如上境界無有去處亦無住處非寂非常遠離一切師召大眾云既是來無所從去無所至則雲門大師手中扇子踴跳上三十三天築著帝釋鼻孔東海鯉魚打一棒雨似盆傾又有甚麼過當知者箇時節具無量廣大智慧門無量神通門無量言詞門無量不可說又不可說一切佛菩薩自在受用門諸人若能如是信如是入方知先聖道過去一切劫安置未來今未來現在劫回置過去世乃喝一喝云若不喝住打葛藤直到明朝擊禪床下座

列祖提綱錄卷第十五

列祖提綱錄卷第十六

武林十八澗理安禪寺住持婁東行悅集

檀越特請普說

大慧杲禪師錢計議請普說師云法不可見聞覺知若行見聞覺知是則見聞覺知非求法也既離見聞覺知外却喚甚麼作法到者裏如人飲水冷煖自知除非親證親悟方可見得若實曾證悟底人拈起一絲毫頭盡大地一時明得今時不但禪和子便是士大夫聰明靈利博極群書底人箇箇有兩般病若不著意便是忘懷忘懷則墮在黑山下鬼窟裏教中謂之昏沉著意則心識紛飛一念續一念前念未止後念相續教中謂之掉舉不知有人人脚跟下不沉不掉底一段大事因緣如天普蓋似地普擎未有世界早有此段大事因緣世界壞時此段大事因緣不曾動著一絲毫頭往往士大夫多是掉舉而今諸方有一般默照邪禪見士大夫爲塵勞所障方寸不寧怙便教他寒灰枯木去一條白練去古廟香爐去冷湫湫地去將者箇休歇人你道還休歇得麼殊不知著

箇糊癩子不死如何休歇得來爲先鋒去爲殿後底不死如何休歇得此風往年福建路極盛妙喜紹興初入闍住庵時便力排之謂之斷佛慧命千佛出世不通懺悔彼中有箇士人鄭尙明極聰明教乘也理會得道藏也理會得儒教則故是也一日持一片香來妙喜室中怒氣可掬聲色俱厲曰昂有一片香未燒在欲與和尚理會一件事只如默然無言是法門中第一等休歇處和尚肆意詆訶昂心疑和尚不到者田地所以信不及且如釋迦老子在摩竭提國三七日中掩室不作聲豈不是佛默然毗耶離城三十二菩薩各說不二法門末後維摩詰無語文殊讚善豈不是菩薩默然須菩提在巖中宴坐無言無說豈不是聲聞默然天帝釋見須菩提在巖中宴坐乃雨華供養亦無言說豈不是凡夫默然達磨游梁歷魏少林冷坐九年豈不是祖師默然魯祖見僧便面壁豈不是宗師默然和尚因甚麼却力排默照以爲邪非妙喜曰尙明你問得我也是待我與你說我若說不行却燒一炷香禮你三拜我若說得行却受你燒

書禮拜我也不與你說釋迦老子及先德言句我卽就你屋裏說所謂借婆鞍子拜婆年乃問你會讀莊子麼曰是何不讀妙喜曰莊子云言而足終日言而盡道言而不足終日言而盡物道物之極言默不足以載非言非默義所有極我也不曾看郭象解并諸家解註只據我杜撰說破你者默然豈不見孔夫子一日大驚小怪曰參乎吾道一以貫之曾子曰唯你措大家纔開箇唯字便來者裏惡口却云者一唯與天地同根萬物一體致君於堯舜之上成家立國出將入相以至啓手足時不出者一唯且喜沒交涉殊不知者箇道理便是曾子言而足孔子言而足其徒不會却問曰何謂也曾子見他理會不得却向第二頭答他話謂夫子之道不可無言所以云夫子之道忠恕而已矣要之道與物至極處不在言語上不在默然處言也載不得默也載不得公之所說尙不契莊子意何況要契釋迦老子達磨大師意耶你要理會得莊子非言非默義有所極麼便是雲門大師拈起扇子云扇子踴跳上三十三天築著帝釋鼻孔東

海鯉魚打一棒雨似傾盆你若會得雲門者箇說話便是莊子說底曾子說底孔子說底一般渠遂不作聲妙喜曰你雖不語心未伏在然古人決定不在默然處坐地明矣你適來舉釋迦掩室維摩默然且看舊時有箇座主喚作肇法師把那無言說處說出來與人云釋迦掩室於摩竭淨名杜口於毗耶須菩提唱無說以顯道釋梵絕聽而雨華斯皆理爲神御故口以之而默豈曰無辯辯所不能言也者箇是理與神忽然相撞著不覺到說不得處雖然不語其聲如雷故云豈曰無辯蓋辯所不能言也者裏世間聰明辯才用一點不得到得恁麼田地方始是放身捨命處者般境界須是當人自證自悟始得所以華嚴經云如來宮殿無有邊自然覺者處其中此是從上諸聖大解脫法門無邊無量無得無失無默無語無去無來塵塵爾利爾念念爾法爾只爲衆生根性狹劣不到三教聖人境界所以分彼分此殊不知境界如此廣大却向黑山下鬼窟裏默然坐地故先聖詞爲解脫深坑是可怖畏之處以神通道眼觀之則

是刀山劍樹鑊湯爐炭裏坐地一般座主家尙不滯  
在默然處況祖師門下客却道纔開口便落今時且  
喜沒交涉尙明不覺作禮妙喜曰公雖作禮然更有  
事在至晚間來入室乃問他今年幾歲曰六十四又  
問你六十四年前從甚麼處來渠開口不得被我將  
竹篲劈脊打出去次日又來室中曰六十四年前尙  
未有昂在如何和尚却問昂從甚麼處來妙喜曰你  
六十四年前不可元在福州鄭家只今者聽法說法  
一段歷歷孤明底未生已前畢竟在甚麼處曰不知  
妙喜曰你若不知便是生大今生且限百歲百歲後  
你待飛出三千大千世界外去須是與他人棺材始  
得當爾之時四大五蘊一時解散有眼不見物有耳  
不聞聲有箇肉團心分別不行有箇身火燒刀斫都  
不覺痛到者裏歷歷孤明底却向甚麼處去曰昂也  
不知妙喜曰你既不知便是死大故曰無常迅速生  
死事大便是者箇道理者裏使聰明也不得記持也  
不得我更問你平生做許多之乎者也臘月三十日  
將那一句敵他生死須是知得生來死去處分曉始

得苦不知即是愚人渠方心伏從此遂救他不坐在  
無言無說處肯來者下做工夫今日一會同此聽法  
須知人人有此一段大事因緣亘古亘今不變不動  
也不著忘懷也不著著意但自時時提撕妄念起時  
亦不得將心止遏止動歸止止更彌動只就動止處  
看箇話頭便是釋迦老子達磨大師出來也只是者  
箇僧問趙州狗子還有佛性也無州云無你措大家  
多愛穿鑿說道者箇不是有無之無乃是真無之無  
不慮世間虛豁之無怎麼說時還敵得他生死也無  
既敵他生死不得則未是在既然未是須是行也提  
撕坐也提撕喜怒哀樂時應用酬酢時總是提撕時  
節提撕來提撕去沒滋味心頭恰如頓一團熱鐵相  
似那時便是好處不得放捨忽然心華發明照十方  
刹便能於一毛端現寶王刹坐微塵裏轉大法輪汝  
等諸人問怎麼說話往往心裏道妙喜老漢搖唇鼓  
舌說得也相似不知他肚裏如何須知妙喜說得底  
便是行得底更無兩般所以西天第十三祖迦毗摩  
羅尊者欲求一弟子繼紹祖位謂深山窮谷中必有



高人居止因往求之故知非但弟子求師切師求弟子亦切遂入山果見一人出迎曰深山孤寂龍麟所居大德至尊何枉神足祖曰吾非至尊來訪賢者彼默念曰此師得決定性明道眼否是大聖繼真乘否祖曰汝雖心語吾已意知但辦出家何慮吾之不聖彼聞已悔謝於是投祖出家卽第十四祖龍樹是也今時學道者多不自疑却疑他人所以道大疑之下必有大悟且道悟得箇甚麼良久云我不敢輕於汝等汝等皆當作佛下座

禮侍者斷七請普說僧問和尚室中道喚作竹筴則觸不喚作竹筴則背不得下語不得無語遂以坐具打地一下云學人爲蛇畫足却請和尚頭上安頭師云自起自倒得人憎進云也要和尚相委悉師云切忌鞭裏動指頭進云還有爲人處也無師云無進云却較些子師云換却你眼睛乃云喚作竹筴則觸不喚作竹筴則背不得下語不得無語不得思量不得擬議當恁麼時釋迦老子達磨大師雖有鼻孔直是無出氣處還委恁麼遇貴則賤遇賤則貴若向貴賤

處著到更須買草屨行脚始得所以道不可以有心求不可以無心得不可以語言造不可以寂默通雖然如是如天普蓋似地普擎全放全收全殺全活妙喜恁麼道也不離者箇消息正如適來禪客以坐具打地一般乃拍禪床一下云且道明甚麼邊事斯辰比丘了賢爲近禮侍者將俗家寄來衣物估唱請老漢舉揚宗旨莊嚴報地可惜者兄弟方始於竹筴子話有箇發明處而今已是說前年話一日問他喚作竹筴則觸不喚作竹筴則背如何渠答不得却曰望和尚爲某作箇方便指示山僧向他道你是福州人我說箇噱子向你如將名品荔枝和皮殼一時剝了以手送在你口邊只是你不解吞渠聞之不覺失笑曰和尚吞著卽禍事過得幾時又問他前日吞了底荔枝只是你不知滋味渠曰若知滋味轉見禍事我愛他者兩轉語所謂從門入者不是家珍信知宗師家無實法與人且如世間工巧技藝有樣子便做得若是者一解須是自悟始得得之於心應之於手若未得箇安樂處一向求知見覓解會者般雜毒纔入

心如油入麪永取不出縱取得出亦費料理此事如  
青天白日元無障礙却被者些雜毒障却所以於法  
不得自在老漢常愛真淨和尚道如今人多是得箇  
身心寂滅前後際斷休去歇去一念萬年去似古廟  
裏香爐去冷湫湫地去便爲究竟殊不知却被此勝  
妙境界障蔽自己正知見不能現前神通光明不能  
發露或又執箇一切平常心是道以爲極則天是天  
地是地山是山水是水僧是僧俗是俗大盡三十日  
小盡二十九凡百施爲須要平常一路子以爲穩當  
定將去合將去更不敢別移一步怕墮坑落塹長時  
一似雙盲人行路一條拄杖子寸步拋不得緊把著  
憑將去步步依倚一日若道眼豁開頓覺前非拋却  
杖子撒開兩手十方蕩蕩七縱八橫東西南北無可  
不可到者裏方得自在如今人能有幾箇放得杖撒  
得手昔因真淨和尚新開語錄其時我老和尚在五  
祖堂中作首座五祖一日廊下見僧把一冊文字祖  
曰你手中是甚文字僧曰是真淨和尚語錄祖遂取  
讀卽讀歎曰慚愧末世中有恁地尊宿乃喚首座我

老和尚時在後架洗轡聞呼狼忙走出來祖曰我得  
一本文字不可思議所謂善說法要你試看休去歇  
去一念萬年前後際斷諸方如今有幾箇得到者田  
地他却喚作勝妙境界舊時寶峯有箇廣道者便是  
者般人一箇渾身都不理會都不見有世間事世間  
塵勞昧他不得雖然恁麼却被者勝妙境界障却道  
眼須知到一念不生前後際斷處正要尊宿如水潦  
和尚因採藤次問馬祖曰如何是祖師西來意祖曰  
近前來向你道水潦纔近前馬祖當臂一踢踢倒水  
潦忽然大悟不覺起來呵呵大笑祖曰你見箇甚麼  
道理潦曰百千法門無量妙義只向一毛頭上便識  
得根源去者箇教中謂之入流亡所所入既寂動靜  
二相了然不生纔得箇入處便亡了定相定相既亡  
不墮有爲不墮無爲動靜二相了然不生便是觀音  
入理之門他既悟了便打開自己庫藏運出自己家  
珍乃曰百千法門無量妙義只向一毛頭上便識得  
根源去又呵呵大笑馬祖知他已到者箇田地更不  
采他亦無後語後來住水潦庵禪和家來參他有百

十衆纔舉揚便賣弄者一踞云自從一喫馬師跏直至而今笑不休渠又何曾有峯巒疊翠澗水潺湲岸柳含煙庭華笑日鸞啼喬木蝶舞芳叢底說話來只道自從一喫馬師跏直至而今笑不休者箇便是第一箇入流亡所動靜二相了然不生底樣子又不見雲門問洞山近離甚處山曰查渡門曰夏在甚處山曰湖南報慈門曰幾時離彼山曰八月二十五門曰放你三頓棒古人淳樸據實祇對自言我此回實從查渡來有甚麼過便道放我三頓棒大丈夫漢須共者老漢理會始得至明日便去問曰昨日蒙和尚放三頓棒未審過在甚麼處門曰飯袋子江西湖南便恁麼去洞山忽然大悟更無消息可通亦無道理可拈出只禮拜而已既悟了便打開自己庫藏運出自已家珍乃曰他後向無人煙處住箇草庵不蓄一粒米不種一莖菜接待十方往來盡與伊出却釘拔却楔拈却炙脂帽子脫却鶻鼻布衫教伊灑灑地作箇衲僧豈不俊哉雲門曰你身如椰子大開得許大口者箇是第二箇入流亡所動靜二相了然不生底樣

子又鼓山晏國師在雪峯多年一日雪峯知其緣熟忽起搗住曰是甚麼晏釋然了悟唯舉手搖曳而已峯曰子作道理耶晏曰何道理之有後來楊大年收在傳燈錄中謂之亡其了心此是第三箇入流亡所動靜二相了然不生底樣子又灌谿和尚一日見臨濟濟下繩床纔擒住谿便云箇箇者箇是第四箇入流亡所動靜二相了然不生底樣子者箇說似人不得傳授人不得老漢十上參也曾零零碎碎悟來雲門下也理會得些子曹洞下也理會得些子只是不能得前後際斷後來在京師天寧見老和尚陞堂舉僧問雲門如何是諸佛出身處門曰東山水上行若是天寧即不然如何是諸佛出身處薰風自南來殿閣生微涼向者裏忽然前後際斷譬如一縷亂絲將刀一截截斷相似當時通身汗出潏然動相不生却坐在淨保保處得一日去入室老和尚曰也不易你到者箇田地可惜你死了不能活不疑言句是爲大病不見道懸崖撒手自肯承當過後再甦欺君不得須信有者箇道理老漢自言我只據如今得處已

是快活更不能理會得也老和尚却令我在擇木寮作不羈務侍者每日同士大夫須得三四回入室只學有句無句如藤倚樹纔開口便道不是如是半年間只管參一日同諸官員在方丈藥石次我只把箸在手都忘了喫食老和尚曰者漢參得黃楊木禪却倒縮去我遂說箇譬喻曰和尚者箇道理恰如狗看著熱油鑊相似要舐又舐不得要捨又捨不得老和尚曰你喻得極好只者箇便是金剛圈栗棘蓬一日因問老和尚見說和尚當時在五祖曾問者箇話不知五祖和尚如何答和尚不肯說老漢曰和尚當時不可獨自問須對大眾前問如今說又何妨老和尚乃曰我問有句無句如藤倚樹時如何祖曰描也描不成畫也畫不就又問忽遇樹倒藤枯時如何祖曰相隨來也老漢纔聞舉便理會得乃曰某會也老和尚曰只恐你透公案未得老漢曰請和尚舉老和尚遂連舉一絡索諸訛公案被我三轉兩轉截斷如箇大平無事時得路便行更無滯礙老和尚曰如今方知道我不謾你我既會了却倒疑著幾箇禪頭乃問

老和尚老和尚曰我箇禪如大海相似是你將得箇大海來傾取去始得若只將得鉢盂來盛得些子去便休是你器量只如此教我怎奈何能有幾箇得到你田地舊時只有一箇環上座與你一般只是死了過得幾時便舉我立僧後來在雲居首座寮夜間常與兄弟入室老和尚愛來聽有時入室了却上方丈見老和尚同在火爐頭坐老和尚曰或有箇禪和子得似老僧你又如何支遣老漢曰何幸如之正如東坡說作劊子得一箇肥漢剛我却倒與老和尚入室被我拶得上壁老和尚呵呵大笑思量者老和尚粉骨碎身亦未能報得因禮上座聞老漢舉福州人喫荔枝有箇譬地處所以說到者裏者兄弟在叢林中規行矩步無衲子之過可惜尺頭短然打箇筋斗出來決定昧他不得有一則古話舉似大眾教中道吾不見時何不見吾不見之處若見不見自然非彼不見之相若不見吾不見之地自然非物云何非汝後來湛堂和尚頌曰老胡徹底老婆心爲阿難陀意轉深韓幹馬嘶青草渡戴嵩牛臥綠楊陰妙喜亦有箇

頌子雖不甚文彩却不在淇堂之下荒田無人耕耕  
著有人爭無風荷葉動決定有魚行

### 念誦提綱

圓悟勤禪師看藏經上堂祥煙繚繞瑞氣氤氲公案  
現成有誰扣擊乃云塵中大經卷莫測津涯聰慧淨  
眼人始能拈出直得義天性海若帝網交羅智照神  
光如洪爐猛燄今日幸遇皇風蕩蕩帝道平平有大  
心檀越爲汝發機使諸人各各八字打開直得霞條  
展處玉牒舒時文彩已彰各宜薦取且不落文墨一  
句作麼生道一堂風冷淡千古意分明

祖師會上堂千聖頂額上可容刹海衲僧命脉中不  
許真機更通一線路以佛現祖從祖證佛印印無差  
機機圓證靈山拈花示衆建立此箇宗風金色頭陀  
曾承妙旨以至西天四七此土二三自曹溪散席已  
來數百年間列刹相望各各握靈蛇珠人人抱荆山  
璧有照有用有權有實提振向上宗風傳持正法眼  
藏要且百川異流同歸大海千重百帀無出一源所  
以道西天二十八祖也恁麼唐土六祖也恁麼天下

列刹相望諸老宿也恁麼山僧也恁麼且道恁麼事  
作麼生商量還提撥得出麼還緇素得明麼山僧不  
惜兩莖眉毛與諸人點破遂拈拄杖云還見麼三世  
諸佛歷代祖師天下老和尚盡在拄杖頭上放大光  
明現權現實現機現境列五位君臣開三玄宗要機  
境相投箭鋒相拄一字三句同源圓相境致殊別若  
也於此委悉百草頭上罷却平生事根株亦不留間  
清聲外句莫向句中求儻或未然山僧不免又拖泥  
涉水也達磨不來東土二祖不往西天人人壁立萬  
仞箇箇常光現前卓拄杖一下下座

蓮華會上堂毗婆尸已前千華現瑞天中天正地優  
曇呈祥直得徧界不曾藏通身無影像現大蓮華王  
周匝千華座一葉一釋迦一鬚一彌勒塵塵爾刹刹  
爾處處爾念念爾一塵舉大地收一華開世界起可  
謂殊勝中最殊勝奇特中倍奇特感慈塔前凝瑞氣  
羅漢洞邊顯真容法會儼然人天普集到者裏合談  
何事說玄說妙得麼說佛說祖得麼舉古舉今得麼  
顯作顯用得麼盡是從前已後大宗師拈出了也即



龍門遠禪師檀越還佛頂心經上堂。庵箇臨箇臨。人會得麼。若道是言語。又不成。言語若道有道理。又不成。道理可謂言詮。不到分別。不及先聖呼爲密語。又曰。眞言一切言音。從是而生。一切語教。從是而出。山僧適來看經中得七字。陀羅尼能滅千災成就萬德。今對諸人舉此七字。陀羅尼一遍。諸人諦聽。遂默然。屈第一指至第七指。曰。諸人聞得麼。恐諸人不聞。更舉一遍。又默然。屈一指至七指。曰。聞得麼。大眾唯佛與佛。乃能知之。自餘群生。悉皆罔措。有方便門名曰重說偈言。今更載三分明說。此七字。呪曰。佛頂心經齋願了。大眾曉得其中旨趣麼。侍山僧奉爲解釋。一字字要知落處。若論佛祇是富人。更無物若論頂。晝夜舒光照前境。若論心。看時無相。用時深若論經。

東山齊已禪師蓮社會道友請上堂漸漸鷄皮鶴髮  
父少而子老看看行步蹢躅疑殺木上座直饒金玉  
滿堂照顧白拈賊豈免衰殘老病正好著精彩任汝  
千般快樂渠儂合自由無常終是到來歸堂喫茶去  
唯有徑路修行依舊打之遶但念阿彌陀佛念得不  
濟事復云噫者條活路已被善導和尚直截指出了  
也是你諸人朝夕在徑路中往來因甚麼當面錯過  
阿彌陀佛者裏薦得便可除迷倒障拔猶豫箭截疑  
惑網斷癡愛河伐心稠林浣心垢濁正心詔曲絕心

生死然後轉入那邊擡起脚向佛祖履踐不到處進  
一步開口向佛祖言誰不到處說一向喚回善導  
和尚別求徑路修行其或準前捨父逃走流落他鄉  
撞東磕西苦哉阿彌陀佛

元叟端禪師朝廷看藏經滿散上堂毗盧藏中有大  
經卷量等三千大千世界書寫三千大千世界中事  
悉盡無餘今上皇帝以清淨大眼觀此大經卷在一  
微塵中敦遣使臣頒降御香命天下僧員破此一塵  
出此經卷普使法界有情知一一塵中有如是經卷  
一一經卷有如是章句一一章句有如是妙義一一  
妙義有如是奇特如是殊勝如是廣大如是自在今  
朝滿散之次仍命山僧升于此座舉揚無上般若表  
懺上項功德所有種種法門智慧海種種因果德相  
海種種進修有願海種種教導方便海種種依正究  
竟海種種互融攝入海不可說不可說種種功德光  
明海普用回向真如實際莊嚴無上佛果菩提四方  
銷兵革之憂萬民樂明桑之正與麼時八表來朝  
萬邦入貢一句作麼生道但見皇風成一片不知何

處是封疆

楚石琦禪師經會上堂諸供養中法供養最供養卽  
不無如何是法莫道我謾你南無佛陀南無達磨南  
無僧伽卓拄杖云山河大地草本叢林盡向者裏平  
等證入未解脫者令得解脫未涅槃者令得涅槃雖  
在衲僧分上如經蠱毒之家水也不得沾他一滴靠  
拄杖下座

聖旨看藏經上堂百千法門同歸方寸河沙妙德總  
在心源大福德人修大福德人受是以恒沙刹土莫  
不稟其威靈草木昆虫亦皆資其化育今則法筵洞  
啓教藏宏開重重福德門種種壽量海如天普覆如  
地普擎如日普照如風普吹仲尼云吾禱久矣復舉  
宋太宗皇帝因入寺問僧云看什麼經僧云仁王護  
國經帝云既是寡人經因什麼落在卿手裏僧無對  
後來雪竇代云皇大無親惟德是輔師云若問永祚  
但以頂戴經云萬歲萬歲

看華嚴經上堂東西南北四維上下塵塵刹刹總不  
離箇華藏世界海有高有下有濶有狹有具有不具

有等有不等有清淨有不清淨有短壽有長年且道毗盧遮那如來卽今在阿那箇世界中說法又說什麼法爲說三乘法爲說一乘法爲說無上乘法爲無所說試道看若道得許你淨佛國土遊戲神通有情無情同證同人若道不得生死海內沉浮

施主看楞嚴上堂體理得妙了了常知一種平懷綿綿不漏著衣喫飯蓋是尋常見色聞聲猶如聖賢但可入佛不可入魔透得十種禪關出得五陰區宇處處無非佛事頭頭總是道場酒肆淫坊了無罣礙龍宮虎穴任便經過亦可入魔亦可入佛然後佛魔俱遣凡聖不存不取涅槃不居生死道我大事了畢拄杖不在苕帚柄聊與三十

呆庵莊禪師法華會上堂久默斯要不務速說今當說之各宜善聽良久云我不敢輕於汝等汝等皆當作佛

笈庵問禪師總督漕撫恭順侯吳實宰居士請至淮城文通塔寺啓建華嚴道場誦上堂大人境界非大人不知殊勝因緣非殊勝不偶山僧還離駕水來至

黃淮途中閱歷州郡縣邑江湖河海計程千有餘程閱日十有五日其中無去來相無久暫相無違順相無動靜相所以道觀方知彼去去者不亡方又云去去實不去來來實不來又云動靜二相了然不生者裏說得透便能世出世法交羅動靜去來自在恁麼則山僧旣到此間未違丈室未到此間無日不與大總督實翁居士把手共行無日不與現前尊官諸上善友同遊華藏界中事無礙理無礙事理無礙事事無礙所謂大人境界殊勝因緣早從未舉已前一一現成具足既然如是且道卽今建立道場重開普光明會又什麼人分上事豁開大地群生眼直得歌謠

載道途

牧雲門禪師滿華嚴會上堂華嚴法界理事無礙懺罪消災一彩兩寶薦拈拄杖云大衆杜順和尚來也在拄杖頭上口喃喃道懷州牛喫禾益州馬腹脹天下覓醫人炙猪左膊上諸人還見麼若也見未免頭上安頭若不見日用堂堂無蓋覆本來同是遮那身

水陸陸座提綱

應庵華禪師王機宜爲弟樞密相公散水陸請陞座  
師示衆云大人具大見大智得大用升大解脫堂演  
大解脫義是故留守樞密大資相公雖示世人有去  
有來極其本體不動不變所以羅籠不肯住呼喚不  
回頭佛祖不安排至今無處所塵塵刹刹普現威光  
物物頭頭全彰勝相殊勝中殊勝奇特中奇特他方  
此界全心淨土人間天上同一眞境正當恁麼時且  
道留守樞密大資相公卽今在什麼處手提殺活金  
剛劍誰敢當頭正眼看

悲濟會陞座師召衆云大智洞明體無去住明逾日  
月寬若太虛天地以此爲覆載日月以此爲照臨山  
嶽以此爲崔嵬江河以此爲流注賢聖以此爲威靈  
凡夫以此爲安養陣亡以此爲超昇冤讐以此爲解  
脫諸佛以此爲示現祖師以此爲單傳諸人以此爲  
悲濟光孝以此爲方便慈拈拄杖云釋迦老子祇今  
在山僧拄杖頭上放大光明其光清淨無塵無雜光  
光相羅前後無別塵塵普入刹刹全彰然後無量爲  
一一爲無量大中現小小中現大於一毫端現寶王

刹坐微塵裏轉大法輪且道諸人向甚麼處見釋迦  
老子若向拄杖頭上見未見在若向妙法蓮華中見  
亦未見在旣不如是畢竟向什麼處見釋迦老子以  
拄杖卓一卓云願今得果成寶王還度如是恒沙衆  
元叟端禪師朝廷金山作水陸陞座拈香祝聖畢乃  
云盡不可說不可說微塵數世界是箇金剛正體淨  
裸裸絕承當盡不可說不可說微塵數世界是箇寶  
覺眞心亦灑灑無空闕如天普蓋似地普擎如日普  
照如風普吹無一時不徧無一處不周無一理不圓  
無一事不具塵塵刹刹八面玲瓏物物頭頭十方通  
暢拈一莖草作丈六金身將丈六金身作一莖草腹  
中現百億閻浮提室內湧三萬二千獅子座七縱八  
橫千變萬化左之右之無可不可三世諸佛以此正  
體以此眞心座寶蓮華成等正覺津濟四生梯航九  
品啓迪盲聾炳耀癡昧奕世人王帝主以此正體以  
此眞心爲生民立極爲世開太平基拯黎元於塗炭  
措天下於磐石大元世界主當今皇帝以此正體以

此真心克紹不圖續登大寶百億須彌盧百億香水海日月所照風雨所至悉稟威靈咸歸化育乃至此日特頒聖旨敦遣使臣就金山古澤心寺照依梁武皇帝科儀修設天地冥陽水陸大會七晝夜熬種種香然種種燈管種種上妙飲食設種種上妙服御金銀珊瑚真珠瑪瑙種種上妙珍寶而爲供養命僧一千五百員披轉三藏五乘十二分秘典真詮權也實也頓也漸也半也滿也偏也圓也交光相羅如寶絲網上以翊衛皇圖下以資培民本徑山臣僧行端與教禪律三宗耆年碩德以此正體以此真心欽奉綸言高陞寶座闡揚諸佛無上奧旨發揮諸佛無上秘傳若幽若顯若聖若凡若飛若潛若動若植普仗良因均霑妙利四方消災沴之虞萬姓樂耕桑之業同濟仁壽共享昇平當此之時理周事徧果滿功圓直下無私一句畢竟如何擎展擊拂子云化行舜日山川外人在堯天雨露中復說偈云執尺量虛空終難究其數持蠡測海水豈解知其源吾君本心體廣大亦如是欲求其邊際畢竟不可得吾君之壽量與此

心體同欲求其窮極是亦不可得吾君之福源與此壽量同欲求其窮盡是亦不可得太后皇太子嬪妃諸眷屬心體及福源等無有差別一塵一佛刹一刹一釋迦各現廣長舌共說如上事百千萬億中亦不能及一天人群生類地獄鬼畜等十方諸有情三界衆含識當知此心體本來相如是

月江印禪師朝廷金山寺建水陸會陞座如來往昔爲衆生修治法海無邊行猶如浦澤清炎暑普滌衆生煩惱熱所以乘大悲願力示現世間爲三界大師四生慈父如優曇華時一現爾或於一毫端現寶王刹坐微塵裏轉大法輪或爲轉輪聖王王四天下千子圍繞七寶莊嚴壽八萬歲飛行自在所向無礙其國豐樂人民熾盛威德特尊無有爲比是皆大悲願力中之所發現所以道大悲願力猶如大海甚深無底大悲願力如大虛空廣大無際大悲願力如大日輪升于虛空大悲願力如須彌山普雨衆寶大悲願力如如意珠滿衆生願大悲願力如世明燈普照一切大悲願力猶如空蓋普蔭群生我佛如來以大悲



心而爲體因於衆生所起大悲因於大悲生菩提心  
因菩提心成等正覺譬如曠野之中有大樹王根若  
得水枝葉花果悉皆繁茂菩提樹王亦復如是。一切  
衆生而爲樹根諸佛菩薩而爲花果若諸菩薩以大  
悲水饒益衆生則能成就諸佛智慧花果若諸菩薩  
以大悲心饒益衆生則能成就阿耨菩提是故菩提  
屬於衆生若無衆生一切菩薩終不能成無上正覺  
故我大元佛心聖人與釋迦如來轉輪聖王同一根  
本同一枝葉亦乘大悲願力示現世間作大國王爲  
世界主允文允武克哲克明辰法永垂視四海衆生  
如赤子金輪統御攝十方利土爲一家具十地菩薩  
之身心超四輪王之壽量萬機之暇留心佛法以正  
法治民故佛教倍前光明熾盛以大悲心饒益衆生  
開甘露門廣度群品由是於楊子江建金山萬僧之  
海會修水陸無礙之大齋披閱五千四十八卷之尊  
經講演禪教直指難思之妙法以百億日月而爲燈  
燭使一切衆生得證光明三昧門故以百億須彌而  
爲香饌使一切衆生悉皆飽滿得證法喜禪悅樂故

以百億香水海而爲醍醐酥酪使一切衆生頓息饑  
虛得入如來清淨法海故以百億四天下七寶而爲  
布施使一切衆生永離貧苦皆得如意富樂故以過  
現未來百千萬億恒河沙微塵數諸佛菩薩而爲眷  
屬使一切衆生得依怙善知識故以三千大千世界  
而爲經卷使一切衆生常轉如是經故上窮有頂下  
極空輪若幽若顯咸脫於苦輪曰天曰人皆承其恩  
力莫不皆從佛心聖主清淨微妙大悲願力中之所  
流出上合諸佛本妙覺心下與一切衆生同一悲仰  
以此祝聖壽壽如妙高不動之山以此延聖福福等  
華藏甚深之海以此治國家則民康物阜以此平天  
下則海晏河清百億劫之罕逢十方國之希有何異  
釋迦出世彌勒降生恒河沙界盡入提封九十六種  
咸歸正化巍巍乎蕩蕩乎不可得而稱量不可得而  
思議只今君臣慶會佛法光輝知恩報恩作麼生道  
兩輪日月無私照一統乾坤樂太平復學梁武帝夢  
神僧告曰六道四生幽囚者衆何不建水陸大齋而  
濟拔之帝既寤詔十大高僧披尋大藏撰成儀文始

於金山建此大會於利夜分悉停燈燭帝親臨筵禱  
曰若此儀文理協聖凡願我并祀燈燭自明如未得  
聖意燭暗如故帝一拜燈燭皆明三拜宮殿震動三  
拜天雨寶花當時靈異不可勝數至於歷代修建顯  
驗尤多當今佛心天子以梁武之心爲心特降御香  
七寶練段修設齋供建此大會宰相百官光臨法會  
諸山碩德共闡玄音凡聖混融人天交接直得婆竭  
羅龍王從海涌出親獻寶珠天帝釋空中雨花殷勤  
贊嘆上來臣僧升於寶座舉唱宗乘所萃鴻因端爲  
祝延天竺復成一闍堯眉八采輝寶宇舜日重瞻照  
四方紫金山頭日卓午大千沙界仰恩光久立尊官  
伏惟珍重

楚石琦禪師洪武元年九月十一日欽奉聖旨於蔣  
山禪寺水陸會中陞座眞如淨境界一泥木管仔能  
隨染淨緣遂成十法界法界者衆生心也衆生心即  
佛心大哉心乎無形無相尤徧十方亘古亘今包含  
萬有但在衆生分上一向染用謂之無明諸佛分上  
一向淨用謂之佛性無明佛性是俱空然而衆生

不了于空無明所惑從無量劫而至今世因身口意  
起貪瞋癡貪行多者二萬一千嗔行多者二萬一千  
疑行多者二萬一千等分行者二萬一千共造八萬  
四千諸煩惱衆生罹王憲死在地獄動經劫數未有  
出期古德有言一切苦果因業而受受盡還無何苦  
之有豈不見梁朝傅大士心王銘云觀心空王微妙  
難測無形無相有人神力能滅千災成就萬德體性  
雖空能施法則觀之無形呼之有聲爲之法將心戒  
傳經水中鹽味色裏膠青決定是有不見其形又云  
欲求成佛莫染一物心性雖空貪瞋體實入此法門  
端坐成佛薦豎起拂子云還見麼無量壽世尊即今  
在拂子頭上放大光明普照十方盡虛空徧法界不  
可說不可說又不可說極微塵數三千大千世界百億  
日月百億四天下百億四大海百億五須彌百億欲  
界天宮殿百億色界天宮殿百億佛色界天宮殿於  
中一一世界大宮殿內皆有菩薩海衆圍繞隨機說  
法各各不同頓說漸說實說權說縱說橫說顯了說  
蓋覆說凡有所說皆說此心何一理而不圓何一事

而不備何一塵而不攝何一刹而不收者裏見得未  
度令度未解令解未到彼岸者令到彼岸未證涅槃  
者令得涅槃皇恩佛恩一時報畢其或未然更添注  
脚去也擊拂子云還聞麼者裏聞去諸人耳在一聲  
中一聲普徧諸人耳此是觀音大士圓通法門十方  
俱擊鼓十處一時聞此是圓真實隔垣聽音響遐邇  
俱可聞此是通真實聲無既非滅聲有亦非生生滅  
二緣離是則常真實是故諸佛於此得之徧十方界  
成等正覺菩薩於此得之圓滿六度萬行獨覺於此  
得之洞明十二緣生聲聞於此得之三明六通證入  
解脫諸天於此得之高超十地人倫於此得之具足  
衆善修羅於此得之永絕憍慢地獄於此得之咸脫  
苦輪乃至餓鬼旁生并及四生九類一切含識於此  
得之莫不悟自心佛成自心佛金剛般若云過去心  
不可得未來心不可得現在心不可得心既不可得  
佛亦不可得菩薩亦不可得獨覺亦不可得聲聞亦  
不可得諸天亦不可得人倫亦不可得修羅亦不可  
得餓鬼旁生四生九類一切含識亦不可得此不可

得亦不可得永嘉大士道了了見無一物亦無人亦  
無佛大千沙界海中漚一切聖賢如電拂所以二祖  
神光參初祖菩提達磨曰我心未寧乞師安心初祖  
云將心來與汝安神光云覓心了不可得初祖云與  
汝安心竟以拂子劃一劃云劃斷葛藤正與麼時果  
滿功圓一句作麼生道將此深心奉塵刹是則名爲  
報國恩欽惟皇帝陛下英武仁聖削平海內子育兆  
民九夷八蠻罔不賓服是以梯山入貢航海獻琛元  
年大赦天下治以寬恩無辜冤枉亦蒙濟拔特賜銀  
帑命善世院就蔣山禪寺修建冥陽水陸大齋七晝  
夜於中作諸佛事供佛賢聖天地神祇三界鬼神并  
召臣僧梵琦舉唱宗乘所集功勳并用超度四生六  
道無辜冤枉悉脫幽冥往生佛土成就菩提所願如  
意珠燦破無明窟智慧劍截斷生死根因大法以悟  
心趣樂邦而見佛復舉梁朝武帝請傳大士講經大  
士登座揮尺一下寶公菩薩謂帝曰陛下還會麼帝  
默然菩薩云大士講經竟師拈云今日聖恩令臣僧  
梵琦陞於此座舉揚第一義諦普願迷流同成佛道

釋迦老子四十九年說不盡底細大法門盡被傳大士一時吐露了也且道節文在什麼處冥陽水陸大齋緣徧滿三千與大千東走金鳥西玉兔上窮碧落下黃泉永拋業識無明海高坐如來妙寶蓮恩重須彌何以報祝延聖壽萬斯年

洪武二年三月十三日欽奉聖旨於蔣山禪寺水陸會中陞座震法雷擊法鼓布慈雲兮洒甘露卽今法雷已震法鼓已擊慈雲已布甘露已洒且道山僧說甚麼法說向聲聞乘法耶說向獨覺乘法耶說向菩薩乘法耶說向阿耨多羅三藐三菩提法耶說向凡夫界法耶教中道法界中無有法名向聲聞乘向獨覺乘向菩薩乘向阿耨多羅三藐三菩提無有法名向凡夫界無有法名向染向淨向生死向涅槃何以故諸法無二故譬如虛空若去來今求不可得然非無虛空據實而論只者虛空早是釘橛了也雲門手中扇子踈跳上三十三天觸著帝釋鼻孔東海鯉魚打一棒雨似盆傾諸人又作麼生會良久云不起纖毫修學心無相光中常自在又云不是心不是佛不

是物是箇什麼明白道了也更要解注那此事不在言語上十雙五箇作言語會苦哉屈哉香嚴和尚道如人上樹手不攀枝脚不踏枝樹下有人來問祖師西來意若答他則喪身失命若不答他則違他所問答則是不答則是大慧和尚云我者裏禪如一團火相似若觸他則燒殺你若背他則凍殺你只如永嘉大師有兩句子與賊過梯道什麼鏡裏看形見不難水中捉月爭拈得平如鏡面險似懸崖金剛取泥處是我屋裏人知得更饒箇古話吾宗第四祖淺波毬多尊者因一族姓子出家夜投天寺宿尊者乃作方便化一夜叉擔一死人更有一夜叉空手而至二鬼共諍一言我擔死人來第二者言我擔死人來前一鬼言我有證人此人見我擔死人來時此人念言我今必定死應作實語語後鬼言此死人者前鬼擔來非是汝許後鬼大嗔拔其一臂前鬼以死人臂還續如故後鬼復拔一臂前鬼更拔死人臂還復補處後鬼拔其兩脚前鬼悉以死人脚補之如本如是二鬼共食所拔新肉即便出去此族姓子豁然大悟今日

聖天子普度幽冥令臣僧梵琦說法度諸佛子所冀一言之下泮然無疑知一切法卽心自性成就慧身不用他悟如夢忽覺如蓮華開正恁麼時如何舉似一百五日近清明上元定是正月半復舉昔有士人撰無鬼論鬼現身云我鬻士人無對後來五祖演和尚代以兩手合作鵝鵝鵞云谷谷呱師拈云五祖和尚可謂是千聖頂上拈來萬人叢中指出語默所不到情解所不及向上一句作麼生論量常憶江南三月裏鷓鴣啼處百花香

列祖提綱錄卷第十六

列祖提綱錄卷第十七

武林十八澗理安禪寺住持婁東行悅集

肅衆提綱

汾陽無德禪師一日謂衆曰夜來夢亡父母覓酒肉紙錢不免徇俗置以祀之事辦於庫堂設位如俗間禮酌酒行肉化紙錢訖令集知事頭首散其餘盤知

事輩却之無德獨坐筵中飲啖自若衆僧數日酒肉僧豈堪爲師法耶腰包盡去惟愁明大懺泉大道等六七人在耳無德翼日上堂云許多閒神野鬼祇消一盤酒肉兩陌紙錢斷送去了也法華經云此衆無枝葉惟有諸眞實下座

雪竇顯禪師因事示衆杜耳目於胎殼掩玄象於霄外而責宮商之異辯玄素之殊底是甚麼人還知麼那一箇者一箇兼本三人放過一著便下座

因事示衆石本落落玉自碌碌古之今之一何暫速獅子不咬麒麟猛虎不食伏肉君不見洞庭孤島煙浪深木馬追風有人識

因事示衆客從遠方來遺我徑寸璧中有四箇字字字無人識清幽鯨海寬冷射蟾輪窄今朝呈似看請道末後句

雪巖欽禪師因事并謝首座十五日以前雷聲甚大雨點全無十五日以後時清道泰家國晏然正當十五日恭惟宿來各各道體起居萬福畢竟如何堂中首座人天眼目



高峰妙禪師因事上堂水中鹹味色裏膠青決定是有不見其形豎拂子云見其形失却山前一村人眼睛

天如則禪師因事示衆以拂子擊禪床左邊云莫認錯莫認錯通身是病通身藥擊右邊云莫錯認莫錯認通身是藥通身病豎拂子云如今藥病兩忘諸人還見麼三錢賣却黑撈波打瓦鼓唱村歌隨處薩婆訶擲拂子下座

廣德義禪師因事示衆纔到洪山便蹂根四方八面不言論他家自有眠雲志蘆管橫吹宇宙喧

己庵顏禪師因事上堂元宵已過化主出門六群比丘各從其類此衆無復枝葉純有眞實如是增上慢人退亦佳矣麒麟不爲瑞鸞鷟不爲榮麥秀兩岐禾登九穗總不消得但願官中無事林下棲禪水牯牛飽臥斜陽擔板漢清貧長樂粥足飯足俯仰隨時筋籠不亂攪匙老鼠不咬甌簞山家活計淡薄常情不敬功德天誰嫌黑暗如有智主人二俱不受良久曰君子愛財取之以道

洞山寶禪師因事上堂總恁麼風恬浪靜那裏得來忽遇洪波浩渺白浪滔天當恁麼時覓箇水手也難得衆中莫有把舵者也無衆無對師曰賺殺一船人慈受深禪師因事上堂古者道忍忍三世如來從此盡饒饒萬禍千殃從此消默默無上菩提從此得師曰會得此三種語了好箇不快活漢山僧祇是得人一牛還人一馬潑水相唾插嘴斯罵卓拄杖曰平出平出

竹庵珪禪師住鴈蕩日其徒懼行規法深夜放火鞠爲瓦礫之墟師竟就樹縛屋陞座示衆云愛閒不打禾山鼓投老來看鴈蕩山傑閣危樓渾不見溪邊茅屋兩三間還有共相出手者麼喝一喝下座

洞山聰禪師因事示衆天晴蓋却屋乘乾刈却不早輸王稅了鼓腹唱巴歌

愚庵及禪師因事上堂學古德道忍忍三世如來從此盡饒饒萬禍千殃從此消默默無上菩提從此得慈受深和尚云會得此三種語了好箇不快活漢師云老慈受錯下名言會得此三種語了好箇沒量大

人還委悉麼堯舜不彰民自化相逢何必動干戈  
用彭俊禪師因事上堂世尊於華嚴會上度一童男  
法華會上度一童女於楞嚴會上度一淫涅槃會上  
度一殺大地衆生如恒沙數如此度之何日而了瑞  
巖者裏也不度童男也不度童女也不度姪也不度  
殺只教諸人行則任行住則任住坐則任坐臥則任  
臥熱則乘涼寒則向火衆中忽有箇出來道長老長  
老宗師家爲人何得與麼忌墮只對他道我不敢輕  
於汝等汝等皆當作佛

呆庵莊禪師因事上堂嗟末法惡時世衆生薄福難  
調制去聖遠兮邪見深魔強法弱多冤害聞說如來  
頓教門恨不滅除令瓦碎古人一期說話誰知驗在  
今日雖然從他謗任他非把火燒天徒自疲我聞恰  
似飲甘露消融頓入不思議且道是什麼人分上事  
拈拄杖敲香几云永嘉大師來也卓拄杖上士一決  
一切了中下多聞多不信

壽昌經禪師因事上堂諸佛時常說法不須疑議猜  
詳是何法天地玄黃宇宙洪荒不論通宗透教祇實

直下承當承當箇甚麼雲騰致雨露結爲霜蛟龍不  
宿死水猛虎豈行路旁透得些些關樞何須願往西  
方不問先佛後祖鼻孔一樣放光作麼生放光化被  
草木賴及萬方釋迦不肯泄破達磨九年覆藏義峯  
不惜口業一下爲君宣揚且道作麼生宣揚揮尺一  
下云罔談彼短靡恃已長便下座

天隱修禪師因事示衆有志學道者必須決擇師承  
發明心地爲要宜當竭力曲盡師法深蓄厚養然後  
隨緣闡化不拘方所若在學地中師承不擇邪正難  
分迷流逐隊妄認緣塵大法不明心地何達或者初  
發心時不知歸向三年兩載從而聞之漸漸慕之憤  
然發志腰包行脚撥草瞻風趣造林下依棲知識排  
入上輩固爲道念非爲求名位只欲幹辦本分一著  
而已原無薦上之心況有人我見耶然處稠人廣衆  
之中其間有先出家而名位卑下者有年少而先具  
戒者有年長而未具戒者不可以尊卑之位忽先後  
之分況此法門本來平等若識心達本當下與佛祖  
不別豈可持其先後執著名分妄爭人我徒喪光陰

諸人要幹辦大事畢竟行履無有一毫自欺處纔不孤負行脚之初心矣他日甚有得力決不相讓

牧雲門禪師上堂古南箇村僧性燥多嗔罵佛法懶得說終日尋人打打打打上士笑呵呵下士便驚怕怕怕怕好事不出門惡事傳天下

箸庵問禪師因事祖堂示衆法門授受誠非細故前佛性命後佛紀綱統系一人苟得其人別叢社何幸不得其人將見長師爲徒無有出泥犁分豈非雖是善因而招惡果老汾陽一陌紙兩片肉斷送閒神野鬼老僧者裏并不用一陌紙兩片肉若是閒神野鬼斷然存割不住何故近來例作禱鬼獻神誰甘淡薄老僧今日與諸人約法三章一知半見底請過一邊團團吞棗底且緩緩著無繩自縛去死十分與你草鞋一編若是英俊道流高超獨步定不入他時流圈續老僧昔日婆心錯失儘有數員禪客念其相依日久恐致爲人悞賺收到座下豈期竟自罔然無知如鮮魚臭肉沿途販賣誤賺後昆更妄付授追思切齒每嘗室中對諸人枚舉如斯等輩作老僧奴兒婢子

尙不中用何況敢稱老僧法子已後如曾經記荊非親炙多年分座說法不許擅自受請難師何況付授違者追擯如曾經記荊總不得過量超師師命住山住靜本分自甘亦不失爲真正衲子逆命違師不甘本分者追擯如曾經記荊行業有餘文彩麤陋刀耕火種了却一生敢保此人龍天自不敢昧不識利害妄刊語句流布者追擯已上數條皆老僧慟心疾首痛哭鼓攻諸仁者是豈老僧得已之陳也哉奉告諸仁者切須見賢思齊不賢自省昧心負德報亦匪輕泛泛之流向破驢脊上攢簇及時趁哄老僧正不敢攀留也不須惆悵臨岐句只箇眞金不混沙卓拄杖

### 訓童行規誨

佛印禪師訓童行自小離於父母第一歸依佛祖寅朝禮念精專夜靜堂中莫語普請作務慇懃常住什物愛護一粒米重千斤日裏應身須顧觸事不要羶狂出言低聲慢舉出入束斂身心行步威儀詳序廊下逢僧問訊叉手旁邊待去既然捨却俗緣遵奉叢林規矩師長訓誨之時不得高聲辭訴白曰無事學

書聖教經文記取謹慎遞相無事且莫欺瞞常住衣  
衫黑膠植襪莫騎尖新鋒措仔細約束身心勿令世  
情染汚深思六道輪迴警策應當恐怖出家要秉佛  
言不信三途受苦小心侍奉師僧恭敬三寶福助童  
行上下謙和酒肉賭錢莫覩閒話不要論量聖教時  
時思慕豈可虛度光陰死後將何憑據不惟辜負四  
恩一乃帶累先祖辭親割愛投師本欲出塵濟度懷  
慨決志修行省察輪迴不住萬劫得箇人身慚愧須  
知來處去除懶墮睡眠調伏身心寬裕從小戒行眞  
實長大爲僧堅固參禪報答佛恩誓願須求煩惱今  
生幸得出家不可遇而不遇念念不退善根心心長  
成覺樹若能如是修行必證菩提之路

爲行者普說

肅師語雖不甚暢然不失訓行者之  
體且諸家爲行者普說竟少故錄

普庵肅禪師爲行者普說此中寶所非從妄想發生  
心地光明應化萬緣如是人心佛行佛行人心遇末  
劫則地獄現前逢明眼則彌勒境界爲什麼如此所  
作無心自然契合不用皮毛滴酒二三載何事不圓  
終日杜門信施力財而未嘗少欠道非傲物欲顯天

眞佛豈背人法身普應若無靈感於物何異紙畫日  
頭若有應於群心杲杲炎光遍灑聖凡難辨龍蛇混  
雜以同居迷悟同光佛於衆生而一體悟則方通消  
息動靜法益群情迷時總屬夢游生死無明顛倒夢  
中說夢迷覺不分醉戒醉人旁觀呵笑善男子欲求  
解脫依師戒定慧方成日久月深般若純熟心法現  
前由人努力不在遲疑今日雖安來朝難保人似浮  
根岸草水急難留且無可救之人誰作波心之主唯  
有眞心廣佛本自不滅不生猶若虛空包含天地顯  
假名則無窮無盡建法幢則無量無邊二乘外道不  
通玄根境法中虛捏怪妄謂諸佛有可說卜度法身  
妄認識神更不求大悟了心一向愛他文字所以徒  
學多知返成誑教老僧若不了心與汝一般愚昧今  
幸具足元常意光無盡所以終日杜門怕逢醉漢有  
時苦口汝又不行朝夕而只是自瞞懶惰而怕見和  
尙不肯息心自悔廣作衆緣天龍嗔呵護教不肯一  
時業報現前難瞞衆目若是箇信佛依法修行之人  
爲法忘軀寒灰冷月深思古德非少善而得見如來

復想我身無一德而助資衆善假使十二時中懸腰墜石猶自妄意蠱心直饒粉骨碎身箇裏難求良匠今則棄俗割愛忽遇斯人何不速辦精機信心實地步步依如念念不退究竟涅槃定歸實際與佛無殊天龍守護鬼神瞻依邪魔摧落千古而不墜玄風長劫而本光不動所遺言句自有護法傳持所立標宗劫火應不能壞如斯精妙事由一心舍短從長豈由他悟佛教則如標月指祖說如潑水示冰見月知光釋水爲水然後大感佛祖之恩殞命猶難酬報我迷心法經劫而不出塵勞今悟佛因見性而永脫生死拳拳在念豈不快哉安比十聖三賢二乘圓覺五蘊不空輪迴不歇任你聰明超世不離三界循環假饒移山填海猶落非色界中雖然雷電奔馳不出五通陰界直饒橫衝直過也不出諸佛法身未解自己本元一切有爲如幻直須幻盡覺圓具足實相將大地山河爲自己以色空明暗顯真如指南栢以標心顧西松而露意方寸迥絕於能所大千無假一微塵受用身心不落有無知見爲人拈舉非干聲色指人心

如斯方是出家兒不誤後來之初學等觀今時聚此出家當求何事教汝持戒一行不持令汝澄心愈增嫉妬教汝擊鐘誦呪也無一字分明隨時逐隊闌喧只欲打過教汝恭敬往來廣結歡喜衆緣汝又要自求閒靜迷識沉神食氣不和自成病體諸事難爲必竟變壞又入魔徒百千萬劫不遇善知識汝等今時遇我出家知汝來處亦知汝去處只似空花從空而有我不得全定汝作妖魔我著汝魔同歸魔道我若如是法身如猛火焰邪魔猶若冰霜汝定消泮法身常住亘古亘今永無變壞所以千佛萬佛只傳此心歷劫恒沙此宗不壞汝之業識雖聞不信後日明朝自當敗闕莫道良醫門下猶有病夫爐鞴完全尙存鈍鐵自是覆盆之下而不肯開張暗爛敗根斯光常在不在從直訓役我多言若是善根何消如此各自努力但辦肯心一片時中究竟如是珍重

#### 受法衣提綱

想中愠禪師洪祐和尚送歸源法衣至上堂拈衣示衆云者箇是先歸源向異類中遺下皮可漏子日炙



風吹而不壞刀所鋸解而不開業力既重累及不肯  
子亦入其群隊去也披云且這是驢是馬溪陞座乃  
云夫爲宗師者垂一機示一境如青天霹靂不容掩  
耳如十日並照無幽不燭如大爐鞴煅煉頑鈍如大  
醫王療種種病如大舟航運載一切有如是奇特如  
是作略然後方可據法空座傳持大法爲人抽釘拔  
楔解粘去縛明暗頭合合據虎頭收虎尾若也向上論  
去尙恐埋沒宗風恥他先作那更婆婆和和澳澳認  
認撒土拋沙瞎學者眼豈堪稱譽天台那畔石佛山  
前有大智人把斷要津不通水泄提破沙盆索起遼  
天重價用黑豆法換盡大地人眼睛掀翻舊日條章  
裂破今時窠臼直得德山臨濟吞聲飲氣竺乾震旦  
迥絕行踪灼然不落聖凡實謂大功不宰諸人還知  
落處麼經天緯地無多子扶樹單傳只一人復舉阿  
難問迦葉因緣師拈云世尊做盡生涯實在後來承  
紹阿難太殺奢華迦葉亦成落魄靈巖今日承鴻祐  
木庵師兄持先師竺元和尙法衣到來但知頂受一  
語不敢問著何故不經一事不長一智

病起提綱

五祖演禪師病起示衆病來又病皮黏骨抖擻起來  
無一物行不成步語聲低鼻孔依前空突兀  
雪竇顯禪師病起示衆門掩還同歲月摧石牕經雨  
積莓苔一床枕簟淨名老時見斷雲孤月來  
應庵華禪師病起上堂法身病色身卽是法身色身  
病法身卽是色身如是次第自幼至老病至膏肓神  
醫拱手處萬病脫然直下正體如如更轉向那邊然  
後法隨法行法幢隨處建立故能顯示攢簇不得底  
病直教千聖覓起處不得普入一切衆生身內全衆  
生之病入大解脫門證無生法忍始可津濟四生梯  
航九有若不如是空病何爲敢問諸人只如山僧許  
多時病且道與適來所說之病是同是別若道是同  
未見老僧在若道是別亦未見老僧在何故海枯終  
見底人死不知心  
黃龍死心禪師屬疾退居晦堂夜參豎起拂子云看  
看拂子病死心病拂子安死心安拂子穿却死心死  
心穿却拂子正當恁麼時喚作拂子又是死心喚作

死心又是拂子畢竟喚作什麼良久云莫把是非來  
辨我浮生穿鑿不相干

密庵傑禪師病起上堂一葉飄空萬木秋翻思光景  
急川流若人識得其中意坐斷千差向上頭山僧數  
日來似病不病似安不安似死不死方丈裏撒屎撒  
尿大開眼狂言寐語直是東西不辨南北不分求生  
不得求死不得釋迦老子爲四生慈父三界醫王也  
覓此病起處不得正當此時若人救得山僧點一盞  
薄荷湯與伊濕口若救不得如人上山各自努力闍  
羅大王不是你爺他時打你鬼骨髀索飯錢去在莫  
言不道

典牛游禪師病起上堂舉馬大師日面佛月面佛後  
來東山演和尚頌云丫鬢女子畫娥眉鸞鏡臺前語  
似癡自說玉顏難比竝却來架上著羅衣師云東山  
老翁滿口讚歎則故是檢點將來未免有鄉情在雲  
巖又且不然打殺黃鶯兒莫教枝上啼幾回驚妾夢  
不得到遼西

白楊順禪師因病示衆久病未嘗推木枕人來多是

問如何山僧據間隨緣對窗外黃鸝口更多只如七  
尺之軀甚處受病衆中具眼者試爲山僧指出病源  
衆下語皆不契師自拊掌一下作嘔吐聲又云好箇  
木枕子

佛心才禪師病起上堂一法有形該動植百川湍激  
鏡朝宗韶琴不鼓雲天淡想像毗耶老病翁維摩病  
則上封病上封病則拄杖子病拄杖子病則森羅萬  
象病森羅萬象病則凡之與聖病諸人還覺病本起  
處麼若也覺去情與無情同一體處處皆同眞法界  
其或未然甜瓜徹蒂甜苦瓠連根苦

心聞賁禪師病起上堂維摩病說盡道理龍翔病咳  
嗽不已咳嗽不已說盡道理說盡道理咳嗽不已汝  
等諸人還識得其中意旨也未本是長江湊風冷却  
教露柱患頭風

石屋珙禪師病起上堂舉苕溪和尚示衆云吾有大  
病非世所醫後有僧問曹山未審是甚麼病山云攢  
簇不得底病又問一切衆生還有此病也無山云老  
僧正覓起處不得師云者僧是病過的人極是搜尋

到頭髮尖裏也不放過若非曹山知他落處其他難爲啓口復成一偈畢似大衆百骨酸疼攢簇難一番熱了一番寒覓他起處竟不得藥銚風爐盡打翻傑峰愚禪師因眼病上堂佛病祖病衆生病拈向一邊丹藥妙藥神仙藥除過一壁離却四大幻身且道那箇是病那箇是藥若向者裏薦得許汝諸人具一隻眼其或未然老僧分明指出病源與諸人看四大分散時向何處安身立命是有病無藥底句鎮州蘿蔔栢樹子乾屎橛麻三斤是有藥無病底句萬法歸一一歸何處趙州云我在青州做領布衫重七斤是藥病對治底句不是心不是佛不是物狗子佛性無是藥病雙忘底句爲治衆生心中五欲八風煩惱塵勞妄想執著一切諸病一大藏教總是濟世醫方一千七百祖師公案盡是靈丹妙藥有病應服藥無病藥還祛衆中還有箇漢出來道和尚自身不能治何用治別人只向他道留得一雙青白眼笑看無限往來人

無文璨禪師病起上堂諸人病是山僧病山僧病是

諸人病諸人痛處山僧能忍山僧痛處諸人欲忍不能挂杖卓一下單方一服當下和平不必松根採茯苓

恕中愍禪師病眼上堂山僧數日來病眼暗昏昏地直得東西不辨南北不分然於不分不辨處却有箇分曉僧問九峯如何是把定乾坤眼折筯攪龍門峯云把定在裏許乞兒弄飯碗僧云乾坤眼何在再犯不容峯云正是乾坤眼貴買賤賣僧云還照燭也無有甚失照燭峯云不借三光勢舌頭拖地僧云既不借三光勢憑何照燭喚作乾坤眼狗咬枯骨頭峯云若不恁麼體觸前見鬼正是見鬼說話九峯長吹緩打自謂手段高強爭柰者僧久經行戶酬唱無虧若是把定乾坤眼總未見得今日不是攬行奪市蓋爲病多諸藥性要識把定乾坤眼麼卓拄杖曙色未分人盡望及乎天曉也尋常

楚石琦禪師病起上堂壽山不會說禪病起骨露皮穿判得閻羅老子一朝催討飯錢劍樹刀山未免鑊湯爐炭交煎更入驢胎馬腹不知脫離何年以什麼

如此是他家常茶飯

了庵欲禪師病起上堂昨日病前日病病病相尋無有自性坐斷淨名舌頭倒行摩竭正令擊拂子野狐窟裏產狻猊獼猴各佩軒轅鏡

上堂東山演和尚云病來又病皮黏骨可殺驚人抖擻起來無一物却較些子行不成步語聲低描也描不成畫也畫不就鼻孔依然高突兀築著磕著好大衆古人發揮到無發揮處直是驚天動地遇古超今山僧一夏以來病來病去病得起來內不見有四大五陰外不見有山河大地上不見有諸佛下不見有衆生中不見有自己淨裸裸赤洒洒沒可把幸自可憐生無端侍者進退一段公案未了今朝月望拈香底拈香揖客底揖客濡毫底濡毫請法底請法直要山僧向太虛空中大書皇帝萬歲四字莫有爲山僧代筆者麼舉起拂子云文明齊北極睿筭等南山擊拂子下座

密雲悟禪師病起陞座云山僧六十有五數來不涉迷悟無端痢疾三年累得通身骨露若人如是證明

管取超佛越祖日用二六時中直教更無差互若能如是修行定證金剛堅固試看確坊踏確人終日未嘗移一步蘇州城有六座門門門有路通人路可惜無人簡點知其數便下座

筌庵問禪師病起陞座師云三百六十骨節八萬四千毛竅通身抖擻欲覓病起處了不可得風寒暑濕熱四面交逼時且道向甚麼處著到慣從五鳳樓前過手握金鞭賀太平忽有箇衲僧出來道和尚猶作主那山僧不覺手之舞之足之蹈之今日初起嚙語猶未歇在喝一喝下座

#### 掩室提綱

天如則禪師依圓覺上期一百二十日掩室安居書偈于門示衆平地牢關立一重佛來無路得相逢分明只在尋常處如隔千峰與萬峰

見心復禪師掩關示衆槁木形骸百念灰溪猿野鶴苦相猜閉門獨掩青松雨笑口逢人亦嬾開

無趣空禪師掩關示衆三十餘年參禮請益十方宗匠問法皆云無說問佛皆云無相幸得無相無說不

覺頓空伎倆追昔脚跟失却便宜今喜眉毛端在眼  
上從斯丟去草鞋即便幻折拄杖拍雙空手入玄關  
坐看陰陽消長偈曰窮子還歸長者宅善財參遍維  
華林大千收拾毫端內推出虛空掩上門

瑞白雪禪師爲乘長老封關封住拄杖頭結定布袋  
口山河大地攪得一團明暗色空捏成一聚爐峰不  
挂片雲秦望豈帶煙色正恁麼時進關一句作麼生  
道良久云木人雲中拍甕板石女山頭唱茶歌

石雨方禪師爲屍行芥城封關海濶天空智者不居  
鐵壁銀山愚人不識然則如鏡照鏡不妨者邊那邊  
死限之心既固活埋之念須堅雖然欲知此話行須  
看三年後

### 啓關提綱

無趣空禪師啓關示衆自結玄關自活埋自吾閉也  
自吾開一拳打破玄關竅放出從前者漢來

玉芝聚禪師啓關示衆丈室三年坐斷十方世界蒲  
團一念頓圓十世古今依稀彌勒樓中不妨開已復  
閉畢竟普賢界裏要看絕後再甦所以道把住則乾

坤失色放行則瓦礫生輝霄漢縱橫蒼檜豈容藏彩  
鳳凰雷浩蕩碧潭寧許臥青龍然則放出關中主一  
句作麼生道咦開門日出西方卯萬象之中獨露身  
石雨禪師爲正衡開關盡大地是箇關房本無出入  
只因迷故關上重關亦是迷上重迷之意今人只思  
尋悟全不知迷既不知迷悟從何得所以老僧常向  
人道迷有十分悟有十分今日開關豈屬迷悟聽取  
一偈有出入無門戶無開掩有封固若是香象截流  
機終不從他覓頭路乃舉鎖匙且道是甚麼試開看  
迎待尊宿引座提綱

實性大師因同參芙蓉訓禪師至上堂以右手拈拄  
杖倚放左邊良久曰此事若不是芙蓉師兄也大難  
委悉便下座

法昌遇禪師黃龍南禪師至上堂拏雲攫浪數如麻  
點著銅睛眼便花除却黃龍頭角外自餘渾是赤斑  
蛇法昌小利路遠山遙景物蕭疎遊人罕到敢謂黃  
龍禪師曲賜光臨不唯泉石生輝亦乃人天欣悅然  
雲行雨施自古自今其柰爐韜之所銳鐵猶多良醫



之門病者愈甚癩病須求靈藥銷頑必藉金鍾法昌者裏有幾箇躲根阿師病者病在膏肓頑者頑入骨髓若非黃龍老漢到來總是虛生浪死拈拄杖曰要會麼打麵還他州土麥唱歌須是帝鄉人

保寧勇禪師因長蘆和尚來上堂金將火試水將杖試大衆祇如金不將火試水不將杖試還有人辨得麼若辨得是真也假也深也淺也若辨不得且分付與明眼人

眞淨文禪師隆慶長老來上堂大衆教中道佛滅度後爲善知識者總是見佛來然則其爲善知識者亦不可容易視善知識者亦不可輕慢隆慶禪師斯之謂也老僧與知事首座大衆同增懽慶乃喝一喝云虎溪宗派龍山子孫吉州隆慶大啓禪門古人所謂從門入者不是家珍焉拈起拄杖云爲是家珍爲是外物大衆却請隆慶禪師決斷擲下拄杖下座

雪竇顯禪師因宗上座至引座大衆今日雪竇宗上座乃是昔年太陽韓大伯具大知見晦迹韜光欲得發揚宗風幸願特陞此座

白雲端禪師中峰至云九九八十一幾人能解筭兩箇五百文原來是一貫到者裏添得一文麼若有添得一文即便滿路光生拔出古今爭奈自古自今千箇萬箇祇愛足頭底白雲今日爲汝添看乃云下座與知事首座大衆請中峰和尚陞座一偏

圓悟勤禪師請長蘆覺禪師上堂多子塔前分半座截斷衆流少林端拱歷九年壁立萬仞奮作家爐轉施向上鉗鎚顯大用大機全生全殺與一切人抽釘拔楔解黏去縛令大地人各各如獅子兒奮迅吒沙踞地返躑所以道法王法力超群生常以法財施一切久積淨業稱無量導衆以寂故稱首夫如是則向萬仞懸崖垂手敲唱俱有百尺竿頭進步主賓互換正當恁麼時如何龍吟長霧起虎嘯乃風生復云撞著道伴交肩過一生參學事已畢今朝幸遇大導師寶華王座爲拈出

龍門遠禪師五祖和尚到上堂曹溪大師傳衣歸嶺南後來讓和尚得法授與馬大師馬大師接得百丈百丈得黃蘗黃蘗得臨濟臨濟得興化興化得南院

南院得風穴風穴得首山首山得汾陽汾陽得慈明  
大師慈明大師接得一人楊岐和尚如今舉他得底  
事看此老子云我者裏如鬧市裏上竿子相似是人  
皆見瞞你眼得麼楊岐老子後來接得端和尚一人  
此老子曾住此山來有頌云海底珠動時雲中月還  
現涼夜無狂風清光都一片端師翁後來接得先師  
一人先師有言曰祇從咬破一箇鐵餤鎚直得百味  
具足此老子所以一生口硬好說硬話伏自先師付  
囑之後大法傳持以來末後東山一時分付今五祖  
堂頭和尚此日幸對人天廣衆請不憚慈悲重爲顯  
揚使先宗有據吾道益明莫不大幸

甘露和尚入山上堂達磨不來唐土地久天長二祖  
不往西天山青水綠龍吟霧起虎嘯風生秋雨垂空  
浮雲蔽日諸人有眼還見麼有耳還聞麼既具見聞  
何者是迷何者是悟何物爲緣何物爲對要知迷悟  
昇沉理畢竟須還本分師先佛道身相屬四大心性  
歸六塵四大體各離誰爲和合者大衆身心既乃如  
此現今復是何物近來參學之人盡皆奔馳語句舉

論古今於本分事全不明了所以正宗淡薄道法薄  
漓幸遇和尚到來伏望震潮音示真旨抉重膜顯衣  
珠四衆傾誠不勝虔請

應庵華禪師爲巨山雪堂和尚到上堂臨濟三遭痛  
棒高安灘上知歸興化於大覺棒頭深明黃蘗意旨  
山中兄弟雖然不多各各病在膏肓若非師叔和尚  
到來明果豈敢妄通消息少間下座與知事頭首大  
衆同伸拜請伏望慈悲痛垂發藥

萬杉和尚到上堂大底大小底小長底長短底短曲  
底曲直底直方底方圓底圓正底正邪底邪爲復是  
佛耶是菩薩耶是羅漢耶是聖僧耶是鬼神耶是天  
仙耶我昔聞是法未嘗妄宣說是義非義是隨義墮  
非是非義非非義是隨句墮若作佛法商量達磨一  
宗掃土而盡不作佛法商量老僧活陷地獄是你諸  
人還縈素得出麼苟或未然少間下座同知事頭首  
攀請新萬杉和尚爲衆說破

徑山大慧禪師至上堂乃云我本無心有所希求今  
此法王大寶自然而至法王大寶既至汝等諸人急

著精彩所謂見之不取思之千里豈不見大隋和尚道我參七十餘員善知識具大眼目底祇有一二其他盡具正知見在天下具大眼目真善知識惟我法叔老師一人而已黑漆竹篋掀翻海嶽從頭打過雖是死馬醫就中要妙黃蘗打臨濟拄杖蔣山豈是無耶蓋爲土曠人稀雲門一曲臘月二十五那在今朝十六日吹唱薰拈拄杖卓一卓云虛空可量風可繫無能盡說佛功德復舉頃在虎丘聞先師舉佛眼叔祖初作無爲軍化士因道中著癩有箇省處歸來舉似師祖後令充知客因夜坐撥火忽然猛省雖然如是每至入室未能深入閭奧從容請益大師祖云我爲你說箇喻子正如一人牽一頭牛從窻欄中過兩角四蹄悉皆過了惟尾巴過不得師云者箇說話多年在肚皮裏信知在天下無人理會得所以密之三寸苟非法叔老師到來小姪此生無因拈出敢問諸人既是大底過了如何尾巴却過不得且道諸訛在什麼處小姪今日對衆拈出供養我法叔老師大和尚惟願壽與趙州同年爲佛法作大主張使天

下諸僧洞徹此一段奇特大事下座同知事頭首大眾殷勤拜請伏望慈悲俯垂開示

無用寬禪師天目中峰和尚至引座明明百草頭明明祖師意天目山古佛輝天并鑒地虎咬大虫蛇吞鼈鼻擲拄杖云直下來也急著眼覷下座大眾懷香拜請幻住大和尚慈悲開示便下座

千巖長禪師龜峯道源和尚至上堂作家相見豈在形言擊鼓陞堂聊陳供養供養我龜峯和尚降尊就卑昔應庵叙謝大慈末句云虛空可量風可繫無能盡說佛功德即今下座同大眾拜請和尚尊慈開示恕中愍禪師瑞龍夢堂和尚至上堂大人具大見大智得大用黑漆竹篋掀翻海嶽芭蕉拄杖敲打虛空直得釋迦彌勒拱手歸降文殊普賢潛身無地所以道殺人須是殺人刀活人須是活人劍有活人劍無殺人刀一切活人死不得有殺人刀無活人劍一切死人活不得活得死人死得活人猶且墮在功勛埋沒宗旨豈不見芙蓉和尚一日訪同參實性大師性乃陞堂以右手拈拄杖倚放左邊良久曰此事若不

是芙蓉師兄也大難委悉便下座實性與麼道李向赤邊咬當茲季運袒肩擔荷赤手提持不涉廉纖斬釘截鐵惟我瑞龍師兄一人也勿謂土曠人稀秘而不泄惟願放開線道曲徇時宜使彼承言滯句者徹證直指單傳一段奇特大事顧不遑歎下座與首座大眾同伸拜請冀爲敷揚

楚石琦禪師靈隱竹泉和尚至上堂舉廣慧璉和尚道我在先師會中見舉竹筴問省驢漢云喚作竹筴則觸不喚作竹筴則背作麼生省近前奪得拋向地上云是什麼先師云瞎省從此悟入我道省驢漢悟則太煞悟要且未盡先師意旨師云大小廣慧恁麼道先師實有意旨那將一把火照看面皮厚多少下坡不走快便難逢若是向上提持還我竹泉師兄始得

弘覺恣禪師通玄奇禪師至引座別峯不意却親遭力索無因見妙高豈是當頭多隱諱從來正打貴旁敲不見丹霞訪忠國師霞問侍者國師在不者曰在即在祇是不見客霞曰大深遠生者曰非但上座佛

眼亦覷不見霞曰龍生龍子鳳生鳳兒國師睡起侍者以告國師乃打侍者二十棒遣出院丹霞聞得嘆曰不謬爲南陽國師豈非丹霞旁敲故顯國師正打因顯國師正打始知毫無隱諱既知毫無隱諱自然大用現前霜威凜凜然後方可祖印高提吹毛橫按勦絕今時露布發揮從上家風激揚敲唱雙行薰割主賓互換主賓互換也雲迷大野霧鎖長空敲唱雙行也韻出青霄風生滿座直得山河大地盡作琴聲草木叢林順方低向正當恁麼時作麼生是毫無隱諱底事卓拄杖云要會麼下座同申勸請通玄和尚普爲諸仁分明指出

化山三宜和尚至引座孟嘗門下珠履三千金谷園中繡襦八百安似我輩衲僧家借來香飯餉萬聖於同堂三變淨坊集分身於一處是故進一步則震動無邊世界網退一步則踏斷百億大風輪不進不退則正令當行十方坐斷便饒如是未是衲僧全體作用在諸人要見全體作用麼舉起拂子云看看空王佛多寶佛威音王佛大通智勝佛四萬同名同號日

月燈明佛盡向山僧拂子頭上吹大法螺擊大法鼓  
演大法義作大佛事一一佛事周徧法界所謂一毛  
現神變一切佛同說盡於未來劫莫得其邊際倒握  
拂子云及乎倒轉柄來要且三世諸佛歷代祖師卒  
摸索頭腦不著何況諸人茄子瓠子那裏知得今朝  
幸遇化山和尚象駕光臨高垂天鑒下座同申勸請  
普爲諸人委曲指示

列祖提綱錄卷第十七

列祖提綱錄卷第十八

武林十八澗理安禪寺住持婁東行悅集

迎待尊宿致謝提綱

石霜圓禪師因同道相訪上堂颯颯涼風景同人訪  
寂寥煮茶山上水燒鼎洞中樵珍重

楊岐會禪師楊岐詮長老來上堂拈花付囑有屈當  
人面壁九年胡言漢語當人分上把斷乾坤且道作  
麼生是把斷乾坤底句還有人道得麼如無雲蓋失

利

五祖演禪師諸院長老入山上堂臨濟入門便喝是  
甚盪鳴聲德山人門便棒拗曲作直雲門三句曹洞  
五位大開眼了作夢何故如此國清才子貴家富小  
兒嬌

石臺師弟至上堂昔日先師頌臨濟三頓棒云一拳  
拳倒黃鶴樓一趂趂鸛鵲洲有意氣時添意氣不  
風流處也風流大眾若到白雲門下須要衆人助拳  
眞淨文禪師因逍遙長老來上堂青山深處人來我  
紅塵裏紅塵偶不見白雲與流水耳目何所分浮名  
與浮利爲是紅塵非爲復青山是是非兩途間幾多  
殊未已幸遇逍遙人可述遙理下座

因雙林下生長老來上堂寶山不易到既到莫空迴  
莫有不空迴者麼遂擲下拄杖云是什麼良久云不  
見雙林釋迦老又聞彌勒下生來喝一喝下座

章江長老來上堂舉僧問雲門如何是諸佛出身處  
門云東山水上行潞潭即不然若有人問如何是諸  
佛出身處但向伊道遠離洪井深入寶山大衆且道



是同是別忽有箇禪僧出來云者裏是什麼所在說同說別也難得須是實到者田地始得若未到且不得草草

永固長老至上堂幽固深遠無人能到到則山青水綠別是人間好諸禪德江月照松風吹永夜清霄何所爲却怪長時杜鵑子春山無限好猶道不如歸

因清涼長老至上堂熱惱既盡清涼現前分別不生虛明自照然後我當按指海印發光汝暫學心塵勞先起乃喝云三世諸佛一棒打殺填溝塞壑拋東擲西一任諸人看鷲拈拄杖云過去諸佛亦如是現在諸佛亦如是未來諸佛亦如是遂擲下云看

因快山長老至上堂快然大道祇在目前縱橫十字擬卽留連乃顧大眾良久喝一喝下座

因華嚴座主至上堂法界者一切衆生身心之本體也乃拈拄杖云不是法界是諸人無始已來靈明廓徹廣大虛寂之妙體故此土他界天堂地獄六凡四聖情與無情同一無異無壞無雜猶帝網之明珠互相融通更相涉入可謂無邊刹境自他不隔於毫端

十世古今始終不離於拄杖頭上若爾則何嘗離本千於方外納須彌於芥中而今百億日月百億須彌百億世界都在拄杖子裏許乃擲下云擲在諸人面前還見麼信得及麼不思議解脫力神通游戲妙用現前非假於他術皆吾心之常分耳喝一喝下座

化城大師來上堂三界無安猶如火宅出得火宅未到寶所且在化城今日相逢化城不見寶所何在元來只是舊時源上座大眾元來一時總是舊時人伏惟珍重

大慧杲禪師雪竇持和尚至上堂仰山道東寺師叔若在慧寂不受寂寞仰山只知有已不知有人徑山卽不然雪竇師叔若在天下衲僧不受寂寞何故不見古雪竇有言寒木在握兮全機可笑秋水橫按兮半提可滅使八極項目者不自爭衡見斯人兮駕御昂柄

應庵華禪師長蘆至上堂風行草偃水到渠成夙世冤家同門出入聞禪聞道似鴨聽雷見佛見祖如風過樹隔江見剎竿便回去脚跟下好與三十棒未足

觀光直須眉毛厮結同生同死且道五逆聞雷一句作麼生道良久云上大人丘乙巳

密庵傑禪師國清直庵和尚到上堂雲開千嶂出木落一枝分相見又無事不來還憶君復舉芙蓉和尚一日訪實性大師大師陞座以右手拈拄杖倚左邊云此事若不是芙蓉師兄大難委悉師召大眾云實性大師弄巧成拙鈍置他芙蓉師兄今日國清師兄到來烏巨也不拈拄杖亦不與麼道且道與古人是同是別良久云相逢自有知音知何必清風動天地徑山別峰和尚至上堂舉仰山道東寺師叔若在慧寂不致寂寥師云仰山和尚好語只是語上偏枯靈隱即不然徑山師叔若在靈隱不致寂寥何故闍蜀同風

雪巖欽禪師上堂就謝天竺侍者肯頭石省清夢默翁西堂生公臺上橫說豎說直得空花亂墜頑石點頭要且不若淨名室內一點全收報恩恁麼說話敢道更經三生六十劫也未夢見在何故紅蓼岸白蘋洲夕陽西去水東流

上堂謝興化首座人從興化來接得劍州信說道凌霄峰頂基盤元是錢王石硯二十年前一共看今日重逢有何照證展手云面目見在

退庵休禪師同參到上堂先師尋常用腦後一鎚卸却學者胸中許多屈曲當年克賓維那曾中興化此毒往往天下叢林喚作超宗異目非惟孤負興化亦乃克賓受辱若是臨濟兒孫終不依草附木資福喜見同參今日傾腸倒腹遂卓拄杖喝一喝云還知先師落處麼伎死禪和如麻似粟

高峯妙禪師妙湛無爲長老至上堂舉劉鐵磨來參馮山把臂投衙山云老特牛汝來也引狗入塞磨云來日臺山大會有齋和尚還去麼磨兒事件馮山作臥勢隨邪逐惡磨使出咄直饒連得便行也是韓盧逐塊

千巖長禪師雙林玉溪和尚至上堂天上無彌勒地下無彌勒千門萬戶開輪鎚只一擊下座雙林友雲和尚至上堂路逢道伴交肩過一生參學事畢且道以何爲驗拈拄杖卓一下云空手把鋤頭

客至上堂披衣登法座道者是高僧將謂多奇特元  
來百不能西風吹細雨落葉滿空庭有客來相訪青  
山自送迎

天如則禪師雪中客至煨芋作供次示衆懶殘捉我  
芋頭煨羨我深居似大梅有客無端來借問一花五  
葉幾時開蘇州呆蘇州呆門外雪成堆徹骨還他凍  
一回

舊同行至上堂透網金鱗何似不入好忽然會得箇  
入處不是同行也大難

蔣山藏主至示衆全提半提全藏半藏十寸是一尺  
十尺是一丈尺有尺形剪有剪樣拂子也用打圓相  
柳標橫挑不顧人誌公豈是閑和尚

天目禮禪師雲巢嚴和尚至上堂舉古德因故人至  
云相見不揚眉君東我亦西紅霞穿碧落白日繞須  
彌南湖今日瑞光和尙至且作麼生相見不揚眉君  
東我亦西紅霞穿碧落白日繞須彌雖然我與古人  
不同

率庵宗和尚至上堂昨夜南山虎咬大蟲不存性命

今日金剛與泥神揩背一夢骨出只如雪峰三到投  
子九上洞山又作麼生無求是處人情好不飲從他  
酒價高

元叟端禪師上堂謝寶中原藏主舉大珠和尚云貧  
道聞江西和尙道自家寶藏一切具足使用自在不  
假外求從此一時休去乃至盡十方世界無纖塵不  
是自家財寶師云馬師一期與麼說大珠一期與麼  
聞終身不忘得大受用苟非深信堅固安能透頂透  
底如此中原藏主昔年於古鄆山中顯示此箇法門  
還有深信堅固得大受用者麼此日特承光降幸望  
款留

斷江首座至上堂山僧昔年行脚駐足茲山育王橫  
川和尚一偈寄云溪長短聲獨自倚廊柱三際俱不  
來一片冷泉水非惟無衆生無佛亦無已短句與長  
吟遣興適意爾夜半落霜花日輪正卓午寥寥天地  
間只有寒山子好大衆有祖以來提持衲僧頂額上  
一著子如石火電光構得構不得未免喪身失命總  
出不得者箇老和尚今日因其得法上足斷江首座

垂訪學似諸人大家薦取

上堂兼謝吉祥香長老達磨盡力提持只道得箇不識六祖全身擔荷只道得箇不會小根小器輕心慢心師承學解露布葛藤其可妄生希冀哉東陵法姪久處衆中深諳此事應緣利物一句作麼生道掣斷金鑊天麒麟高舉鐵鞭擊三百

愚庵及禪師寶陀古鼎和尚至上堂舉龍牙道雲居師兄得第二句我得第一句師云大小龍牙只知開張大口不覺舌頭拖地山僧茲承寶陀法兄和尚曲勞象駕枉賁空山但愧荒疎無伸供養豈敢妄通消息觀音菩薩將錢買糊餅放下手却是饅頭是第二句且如何是第一句喝一喝下座

靈隱天童侍者至上堂舉玄沙因光侍者道師叔若參得禪小姪當打鐵船下海去沙住後令人持書問光云打得鐵船也未光無對後汾陽昭代云只見錐頭利不見鑿頭方玄覺云玄沙也是貧兒思舊債師云大小玄沙光侍者人我未忘互揚家醜千載之下還人點檢翠屏終不學他古人一切只是如常昨承

靈隱天童侍者相訪寒溫纔罷燒香喫茶茶罷送歸客位自然主賓道合叔姪情忘今日陞堂略此叙陳伏希道照

無文璨禪師謝寶嚴上堂不撥一塵不露一機錦包特石繡裹秤鎚開先見了直得百寶莊嚴而頂戴之何故有行鬼不識無心人未知

恕中愍禪師謝國清清涼開元三藏主上堂向上一路千聖不傳未曾踏著早隔大千清涼山裏萬菩薩拖犁拽耙方廣寺中半千尊者撥供遷齋惟有開元石佛硬糾糾地風吹不入水灑不著五千餘卷言言異一一龍宮海藏來

仲膚首座允藏主至上堂風行草偃水到渠成正令既行十方坐斷睦州拶人脚折雲門颺下柴片雖是逸格超宗未免麻纏紙裏也堪笑也堪悲烏石嶺頭相見事知音知後更誰知

多福秋江和尚至并侍者進退上堂通宗通途挾帶挾路一句全提萬機頓赴僧問多福如何是多福一叢竹福云一莖兩莖斜僧云學人不會福云二莖四

莖曲奇怪諸禪德是牛鼻勒芒繩是馬口啣生鐵提  
妙明之心印用格外之生機還他多福始得且者僧  
與麼問還有孤負處麼金鷄啼向玉闌干一聲直透  
須彌頂

愚極慧禪師謝劍南儒藏主雲谷慶藏主無則珍藏  
主上堂舉白雲師祖開堂拈香有云衆中衣鉢道友  
有一言半句利益我者同伸報謝山僧乍住二三故  
人遠來相賀又非一言半句者比豈無片香以爲供  
養燒楓香是著菩提邊事燒黃熟是說佛說祖邊事  
而今猛炳一爐也要盡大地人知道浙西管內嘉興  
府川原道地且道燒底是什麼香良久云不下閣  
楚石琦禪師淨慈雪窻光書記至上堂上大人丘乙  
已化三千七七十衛小生八九子佳作仁可知禮也  
召衆云是什麼語話孔門弟子無人識碧眼胡僧笑  
點頭

諸山至上堂一花開大地春一葉落天下秋動絃別  
曲貴知音瞬目揚眉早蹉過然則不犯之令把斷要  
津無味之談塞斷人口德山棒臨濟喝俱抵豎指魯

祖面壁歸宗斬蛇大隋燒畚石鞏張弓子湖看狗或  
則平田淺草或則鐵壁銀山或則掣電轟雷或則和  
泥合水全提正印獨振宏綱檢點將來不無滲漏所  
以卽心卽佛今時未入玄微非心非佛猶是指蹤之  
極向上一路千聖不傳學者勞形如猿捉影還有趣  
向分也無平無盡處是青山行人更在青山外復舉  
僧問黃龍璣和尚云禪以何爲義璣云以誘爲義師  
云若有人問南湖禪以何爲義向他道以贊爲義且  
道誘的是贊底是眼見則瞎耳聽則聾口說則啞心  
思則窮天際雪埋千尺石洞門凍折數株松

無夢噩書記至上堂舉白雲端和尚云寫盡千張紙  
徒煩心手勞人情如太華爭似道情高師云大小白  
雲猶有者箇在永祚承無夢師兄相訪羅茶淡話兀  
坐忘懷若有一箇元字脚彼此不著便何也人平不  
語水平不流

道舊至上堂舉颯颯涼風景同人訪寂寥煮茶山下  
水燒鼎洞中樵師云白雲老人家貧難辦素食事忙  
不及草書只是不合將常住物入自己用



諸山講主至上堂先聖道諸法不自生亦不從他生  
不共不無因是故說無生盡大地是餬餅任你橫咬  
豎咬西天那爛陀寺裏一萬來僧人人得喫只有摩  
訶迦羅大神不得喫把須彌山一擲百雜碎帝釋踣  
跳上梵天去也

同參至上堂舉泉大道訪慈明明云片雲橫谷口遊  
人何處來泉云夜來何處火燒出古人墳明明云未在  
更道泉便作虎聲明便打一坐具泉推明向禪床上  
明却作虎聲泉云我見八十餘員善知識惟師繼得  
臨濟宗風師云錯下名言當時慈明爭容得者風顛  
漢恁麼道更與一坐具且看他作箇什麼伎倆纔眼  
目定動便連棒趲出臨濟法道未至寂寥

了庵和尚退靈巖回叙謝上堂夫爲善知識者驅耕  
奪食轉凡成聖其見善知識者如見青蓮華眼根清  
淨其聞善知識說法者如餐香積國飯毛孔俱香靈  
巖禪師之謂也再歸攜李深懷鄙懷龍象參陪幸希  
珍重

南石琇禪師前荆溪南嶽天錫和尚至上堂舉大顛

通禪師因水空和尚來顛把住坐具云不用通時喧  
亦不用通來處空云擬欲恁麼又恐人情不足顛放  
手云還足也未空提起坐具云若通時喧恐迷來處  
顛云暫時相見也無妨靈巖今日承南嶽天錫和尚  
到來通時喧了便云從虎丘來特爲相賀來處不迷  
人情周足諸人總是不知賴有露柱證明

光孝仲虛法弟禪師至上堂楊岐牽犁九峰拽耙閒  
言語道吾作舞雪峰輓毬閒言語光孝仲虛和尚則  
不然凌霄峰頂碁盤石攤向門前賣與人誰道于今  
行市少一番提起一番新且道靈巖又作麼生卓拄  
杖下座

了庵欲禪師客至上堂三世如來同一舌大藏教中  
無法說衲僧手裏定盤星萬里長天耀孤月首座有  
長處且不循途轍荆棘林中放步行拔出時人釘根  
楔

妙智長老至上堂覆疊舌頭無骨妙智皮下有血西  
天解守蠟人冰凍土不聞鵝護雪翻思百丈有三訣  
喫茶珍重歸堂歇末法師僧幾箇知茫茫弄巧翻成

拙喝

蹊首座至上堂杲日麗天盲人摸地本色衲僧無處  
出氣豈不見興化一日同參到纔上法堂化便喝僧  
亦喝化又喝僧復喝化云你看者瞎漢猶作主在僧  
擬議化拽拄杖直打下法堂侍者云者僧觸忤和尚  
化云是他適來也有權也有實也有照也有用及乎  
我將手向伊面前橫兩橫便去不得似者般瞎漢不  
打更待何時阿呵呵獅子兒返躑龍馬駒踴跳打破  
上頭關主賓俱失照有底便道當時好再與一喝不  
然掀倒禪床拂袖而去有甚共語處山僧不逢別者  
終不開拳適值大道師兄遠臨要使現前一衆與他  
古人兩得相見還委悉麼青山不鎖長飛勢滄海合  
知來處高

永福顯首座至上堂離四句絕百非摩訶演法夢裏  
提持敢問大衆夢裏覺裏是同是別若也道得個儻  
分明非惟小释迦無遁形之地便可將鄱陽三百里  
水面納向鴛鴦湖一滴之中直是不寬不隘無欠無  
餘還委悉麼驚群須是英靈漢敵勝還他獅子兒

鷄足西堂至上堂鷄足峰前風悄然能仁堂下浪黏  
天騰身抹過青霄外一曲胡笳奏未圓山僧數日拋  
離大衆昨晚歸來得與飲光尊者相見既曰情忘彼  
我自然這叶主賓提起陳年葛藤直是牽拽不斷衆  
中莫有一刀兩段底麼良久云設有也是草裏漢  
末宗西堂至上堂并謝頭首一大藏教道什麼如是我  
聞先已錯廣福堂前正令行空裏磨盤生八角主  
賓互換縱奪臨時掀翻大海躍倒須彌擊拂子太湖  
三萬六千頃月在波心說向誰

無想仲謀和尚至上堂興化接同參傷鹽仍費醋本  
覺遇知已目擊而道存棒喝既不施權實將焉措石  
上與松根相對意自足爲復古人非爲復今人是到  
此休論是與非畢竟古今無二致須彌頂上擊金鐘  
下載清風殊未已喝一喝

源首座至上堂二由一有一亦莫守一心不生萬法  
無咎首座有長處何須更開口萬仞峯頭把釣竿一  
掣六龍頻入手松間石上不妨暫且盤桓佛祖位中  
自是推門入白大衆還委悉麼豐城寶劍未出匣夜

夜寒光射斗牛

禮首座至上堂法昌一力撾鼓功臣萬象說禪二老徐六擔板未免各見一邊本覺虛心閱世一切任之自然或則逆風把柁或則順水行船總不妨事所以道寂寥非內寬廓非外寂寥非內也一毫穿衆穴寬廓非外也衆穴一毫收豈不見趙州會下二僧相推不肯作第一座主事白趙州州云總教作第二座主事云教誰作第一座州云裝香著主事云裝香了也州云戒香定香慧香解脫香應庵老祖云趙州下一槌不妨驚群動衆子細檢點將來大似泥裏洗土塊若是薦福門下不用相推第一座也有人第二座也有人第三座也有人雖然不免從頭註過第一座鐵眼銅睛覷不破第二座陽春白雪無人和第三座真實身心同達磨且道與趙州是同是別若也會得許你具一隻眼若也不會也許你具一隻眼有箇衲僧出來道總不恁麼時如何對他道切忌向鬼窟裏作活計隨機應變本分作家裂半分三輪他敏手到箇裏正如披圖經而升高臺據王令以蒞萬國非惟收

放在我抑且遐邇不遺山僧如斯舉唱要且不是扶他先作簷簷後人何故面前自有五百衆中老作家爲汝作證信得及麼擊拂子云棋逢敵手難藏行琴遇知音不厭彈

月江印禪師繕西堂至上堂喚醒馬耆千載夢招同船子一帆風何如晏坐獅子窟哮吼一聲天地空華藏海十三重都盧收在一塵中若是機輪能獨脫看他八面自玲瓏

笑隱訢禪師上堂摩竭掩室拂跡跡生毗邪杜詞雕文喪德何況據曲汞木鼓兩片皮如以五采繪畫虚空徒自勞爾山僧尋常不陞此座貴在心心相知而道場豐安二法弟來訪勸請爲衆敷揚記得芙蓉訓禪師訪實性大師實性以右手拈拄杖過左邊云此事若非芙蓉師兄也大難委悉諸德看他得底人直是不肯容易動著所以長慶道撞著道伴交肩過一生參學事畢且喚什麼作參學事擊拂子擡羊挂角千峰頂更有擡羊在上頭

百丈和尚朝覲回上堂一扭鼻頭痛一喝雙耳聾黃

金不重鎖獨坐大雄峰佛智先師將百丈祖師活計  
一時併蕩賴有東陽法弟向九重城裏萬乘之前全  
壁而歸致令山僧均受光寵今日不敢囊藏對衆明  
明顯示諸人要識祖師麼拈拄杖擲下云西天此土  
無人識五百生前箇野狐

護法至致謝提綱

白雲端禪師郭功甫入山上堂夜來枕上作得箇山  
頭謝功甫大儒廬山二十年故舊今日遠訪白雲舉  
似大眾請已後分明舉似諸方此頌豈惟謝功甫大  
儒直要與天下有鼻孔衲僧脫却著肉汗衫莫言不  
道乃云上大人丘乙巳化三千七十七士爾小生八九  
子佳作仁可知禮也

楊長官至云自古自今說理說事者如稻麻竹葦會  
禪者更比比然討一箇家裏人如天上揀月相似黃  
梅賢宰楊次公聞名十載有餘夜來忽蒙訪及元來  
却是一箇本分家裏人杓柄長短鍋子大小雖然未  
曾一點過看他數目也甚分明可謂如在東溪日  
華開葉落時幾擬將黃金鑄作鍾子期昨來當塗郭

功甫到曾舉上大人一遍今日次公來更須舉一遍  
夜涼堂上坐忽聞人叫喚黃梅楊長官來到白雲畔  
久聞竊吾宗未得當面斷一夜燈火前勘過舊公案  
所犯一一招也要衆人看鼻直額骨高一箇沒量漢  
何日履亨衢吾道聊輝煥共唱太平歌掃盡天下亂  
文章不礙他兼能大衍筭兩箇五百文依前是一貫  
吾本來茲土傳法救迷情豈不知一花開五葉結果  
自然成因風吹火用力不多

五祖演禪師王提刑入山上堂舉阿難問迦葉世尊  
傳金襴外別傳何物迦葉召阿難阿難應諾迦葉云  
倒却門前刹竿著又永嘉道建法幢立宗旨明明佛  
勅曹溪是師云迦葉教倒却刹竿永嘉又教立宗旨  
且道倒底是立底是到者裏須是具擇法眼始得畢  
竟如何倒也七縱八橫立也二三成六七峰閣上共  
談玄一句一言清耳目

提刑入寺上堂兵隨印轉將遂符行大權菩薩覆護  
衆生相順者善言誘諭凶頑者枷棒縱橫中間有箇  
沒量大漢金鎖玄關留不住聖凡位裏莫能收若柰

何不得佛法無靈驗白雲有箇消息試說看古人云  
無邊刹境自他不隔於毫端十世古今始終不離於  
當念納須彌於芥中擲大千於方外變大地爲黃金  
攪長河爲酥酪到者裏合作麼生國土動搖迎勢至  
寶花彌滿送觀音

眞淨文禪師王主簿到上堂憶在報寧時彼彼各年  
少而今住山來各各已衰老休話人間短與長相逢  
把手呵呵笑呵呵笑逍遙自合無爲道驚拈拄杖敲  
香臺云不可不自在復擲下云不可不逍遙喝一喝  
下座

圓悟勤禪師知縣入山上堂拈香示衆信手拈來光  
明烜赫結而爲葢散而爲雲爇向爐中莊嚴知縣宣  
德妍智道人伏願道心堅固種智圓明遂敷座適來  
錦上鋪華如今鋪華錦上還有明眼底解拈得探得  
麼試出來激揚看復云心不是佛認心乖宗智不是  
道立智失旨道本無爲佛亦無相於無相無爲處辨  
得去一切諸相悉皆是佛一切所爲悉皆是道拈起  
也天回地轉放下也草偃風行若是向上更不落二

落三直下單刀直入其或尙存光彩猶滯皮膚不免  
向者裏談妙談玄演事演理行棒行喝舉古舉今且  
道山僧畢竟將什麼爲人不住舊時無相貌外尋知  
識也非眞

大慧杲禪師張汪二狀元至上堂舉僧問雲門如何  
是和尙家風門云有讀書人來報師云讀書人已在  
者裏且作麼生與伊相見乃顧視左右云不是冤家  
不聚頭

張侍郎至上堂古人道我宗無語句實無一法與人  
怎麼道早是通身浸在屎窖裏了也那堪更踏步向  
前如之若何問向上向下三要二玄銀盃裏盛雪北  
斗裏藏身意旨如何豈不是屎窖旁邊更掘屎窖雖  
然如是若於屎窖中知些氣息方知三世諸佛歷代  
祖師天下老和尚古往今來一切知識盡在屎窖裏  
轉大法輪其或未然切忌向屎窖裏著到

應庵華禪師韓大尉入山上堂舉朱行軍入南際寺  
齊僧執手爐行香乃云直下是直下是時有僧云直  
下是箇什麼行軍便喝僧云行軍是佛法中人發



作麼行軍云你作惡發會那僧便喝行軍亦喝云鈎在不疑之地遂呼左右認取者僧著師云行軍拈出倚天長劍者僧披襟敢衝雪刃雖然兩不相傷爭奈二俱弄險今日承宣大尉入山齋僧雖無如是問答須知此話已行此話既行且道說箇什麼臥龍纔奮迅丹鳳亦翱翔

官客入山上堂釋迦老子道吾有正法眼藏涅槃妙心分付摩訶大迦葉恁麼說話大似旁若無人豈不見陳操尙書一日訪資福福見來以手畫一圓相尙書云弟子恁麼來早是不著便那堪更畫圓相資福便歸方丈閉却門後來雪竇道尙書祇具一隻眼眞如喆和尙云資福雖是本分鉗鎚爭奈尙書是煨過了底精金師云雖然如是若到天童門下未放過在當時待尙書道弟子恁麼來早是不著便那堪更畫圓相天童則大開東閣明窓下如法安排何故門內有君子門外君子至

密庵傑禪師李侍郎入山上堂幽禽噪破那伽定便見文星入寺來倒屣門迎開笑面林泉陡覺起風雷

風雷起處萬壑生春正眼洞明十虛無間手携仲尼日月腰佩佛祖靈符在處爲瑞爲祥爲龜爲鑒牆壘法門股肱王室不是神通妙用亦非法爾如然何謂如此自從踏斷千差路便向毗盧頂上行

雪巖欽禪師上堂謝青原居士眼空東魯口吸西江機鋒峻捷不讓老龐仰山者裏別無禪道佛法只有一口吹毛利劍凜凜如霜要爲人剪除毛病換骨洗腸長憶江南三月裏鷓鴣啼處百花香

高峰妙禪師直翁居士至上堂山僧有一奇特因緣未嘗輕易拈出今日幸遇直翁證明供養大眾良久云美食不中飽人餐

藕林居士至上堂此事如欲登天目大山相似未到山時不免蘊一座山於八識田中泊至一到所蘊之山恍焉消殞因甚如此豎起拂子云只緣身在此山中復舉老子道湛兮似或存吾不知其誰之子象帝之先師拈云咄哉者漢錯下註脚湛兮似或存吾不知其誰之子毗耶城裏老維摩

千巖長禪師東陽陳君采至示衆舉白雲端因郭功

父到云夜來作得箇山偈說向大眾請舉似諸方非  
惟謝功父大儒且要天下有鼻孔衲僧脫却貼肉汗  
衫乃云上大人丘乙巳化三千七十士爾小生八九  
子佳作仁可知禮也師云白雲固是作家爐鞴功父  
亦是煨了精金檢點將來好與三十棒何故一箇不  
合將常住物作私已人情一箇攻乎異端斯害也已  
要脫他天下衲僧貼肉汗衫倒添了百二十斤黃金  
鎖甲如何有箇洒洒落落時節無明茅庵之下君采  
大儒訪及我也不統夜思量作箇山偈我也不擊鼓  
叙謝廣演條章只有一味杜田禪自然兩眼對兩眼  
如何是杜田禪喝一喝云朕聞上古其風樸略  
長翁淨禪師客至上堂陸修靜陶淵明文殊普賢作  
圓相曰咦一款具呈且道憑誰批判若是孔夫子吾  
無隱乎爾

作麼生判斷使其聲和響順形直影端剖破人我藩籬塞却無明窟穴擊拂子二由一有一亦莫守日午打三更面南看北斗

忽都達兒狀元入山上堂舉玉泉浩布褐因東坡居士微服相訪浩問云尊官何姓坡云姓秤是秤天下長老的秤浩睡地云者一睡重多少坡休去師云玉泉是作家宗匠東坡是當世大儒薦剗相逢發揮此道盡謂東坡休去秤尾無星殊不知八兩半斤總在自家手裏雖然如是也須扶起玉泉只如他道者一睡重多少多少人道不得直饒道得更與一睡唯庵然禪師官員至上堂舉昔日朗州刺史李翱慕樂山和尚道風屢請不赴乃肅裝客禮直造座前山

默然殊不顧視李乃云見面不如聞名拂袖便行山  
召李翔李回首山云何得貴耳賤目李遂禮拜起問  
云如何是道山以手指天復指淨瓶云會麼李云不  
會山云雲在青霄水在瓶李因有省乃呈偈云煉得  
身形似鶴形千株松下兩函經我來問道無餘說雲  
在青霄水在瓶師云我者裏則不然今日若問龍峰  
如何是道但云國正天心順官清民自安且道與藥  
山還有優劣也無靠拄杖下座

了庵欲禪師路官馬知事至上堂久雨不晴天道晦  
冥浸爛鼻孔滴穿眼睛山僧正是煩惱不暇忽然聽  
得尙書履聲呼童掃榻喚僧點燈抵掌劇談半餽悶  
中不覺惺惺起來豁開戶牖萬里不挂片雲今朝月  
望陞高座一炷清香祝聖君

天目禮禪師平齋洪中書人山上堂月墮金莖香飄  
丹桂以我爲隱乎吾無隱乎澗老晦堂與麼提撕黃  
山谷打失鼻孔檢點將來不是不是

到宗刹諸山請提綱

智門祚禪師到南嶽承天陞座承天師兄早是瞞你

諸人了也翠嶺乍到不可雪上更加霜然則一言纔  
出驪馬難追事到如斯不免塗灰抹土蓋爲祖禪不  
了殃及兒孫三十年後鼻孔遼天莫錯怪人好下座  
雪竇顯禪師到萬壽衆請上堂萬壽門下一作家  
蓋是強將之兵也雖然如此保福有言擊石火閃電  
光構得構不得未免喪身失命若教據令而行盡蘇  
臺一境人箇箇三頭六臂到翠峰手裏也須瓦解冰  
消如今放過一著分付萬壽和尙

到越州承天寺衆請陞座作者相見一拶一捺據起  
便行若佇思停機卒摸掇不著若言問在答處答在  
問宗箇箇依草附木問不在答處答不在問宗罕見  
頂上有眼諸人還薦得也無薦得薦不得却是新雪  
寶之過且莫鈍致承天和尙

白雲端禪師到圓通云秋江清淺時白鷺和煙島良  
哉觀世音全身入荒草大衆承天未出世時或有一  
箇半箇衲子相疑著誰知道出世後直得無言可說  
無理可伸然雖如是猶賴得圓通主人在何謂如此  
千古萬古無人知眼裏瞳兒看分明

到歸宗云眞性心地藏無頭亦無尾應緣而化物方便呼爲智大衆承天此者來禮拜歸宗師叔師叔若行一丈承天也行一丈師叔若行一尺承天也行一尺何謂如此得風流處且風流有般漢到者裏道耶舍塔高金輪峯峻巖回頭早是鷄子過新羅似恁麼還稱得老師叔也無不見道打麵還他州土麥唱歌須是帝鄉人雖然如是三十年後清平過水

到開先云莫行舊時路莫挂本來衣如今有人向鋒刃上橫身火焰裏出手盡是勞而無功豈可更擔水向河頭賣然雖如是若教嫗母臨明鏡也道不勞紅粉施

到棲賢上堂承天自開堂後便安排些葛藤來山南東葛西葛却爲在歸宗開先萬杉一時打疊却了也今日到三峽會裏大似臨嫁醫癭卒著手脚不辦幸望大衆不怪伏惟珍重

保寧勇禪師到長蘆上堂未到者裏萬事不言既到者裏如何即是有口有舌何妨亂說有問話者麼再召無人師云較些子古資福云隔江見資福利竿

便回脚跟下好與二十保寧昨日離金陵泛小舟渡大江到長蘆門下見刹竿觀佛殿上方丈禮拜祖印禪師蒙不賜罪責特加殷勤何故恩深轉無語懷抱自分明禪師又令對衆陞座不免胡言漢語瞞諸人等是不識守惡更有一頭乘興安然泛小舟霎時風送到江頭不知相見談何事諸高德試道看

太平州瑞竹上堂主人命陞此座爲衆說法若論此座而無所陞無所不陞若論此法而無所說無所不說三世諸佛亦如是東西祖師亦如是諸人亦如是保寧亦如是既然如是誰是坐者誰是立者誰是說者誰是聽者若也會得已是頭上安頭若也不會一任斬頭覓活

五祖演禪師到海會上堂白雲山裏白雲人把定封疆無縫罅無縫罅知幾價莫有知價底麼乃云一二三四五

到興化上堂世事冗如麻空門路轉賒青松林下客幾箇得歸家共唱胡笳曲分開五葉花幸逢諸道友同上白牛車大衆車在者裏牛在什麼處芳草渡頭

尋不見夜來依舊宿蘆花下座甘露資長老把住師  
云舒州管界元來有箇草賊師云和尚也須提防資  
擬議師便拓開

圓悟勤禪師到洛浦上堂萬木榮紆一逕遙耽耽古  
屋枕山腰今朝喜到深深處幾度飛書辱見招爍爍  
山桃似火絲絲溪柳拖金日暖風和鶯吟燕語所以  
不離普光殿不出菩提場徧遊華藏海無邊刹境左  
穿右穴重重無盡一一交羅且作麼生是洛浦深深  
處覷面若無宗正眼回頭只見翠山巖

到梁山上堂擊布鼓於龍門曜螢火於太陽到者裏  
直得藏身無路還有忍俊不禁底麼師復云無生獅  
子窟哮吼驚群不二栴檀林香風雨座直得言超象  
外句演真乘道出古今用過佛祖山僧到者裏如何  
啓口所謂見所未見聞所未聞雖然借路經過不免  
逢場作戲乃古乃今無彼無此適來覺海舉夾山道  
太陽溢目萬里不挂片雲清清之水遊魚自迷目前  
無闍黎此間無老僧若能知雲月是同溪山各異便  
見但知作佛愁什麼衆生如此則三玄三要八字打

開五位君臣一筆勾下諸人還見麼出頭天外看須  
是箇中人

到德山上堂高懸古鏡列萬象於臺前橫按鐸鐸截  
群機於句下開作家爐韞奮佛祖鉗鎚演見性之真  
風紹圓明之宗範直得如天普蓋似地普擎頭頭物  
物明明了了要津坐斷選佛場開到者裏豈可飲氣  
吞聲不免借華獻水大衆當年見性禪師據一條白  
棒佛來也打至於隔江搖扇斫木傳心巖頭雪峰唱  
末後句洞山龍牙明殺活機今古流傳叢林龜鑑而  
今堂頭繼此真風截斷衆流不存涓滴山僧幸獲觀  
光敢問人境相稱一句作麼生道五溪清不盡千古  
美無虧

龍門遠禪師到真乘請上堂真乘舉石霜徧界不曾  
藏語師云徧界不藏全體露絲毫有見事還差會中  
誰是仙陀客不動纖塵使到家真實到家之者得意  
忘言鈴鐸在外之人隨情起解情解既起名相日興  
言意兩忘十方咸暢豈不見適來堂頭已普告大衆  
如何更令山野稱提蓋爲妙旨幽深人難洞達何也



既知咫尺之間爲什麼却道不觀師顏既言徧界徧空如何更云不曾藏覆還見落節處麼若見得便見石霜老子雪峰大師亦知龍門山僧與真乘長老又此一衆禪和總有分付處山僧未離本院不到此時真乘無一人龍門長老山僧離本院度荒山來到真乘諸人一一相見此間有一人龍門長老若有一人龍門長老於法成增若無一人龍門長老於法成減減故落斷增故落常既墮斷常豈云正見一似上座未出家時無一人上座既出家後有一人上座你諸人如何裁斷得心地安樂去還裁辨得麼向此有箇入處更有什麼事也或若未明良久曰不解作客久立

到蔣山上堂玄沙白紙費封題一聽雷音萬仞低慰釋私懷已無量那堪更唱邏羅哩乃呵呵大笑曰古人道笑須三十年誠哉此語某頃在白雲時與堂上佛果師兄道聚其樂無涯至今樂猶未已也又呵呵大笑云一手一獨拍兩手鳴擲擲舉意超情念相看回路陌摩雲鐘阜高徧界烏輪赫妙機速雷電神珠

不在額珍重人天大導師衲僧一見喪魂魄何也誰敢正眼觀著下座

此庵元禪師耿龍學請就淨光陞座靈峰古禪師舉白雲見楊岐岐令舉茶陵悟道頌公案請師批判師乃云諸禪德楊岐大笑眼觀東南意在西北白雲悟去聽事不真喚鐘作甕檢點將來和楊岐老漢都在架子上將錯就錯若是南明卽不然我有明珠一顆切忌當頭蹉過雖然覲面相呈也須一鎚打破舉拂子曰還會麼甚逢敵手難藏行詩到重吟始見功雪竇宗禪師初至雪竇日因顯和尚請陞座僧問寶劍未出匣時如何云神光射斗牛僧云出匣後如何云千兵易得一將難求僧退師乃云寶劍未出匣神光射斗牛千兵雖易得一將實難求便下座雪堂行禪師到國清衆請上堂句亦刻意亦刻絕毫絕毫處如山如嶽句亦到意亦到如山如嶽處絕毫絕毫忽若拶通一線意句俱到俱不到俱刻俱不刻直得三句外絕牢籠六句外無標的正當恁麼時一句作麼生道傾蓋同途不同轍杞將携手上高臺

大慧杲禪師到資福請上堂舉香城順和尚頌黃龍三關云黃龍老和尚有箇三關語山僧承嗣伊今日爲君舉爲君舉貓兒偏解捉老鼠廣鑑英禪師因見此頌乃曰只好第恐學者作無事會去師云誠哉是言山僧今日也有箇頌子黃龍此語蓋天地從來縝密不通風後昆隨例承其響總道貓兒解捉蟲

資福

乃廣鑑法孫

到雪竇請上堂平常無生句妙玄無私句體明無盡句一鏃破三關他家有本據作麼生是他家本據莫怪從前多意氣他家曾踏上頭關復舉僧問明覺禪師如何是諸佛本源明覺云千峰寒色僧云未審向上還有事也無明覺云雨滴巖花師云千峰寒色雨滴巖花今日不妨應時應節若是諸佛本源不得動著爲甚麼不得動著自有雪竇主人在

到啓霞請上堂適來蒙堂頭法叔禪師舉臨濟訪龍光因緣客聽主裁敢不遵依嚴命略與諸人下箇註脚龍光據坐雖然無語其聲如雷臨濟云者老漢今日敗闕堂頭法叔禪師道那裏是他敗闕處妙喜道

路遙夜長休把火大家吹殺暗中行

到天童請上堂垂萬里鈎駐千里鳥雖布漫天網打衝浪鯨鯨此是天童老人尋常用底育王今日得得入山瞻禮客聽主裁令陞此座到者裏說箇什麼即得莫是說心說性得麼說玄說妙說理說事得麼既總不得不可只恁麼休去既不可休去又不可說心說性說玄說妙說理說事莫是世諦流布得麼若恁麼喚作順水張帆未是衲僧用處雖然如是略借主人威光與大眾赴箇時節且道卽今是什麼時節尺蠖之屈乃欲求伸擊碎蟠桃核得見箇中仁箇中仁既見此道出常情且道出常情一句作麼生道還委悉麼眼光爍破四天下主盟此道是渠儂復云適來蒙堂頭老人舉僧問香林如何是衲衣下事林云臘月火燒山師云此是香林語堂頭今日舉育王隨擡擡也未敢相許因什麼未敢相許選佛若無如是眼假饒千載又奚爲

無用全禪師到靈隱請上堂靈山正派達者猶迷明來暗來誰當辨的雙收雙放孰辨端倪直饒千聖出

來也祇結舌有分何故人歸大國方爲貴水到瀟湘  
始是清復云適來松源和尚舉竹筴話今天童納敗  
關諸人要知麼聽取一頌黑漆竹筴握起迅雷不及  
掩耳德山臨濟茫然懵底如何插嘴

吉祥訥禪師到隱靜上堂五峰影裏雙澗聲中草木  
青葱煙雲澹泞風光溢目觸處可觀然雖如是祇如  
撞著道伴一句作麼生道還知落處麼良久曰玲瓏  
八面自迴合峭峻一方誰敢窺復曰嘯月吟風水石  
間忘機贏得此心閒無端打破空痕藉羞對白雲歸  
舊山

月江印禪師到雪竇衆請上堂向上一路千聖不傳  
釋迦彌勒仰望不及向上一路千聖不然德山臨濟  
窺覷無門故我明覺祖師昔日向妙高臺上唱出陽  
春白雪直得須彌岌岌海水騰波十方世界風凜凜  
地育王今日得得入山瞻禮慈容特蒙堂頭禪師闡  
揚二覺之家風傾瀉千尋之雪瀑復令山野高陞此  
座舉唱宗乘然則客聽主裁又說什麼卽得擊拂子  
就樹摘將黃葉去等閒推出白雲來復舉堂頭禪師

適來舉臨濟栽松次黃檗問云深山中栽許多松作  
麼濟云一與山門作境致二與後人作標榜道了以  
鏤頭築地三下檠云雖然子已喫吾三十棒了也濟  
又以鏤頭築地作嘯嘯聲檠云吾宗到汝大興於世  
爲山問仰山云當時黃檗只囑一人別更有在仰山  
云有祇是年代深遠不欲舉似和尚爲云但學看吾  
也要知仰云一人指南令行吳越遇大風則止應庵  
和尚拈云黃檗道雖然如是子已喫吾三十棒了也  
養子之緣固當如是臨濟正令雖行可惜向鏤頭邊  
甘自活埋仰山見解未出常流豈止遇大風則止當  
時何不道直待虛空界盡此話方始大行豈不是頭  
正尾正師乃召大衆云黃檗臨濟兩父子開口不在  
舌頭上爲山仰山杓卜聽虛聲老應庵劈開太華放  
出黃河石室翁手然犀炬照開滄海育王見處也要  
諸人共知一人指南令行吳越太虛空中不消釘橛  
藕絲數裏騎大鵬等閒挨落天邊月久立衆慈伏惟  
珍重

朝宗忍禪師到黃檗請上堂斷際出身處黃檗古道

場誰云來作客到處是家鄉山僧以昔日同參之誼來訪黃檗法姪承遣僧百里遠迎兼領衆敦請說法雖是一片好心未免彼此鈍置何故慫作家相見嘴盧都何事今朝者也乎大抵欲談辭已喪高陞法座共歡呼辭已喪又歡呼箇甚麼良久云相逢自有知音知何必清風動天下座

主人即隱元禪師

筓庵問禪師到報恩玉林和尚請上堂維那宣疏云惟我筓庵法兄大和尚十年以長幸獲比肩某甫三旬兄登不惑賁然惠顧一衆欣慶因某禁足養親不獲對衆引請謹奉先師法服一頂惟願法兄大和尚不忘久入先師之室早已雷震一方恭請披先師衣坐先師座揭露先師正法眼藏令見者聞者同明向上一竅使無知劣弟斗室安眠匪敢攀古人閉門打睡之機亦稍慕高祖死關之遺範云爾師接疏云大衆會麼我堂頭玉林法兄大和尚已爲諸人一槌兩當了也伶俐底不妨便請前來對衆激揚衆問話畢乃云問話且止者是什麼所在盡擬向者裏指東畫西說長道短昔年先師於此建立法幢繼得我玉林

法兄和尚展開潑天門戶直使舊業維新問上座今日到來直是讚歎莫及何況登他寶座向人天大衆前鼓兩片皮欺胡謾漢追憶問上座自見先師二十年來端爲此事未嘗有絲毫自欺昔日在磬山室中親侍先師受盡鉗鎚耐盡冰雪固是不敢自欺及來到者報恩寺裏輔弼先師合水和泥通身擔荷亦何常有絲毫自欺處迨後先師示寂安厝後事曳杖他山至今八九年來若有一絲毫自欺今日爭敢與我玉林法兄和尚覲面相見既承推出座上爲衆舉揚此事更是不不得有一絲毫許自欺以欺諸仁者顧左右云且道作麼生是此事那裏是問上座不自欺處還知麼若也知得灼然佛祖向上一機廓爾人天正法眼藏若也不知少間下座伏望諸仁者同詣方丈懇請堂頭和尚不惜屈曲垂慈深錘痛拶惟此叙陳伏希鑒炤下座

到萬壽三宜和尚請上堂主賓互換偏正隨機雙瑣金針縱橫妙叶古佛堂前不留朕跡黃金殿上迺出尊卑者是萬壽和尚尋常瞞人不得處若向言中取

則埋沒已靈更若旬外旁資辱他先聖不見先德云  
道則太煞道相續也大難山僧今日借板門。能爲諸  
人略通一線去也卓拄杖云竿頭絲線從君弄不犯  
清波意旨殊

列祖提綱錄卷第十八

列祖提綱錄卷第十九

武林十八澗理安禪寺住持婁東行悅集

施主請陞座提綱

定州崔禪師州將王令公於衙署請陞座拈拄杖曰  
出來也打不出來也打僧出曰崔禪師擲下拄杖  
曰久立令公伏惟珍重

風穴沼禪師鄂州李史君請升座祖師心印狀似鐵  
牛之機去卽印住卽印破祇如不去不住印卽是  
不印卽是還有人道得麼時有盧陂長老出問學人  
有鐵牛之機請師不搭印師曰慣釣鯨鯢澄巨浸却  
嗟蛙步蹶泥沙陂佇思師喝曰長老何不進語陂擬

議師便打一拂子曰還記是話頭麼試舉看陂擬開  
口師又打一拂子牧主曰信知佛法與王法一般師  
曰見甚麼道理牧主曰當斷不斷反招其亂下座  
浮山遠禪師歐陽公請因基說法乃陞座若論此事  
如兩家著基相似何謂也敵手知音當機不讓若是  
綴五饒三又通一路始得有一般底只解閉門作活  
不會奪角衝關硬節與虎口齊彰局破後徒勞綽幹  
所以道肥邊易得瘦肚難求思行則往往失黏心羶  
而時時頭撞休誇國手謾說神仙羸局輪籌卽不問  
且道黑白未分時一著落在什麼處良久云從來十  
九路迷悟幾多人

五祖演禪師郭朝奉祥正請上堂朝奉於法座前燒  
香云此一瓣香爇向爐中爲光明雲遍滿法界供養  
我堂頭師兄禪師伏願於此雲中方廣座上擘開面  
門放出先師形相與諸人描邈何以如此白雲巖畔  
舊相逢往日今朝事不同夜靜水寒魚不食一爐香  
散白蓮峯師遂云曩謨薩怛哆鉢囉野恁麼恁麼幾  
度白雲溪上望黃梅花向雪中開不恁麼不恁麼嫩



柳條金線且要應時來不見龐居士問馬大師不與萬法爲侶者是什麼人馬大師云待汝一口吸盡西江水卽向汝道大衆一口吸盡西江水萬丈深潭窮到底掠約不是趙川橋明月清風安可此

佛印元禪師郭公提刑請陞座郭公拈香云覺地相逢一何早鶻臭布衫今脫了要識雲居一句玄珍重後園驢喫草召大衆曰此一瓣香熏天炙地去也師曰今日不著便被者漢當面塗糊便打乃曰謝公千里來相訪共話東山竹徑深借與一龍騎出洞若逢天旱便爲霖擲拄杖下座公拜起師曰收得龍麼公曰已在者裏師曰作麼生騎公擺手作舞便行師拈掌曰祇有者漢猶較些子

保寧勇禪師郭公提刑請陞座郭公拈香云法鼓旣鳴寶香初爇楊岐頂顙門請師重著楔師卓拄杖一下曰著楔已竟大衆證明又卓一下便下座

兜率悅禪師漕使無盡居士張公商英按部過分寧請五院長老就雲巖說法師最後登座橫拄杖曰適來諸善知識橫拈豎放直立斜拋換步移身藏頭露

角既於學士面前各納敗闕未免喫兜率手中痛棒到者裏不由甘與不甘何故見事不平爭忍得衲僧正令自當行卓拄杖下座

圓悟勤禪師呂左丞請上堂云一句語全規矩應出毗盧印一種機截衆流透過祖師關若是明眼人已透過三千里其或尙留觀聽猶滯皮膚未免向第二義門重話會去也所以道知幻卽離不作方便離幻卽覺亦無漸次釋迦老子三世諸佛心髓一時頓現便恁麼承當全心卽佛全佛卽心心佛無二更疑箇什麼正當恁麼時作麼生道千古萬古黑漫漫填溝塞壑無人會

陳大夫請上堂云有句無句初無兩端如藤倚樹打作一片樹倒藤枯忍俊韓盧呵呵大笑金毛獅子若是鐵眼銅睛當陽覷透便可以把斷要津不通凡聖終不向他語言裏作窠窟機境上受羅籠所以道言無展事語不投機承言者裏滯句者迷不落語言不立機關布漫天網打衝浪魚垂萬里鉤駐千里鳥雕也須還他大達之士始得所以趙州勘破處爲方便

玄沙踰過處驗作家雪峰報毬雲門顯鑑睦州見成  
俱胝一指如生鐵鑄就通上徹下只要箇本分人忽  
若總不恁麼又作麼生委恁麼了取平常心是道饒  
來喫針因來眠復頭云卽心卽佛開心印非佛非心  
蹈大方當處分身千百億普光明殿放毫光

大慧杲禪師陳知縣請陞座云祖師道通達本法心  
無法無非法悟了同未悟無心亦無法旣無心又無  
法却喚甚麼作本法本法又作麼生通達黃面老子  
云心不妄取過去法亦不貪著未來事不於現在有  
所住了達三世悉空寂諸人還委恁麼若未委悉分  
明爲諸人註破不住現在此名爲定不著未來此名  
爲慧不取過去此名爲智亦謂之如來禪亦謂之祖  
師禪苟能於日用二六時中如是通達如是了悟則  
此定此慧此智一如空無有邊際定慧智旣無邊  
際則當人日用神通光明亦無邊際神通光明旣無  
邊際諸波羅密諸解脫門亦無邊際波羅密解脫門  
旣無邊際此無住心亦無邊際無住心旣無邊際徑  
山今日以此無邊際心說此無邊際法奉爲臣子陳

亞卿祝吾君壽地久天長亦無邊際正當恁麼時依  
時及節一句作麼生道舉拂子云將此身心奉塵刹  
是則名爲報我皇下座

應庵華禪師數教授請上堂五百力士揭石義萬仞  
崖前撒手行十方世界一團鐵虛空背上白毛生直  
饒拈却賊脂帽子脫却鶻鼻布衫向報恩門下正好  
契棒何故半夜起來屈膝坐毛頭星現衲僧前

東山雲頂禪師九龍觀道士并三士人請上堂儒門  
畫八卦造契書不救六道輪迴道門朝九皇鍊真氣  
不達三祇劫數我釋迦世尊洞三祇劫數救六道輪  
迴以大願攝人天如風輪持日月以大智破生死若  
劫火赫秋毫入得我門者自然轉變天地幽察鬼神  
使須彌鐵圍大地大海入一毛孔中一切衆生不覺  
不知我說此法門如虛空俱含萬象一爲無量無量  
爲一若人得一卽萬事畢珍重

千巖長禪師曹居士請陞座婺州信士曹仁卿同合  
宅資眷就寺設齋表觀請老僧升座說法老僧曰諾  
會麼盡大地是箇老僧盡大地是箇法座更教老僧

升什麼座說什麼法記得五六年前行橋時已曾到宅叨齋受臘今日山中三四百衆喫齋受臘人人歡歡喜喜只者歡歡喜喜增仁卿多少長田仁卿多少壽量適來長老已爲仁卿向法座上舉揚老僧只喫齋受臘便了不用爲蛇畫足自然水到渠成豈不見五祖演禪師雲端坐受供養施主長安樂趙州云老僧在者裏坐地更說什麼佛法無明有條攀條無條攀例忽有箇漢出來道和尚你坐地分贓他日作箇什麼填還他施主去只向道不作牛犢定作驢因甚如此大丈夫異類中行不是差事

古林茂禪師施主請上堂佛佛授手無邊刹境自他不隔於毫端祖祖相傳十世古今始終不離於當念向上一路千聖不傳直饒坐斷報化佛頭未免墮在聲色堆裏更向威音那畔獨振玄風空劫已前單明自己大似隔靴用拳頭抓癢有甚快活處所以道群靈一源假名爲佛體竭形銷而不滅金流璞散而常存百姓日用而不知諸佛常知而獨用以獨用無私之旨常居乎有象之先以日用不知之心迥出手眞

諦之表無前無後無古無今彼我混同聖凡不異正與麼時如何青山不鎖長飛勢滄海合知來處高擊拂子下座

石車乘禪師司理黃元公等請上堂一句截流全心卽佛萬機不到全佛卽心到者裏心佛俱忘復是何物喝一喝甜瓜徹蒂甜苦瓜連根苦

箸庵問禪師衆官請上堂隨波逐浪不遺一滴截斷衆流不存毫末一口吸盡西江不與萬法爲侶且道是隨波逐浪截斷衆流龐居士道十方同聚會箇箇學無爲此是選佛場心空及第歸大家在者裏豈不是心空及第且無爲又作麼生學長江水上浪滔天明月清風安可比

金大司空請上堂師云實際理地不受一塵萬行門中不捨一法若受一塵法輪從何而轉若捨一法佛事何由而興所以有力大人向劫濁苦海中爲津爲梁逆行順行總莫可測回天關轉地軸須是其人方能擔荷吹陽春於旣燼樹福運於方輿結一時殊勝之緣作千載賢良之合風雲際會敲唱乘時有此殊

勝因成此殊勝緣具此殊勝願得此殊勝福不忘囑  
付舉起便知把手相呈一超直入且徹頭徹尾一句  
作麼生道全憑舉鼎調羹手撥轉如來正法輪

### 慶生提綱

圓悟勤禪師周侍御請上堂玄機透脫融萬象於目  
前至理高明會千差於物表一明一切明一見一切  
見一用一切用一說一切說直截根源當陽顯露若  
能於此洞達去自己脚跟下一段大事明於杲日寬  
若太虛可以修身可以見性可以祝一人上壽可以  
種未來勝因是故靈山拈花迦葉微笑少林面壁神  
光傳心於是中間如擊石火似閃電光須是奇特人  
方明本分事要知本分事還他奇特人只如今日奇  
特本分底一句作麼生道葵霍同傾仰高祝萬年春  
鄭太師請上堂乃云靈光未兆萬彙含太虛一氣既  
彰華開世界起過去諸佛現在諸佛未來諸佛皆同  
箇中出現若天若人若群生無不從是中流出以一  
處明百處千處光輝一機轉千機萬機歷落所以道  
淨法界身本無出沒大悲願力示現受生然而此悲

此願此力若是宿稟靈根具超脫種智則才生下時  
已作獅子吼已具大神通至於若行若住若坐若臥  
或放行或把住無不皆從諸聖頂額上縱橫十字乃  
至享福享壽享富貴多子孫悉承渠儂威力正當恁  
麼時一句作麼生道重重彰瑞氣一一湧金蓮復頌  
云威音已前靈苗秀到今光彩轉新鮮萬卉芬芳風  
景麗壽山高到大椿年

大慧杲禪師榮侍郎生日請陞座僧問楊岐一頭驢  
爲什麼只有三隻脚師云你少喫水草進云恁麼則  
覷面相呈更無回互師云且莫詐明頭進云既是潘  
閬倒騎歸爲什麼攔殺黃番綽師云非汝境界進云  
爭柰卽今何師云且莫辜負老僧進云恩大難酬便  
禮拜師乃云楊岐一頭驢只有三隻脚潘閬倒騎歸  
攔殺黃番綽妙喜三十年前底註脚今日被者僧對  
人天衆前華劈一上不同小小直得楊岐和尚拍手  
呵呵大笑山河大地萬象森羅一時起舞當恁麼時  
且道是甚麼人證明所以道處處真處處真塵盡  
是本來人真實說時聲不現正體堂堂沒却身作麼

生是堂堂正體未離兜率已降王宮未出母胎度人已畢豈不是堂堂正體若作堂堂正體會則辜負釋迦老子若不作堂堂正體會則辜負自己自己既辜負將甚麼與釋迦老子相見若向者裏撥得一線路方知釋迦老子在兜率天乘日輪香象降摩耶夫人胎只是示現箇生底時節以至一手指天一手指地云天上天下唯我獨尊也只是與一切人作箇示現生相底樣子若向者裏見得不獨爲釋迦老子出氣亦乃與生身父母出氣不獨爲生身父母出氣亦乃與一切有情出氣正當恁麼時且道承誰恩力良久云揮劍斫開人我易推山塞斷是非難

博山來禪師魏國公徐六翁老居士誕日請上堂因緣所生法莊嚴世間相了彼性空者斯人具正眼諸昆仲心本無生從緣有生生緣勝故佛種亦勝法華經云佛種從緣起是故說一乘作麼生是說一乘底道理諸昆仲毫端歛法界之方滴水含滄海之濶無明全諸佛之智藏識潛增上之緣理應箭鋒事存函蓋不可以思議而得之者也諸昆仲茲因魏國六翁

老居士華筵大誕之辰合郡衆居士於濟生庵中設此無遮大會爲六翁居士祝壽且道將何爲祝耶須彌耶滄海耶大地耶草木叢林耶若以須彌爲壽須彌高而有頂若以滄海爲壽滄海深而有源若以大地爲壽大地厚而有輪若以草木叢林爲壽草木叢林多而有盡惟以吾大圓覺中華藏界內香雲花雲幢幡雲音樂雲寶蓋雲若舉一若舉二若舉百若舉千乃致百千萬億數中隨拈一微塵許皆與有情無情等與毗盧遮那等皆可爲居士祝壽也雖然如是不免爲居士旁通箇消息作麼生是旁通底消息華藏界中纔一念閻浮早已萬千年珍重

筌庵問禪師慶誕陞座今日是大玉太史不惜眉毛露頭露面底時節此老于二千年前靈山會上親受釋迦老子遺囑未離當處已到閻浮未出母胎已成正覺今日既不忘囑付山僧插一瓣香爲伊證明還會麼若也會得便見目前山河大地若草若木若有情若無情同聲讚嘆以祝眉壽且道山僧拄杖子又如何慶讚卓拄杖一下云南山不斷蘗葱翠東海方



昇爛熳霞巖壑久沾春富貴濛濛新雨潤林華

施主誕日供僧請陞座輕雲潑黛薄霧描青瑞氣生  
煙紅霞開旭藍田燦白玉之光赤水耀驪珠之色人  
與境會事得理融方能建最勝幢於普光殿中樹功  
德林於衆香國土毗耶非小大千非廣渤海非多滄  
蹄非細同此身心同此塵刹同此行願同此福德正  
當恁麼時且誕生一句作麼生道擊拂子云一夜天  
香聞桂子秋深還到葛洪家下座

周居士請上堂無量壽如來今日在山僧拄杖頭上  
放光動地普告大衆說偈云一切法不生一切法不  
滅生滅滅已盡寂滅常現前憍陳如尊者從旁忍俊  
不禁叉手當胸瞪眉努目道古佛如來將謂有少奇  
特三昧與麼說話不出他座主圈續何足當今日因  
齋慶讚無量壽如來忽然聳入山僧拄杖變現八萬  
四千諸佛國土普化八萬四千諸佛國土中香飯徧  
設八萬四千獅子寶座供養八萬四千諸大菩薩普  
熏諸大菩薩八萬四千毛孔於諸毛孔中各各具八  
萬四千無量無邊功德莊嚴作此一期佛事已拄杖

子請質之曼殊大士曼殊大士請質之維摩老人衆  
中有知恩報德者麼正好出來還飯錢其或未然拄  
杖子還他拄杖子曼殊大士還他曼殊大士維摩老  
人還他維摩老人莫道默然好卓拄杖

金大中丞慶誕請陞座師云祥雲繞座瑞氣盤空總  
握樞機光揚化日具匡時之略乃能展向上之猷樹  
蓋世之勳始得副大機之用所以大人行大事大智  
得大力大材成大功大德必大壽三千里外橫按鎮  
鄧殺活全彰體用兼舉抒神力於盤根錯節之時挈  
紛拏於振甲揮戈之日捏聚也全身掣定帷幄運籌  
放開也百職維新海山永賴是則大中丞豈翬居士  
生平夙抱歷劫素修從靈山授記以來現宰官身具  
大人作所謂以出世心行世間法不壞世間法能成  
出世心此心行于身則中丞今日道成德備安富尊  
案此心行于家則中丞今日祥麟瑞鳳克讓克恭此  
心行于天下則中丞今日據寰中勅握閭外威關土  
開疆澤民裕國此心行于今日一時則現前縉素群  
機拱息衆望獨尊鼓舞休明謳歌福運且道正當恁

麼時祝壽一句又作麼生須彌峯巖同天地億萬斯年臺太平復偈云九天雨露洽方新特拜樞衡寵渥恩壽域蕩平開化日會看龍虎際風雲

陳行志爲母祝壽請陞座師云行志爲母祝壽山僧何法可說有說言思易窮無法算數莫極大家隨例當齋箇箇仰望不及既仰望不及且道有何奇特拈拄杖云昨日南山虎咬大蟲東海鯉魚翻箇轉身跳入太湖波底忽轟霹靂直得莫菴縹緲兩峯相對點頭云大好消息却被三家村土地從旁不憤笑云長老長老好生饒舌鄉子底裏愛說平易禪何消你大驚小怪恁般廝結殊不知拄杖子既到者裏却放過不得卓拄杖云慣釣鯨鯢沉巨浸却憐蛙步輾泥沙喝一喝復云今日陳行志請爲母親祝壽一箇高興不知說到那裏去了大衆灼然陳行志請爲母親祝壽山僧却不是說底別事久立珍重

牧雲門禪師歲旦董文學誕日上堂大年初一光風霽日好大衆自從威音王已前直至如今有佛世界無佛世界於中有不可說日月不可說不可說歲數

不可說不可說國土無不盡從者一日子流出直得皇風蕩蕩八表無垠野老謳歌萬方無極且有箇人出世恰好撞著者日子又如何既承禮樂詩書後定作頂冠束帶人

祈嗣提綱

無相真禪師檀越祈嗣有應供菩薩請示衆清涼山裏萬菩薩盡是吾家屋裏人珍重秋光去秋月幾回圓關幾回新平安來往莫忽忽海角天涯不易逢須信善財纔歛念依然在覺城東龍彪產兮真奇異纔生已有食牛氣薔薇林深秋月圓一片香風動天地

南石琇禪師琴川陳從道設齋求嗣上堂饑來喫飯困來打眠踏著尋常一路恁麼禱僧也甚希有更要萬仞峰頭濶步荊棘林裏翻身底萬中無一馬祖一喝百丈直得三日耳聾黃檗聞之不覺吐舌且道是尋常一路是萬仞峰頭濶步旃檀圍繞旃檀樹獅子還生獅子兒

箸庵問禪師施主祈嗣請陞座云九夏功成一期告

滿拄杖頭週遭向四天下走一轉身元來祇是自家屋裏三條椽下七尺單前翻來覆去了無些子奇特雖然祇是自家屋裏亦乃了無奇特爭奈頭是頭底是底驢是驢馬是馬老僧是老僧闍黎是闍黎寒時寒殺熱時熱殺瞋肝懽侗有甚麼數茄子瓠子那裏得知今日適當解夏施主入山營供要山僧與他祈嗣若喚作祈嗣又爲諸入解夏若喚作解夏又爲他祈嗣畢竟作麼生得相應去拈拄杖云丹山生鸞鷟獅子產狻猊不惜莖眉者天然是俊兒卓拄杖云要一得一要二得二從來言不虛發汝諸人各各分明記取下座

浴佛日施主祈嗣上堂舉雲門拈世尊初生話師云磬山今日又且不然雲門一棒我只一杓看取兒孫擎頭戴角

### 飯僧提綱

保寧勇禪師因施主飯僧上堂問既無盡答亦無窮若據祖宗門下本無如是事若於建化門中隨機施設亦大矣哉永嘉云嗟末法惡時世衆生薄福難調

制去聖遠兮邪見深魔彊法弱多冤害永嘉與麼道且暫時曲順人情卽不可千古之下要且遭人檢點何故且我家本無是事諸佛亦不曾出世亦無佛可成亦無法可說亦無衆生可度亦無煩惱可斷亦無菩提可求亦無涅槃可證亦無前際中際後際亦無正法像法末法於一切法求其實性皆不可得所以時亦不去來法亦不生滅不見道一切法不生一切法不滅若能如是解諸佛常現前所以長沙云盡十方世界是沙門一隻眼盡十方世界是沙門全身盡十方世界是箇真實人體盡十方世界是解脫門乃至佛及衆生有情無情有性無性皆同一體同一性同一相亦無內外中間取捨愛憎斷常生滅染淨去來種種知解之所分別若能如是則三界不能收六道不能攝於一切處運用去來無住無著應物現形得大自在或凡或聖或是或非逆行順行天莫能測所以永嘉到者裏出手不得又記得本淨云道體本無修不修自合道棄却一眞性來入關浩浩若逢修道人第一莫向道實謂誠實之言保寧與麼也且隨

方就圓然雖如是笑我者多嘲我者少

市戶請上堂摩竭室不換方丈門再開不惜眉毛者  
橫身請入來乃云三界六道輪迴業鏡難藏好醜不  
須更滯他人盡是自作自受如今於諸人分上各自  
有一面業鏡子明歷歷地且道是好是醜試請迴頭  
自照看又外道問世尊今日當說何法尊云說定法  
次日復問說何法尊云說不定法道云昨日爲什定  
今日爲什不定尊云昨日定今日不定諸仁者是知  
佛法無有定相無不定相隨機施設一切臨時說有  
亦得說無亦得說定亦得不定亦得猶如太空蕩蕩  
無礙一任穿鑿縱橫自在如今若有人問保寧今日  
當說何法卽云說不定法或次日問說何法卽云說  
定法或問昨日爲什不定今日爲什定卽云昨日不  
定今日定或問昨日不定事作麼生卽云未曾再謝  
知府在或問今日定底作麼生卽云市戶已作茶筵  
了謝畢乃云引退潛藏志未從世間何處可相容依  
前却入塵泥去物物頭頭露祖宗拍禪床下座  
五祖演禪師因齋上堂不寒不暖喜春遊士女傾心

結頂修自覺一生如幻夢始知百歲類浮漚子規啼  
處眞消息芍藥開時野興幽此箇門風誰會得等閒  
白却少年頭

桐樹郭宅請上堂桐林郭評事家門幸食祿性靜好  
吾宗溫良如美玉封疏請諸山營齋植洪福二人長  
老共談玄正值陽和二月天渴鹿飲溪水作水野猿  
啼樹霧成煙黃梅路上多知己今日共乘般若船乘  
船卽不無且道說箇什麼事幸遇三春明媚因行不  
妨掉臂囉邏哩囉邏哩乃拍手大笑云是何曲調萬  
年歡

因齋上堂二月中春物象鮮盡塵沙界一般天蒼蒼  
雨洗去冬雪野火風飄昨夜煙危嶺乍聞猿嘯日長  
江時見客乘船人生幾度逢斯景好是誠心種福田  
眞淨文禪師因施主上堂佛以一音演說法衆生隨  
類各得解僧俗男女平等心一一皆同證法界  
夢菴信禪師因衆善友入寺請因緣設粥陞座記得  
昔日甘贄行者入南泉寺設粥乃請南泉和尚念誦  
泉云爲狸奴白牯念摩訶般若波羅密多甘贄便出

泉粥後問典座甘贊在甚處座云當時便去也泉云打破粥鍋著師召大衆云甘贊設粥功不浪施南泉念誦不妨親切當時打破粥鍋如今諸人如何修設然雖如是只如諸人設粥忽然請山僧念誦且道同向甚麼卽是若道爲狸奴白牯又是隨他脚跟轉若道爲燈籠露柱不免依樣畫貓兒若道爲他增長福田又是掩人之德若只麼休去又乃施無所歸且道如何回向卽是以拄杖卓一下云普同供養

密庵傑禪師施主請上堂師據座顧視左右薦拈拄杖云今佛放光明助發實相義乃卓一下云希有諸比丘是中難比況復提起云還見蔣山拄杖子麼朝到西天暮歸東土向諸人道有世界以音聲爲佛事有世界以香飯爲佛事有世界以出入息爲佛事復卓一下云且道者箇世界將什麼爲佛事擲下拄杖云阿剌刺四方八面活鱖鱖

楚石琦禪師楊府安人眞如善住二居士入山齋僧上堂沙門釋子頭戴施主屋腳踏施主地口喫施主飯身著施主衣將什麼報答施主入道不通理復身

還信施長者八十一其樹不生耳若終日喫飯不曾咬破一粒米終日著衣不曾挂著一縷絲行不見行立不見立十二時中不依倚一物不見施者不見受者亦無施物恁麼見解正是增上慢人別造地獄著你在總不恁麼時如何大衆歸堂喫茶去

南石琇禪師施主設齋粥上堂繁興大用舉必全眞維摩以一鉢飯飽二萬二千菩薩甘贊行者設粥南泉打破粥鍋且道是繁興大用不是繁興大用等閒認得東風面萬紫千紅總是春

#### 施齋田提綱

疎山性禪師疎溪施主施齋田請上堂人人一坐具方圓儼今昔行坐不曾移歲寒消劫石更不屬陰陽又不輪糧役四至旣分明契券親委悉復證者田地大自在休息那箇不具足受用無窮極如是布施汝如何不感激養十方佛種常生大智食轉施諸凡聖不思議功德不是有心求不是無心得須悟春風意莫認春山碧無上大因緣知恩念來歷因果旣無差宜應全道力較彼來處功羹飯銅鐵汁烹然畫斷三



輪虛空爭覓踪跡燈籠露柱秋收依舊山堆嶽積卓  
拄杖云柳絮隨風葵花向日

### 供羅漢提綱

無相真禪師供羅漢示衆應供真人著眼高海山來  
往不辭勞也知爲瑞爲祥處惹得天花上毳袍石梁  
方廣路非遙薺蔔堂中信手招尊者半千誰是主海  
天雲靜月輪高

眞淨文禪師供羅漢上堂方上人今日爲施主供養  
羅漢且道羅漢來也無若來在什麼處若不來又供  
養他作什麼乃願謂大衆云要識眞羅漢麼元來總  
在者裏復召云方上座還見麼正好供養來無所從  
去無所至一一不生一一不滅性眞妙明常住世間  
清淨本然周遍法界若也如是萬兩黃金亦消得若  
不如是滴水難消老僧隨例餐餽子也得三文草  
鞋

上堂山門今日供養羅漢爲十方檀越酬還心願亡  
者生天現存獲福召云大衆但祇隨例餐餽子莫問  
人間短與長復拈起拄杖云我生已盡梵行已立所

作已辦不受後有三界不柰伊何堪受人天供養者  
一隊少叢林漢總好與二十拄杖喝一喝下座

供養羅漢上堂三界惟心萬法唯識未有一法不從  
心之所生心若滅也一切法滅所以過去心不可得  
未來心不可得現在心不可得三際既不有一心何  
所生大衆但盡浮想盡說阿羅漢浮想不盡總屬流  
浪生死喝一喝下座

上堂今日供養羅漢夜來四方高人諷誦妙法蓮華  
經安樂行品一遍大衆作麼生是安樂行擬心早不  
安樂了也乃喝一喝云豈不是安樂行如何是透法  
身句北斗裏藏身豈不是安樂行如何是祖師西來  
意庭前栢樹子豈不是安樂行如何是超佛越祖之  
談糊餅豈不是安樂行以至僧俗大衆一一清淨光  
明住持豈不是安樂行乃至一佛二菩薩一一羅漢  
一一辟支佛無不清淨實相住持所謂安樂行也大  
衆唯有譬中寶珠不安與之雖然不與你人人具足  
十二時中光明烜赫阿誰欠少還會麼歸堂喫茶去  
喝一喝下座

供養羅漢上堂大衆一切法卽諸佛法一切心卽諸佛心一切語卽諸佛語一切道卽羅漢道法也心也語也道也且道是一也是二也是同也是別也二由一有一亦莫守一心不生萬法無咎

楚石琦禪師因齋羅漢上堂風生古殿月轉回廊香煙合匝燈燭熒煌賓頭盧尊者應供四天下無一處不到還到此間麼此間是什麼所在說到不到合掌云三德六味施佛及僧便下座

### 放生提綱

雪竇顯禪師放白鰓示衆朱冠青戡雪爲毛不近鸞凰意亦高放你雲林莫回首如今何處是仙曹無相眞禪師施主送魚放生示衆死水浸著未是作家大海番身不妨脫洒蘆山今日通一線道須貴各得自由休更貪他香餌信得及去千尺絲綸惹絆不住縵天大網誰敢羅籠一跳便過龍門不怕掀天動地遇大旱則爲霖雨著意嘉惠生靈十千天子齊立下風怒海鯤鵬仰望不及良久云若到者箇田地不得辜負老僧

中峰本禪師置運使卒哭藥師道場放生紅芍藥邊方舞蝶碧梧桐裏正啼鶯目前大道無遮障自是衆生沒路行由是今日藥師如來與近故少中大夫兩浙都運霍公於一毫端上起大道場作百寶莊嚴佛事本上座因齋慶讚普爲諸含識指箇路頭去也教中道三弄無法同處求心心不可求法將安寄便見十方世界是清淨法身十方世界是藥師十二願海審如是百羽者聽其高飛有足者不妨遠舉帶甲者潛於深淵負鱗者縱於巨壑無一衆生不成正覺無一衆生不入圓明雖然如是只如古人道門裏出身易身裏出門難且道不涉易難如何是超然獨脫底句乃教生云衝開盡是通霄路透出無非解脫門第庵問禪師西湖放生示衆南山起雲北山雨秋色滿湖鷗鷺舞鷺然挂杖化爲龍大地含生失本據連累旁觀多少人提督叫屈稱冤苦山僧瞬目笑顏開利那共入無生路還委麼我若向刀山刀山自摧折我若向地獄地獄自消滅拍手云透網金鱗休帶水摩雲俊鶴合冲霄

湖舟放生陞座師云縵天布網要入入不得要出出不得直饒轉得身來已是皮穿肉綻欲得搏九萬雲徙九萬里也須是不脛而走無翼而飛底始得良久云不食香餌味始是碧潭龍今辰奉爲闔城善信結社放生上祝皇圖祈消兵祲且天下太平干戈永息一句作麼生道聽取一頌薦自飛兮魚自躍弋何慕也釣何驚共瞻一片湖山色仰沐皇恩浩蕩仁

供法衣提綱

白雲端禪師施主捨法衣云龍披一縷金翅不吞當時若一口吞盡豈不天下太平且道那箇是吞不盡底拈起法衣角示衆云者箇豈不是吞不盡底還見麼等閒挂在肩頭上也勝時人著錦衣

眞淨文禪師施主捨法衣上堂師云諸佛出世咸披此衣說法度人洞山今日亦披此衣說法度人遂拈起衣角召大衆云還有不受惡水潑者麼良久云月到天心白波歸海上清

施主捨法衣上堂大衆諸佛法衣得之者出三界離五欲成大道度衆生遂舉衣云舉起也地獄停酸修

羅息戰放下也帝釋搖頭諸天罷樂不擊不放十方法界情與無情同成佛道未審施法衣者成得箇甚麼良久云自從盧老收歸後須信人人總有之

圓悟勤禪師施主捨法衣上堂云迦葉攜坐鷄足峰老盧持過大庾嶺如今披向寶華座孤光迥迥高峰頂且道是同是別錦衣公子貴林下道人高

應庵華禪師廣德軍趙中大施法衣請小參師乃舉教中道若以色見我以音聲求我是人行邪道不能見如來乃喝一喝云諸人還聞麼要且不是聲提起袈裟角云諸人還見麼要且不是色既不向聲色上辨向什麼處見如來若道二六時中一動一靜一語一默折旋俯仰處見如來卽是認賊爲子若道不向二六時中動靜語默折旋俯仰處辨正是癡狂外邊走到者裏若是明眼漢瞞他一點不得豈不見本仁和尙道尋常不欲向聲前句後鼓弄人家男女要且聲不是聲色不是色時有出問如何是聲不是聲仁云喚作色得麼曰如何是色不是色仁云喚作聲得麼且道爲你說答你話若辨得出於佛法中不妨有

箇入處雪竇拈云本仁也甚奇怪要且貪觀天上既非聲前句後從什麼處入師拈云雪竇到者裏盡其神通無插手處只如道既非聲前句後從什麼處入往十箇有五雙踉蹌過還知薦福落處麼一箭落雙鷗了智上人遠自廣德持判府中大回禍俸資特就今辰齋僧營辦種種佛事及捨法衣一頂與山僧受用乃命小參舉揚正法眼藏涅槃妙心集此無涯上善並用祝陪台筭并諸寶眷福壽延鴻不盡功德四恩總報三有齊資法界有情同圓種智判府中大雖未參識竊聞深知有此一段大事雖相去千有餘里而未嘗隔一絲毫許正所謂千里同風也既作宗門外護而又於此道不倦信知於過去無量塵沙劫中熏習得熟纔出頭來一撥便轉豈在忉忉也然做工夫別無他術只要有大信根具大種智知有此事於二六時中行住坐臥處切切提撕看是什麼道理但恁麼推來推去推到無依倚處驀地撞著更不費絲毫氣力便是從懷肚裏出來底未嘗別有一物與你也與他從上佛祖同一受用正如斬一緼絲一斬一

切斬如染一緼絲一染一切染前後際斷三祇劫空覓其虛空了不可得全體是箇金剛正體了無出沒在諸佛分上不曾添一絲毫在凡夫身中不曾減一絲毫如水洗水似金博金有時拈一莖草作丈六金身有時將丈六金身作一莖草擒縱自在殺活自由者箇話頭乃從昔靈山會上黃面老子處來佛佛祖祖以心契心至於今日未嘗有一絲毫許錯悞謂之正法眼藏涅槃妙心未有天地未有日月未有人倫已前此之亦逼塞虛空逮乎天地既分有日月人倫此心亦逼塞虛空所以道生也恁麼死也恁麼要且生死籠罩也不得何故爲他著著有出身之路不見教中道若在長者長者中尊爲說勝法若在居士居士中尊斷其食著若在利利利中尊教以忍辱若在婆羅門婆羅門中尊除其我慢若在大臣大臣中尊教以正法若在王子王子中尊示以忠孝若在内宮内宮中尊化正宮女若在庶民庶民中尊令興福力若在梵天梵天中尊誨以勝慧若在帝釋帝釋中尊示現無常若在護世護世中尊護諸衆生此蓋從

清淨微妙根本智中廣發如是勝妙方便大解脫門  
又謂之金剛正體又謂之頂王三昧又謂之浮幢王  
剎海又謂之第一義至於楊岐和尚以金剛圈栗棘  
蓬揭示學者洞明少室直指之由其變通逸格超量  
得大自在與一切人抽釘拔楔解粘去縛令各自  
證透頂透底要且不可以心知不可以識識長沙和  
尚道我若舉揚宗教法堂前草深一丈事不獲已所  
以向諸人道盡十方世界是沙門眼盡十方世界是  
沙門全身盡十方世界是自己光明盡十方世界在  
自己光明裏盡十方世界無一人不是自己我嘗向  
諸人道三世諸佛共盡法界衆生是摩訶般若若光  
未發時汝等諸人向什麼處委光未發時向無佛無  
衆生消息既無佛無衆生消息且道大地山河日月  
星辰人畜草芥纖洪長短從什麼處得來還知落處  
麼天上有星皆拱北人間無水不朝東  
筌庵問禪師施主送法衣示衆師拈起法衣角云者  
箇是黃面老子遞代傳持底今日因甚却自信心檀  
越屋裏送來山僧既不囊藏被蓋索性對人天衆前

一回舉似還知麼拈來不隔寸絲頭一片雲霞爛不  
收有意氣時添意氣得風流處且風流

供法衣上堂蜀錦吳綾攢花簇巧爛紅妍紫溢彩增  
輝奪驪龍頂下之光捋猛虎鬚邊之利衲僧家箇箇  
牙如劍樹口似血盆誰肯輸機納款所以道從天降  
下則貧窮從地涌出則富貴法王大寶現成自然不  
求而至入荒田不揀信手便拈來覲面互施呈舉一  
不舉二到者裏脫珍御服著弊垢衣得妙回途入塵  
垂手一句且作麼生道隨身竿木逢場戲百草頭邊  
見祖師

侍者供法衣上堂披如來衣坐如來座行如來事三  
脚蝦蟆著錦襠風吹不動塔前樹馬祖扭鼻野鴨子  
沒處去百丈捲席大用現前不存規矩堪笑南陽老  
國師負汝負吾成指注點即到不到點三十年  
後莫道金山者裏有屈無叫處

列祖提綱錄卷第十九



列祖提綱錄卷第二十

武林十八澗理安禪寺住持婁東行悅集

供法帔提綱

高峯妙禪師通寧智願庵主送法帔至上堂裁蜀錦  
剪吳綾披白玉間黃金打成一片時針割不入羅紋  
結角處線路難尋雖然只如西峯以諸法空爲座以  
拄杖指帔云還著得遮箇麼靠拄杖云天香影散莓  
苔石五葉花開蘚蔔林

千巖長禪師因甯府施法帔上堂春雲乍卷春雨初  
晴花紅柳綠水碧山青紫燕黃鸝深談實相叢林草  
木盡作琴聲突出釋迦鼻孔豁開達摩眼睛只如今  
日齊郡夫人張氏德眞所施一片法帔上有一卷心  
經喚作一卷心經又是一片法帔喚作一片法帔又  
是一卷心經金猊猊錦層層結角羅紋重重寶印縱  
橫十字朶朶珠璣莊嚴既妙德相彌增一一從夫人  
心中流出一一於諸佛分上圓明老僧受了諸人無  
分諸人受了老僧無分不如打歸常住千年萬歲耀  
眞燈耀眞燈復何憑有時挂向華王座也勝諸方黑

漆屏

供寶蓋提綱

佛眼遠禪師郭公朝散施寶蓋上堂舉木平和尙行  
脚時問洛浦一漚未發時如何浦云移舟諳水脉舉  
棹別波瀾木平不契遂問盤龍云移舟不辨水舉  
棹卽迷源木平遂於言下大悟後住木平李王詔至  
金陵問道於他法眼有偈云木平山裏人貌古言復  
少相看陌路同論心秋月皎壞衲線非蠶助歌聲有  
鳥城郭今日來一漚曾已曉誠哉是言也作麼生明  
他向盤龍言下悟底事若有人問龍門一漚未發時  
如何龍門實難吐露良久遂云一漚未發時寶蓋向  
空垂瑞色飄飄起香風颭颭吹何勞輕舉拂不假略  
揚眉五百曾親獻如來印可之昔日毗耶離城五百  
長者子各持七寶蓋來詣佛所佛之威神令諸寶蓋  
合成一蓋遍覆三千大千世界諸人還信得及麼非  
但古人見今諸人皆有此一蓋還曾窺覷得著麼若  
窺覷得著步步莫非玄路言言盡轉法輪其或未然  
山僧雖老拙寶蓋助宣揚

楚石琦禪師松林施主妙蓮居士項氏捨寶蓋入山上堂生心受施淨名早誦有法可說如來不許直得無物可施無法可說牢籠佛祖含育聖凡猶是半珠未爲全寶到箇裏明如日寬若太虛千聖不攜萬機寢削塵塵爾刹爾念念爾法爾盡十方微塵國土一時拈來著在針鋒上却從針鋒上流出一切智光明雲於其雲中現妙蓮華量等十方微塵國土合爲一蓋內出百千佛異口同音而說偈言一念普觀無量劫無去無來亦無住如是了知三世事超諸方便成十力說是偈已卽入針鋒裏去也

資冥請提綱

五祖演禪師施主請上堂舉道吾與漸源往山下弔慰源拈棺問曰生耶死耶吾云生也不道死也不道源云爲什麼不道吾云不道不道回至中路源云和尚須與某甲道若不道卽打和尚去也吾曰打卽任打道卽不道源便打至院吾令潛去師云白雲今日忿氣不甘須要斷者公案道吾第一不解與身作主第二不能隨機入俗當初待伊問道生耶死耶但向

伊道等歸院裏向你道當時若著得者語靈利漢一踢踢著大小大道吾和尚也又免得一頓拳頭有眼底仔細看

安樂院主修齋上堂昨夜得一夢夢見臻公在天宮與帝釋對坐臻問帝釋曰天上有五衰相是否釋云此是佛之所說豈可妄言於是帝釋却問臻云我聞閻浮提有不持戒者是否臻云此是佛之所說豈可妄言良久臻云天宮雖榮不是久居遂下十八重地獄乃見閻王居正殿與地藏菩薩摩訶薩便出門首見一青衣童鞠躬云東海龍王請伴諸羅漢齋臻遂赴齋回得數顆如意珠一時分付諸門人白雲被珠光一爍忽然夢覺以至今朝諸法乳爲臻公設齋請白雲陞座大眾且道昨夜夢底是適來說底是衆中盡是久參先德禪道之精若人辨得試出露箇消息看有麼有麼若無白雲又有箇古話釋迦老子在跋提河側般涅槃了迦葉始至遶金棺而哭於是世尊爲現雙趺大眾且道般涅槃時是現雙趺時是乃云止止不須說我法妙難思諸增上慢者聞必不敬信

圓悟勤禪師少保張丞相忌日請上堂大衆握佛祖  
鉗鎚控作家爐韃烹煨古今驗證衲僧唯用向上一  
機金剛王寶劍臨濟祖師傳黃檗馬祖此箇機要向  
大河之北獨振正宗一喝分賓主照用一時行坐斷  
天下人舌頭奔走四海雲水以至乃子乃孫傳此正  
見用此真機若非大解脫人安能當陽證驗憶昔無  
盡大居士生平以此箇事爲務徧寰海宗師無不咨  
參到兜率山下逢見老衲論末後句始得脫體全真  
言解道理一時脫却遂作偈云鼓寂鐘沉托鉢回巖  
頭一拶語如雷果然只得三年活莫是遭他授記來  
鏗金戛玉虎驟龍驤不妨具大機得大用以此正印  
印天下叢林善知識山僧昔在湖北相見與伊電卷  
星馳一言契證表裏一如居士功業書於竹帛遺德  
在於生民後來當此之日撒手那邊行止且道無盡  
居士向什麼處去還委悉麼大千沙界諸佛士利利  
塵塵現勝身復云盛德在生民四方共欽仰三教大  
宗師秤頭有銖兩七十九歲佛齊年是日霜風亘霄  
壤一聲振忽雷前星墮雲帳麒麟掣斷黃金鎖一躍

直歸梵天上萬載千秋著遺想

劉提舉請上堂般若智光破生死昏衢之暗金剛寶  
劍截結使纏縛之憂透脫處一念無多受用處通身  
具眼直得如天普蓋似地普擎如日普照如風普涼  
一絲不移纖塵不翳所以道一切法不生一切法不  
滅若能如是解諸佛常現前又道未達境唯心起種  
種分別達境唯心已分別卽不生於分別不生法中  
認取不變不移無窮無盡清淨本然周徧法界本來  
自性若了得去於天地未分生佛未立乃至劫火洞  
然大千俱壞於中無一絲毫動搖無一絲毫起滅無  
一絲毫增減無一絲毫榮悴若能恁麼始知提舉朝  
議未嘗滅未嘗虧未嘗移未嘗去且獨超物外一句  
作麼生道九蓮開合處百寶自莊嚴久立珍重  
虎丘隆禪師騰樞密宅請陞座世尊出世爲一大事  
因緣祖師西來直指人心見性成佛所以道佛佛授  
手祖祖相傳便有教外別傳不立文字單提直截究  
本明宗令一切人離諸執著況此一事不以心思不  
以意思慮知解盡是鬼家活計若是向上人赤條

條地直向父母未生前承當却來者邊行履出生入死得大解脫要識諸佛出處麼現在諸人眉毛眼睫上轉大法輪演說摩訶般若離四句絕百非要識祖師西來意麼現在諸人六根門頭晝夜放大光明交光相羅如寶絲網以至山河大地草木叢林盡在諸人大光明中發現只如光未發時上無諸佛下無衆生消息是汝諸人向什麼處安身立命若也知得去處便知故樞密相公落處苟或未然萬古碧潭空界月再三撈攬始應知

大慧杲禪師魏侍郎請陞座寄居衢州常山縣持服魏珰謹施淨財入山修設仍命山野陞於此座舉揚般若以此功德資薦先考致政宣教往生安養諸人遊知麼者老居士便是和州三世接待底魏公也山僧大觀初行脚時亦曾到他家時侍郎尚幼今日作官爲國家宣力皆乃翁陰德所致此翁平生極修學喜讀佛書從方外老衲游精修梵行常以王梵志土饅頭頌作佛事以警悟流俗比見潘舍人所作行狀詳書其實聞疾已革有來問訊者亦以慈悲攝化不

及世間一言啓手足時談笑自若跏趺而逝淨名所謂設身有苦念惡趣衆生起大悲心我既調伏亦當調伏一切衆生但除其病而不除法遂召大眾云魏公疾已革而能忍苦爲諸來者隨宜說法足見學佛之驗今日幸遇在會諸人同此證明不免借渠鼻孔出氣要識法麼眞如佛性菩提涅槃是要識病麼妄想顛倒貪嗔邪見是雖然如是離妄想顛倒無眞如佛性離貪嗔邪見無菩提涅槃且道分卽是不分卽是若分存一去一其病益深若不分正是顯眞佛性籠侗眞如畢竟作麼生說箇除病不除法底道理有般漢問怎麼說便道卽法是病卽病是法但有言說都無實義眞如則顛倒妄想貪嗔邪見悉皆是法隨顛倒則眞如佛性菩提涅槃悉皆是病怎麼見解莫道我披衲衣便是作他座主奴也未得在何故須知平地上死人無數灼然過得荆棘林者是好手不見古人云設有一法過於涅槃吾說亦如夢幻苟能於夢幻中如實而證如實而解如實而修如實而行以如實之法能自調伏起大悲心作種種方便復能

調伏一切衆生而於衆生不作調伏不調伏想亦復  
不作顛倒想不作貪瞋邪見想不作眞如佛性菩提  
涅槃想不作除病不除法想不作存一去一分不分  
想既無如是之想則一道清淨平等解脫徑山今日  
說此清淨平等解脫之法奉爲持服魏缸追薦先考  
致政宣教伏願了惟心之淨土見自性之彌陀此界  
他方隨處快樂復召大眾云今既借渠鼻孔出氣已  
了而今徑山却將鼻孔爲渠出氣去也喝一喝

張侍郎請陞座借人口說得底不干自己事自己胷  
襟流出底旁觀者有眼如盲有口如啞便恁麼領略  
得作禪狀元也不難直饒如是始入得徑山門未入  
得徑山室若入得徑山室禪狀元始用得著禪狀元  
纔用得著儒狀元使用不著敢問大眾前面爲甚麼  
用得著後面爲什麼却用不著顧左右云還知徑山  
落處麼若知徑山落處禪狀元卽是儒狀元儒狀元  
卽是禪狀元卽今拈却禪與儒且道當面一句作麼  
生道要知死底張宣教便是活底狀元爺

朱舍人請升座僧問三世諸佛說了也和尙作麼生

師云墜竭提國親行此令進云要且只今事不恁麼  
師云劍去久矣爾方刻舟進云也知和尙截斷天下  
人舌頭師云果然不恁麼進云道端白日青天開眼  
落人圈穢便禮拜問釋迦彌勒猶是他奴未審他是  
阿誰師云你是一枚村夫進云切忌爲他安名立字  
師云村夫有甚麼名字進云前言何在師云你道他  
畢竟是阿誰進云家無小使不成君子師云未免隨  
人脚跟轉問如何是佛法的大意師云老僧無的  
的大意亦無如何進云既是無和尙甚處得者消息  
師云育王亦無者消息乃云只者消息三世諸佛說  
不及六代祖師傳不到既說不及又傳不到則釋迦  
彌勒亦是空名釋迦彌勒既是空名喚什麼作奴喚  
什麼作主喚什麼作生喚什麼作死喚什麼作古喚  
什麼作今既無生又無死既無古亦無今淨裸裸絕  
承當亦漚漚沒窠窟如是則盡十方世界無內無外  
是箇淨妙佛土是箇無上佛土是箇無等佛土是箇  
不可思議佛土是箇不可量佛土是箇不可說佛土  
既有如是佛土只如宮使舍人今請妙喜舉揚此段



大事因緣追薦先妣太夫人俞氏且道在那箇佛土  
中良久云一塵一佛刹一葉一釋迦

蔡春卿薦考請示衆學洛浦示衆云孫臏收鋪去也  
有卜者出來時有僧出曰請和尚下一卜浦云汝家爺  
死僧無語法眼代拈掌三下師云者僧沒興死却爺  
又被他人拈掌信知禍不單行福無雙至然洛浦善  
卜法眼善斷若子細思量爻象吉凶二老一時漏逗  
既占得火風鼎卦何故斷作地火明夷雲門即不然  
驚拈拄杖云孫臏門下死却郎罷連卓三下云會麼  
內屬良宮再求外象又卓三下云千靈萬聖萬聖千  
靈莫順人情復卓一下云吉凶上卦

密庵傑禪師施主追修請上堂諸佛未出世達摩不  
西來人人抱荆山之璞箇箇懷赤水之珠及乎五葉  
開敷千燈續焰便見生死交謝寒暑迭遷北里蒙家  
昨日歌兮今日哭蔣山與麼告報大俱移花兼蝶至  
買石得雲饒諸人若善參詳管取終日於聲色頭上  
坐臥聲色不能染污終日於生死界中出沒生死不  
能籠罩且據箇什麼道理便能如是驚拈拄杖云千

聖不知何處去倚天長劍逼人寒

雪巖欽禪師追嚴上堂第一義諦廓然本無對面者

山摧海枯長憶江南啼鷓鴣

追嚴上堂雷聲斷梅陰霧豁開突出先佛未形之相

生住異滅離該洞庭山子青崔嵬

高峰妙禪師薦亡上堂入我法中不論凡聖動靜施

爲威遵舊令要明少室格外新條薦拈拄杖云未免

借伊鼻孔出氣卓拄杖云開甘露門劃一劃云示甘

露味大地衆生頓超十地惟有今辰覺成上座營齋

報薦考妣二位亡靈不在其內何故擲拄杖云分明

一對黃金骨不必旃檀入細雕

楚石琦禪師薦亡上堂舉天衣懷和尚云百骸俱潰

散一物鎮長靈百骸潰散皆歸土一物長靈甚處安

南堂靜和尚云一物長靈甚處安長空雲散碧天寬

蓮宮佛刹花無數眨起眉毛子細觀師云觀則不無

喚什麼作一物喝一喝

筈庵問禪師檀越資冥上堂師云生也不道死也不

道快鷄俊鷹趕不上迅雷疾電追莫及騰身抹過太

虛空生鐵蒺藜當面擲春風嫋嫋春柳依依陌上桃  
花血濺眉殘紅流在釣魚磯驚拍禪床云話墮了也  
急著破顛

史亦豹太史薦亡請上堂舉李都尉楊內翰與唐明  
嵩禪師問答次李云彌陀演化於西方達磨傳心于  
東土胡來漢現水到渠成五嶽鎮靜以嶢嶢百谷朝  
宗而浩渺一靈之性托境現形三有之中憑誰立命  
嵩云仙人無婦玉女無夫楊云尼剃頭不復生子嵩  
云陝府鐵牛能哮吼嘉州大象演摩訶李云側跳上  
山巔嵩云騎牛不著靴元叟端和尚云大小唐明牆  
壁不堅腐鏽不固致令他俗人有入室操戈之學是  
你諸人且作麼生會鑿拂子云白鷺下田千點雪黃  
鸝上樹一枝花師云端和尚也只知其一不知其二  
山僧今日大開門戶廣演懺摩亦豹太史入山薦先  
并薦亡室韓氏夫人此夜今時同垂法會大眾會麼  
山僧所供竝是詣實下座

史趾祥居士設薦殉難諸亡靈請升座世界未形乾  
坤未立佛生凡聖何處安名世界已形乾坤已立佛

生凡聖各得其處所以道是法住法位世間相常住  
如何是是法豎拂子云者箇是拂子如何是法位擊  
拂子云喚作拂子也不得不喚作拂子也不得者裏  
著得隻眼天地由此而位萬物由此而育君得之而  
統御萬邦臣得之而匡扶九有父子兄弟夫婦得之  
而孝慈友睦敦於一門朋友得之而信義忠貞盟於  
方寸是千萬世不易之常理亘古今不磨之至性也  
此理一日不毀則世界一日不壞此性一息不泯則  
乾坤一息不移莫謂黃虞忽焉沒祇今何異劫初前  
山僧今日伏爲護法史趾祥居士設薦赴義殉難諸  
幽魂特請陞座舉揚上而國主藩王下而將吏胥役  
以及若憶若忘若耿於衷若逸於外同時異世自他  
不隔於毫端存沒昇沉始終不離於當念歸根落葉  
體露金風奮氣揚眉身嬰白刃寶蓮華座方垂藥的  
的枝頭吐異香諸仁者還信麼不見教中道我若向  
刀山刀山自摧折我若向火湯火湯自枯竭我若向  
地獄地獄自消滅我若向餓鬼餓鬼自飽滿我若向  
修羅修羅自調伏我若向異類各得大智慧正恁麼

時且薦拔諸魂作何趣向聽取一偈熱血化爲功德  
水幽冤凝作妙香雲珊瑚枝上鈎明月碧落招回蜀  
帝魂拍禪床下座

進督府爲夫人金氏升座靈光獨耀迥脫塵體露  
眞常不拘文字心性無染本自圓成但離妄緣卽如  
如佛妄緣非實一切惟心心境若空一切妄緣從何  
而有其迷妄也妄見有生妄見有死於生死中起諸  
惡業造諸罪障其離妄也生如漚寄死若幻銷於本  
無生死中惡業本空罪障本淨所以古佛有言假借  
四大以爲身心本無生因境有前境若無心亦無罪  
福如幻起亦滅如是則身也心也塵也境也罪也福  
也起也滅也等如幻故雖則等如幻故當其幻起一  
念忽住幻境時盡塵沙劫不可說不可說境界若愛  
若憎若恩若怨於衆生心中無不徧具當其忽起一  
如幻念忽悟如幻境時盡塵沙劫不可說不可說境  
界若愛若憎若恩若怨於無生心中便如日照太虛  
洞諸群暗如紅爐點雪有礙皆融則知等此一念其  
轉凡成聖轉迷爲悟幻與如幻之不同便聖凡迷悟

之迥異矣卽今總督部院實翁大居士夙承願力此  
性不迷因其夫人仙逝千里馳書敦請山僧特臨淮  
甸親爲對靈以舉揚資冥福以般若雪愆尤居士纔  
舉此念時夫人已早登淨界了也一念淨則念念淨  
一人淨則多人淨一世界淨則多世界淨無邊刹境  
自他不隔於毫端十世古今始終不離於當念何祇  
夫人乘此一念空諸有漏淨諸有緣多生眷屬歷劫  
冤親無不乘此一念得證大解脫地得入大寂定門  
以至靈海一切有情群黎得因大總督此一念間各  
各悟身如幻悟心如幻悟境如幻則居士此念又自  
他俱利物我俱成下徹幽玄上超群際豈僅結一時  
般若之緣誠爲塵劫菩提之種且道山僧今日高陞  
寶座特爲舉揚畢竟是幻耶非幻耶是妄緣耶是真  
際耶聽取一偈頓空有趣幻非幻燦破情緣空不空  
玉女已歸霄漢去不須惆悵五更風以拂子打圓相  
喝一喝下座

吳母太夫人點主後升座橫按拄杖云雄雄坐斷溪  
山路百億須彌洞底寒八表自然歸正域死生夢幻

不相干既不相干合須辨主若辨得去問如瓶瀉答  
似雲與竿木隨身逢場作戲迷鑑誅於言下惑照鑑  
於微芒竭世樞機逞諸玄辨總是癡狂外走徧界觸  
體人人有通天活路箇箇有遍地奇能增一些不得  
減一些不得明投暗合體用互宜隨他智如鷲子辯  
若滿慈於諸人分中了沒交涉臨濟三玄三要洞山  
五位君臣雲門一字關瀉仰九十六圓相鬼門貼掛  
誑說閭閻振轉上頭關擲翻華藏界全超凡聖古今  
更不倚門傍戶赤肉團上突出無位真人自己胸中  
流出蓋天蓋地奴呼彌勒婢視釋迦自餘賣草鞋漢  
那討出頭處所所以事是怎麼事人須怎麼人醒翻  
上味爲世所珍不遇其人翻成毒藥今日揭開腦蓋  
與諸人露布了也明明不異的的相承全賓即主全  
主即賓打破涅槃城同遊解脫海且一起直入一句  
作麼生道拈拄杖云青山不鎖長飛勢滄海合知來  
處高一喝卓拄杖

朝宗忍禪師祈禱并薦夫請上堂一者祈禱二者薦  
亡一椎兩常舉世無雙既兩當因甚却無雙下不厭

地獄上不欣天堂當陽突出露堂堂鷓鴣啼處百花  
香喝一喝遂舉金剛經云若見諸相非相即見如來  
師云大小世尊抱橋柱洗澡曹山則不然若見諸相  
非相即見諸相須知要見如來則易要見諸相則難  
若人道得不難不易句一生參學事畢卓拄杖下座  
沈制臺差官到山爲薦陣亡將士請上堂假借四大  
爲身箇中畢竟無我但能一念解脫管教法法全彰  
萬物皆備三界獨尊劍樹刀山化爲烏有幢幡寶蓋  
起自何來所以道我若向刀山刀山自摧折我若向  
火湯火湯自消滅坐斷罪福路頭自然直下超越今  
日蓋爲沈大司馬奉旨勦徭一載之內八排皆平今  
當奏凱之際忽與同體之悲差官齋賢入山禮懺設  
齋命山僧陞座說無生法以薦陣亡將士某某等衆  
須知法雨一施直達幽冥法音一聞即超極樂奮勦  
寇雄心披忍辱鎧而魔軍頓破封轉侯妄念操智慧  
刀而佛道立成然雖如是猶是大司馬下憫群情底  
意且上祝皇恩一句又作麼生八方霑霖無爲化四  
海謠歌賀太平下座

龍門遠禪師還東山省觀衆請小參暫下蓮峰輕屈指光陰倏爾又三年雖然不隔絲毫許爭似躬親到座前某伏自數日前陪從太平禪師象馭再登蓮嶠歸侍老師大和尚瞻禮慈容之間須知有相見底事敢問大衆作麼生是相見底事不可是你見我我見你是相見若恁麼全無佛法得力處何故世間諸趣彼此見存常在生死之中未有脫離之地所以雪峰和尚向人道望州亭與你相見了也烏石嶺與你相見了也僧堂前與你相見了也若據如斯指示豈待音容相接言氣相交始爲相見諸高德夫爲參學之士須實有去處始得還知麼如今敢道千里同風相見却易會對面相見却難知何故難知夾山老子道目前無闍黎座上無老僧諸來大衆盡在于此如何見得堂上老師大和尚在座與諸大衆證明作麼生見座上無老僧不可等閒過却將爲閒事晝夜被見聞風所飄鼓根塵陰界諸入纏縛不得自由生死事大須得箇悟由入頭處始得雖然如是格外道人實遭怪笑何故須知有向上一著且待異日他時別爲

諸人點破因記得昔日南泉趙州二尊宿皆是道超物外名播寰中時有一僧往山中見一禪伯在盤陀石上卓庵而坐僧遂問曰南泉出世浩浩地何不往彼問訊空坐何爲庵主曰莫道南泉出世佛出世我亦不去僧持此語見南泉泉大驚遂令趙州往驗看州到庵主處從東過西庵主不顧州又從西過東庵主亦不顧州遂當門立曰庵主你敗也庵主亦不顧遂拽下簾子而行庵主亦不顧大衆者一則因緣諸人作麼生委悉莫是趙州南泉不到庵主田地返被庵主勘破落他陷虎之機也無莫是庵主雖然並無受用臨機不解互換平地上死人也無諸仁者素非此理大凡行脚人須是道眼分明始得若道眼不明祇被南泉趙州庵主三人換却眼睛了也實無少許相應處若也道眼分明南泉趙州庵主便是上座更無異見也還相肯諾也無不見道曾經大海休誇水除却須彌總是塵久立

大慧杲禪師自虎丘上雲居省觀秉拂夷門昔日呈家醜拈出無邊栗棘蓬今日甌峰孤頂上幸然無事



又相逢相逢卽且置其中事作麼生若有人道得一句便請各自歸堂若道不得打葛藤謾諸人去也諸佛未出世時有卽今巴鼻一人人頂門上輝大寶光出世後消息全無一箇箇脚跟下縱橫十字有佛處不得住無佛處急走過撈著不來三千里外穿却鼻孔到者裏直饒置無邊刹境於一毛頭上只者一毛頭從甚麼處得來納百億須彌廬於一粒粟中只者一粒粟又向甚麼處安著如是則易不如是則難休於言上覓莫向意中求如是則難不如是則易識取鉤頭意莫認定盤星衲僧拄杖子拈得便行切忌向平地上釘椿搖櫓所以道神光不昧萬古徽猷入此門來莫存知解只如一大藏教說權說實說頓說漸說有說無乃至西天此土諸代祖師古往今來一切知識種種言語種種作用且道是知解耶非知解耶若定奪得出秉拂上座一場敗闕若定奪不出潑第二杓惡水去也喝一喝云是甚麼有照用無向背只許老胡知不許老胡管陸州一向擔板趙州貴買賤賣獨有三聖瞎驢至今遭人笑怪須彌山突出諸人

額角邊大海水灌入諸人鼻孔裏卽且置馬大師道自從胡亂後三十年不曾少鹽醬又作麼生商量還委悉麼多年曆日無人問薦地拈來愁殺人喝一喝復舉巖頭參德山纔跨門便問是凡是聖山便喝頭便禮拜後有僧舉似洞山山云若不是竄公也大難承當巖頭聞云洞山老漢不識好惡錯下名言我當時一手擡一手搦師云猛虎不識穿窬中身死蛟龍不怖劍劍下身亡巖頭雖於虎穿中有透脫一路向劍刃上有出身之機若仔細檢點將來猶欠悟在只今還有爲巖頭作主底麼出來與杲上座相見良久喝一喝拍一拍云泊合停囚長智

玉泉曇懿禪師省大慧和尚於小溪慧爲之陞座乃舉雲門一日拈拄杖示衆云凡夫實謂之有二乘析謂之無緣覺謂幻有菩薩當體卽空衲僧見拄杖子但喚作拄杖子行但行坐但坐總不得動著慧云我不似雲門老人將虛空剗窟籠幕拈拄杖云拄杖子不屬有不屬無不屬幻不屬空卓一下云凡夫二乘緣覺菩薩盡向者裏各隨根性悉得受用唯於衲僧

分上爲害爲冤要行不得行要坐不得坐進一步則被拄杖子迷却路頭退一步則被拄杖子穿却鼻孔卽今莫有不甘底麼試出來與拄杖子相見如無來年更有新條在惱亂春風卒未休正恁麼時合作麼生下座煩玉泉長老爲衆拈出師登座叙謝畢遂舉前話云適來堂頭和尚恁麼批判大似困魚止瀼病烏棲盧若是玉泉則不然拈拄杖云拄杖子能有能無能幻能空凡夫二乘緣覺菩薩卓一下云向者裏百雜碎唯於衲僧分上如龍得水似虎靠山要行便行要坐便坐進一步則乾坤震動退一步則草偃風行且道不進不退一句作麼生道良久云間持經卷倚松立笑問客從何處來

### 通嗣書至提綱

黃龍南禪師四祖演長老通嗣法書上堂山僧才輕德薄豈堪人師蓋不昧本心不欺諸聖未免生死今免生死未出輪迴今出輪迴未得解脫今得解脫未得自在今得自在所以大覺世尊於然燈佛所無一法可得六祖夜半於黃梅又傳箇甚麼乃說偈曰得

不得傳不傳歸根得旨復何言憶得香山曾漏泄新婦騎驢阿家牽

東山演禪師四面專使文詳持法嗣書到師於法座前受書拈起問專使云者箇是四面底闍黎底在什麼處使云驢在目前師云幾不問過遂陞座云好事難逢何不出來大家唱和復云大眾四面長老有書對大眾前須當說過四面大漆桶詳師分半桶白蓮峰下開薰却我鼻孔且道爲什麼如此無你出氣處資福專使持法嗣書至師於法堂上受書拈起問專使云本無名字什麼處得者箇來專使擬議師云因誰致得遂陞座舉石頭問長髭什麼處來髭云嶺南來石頭云大庾嶺頭一鋪功德成就也未髭云成就久矣只欠點眼在石頭云莫要點眼麼髭云便請石頭垂下足髭便禮拜石頭云你見箇什麼道理便禮拜髭云如紅爐上一點雪師云紅爐一點雪知音譬不譬龜毛扇子扇泥牛一點血

圓悟勤禪師峽州東山馳法嗣書到上堂靈山會上千葉騰芳少室峰前一枝獨秀生佛未具已見蟠根

空劫那邊轉彰文彩渾崙壁不破撲鼻更馨香八面  
自玲瓏通身轉綿密箭鋒相拄針芥相投則且置獨  
脫一句作麼生道條爾風雲會廓然天地春復云坐  
見東山振古風頂門眼正有全功操持臨濟金剛劍  
個儻楊岐栗棘蓬鐵壁銀山須作用魔宮虎穴亦流  
通攝將香水無邊刹併入鉗鎚爐鞴中

天目禮禪師翠巖眞長老嗣書至上堂洪崖井邊翠  
巖寺裏山遮半月江礙斜陽不是諸佛眼睛亦非祖  
師巴鼻召專使云會麼歸去牀王閣上捲起珠簾看  
取十八灘頭煙波鼎沸

愚庵及禪師善權通長老嗣書至上堂自從胡亂後  
三十年不少鹽醬雪後始知松柏操任汝非心非佛  
我只管卽心卽佛事難方見丈夫心有底便道江西  
信息通也大梅梅子熟也善權方便固當如是只如  
石頭道書亦不達信亦不通諸人如何話會直下道  
得鉏斧子未到你在

### 法眷書至提綱

眞淨文禪師上堂謝黃檗先馳云分枝列派共闡宗

猷祖令全提各隨機變洒黃龍之一雨枯木重榮繼  
斷際之遺蹤眞燈再焰光我先覺以進後昆不任歡  
慶某無似之者何承先馳上人遠離鶯嶺深入洞山  
得得馳書叙其法乳過沐周勤仰荷弗已復拈拄杖  
召大眾云實謂雖與我同條生不與我同條死阿喇  
喇也大奇筭來彼此丈夫兒睡則同床各自夢古今  
此理少人知小人知付先馳傳歸鶯嶺分明舉向師  
第庵問禪師玉林和尚書至上堂隻羽翔天半雙眉  
亦暫舒寒風吹凜冽喜得故人書大眾且道書中說  
甚麼便下座

### 嗣法師遺書至提綱

圓悟勤禪師聞五祖訃上堂大庾嶺頭笑却成哭崇  
寧門下哭却成笑何故喫泉水貴地脉且要正眼流  
通宗風不墮所謂無常生死法與我不相干若能如  
是見不用哭蒼天旣不用哭蒼天如何通信請大眾  
拈香兩彩一賽下座

龍門遠禪師五祖演和尚遷化遺書至上堂昨朝六  
月二十六無角鐵牛生四足哮吼一聲人未知撼動

天關并地軸隻履又西歸唱罷胡家曲可憐末後太分明無限清聲徧溪谷我先師出世四十餘年於舒斬二郡四坐巨利垂慈苦口接物利生未嘗少暇於二十五日早陞座告衆至晚淨髮歸方丈二十六日早安然長往自始及末從初至終盡善盡美眞善知識清遠忝承提訓痛傷可量古人道將此深心奉塵刹是則名爲報佛恩昔日大梅遷化上堂聞鼃鼠聲乃云卽此物非他物汝善護持吾當逝矣我先師上堂告衆云富嫌千口少貧恨一身多以今校古絲毫無差諸人還知大梅東山二老子去處麼若知得則不辜負先師若也未知有寒暑兮促人壽有鬼神兮妬人福下座

嗣法師遺書至舉哀拈香法語

大慧杲禪師爲圓悟和尚學哀拈香指眞云者老和尚一生多口攪擾叢林近聞已在蜀中遷化了也且喜天下太平雲門昔年雖曾親近要且不開他說著箇元字脚所以今日作一分供養點一盞茶燒此一炷香薰他鼻孔卽非報德酬恩只要辱他則箇召大

衆云既不聞他說箇元字脚又無恩德可報何故特地作者一場笑具還委悉麼冤有頭債有主偶因失脚倒地至今怨入骨髓遂燒香

虎丘隆禪師爲圓悟和尚學哀云釋迦已滅彌勒未生正當今日流通佛祖正脉委在我圓悟禪師大和尚直得七據寶刹統三界以爲家四海馳聲作群生之眼目不謂法幢摧折佛日掩光後學無聞叢林失所雖然如是盡落今時何故豈不見道淨法界身本無出沒既無出沒師今不死我何疑惑大衆既然不死還知圓悟老人落處麼若也知得落處不勞指注儻或未然仰師之道地久天長却請眞前大家燒香復指眞云見麼拘尸城畔當時大事曾與濯錦江頭此時還循舊轍放光現瑞攝化歸眞法海珠沉人天眼滅雖然如是怎麼中有不怎麼不怎麼中却怎麼便見無生死中示有生死無去來中而示有去來雖然要且無生死去來之相故我圓悟禪師大和尚禪河渺邈津濟無窮名動至尊道滿天下且罷事已畢隻履西歸穩坐家堂末後一句作麼生道諸人若向

者裏道得圓悟老人猶在若不然者與諸人道去也  
良久却顧侍者云道什麼遂舉哀

我庵無禪師寂照和尚遺書至舉哀拈香妙喜五傳  
最光焰寂照一代甘露門等閒觸著肝腦裂冰霜忽  
作陽春溫我思打失鼻孔日是何氣息今猶存天風  
北來歲云暮掣電討甚空中痕

疎山性禪師全室和尚訃音至舉哀拈香三十三天  
天子死盡有哀情北鬱單越人死盡發歡聲有哀有  
喜總屬愛憎衲僧去就似火燒冰還知先師入何地  
獄出何類行有等便道今日不滅昔日不生且道疎  
山逆子如何報孝以手搥胸云波旬休息天下太平  
復舉哀云蒼天蒼天

### 二親遺書至提綱

荷澤會禪師一日鄉信至報二親亡師上堂自白槌  
曰父母俱喪請大眾念摩訶般若衆纔集師復打槌  
曰勞煩大眾

### 歸省受業提綱

古靈讚禪師參百丈回受業業師集衆請陞座師舉

百丈示衆云靈光獨耀迥脫根塵體露真常不拘文  
字心性無染本自圓成但離妄緣卽如如佛受業師  
於言下有省

大慧杲禪師歸受業衆請小參山僧昔爲童子時一  
念知道出家好却因脫白此伽藍今日重來稱長老  
兵戈之後亡者多現前者宿喜無惱以尊就卑離我  
人咸請舉揚無上道後生當發猛勇心四海求師宜  
撥草徑山奉勸語不虛辨口維摩須靠倒

疎山性禪師歸溧陽弘溪受業衆請陞堂擊拂子云  
還有識得先師面皮厚薄者麼旣無看山僧追風捕  
影去也桑梓南徐金壇縣得業丹陽大聖院本是一  
箇無事人剛要參禪求正見幼年行脚到天目師子  
巖前親中毒諸方歷罷使歸來自云平生志願足蘭  
若高棲弘溪口傲雪披霜歲長久栽田博飯效古風  
始終不落他人後守株待兔五十年一味擔板少人  
緣狹路相逢李百八買帽相頭宿世冤八十六年世  
緣盡東涌西沒那伽定當頭一句孰與評坐斷乾坤  
無少剩思量解笑不解哭斷絃誰把驚膠續荊棘林



中示要津無影樹下吟風曲豈如寂滅自了漢須把  
眞燈燭幽暗苦海無邊願再來重整中峰舊公案復  
舉南泉爲馬祖齋次問衆云若道今日先師來以何  
憑據若道不來又是佛法無靈驗時洞山在座下出  
云有伴卽來師云古人卽不問且道先師今日來不  
來良久自代云新疎山髻亂時相見復顧大衆云委  
悉麼拈拄杖敲香卓喝一喝云先師來也便下座

列祖提綱錄卷第二十

列祖提綱錄卷第二十一

武林十八澗理安禪寺住持婁東行悅集

受請陞座拈衣法語

楊岐會禪師九峰受疏拈衣示衆云會麼若也不會  
今日無端走入水牯牛隊裏去也還知麼筠陽九曲  
萍實楊岐

保寧勇禪師在蔣山受小疏僧呈法衣師提起身上  
袈裟云大衆且道者箇是那箇是若道者箇是爭奈

那箇何若道那箇是爭奈者箇何却顧衆云如今不  
免對大衆前改頭換面捻一放一去也便卸袈裟披  
法衣

五祖演禪師白雲受帖舉法衣云既是大庾嶺頭提  
不起爲什麼却在者裏且道者裏底是那裏底是乃  
云攜瓶自汲清涼水却著袈裟作主人便披

圓悟勤禪師照覺受請舉法衣云古人事不獲已挂  
弊垢衣如今推免不下入者群隊去也大庾嶺頭藏  
不得如今也要大家知

太平懃禪師受請曰五祖付法衣師受而捧以示衆  
曰昔釋迦文佛以丈六金襴袈裟披千尺彌勒佛身  
佛身不長袈裟不短會麼卽此樣無他樣

拈勅黃法語

圓悟勤禪師在蔣山受勅拈起示衆云大衆見麼龍  
飛鳳舞降自九重佛祖綱宗盡在裏許却請維那對  
衆宣讀

住金山師在乾明受勅拈起示衆云見麼拈時十日  
竝照舉處千界光輝九重天上降來宰輔手中親付

更不敢囊藏被蓋請僧正一爲敷宣

住雲居師在金山受割次日勅下拈勅示衆云九重城裏親宣賜一道神光燦太虛勝義諦中真勝義千華叢裏綻芙蓉一舉便知多少省力苟或未然更請宣過

大慧杲禪師再住徑山於育王受請拈勅黃示衆云達磨不來東土二祖不往西天人人常光現前箇箇壁立萬仞且道者箇從甚麼處得來若知來處受用無窮其或未然却請維那分明宣過也要大家知有長翁淨禪師奉勅陞住天童捧勅黃示衆曰雲開九天呈起日看彩鳳脚出且道如何委悉急急如律令勅

密庵傑禪師住徑山師在華藏受請捧勅黃示衆云鳳闕頒宣群生聳耳富陽拈出巾地普天喚回枯木龍吟別是一壺春色若也見得皇恩佛恩一時報畢其或未然却請維那分明宣過

住靈隱師在徑山受請捧勅黃示衆云九重天上降來善法堂前拈出明如杲日寬若太虛光揚佛祖家

風流通正法眼藏恁麼見得堪報不報之恩其或未然維那分明道破

#### 拈護法疏法語

五祖演禪師四面山授疏示衆云兵隨印轉將逐符行請對尊官分明剖露

住東山師在海會受請拈疏示衆云八十翁翁親繡毳毼付維那

圓悟勤禪師住金山受勅後次拈疏云毫端寶剎闡外威權有卷有舒有照有用字字珠回玉轉一一草偃風行雖然文彩已彰更請重新拈出

應庵華禪師妙嚴受請判府左司度疏師拈示衆云此是判府左司兩手分付謂之無盡藏頂王三昧言言見諦句句朝宗若也知得更不重說偈言若也未知輒煩僧官對衆宣讀

密庵傑禪師受請拈疏云諸佛說不到處祖師提不起時結角羅紋語言三昧盡從箇裏流出輝騰今古不墮斷常欲令四衆共知何妨重爲說破

拈疏云黃面老子二千年前靈山會上付囑國王太

臣一則語流布天上人間綿綿不墜有眼者見有耳者聞聞見既通塞却耳根更須諦聽

元叟端禪師擅越疏孤峯頂上天不知地不管因甚被者箇勾引出來過去阿僧祇切與合府豪俊同修無上佛果菩提

住鳳山在徑山楞伽室受請拈院疏此是宣政諸官當面所付謂之金剛秘密三昧魔外以之殄除正宗以之光顯

### 拈公帖法語

五祖演禪師白雲受帖拈起示衆云大衆只恁麼會得埋沒宗風過犯不小幸有現成公案請維那對衆宣讀

住海會師在太平受帖拈起示衆云恁麼會去早是鈍漢何也若憑說五千四十八卷豈不是說若不憑說又如何辨白請維那分明拈出

圓悟勤禪師住崇寧在昭覺初受六祖請拈帖示衆云幸自無事須要箇護身符子作麼然禪不入愼家之門且作麼生斷者公案會麼兵隨印轉請維那剖

露

住夾山師在天寧受請拈帖示衆云百草頭上薦取爭如箇裏承當既然符到奉行豈可當爐避火若也見得坐斷一切人舌頭苟或未然却請維那剖露住道林師在夾山受請拈帖示衆云大衆湖外有知音千里通消息透出威音王誰解知端的還知麼箇裏辨取苟或未然却對衆宣過

密庵傑禪師在褒禪受華藏請拈帖云三回兩度推不去今日依前把不住不是時節因緣亦非人情之故既然如是因甚麼撞頭磕腦不見道顯是菩提

### 指座法語

五祖演禪師白雲受帖指法座象王回獅子步儂家看著雙眉聚然雖如是事到如斯難爲辭讓但有路可上更高人也行

海會受請指法座云少間向上頭撒沙撒土去也前漢文禪師洞山受請宣帖罷乃云大衆諸佛出興於世總祇赴箇時節且道貧道今日赴箇什麼時節指法座召大衆云今古應無墜分明在目前

圓悟勤禪師昭覺初受六祖請指法座云盡十方都是箇寶華王座長在裏許又何須特地車不橫推理無曲斷

筓庵問禪師住金山在夾山受請指法座云借座燈王衲僧掩彩更上一層樓通身得自在一著高一著一步濶一步莫怪渠儂向上行他家自有通霄路

### 登座垂語

五祖演禪師太平受帖陞座云祖令當行十方坐斷其中莫有不惜性命者麼出來與老僧相見

圓悟勤禪師受請陞座云蝸牛角上三千界雲月溪山共一家既爾業緣無避處不如隨分納些些一不做二不休還有共相建立底麼

受夾山請陞座示衆云鈎頭有餌句裏無私已泛扁舟放行綸線還有衝浪錦鱗麼

受道林請陞座數載碧巖藏拙訥幽深煩愜再南心業緣苦死相驅逼隨順還須過道林二途俱不涉底出來道看

### 受請陞座提綱

保寧勇禪師在蔣山受小疏陞座云夫參學人直須具頂門上眼超世英雄於一切人天衆前震法雷擊法鼓藏鋒露刃掣鼓奪旗吼獅子音作大佛事若能如是方有些子丈夫之氣山僧今日不惜眉毛入泥入水去也我佛世尊爲一大事因緣故出現於世敢問諸德作麼生是一大事良久云五千餘卷證不盡三世諸佛讚不及今古祖師提不起還委悉麼若委悉不動步超釋迦越彌勒又何必更命山僧向諸德前鼓兩片皮壓良爲賤然雖如是不許夜行剛把火直須當道與人看乃云爐冶鉗鎚枉用工吹毛何必在磨礱靈光昨夜輝牛斗坐致昇平宇宙中久立

受帖日陞座明珠歷掌別者還稀寶鏡當臺何人鑒照鋒前一路截斷衆流言下千差隨波逐浪所以展則大千俱徧不展則絲髮不存與麼語話猶是化門之說且道不落化門一句作麼生道道泰不傳天子令時清休唱太平歌謝了又云千峰壁立滑於苔不惜眉毛露出來直下早逾千萬里那堪此處更徘徊喝一喝下座

眞淨文禪師在洞山受聖壽請陞座問答畢乃云更有問話者麼良久乃喝云昔日大覺世尊起道樹詣鹿苑爲五比丘轉四諦法輪唯憍陳如最初悟道貧道今日向新豐洞裏只轉箇拄杖子遂拈拄杖向禪床左畔云還有最初悟道底麼良久云可謂丈夫自有衝天志不向如來行處行喝一喝下座

五祖演禪師在白雲受請陞座秋風颯颯玉露垂珠水碧山青蛩吟蟬噪圓通門大啓文殊普賢穿過汝諸人鼻孔自是汝諸人當面諱却復云諸佛不出世四十九年說未審說箇什麼祖師不西來少林有妙訣殃及子孫至今分疎不下更說什麼妙訣若人識祖佛當處便超越超越與未超越則且置你這祖佛卽今在什麼處若無人道得山僧不惜眉毛與汝諸人拈出拍禪床一下

師在太平受請陞座法不孤起仗境方生明鏡富臺好醜自現久參上土言下知歸晚學初機當須子細是以古人道法無去來無轉動者輒成山頌舉似大衆觸目光明處處新其中那箇辨疎親祇園枝上千

花秀一度芬芳一度春

師在海會受請陞座三處住持只者滋味者回冤家難爲迴避白蓮峰鼻孔海會山出氣

雪竇顯禪師在翠峰受疏曰洞庭檀越與明州專使相爭紆紆不已師乃陞座普告大衆不須作鬧事在況僧家也無固無必住則孤鶴冷翹松頂去則片雲忽過人間應非彼此殊源動靜乖趣今與諸人評議念三二年洞庭晦迹承四遠信心恩願棲衆方諸舊轍藏教復乃新歸豈可知感頓忘遽致前邁誠爲不可而又四明太守星馳介使輜重俄臨旣已跋涉數州迢遞千里投誠苦逼一至於斯進退審詳不能自決敢問大衆住翠峰好往雪竇好於時衆僧高聲云往雪竇好師乃顧謂洞庭諸檀越云不用爲訝宜各知時且佛法委自王臣兼住持亦以緣斷在彼在此本無間然希披疏文以奉來命使下座

圓悟勤禪師住崇寧師在昭覺初受六祖請陞座一向目視雲霄壁立千仞則孤負諸聖一向拖泥涉水灰頭土面則埋沒自己如今恁麼也得不得



且貴正眼流通還委悉麼直饒高步毗盧頂不稟釋迦文婢視聲聞奴呼菩薩底來也須亡鋒結舌自餘故是出頭不得所以道三世諸佛只言自知歷代祖師全提不起一大藏教詮註不及明眼衲僧自救不了若據本分草料猶是節外生枝不涉化門一句作麼生道陣雲橫海上拔劍攪龍門下座

住夾山師在天寧受請陞座目前無異草徧界絕遮欄域中日月斬新方外乾坤獨露直得龍天釋梵動地雨華妙德空生目瞪口呿行棒行喝拈向一邊雲月溪山放過一著一處透脫千處百處該通一機洞明千機萬機圓轉碧巖不離此處此處不離碧巖攝大千於毫端融芥塵於刹海銜華鳥過抱子猿歸湛寂凝然應真不借則且置只如無陰陽地上成得箇甚麼邊事萬卉正資和氣力碧巖先發一枝春復舉馬大師問藥山子在此許多時本分事作麼生山云皮膚脫落盡唯有一真實祖云據汝所見可謂協於心體而布四肢何不將三條篾束取肚皮籠處住山去山云某甲何人敢言住山祖云不然未有常行而

不佳未有常住而不行欲益無所益欲爲無所爲宜作舟航由是住山師云大衆古人得意之後不忘利生直入深山提持宗要山僧暗昧豈敢仰攀如是則更不用篾束肚皮却有箇折脚鐺子與方來共守寂寥若信得及不在忉忉或未諳詳聽取箇末後句高峯突兀倚天門青嶂虛閒可埽跟折脚鐺兒幸然在不妨攜去隱深雲雖然如是也須是大家出一隻手始得且道畢竟如何妙舞應須誇徧拍三臺須要大家摧

住金山師在高郵乾明受勅陞座大道無背面真機有卷舒撮大地如陶家輪迴大千向針鋒上猶未是寰中正令闔外全威所以萬國仰瞻同歸舜日靈光一道共照皇家重興佛祖道場追還普天寶所正令全提主賓同用山僧今日得奉一人聖詔傍資宰輔威權共建法幢豎立宗旨楊子江心滔天輓浪妙峯孤頂舒卷閒雲是處著眼不前頂顙正令全現若是箇同得同用同殺同活底共一眼見共一耳聞同一口宣同一音演更無異緣亦無異見說什麼九十六

種二十五有正要當頭辨取一時列在下風且如今日應時應節事作麼生道一句迥超今古格萬年仰祝聖明天

住南康軍雲居真如禪院師於建炎丁未歲十一月初六日在鎮江浮玉山受劄子召赴行朝至十七日朝見登對移刻奉勅住雲居次日勅下時兩府并禁從就雍熙寺請師陞座祇受勅文師云提金剛正眼關向上宗乘報不報之恩能難能之事運臨濟金剛王寶劍喝下全彰用德山山形拄杖子覲面分付是則全是見則全見不落凡聖階梯直下頓彰已見既遇明眼作證又逢聖世昌時不敢被蓋囊藏直下分明舉似遂拈拄杖示衆云豈不見僧辭歸宗宗問什麼處去僧云諸方參五味禪去宗云我此間只有一味禪僧云如何是和尙一味禪宗便打黃檗聞之云馬大師出八十四人善知識問著一箇箇扇轆轤地只有歸宗猶較些子師云歸宗和尚束虎空爲箇杖子向千聖頂額上全提鎔瓶盤釵釧作一金攪酥酪醍醐爲一味若不得黃檗明辨端倪洎險勞而無功

雖然如有條攀條無條攀例今日對諸人面前分明拈出還相委悉麼朝擊三千暮八百煅烹佛祖只憑伊復舉黃檗和尚示衆云汝等諸人盡是不著便底恁麼作路何處有今日也還知大唐國裏無禪師麼僧云只如諸方匡徒領衆又作麼生檠云不道無禪只道無師師云黃檗老漢能區區能別能揀能擇擒虎兇定龍蛇即不無要且只明得當時事殊不知彼一時此一時若是山僧即不然汝等諸人盡是英靈豪傑底恁麼舉止須信有奇特事還知大宋國裏有禪師麼且道禪師即今在什麼處如今迴避不及不免露箇面目去也乃云親蒙金口賜師名優鉢羅花火裏生圓悟如來無上見謳歌鼓腹樂昇平應庵華禪師受妙嚴請陞座寶劍揮空乾坤失色掀翻是非窠窟截斷生死根株有佛處不得住地久天長無佛處急走過河清海晏三千里外一句全提更無絲毫滲漏堪與佛祖爲師作箇人天榜樣正恁麼時轉凡成聖一句作麼生道委悉麼萬古碧潭空界月再三撈攬始應知

師受天童請上堂去年十一月笑別下鍾阜今年九月中行見朝天路去住既無心動靜非取與平生安樂法此意同誰語四明昔嘗到諸刹皆可數山川氣象雄麟鳳棲遲處今思昔日遊歲月二紀許豈謂臨晚景侯伯重相顧開緘讀來書丁寧見毫楮姑蘇二千石眼高照天字我昔昧平生今見開心腑欣然樂與行方鳴集衆鼓先師未了底今日應須去敢問諸人如何是先師未了底薦拈拄杖卓一卓喝一喝下座

密庵傑禪師住烏巨就本院受請陞座適來未鳴鼓已前喚作傑上座而今陞座已後喚作烏巨長老驟爾更其名易其號披毛戴角拖犁拽耙向異類中頭出頭沒既然業債難逃只得歡喜忍受怎麼見得徹去新長老出世事畢其或未然傑上座今日失利復舉三聖道我逢人則出出則不爲人興化道我逢人則不出出則便爲人後來白雲和尚拈云二尊宿各有一處打得著且道那箇在前那箇在後師召大衆云白雲端和尚錯下名言殊不知二尊宿前不至村

後不迭店直至於今翻成話霸何故字經三寫烏焉成馬下座

師在華藏受徑山勅陞座至化無私大千普應皇恩廣被巖谷生春雷動風行龍驤虎驟無量殊勝併集恒沙妙義全彰不歷化城直登寶所寶所既至遇緣卽宗法隨法行法幢隨處建立移身換步物我一如各各不相知法法不相到且全身奉重一句作麼生道良久云天上有星皆拱北人間無水不朝東

師住徑山受靈隱勅陞座一處通千處百處一時通一處透千處百處一時透如開武庫錯落交輝又如大火聚巖著燎却面門如是則居方則方遇圓則圓拈一莖草作丈六金身拈丈六金身作一莖草坐斷情塵意想不落見聞覺知敲唱俱行十虛通暢且移身換步一句作麼生道薰風生閭外白日遶須彌

師在平江元知府庵受天童請上堂舉應庵和尚受天童請日偈畢乃云山僧亦有一偈舉似大衆去年八月間得旨與安閒擺脫水雲性縱步到陽山元宅諸子弟忻然力追攀庵居三箇月開懷宇宙寬忽接

四明信來書意盤桓天童虛法席使君語猶端迢迢  
遣專使不問路行難山僧臨晚景不敢自矜瞞鼃鼓  
樂與行四衆亦忻歡先師未了底應是趕波瀾敢問  
大衆如何是先師未了底一回飲水一回噎臨濟德  
山俱汗顏

東山空禪師受雪峯請上堂俊快底點著便行癡鈍  
底推挽不動便行則人人歡喜不動則箇箇生嫌山  
僧而今轉此癡鈍爲俊快去也彈指一下曰從前推  
挽不出而今出從前有院不住而今住從前嫌佛不  
做而今做從前嫌法不說而今說出不出住不住卽  
且置敢問諸人做底是什麼佛空王佛邪燃燈佛邪  
釋迦佛邪彌勒佛邪說底又是什麼法根本法邪無  
生法邪世間法邪出世間法邪衆中莫有道得底麼  
若道得山僧出世事畢如或未然逢人不得錯舉喝  
一喝下座

德山瓊禪師受請日上堂作家撈籠不肯住呼喚不  
回頭爲甚麼從東過西自代曰後五日看  
天童交禪師受請日上堂咄哉黃面老佛法付王臣

林下無心客官差逼殺人莫有知心底爲我免得麼  
若無不免將錯錯錯便下座

寶壽德禪師冬日在南華受請示衆曰新冬新寶壽  
言是舊時言若會西來意波斯上艸船

牧庵忠禪師樞密柳公仲古鎮長沙以法輪起師從  
於衆望師掉頭不顧復以勝業虛席必欲迎致檄諸  
禪勸請師聞而宵遁追蹤至定明蘭若擣鼓于堂致  
師于座縑素羅拜踰時不已師慨然說偈曰咄哉黃  
面老將法付王臣林下無心客官差逼殺人昔聞其  
言今見其事便下座

筓庵問禪師在竹林受金山龍游禪寺請陞座宗乘  
一唱三藏絕詮亘古亘今輪絕不動風行草偃水到  
渠成自然時節因緣滿目全彰殊勝同殺同活同縱  
同奪同照同用同主同賓提持向上玄猷共展衲僧  
巴鼻有意氣時添意氣增些子不得不風流處也風  
流減些子不得增不得處減些子減不得處增些子  
便見法隨法行一幢隨處建立如盲龜值木如香象  
渡河波浪滔天全身出沒截流而過深淺隨宜楊子

江心揚化日妙高峰頂露針錐何曾略假外求只在竿頭進步正當恁麼時兵隨印轉將逐符行節拍相資作麼生道九萬里鵬鷺展翼三千年鶴便翱翔復偈云滿院竹風翻不住一聲長笛到江聞弘恢佛祖機前令偏向洪波浪裏行

受漏澤請陞座師接疏云一言未啓千里同風欲得錦上添花要須向人天衆前分明剖露大衆委麼不可道兵隨印轉將逐符行不可道一朝權在手便把令全施須知有向上一竅始得且作麼生是向上一竅昔日靈鷲山中親付飲光以及國王王子大臣廣令弘護傳示將來毋使斷絕卽今大司空豈翁居士同大護法當道尊官一郡神衿合詞崇啓重開古寺建立道場卽此一會何異靈山既然今古無差便乃聲和響順千峰頂上興慈不妨十字街頭垂手十字街頭垂手要見千峰頂上興慈大衆委麼乃豎拂子云鶴有九霄難翥翼馬無千里謾追風久立珍重

更受請提綱

保寧勇禪師再受保寧帖上堂拍手三下指口搖手

三下下座

大慧杲禪師在育王再受徑山勅陞座善法堂前瑞氣新天書來自九重城惟憑一句無私語上祝吾皇億萬春

受請當晚小參提綱

眞淨文禪師在洞山受請當晚小參新豐古剎萬疊爭攢悟本眞宗千林競簇古今勝地佛事常興所以昔日悟本大師有時提唱云惟有佛菩提是眞歸仗處復喝一喝云猶有者箇去就在諸德祇如大師道猶作者箇去就在且道意作麼生還知落處麼叢林中多有商量者有底道聞佛聞法似生冤家況更有歸仗處故遭悟本大師檢點有底道悟本祇要人休歇去有底道悟本祇見錐頭利不見鑿頭方似與麼匹配又何曾夢見他古人既不如此又且如何諸德此箇事大須子細不可驕心一等參禪窮教到底宗門中千差萬別隱顯殊途惟大智方明降茲已往莫測涯際而今多是抱不哭孩兒打淨潔毯子把纒放船抱橋柱澡洗彼此丈夫阿誰無分若便明去驅耕



夫之牛奪饑人之食入火不燒入水不溺於一切處  
不留一切處或就靈光獨耀烜赫殊分可謂蕩蕩乎  
落落乎張起濟岸帆撥動渡人舟於生死海內白浪  
堆中出沒去來逍遙自在乃喝云從他誘任他非雨  
中兼笠笠蓑衣而今暫別海門月攜魚且向市鄺歸  
下座

五祖演禪師受東山請當晚小參一則三三則七牧  
羊隄畔女貞花拒馬河邊望夫石石擊尺赤土畫箴  
箕從教眼搭癡復云淮甸三十載今作老黃梅好事  
明明說從教鴨聽雷

明覺顯禪師受雪竇請當晚小參諸仁者未有常行  
而不住未有常住而不行古之今之各有攸往且如  
茲院僻處一隅若非念報佛恩無以四來居此恐山  
僧進發之後法席空虛今命素公開士接續住持幸  
冀衆慈同心勸請

圓悟禪師高郵乾明受勅住金山龍遊當晚小參祖  
師心印狀似鐵牛之機諸佛密語正如擊塗毒鼓未  
擬議前先蹉過纔思量處隔千山須要眼似流星心

如鐵石所以從上來提持向上綱宗只有三句有時  
咬去有時咬住有時一向不去有時一向不住明眼  
漢沒窠臼若論戰也箇箇力在轉處却物爲上逐物  
爲下要須把斷凡聖路頭不立毫末然後舉一毫毛  
盡無邊香水海七達八通說一句子窮龍宮盈海藏  
此猶是極則之談未是衲僧巴鼻若論衲僧受用直  
饒棒如雨點喝似雷奔列千聖下風立毗盧頂上擊  
石火閃電光俊絕俊鷹也趕他不及要須正一切知  
見發明大解脫無不歷落無不透脫則在天同天在  
地同地物同物我同我證一切智明一切道無處不  
通容無機不圓證正當恁麼時諸人各各返照自己  
分上曾移易一絲毫許麼所謂十世圓融十分成就  
且道不落機緣一句作麼生道覲面要須宗正眼臨  
機截斷聖凡蹤

辭衆提綱

白雲端禪師受法華請辭衆上堂佛身充滿於法界  
普現一切群生前隨緣赴感靡不周而常處此菩提  
座大衆作麼生說箇隨緣赴感底道理祇於一彈指

間盡大地含生根機一時應得周足而未嘗動著一毫頭便且喚作隨緣赴感而常處此座祇如山僧此者受法華請相次與大眾相別去宿松縣裏開堂了方歸院去且道還離此座也無若道離則世諦流布若道不離作麼生見得箇不離底事莫是無縫剝境自他不隔於毫端十世古今始終不離於當念麼又莫是一切無心一時自遍麼若恁麼正是掉棒打月到者裏直須悟始得悟後更須遇人始得汝道既悟了便休又何必更須遇人若悟了遇人底當垂手方便之時著者自有出身之路不瞎却學者眼若祇悟得乾蘿蔔頭底不惟瞎却學者眼兼自己動便先自犯鋒傷手汝看我楊岐先師問慈明師翁道幽鳥語喃喃辭雲入亂峰時如何答云我行荒草裏汝又入深村進云官不容針更借一問師翁便喝進云好喝師翁又喝先師亦喝師翁乃連喝兩喝先師遂禮拜大眾須知悟了遇人者向十字街頭與人相逢却在千峰頂上握手向千峰頂上相逢却在十字街頭握手所以山僧曾有頌云他人住處我不住他人行處

我不行不是與人難共聚大都縑素要分明山僧此者臨行解開布袋頭一時撒在諸人面前了也有眼者莫錯怪好珍重

眞淨文禪師在筠州九峰受歸宗請晚參上堂辭衆舉拂子云昔日世尊拈花迦葉微笑今夜歸宗舉拂大眾寂然爲復寂然者是微笑者是是又是箇什麼只如歸宗舉拂與世尊拈花是同是別若言同法無同相若言別豈有兩般久參先德聞舉便了後進初機却須子細良久云法法總歸宗臨機要變通靈源明妙處平等主人翁

明覺顯禪師辭翠峰上堂山僧斯者抑徇彼請難可稽留束裝告行但多攀感況住持久煩勤舊備認歲寒希各務道專致以副誠祝其有參隨高士動逾千里附近百僧忽齋粥疏遺船車隘窄冀相回互禪悅自貽則佛國徧遊亦不爲遠何以諸禪德去來不以象故無器而不形動靜不以心故無感而不應然則心生於有心象出於有象象非我出故金石流而不焦形非我生故日用而不勤紘紘自彼於我何爲請

諸人高挂征帆不勝珍重

元叟端禪師受杭州路中天竺寺請辭衆上堂我昔來禹泉四年八箇月打鼓弄糊獃日夜不知歇朝廷公道開分條遇明哲拯弊除貪婪蒐賢選英傑胡爲天竺峰而乃付愚拙差官逼殺人不容更分說束包登前途聊與衆人別千歲禪巖跳上天六月火雲飛瑞雪

呆庵莊禪師應高僧選辭衆上堂我來雲中居五載如轉燭所樂在妄緣心心自知是虛名不可逃驛書到空谷笑看折脚鐙委置憑誰續摩挲七尺藤光漆耀人目用捨各有時去住拘何束珍重同道流共唱清平曲薰拈拄杖召大衆云且道清平曲是甚腔調喝一喝下座

愚庵及禪師赴徑山別衆上堂備員南宕恰三年又向凌霄闌化權了却先師舊公案饑來喫飯困來眠且先師公案作麼生了拍禪床下座

名德頭首受請借座陞座

住持先爲引座提綱

白雲端禪師演首座受四面請師上堂云年年秋暑

甚如初何事清涼特之餘盡是當人心地感不虛把手在龍舒且道把手一句作麼生道良久云行到水窮處坐看雲起時

保寧勇禪師壽寧長老進發上堂曹溪一宿也大無端黃檗三頓遞相鈍置蒲團禪板屈抑當人索火來燒猶較些子保寧今日別無相送壽寧長老拈拄杖云祇有一條黑漆拄杖更不囊藏向大衆前兩手分付擲杖下座

圓悟勤禪師報寧民和尚受帖上堂一向孤峰獨宿日視雲霄雖則不理沒宗風無乃太高生一向十字路口土面灰頭利物應機雖則埋沒自己無乃太屈辱生況明悟之士頂門具眼肘下有符出沒卷舒得大自在動若行雲止猶谷神可以或孤峰獨宿不得土面灰頭或土面灰頭不得孤峰獨宿恁麼中有不恁麼不恁麼中却有恁麼且應時應節一句作麼生道良久云瑞氣逢嘉運靈苗觸處春

應庵華禪師隆報覺長老受請上堂云無上法王有大陀羅尼門名爲圓覺流出一切清淨真如菩提涅

漿鷺拈拄杖卓一卓云普請向者裏入聞聲悟道見  
色明心觀音菩薩將錢買胡餅放下元來是箇饅頭  
又拈拄杖卓一卓云若向者裏入瞎却人眼不向者  
裏入又向什麼處入伶俐漢一撥便轉更須知有出  
身一路敢問大衆作麼生是出身一路又卓一卓云  
舉頭天外看誰是我般人

夢庵信禪師丹陽邵安撫遠將書帖就庵請疎禪人  
住孝感功德院因爲引座徧探虎穴須是英靈獨摘  
驪珠豈無奇傑既操如是之志必應如是之求且道  
如是之事又作麼生用知音千里遠相囑爲我拈來  
與衆看

臨安府南蕩慶善專使來就庵請堅禪人住持因爲  
引座錢塘潯漫連渤澥拋餌垂綸雜草草莫學空船  
載月歸深入煙波爲尋討鯨鯨早晚如上鉤不枉隨  
波同混流百丈山前成底事先將漁笛上扁舟乃左  
右顧視云幸有知音便將拈出

肯堂尤禪師因元庵和尚受智者請引座南山有箇  
老魔王炯炯雙眸放電光口似血盆呵佛祖牙如劍

樹罵諸方幾度業風吹不動吹得動雲黃山畔與嵩  
頭陀傳大士一火破落戶依舊孟八郎賺他無限癡  
男女開眼堂堂入鑊湯忽有箇諸僧出來道既是善  
知識爲甚麼賺人入鑊湯只向他道非公境界

楚石琦禪師了庵和尚赴靈巖進發上堂三聖道我  
逢人即出出即不爲人與化道我逢人即不出出即  
便爲人你看他臨濟兒孫如水銀落地相似大底大  
似小底小則卒討他頭鼻不著新靈巖和尚權衡佛  
祖密鑊聖凡爲四海禪流掃諸方露布洞庭湖上豎  
起金剛幢智積山中豁開正法眼畢竟憑箇什麼拈  
拄杖卓一下下座

元叟端禪師爲明州新瑞巖前山和尚引座控佛祖  
大機定乾坤正眼從上以來據曲徇木如恒河沙轉  
其指歸直是萬中無一所以道譬如琴瑟笙篴琵琶  
雖有妙音若無妙指終不能發擊拂子十二峰前月  
如剪清光千里共依依

爲旌忠了庵和尚引座開蓮華於臘月落冰片於炎  
天疏正脉之淵源碎邪師之窠臼寒木在握兮全機

可笑秋水橫按兮半提可滅使八極項目者不自爭  
衡將見斯人兮駕馭昂赫擊拂子云叢林在處今寥  
落聽取西山第二禪

愚庵及禪師衍書記赴普慶上堂欲識佛性義當觀  
時節因緣豈不見馬祖問藥山子近日見處作麼生  
山云皮膚脫落盡唯有一真實祖云子之所得可謂  
協於心體布於四肢既然如是將三條篋束取肚皮  
隨處住山去山云某甲又是何人敢言住山祖云不  
然未有長行而不住未有長住而不行欲益無所益  
欲爲無所爲宜作舟航無久住此馬簸箕固是鍛爲  
子屈然則時節既至其理自彰正與麼時且如何說  
箇自彰底理驀拈拄杖召衆云來日普慶山中看取  
斯道長老爲一切人分明學似卓拄杖喝一喝

顏藏主赴千頃上堂學古德道者一片田地分付來  
多時也我立地待你搆去法眼道者一片田地分付  
來多時也我坐地待你搆去佛果道者一片田地分  
付來多時也我今爲汝當面慶讚一卽三三卽一所  
見不同互有得失徑山道者一片田地分付來多時

也自是你搆不著今日分付用愚長老赤手提持祖  
肩擔荷向千頃雲中放兩拋三深畊淺種栽荊棘林  
開三毒花結無明果改禾莖爲粟柄變瓦礫作黃金  
直得釋迦彌勒拍手喜歡文殊普賢合掌贊歎遵從  
百代典刑振起一方叢席卓拄杖云要識眞金火裏  
看棒頭有眼明如日

笑隱訢禪師爲奉聖滅庵和尚引座傳佛心宗不是  
細事荷擔大法須得其人所以首山風穴單丁草屋  
住三十年而法道之盛過於萬指千礎後來眞淨和  
尚又道先師在黃檗衆不滿百而明眼輩幾半今雖  
三倍當時纔一兩人而已可謂千兵易得一將難求  
今日奉聖專使來請第一座住山留之則孤彼來意  
放行則此衆失依諸人還定當得麼若定當得便見  
靈山會上千葉騰芳少室峰前一枝獨秀如或未然  
更聽拄杖子通箇消息卓一下云銀山鐵壁無回互  
草偃風行得自由復舉楊岐在九峰受請下座九峰  
勤和尚把住云且喜得箇同參岐云同參底事作麼  
生峰云九峰牽犁楊岐拽耙岐云正與麼時楊岐在



前九峰在前峰擬議岐拓開云將謂同參元來不是  
師云楊岐九峰填饒迭奏今古罕聞龍翔今日對衆  
舉揚貴要大家知有且道知有箇什麼祖翁田地無  
多子努力同心兩弟兄

前堂首座赴保寧請上堂開無明華結三毒果魔王  
惡業現前驅耕夫牛奪饑人食白拈手段尤高所以  
百丈再參馬祖震威一喝直得三日耳聾黃檗聞之  
不覺吐舌始知大機大用不假師承鉗鎚妙密屬乎  
當人如我仲方法弟先師之所敬畏頃辭海上名藍  
屈爲山中表率茲奉丞相鈞命往赴保寧之請所謂  
法隨法行法幢隨處建立鎔凡鍛聖烹金爐耀古騰  
今打鳳羅龍龜毛綱漫天巾地直得無路可行無門  
可入山僧爲汝諸人作箇方便拈拄杖擲下云喪身  
失命知多少照顧南山鼉鼻蛇

列祖提綱錄卷第二十一

列祖提綱錄卷第二十二

武林十八剎理安禪寺住持婁東行悅集

名德受請借座陞座提綱

楊岐會禪師在筠州九峯受楊岐請陞座問答罷乃  
云更有問話者麼試出衆相見楊岐今日性命在你  
諸人手裏一任橫拖倒拽爲什麼如此大丈夫兒須  
是當衆決擇莫背地裏似水底捺葫蘆相似當衆引  
驗莫便面亦有麼有麼出來決擇看如無楊岐失利  
師纔下座九峯勤和尚把住云今日喜遇同參師云  
同參底事作麼生峯云九峯牽犁楊岐拽耙師云正  
當與麼時楊岐在前九峯在前峯擬議師拓開云將  
謂是同參元來不是

雲峯悅禪師在同安受翠巖請陞座云山僧今日平  
地喫交了也你等諸人還知敗闕麼然官不容鍼私  
通車馬拍禪床下座

厚賢顯禪師在靈隱受翠峯請衆請陞座天下絕勝  
之覺場靈隱導師之廣座暫借卑僧陞陟實愧非材  
豈敢於五百員衲子前提唱佛祖抑揚古今銜耀見

知恥他先作假饒說得天雨四華地分六震於曹溪路上一點使用不著何以行脚高士有把定世界函蓋乾坤底眼誰敢錯悞絲毫其知有者必共相悉

玉泉皓禪師在鹿門受大陽請陞座某在鹿門十年不曾飲鹿門一滴水嚼鹿門一粒米汝若不會來大陽爲汝說破攜拄杖下座

報本存禪師在天衣受請上堂吳江聖壽見召住持進退不遑且隨緣分此皆堂頭和尚提耳訓育始終獎諭若緣今日正令當行便好一棒打殺那堪更容立在座前雖然如是養子方知父慈

名德受請借座當晚小參提綱

雲峯悅禪師在同安受翠巖請當晚小參問答畢乃云莫更有作家禪客本分衲僧何妨出來共相證據有麼布袋裏盛錐子不出頭來也大好大凡扶豎宗乘亦須是箇人始得若未有奔流度刃石火電光底眼睛不勞拈出臨濟大師與德山坐次德山云今日困濟云老漢麻語作麼山擬拈棒濟便掀倒禪床師云奇怪諸禪德看此二員作家一撈一捺略露風規

大似把手上高山然雖如是未免旁觀者哂且道誰是旁觀者喝一喝擊禪床下座

名德借座辭衆提綱

雲峯悅禪師離同安辭衆上堂山僧道漸荒薄德揣無堪豈謂使命遐飛僧徒雲請此蓋堂頭和尚友於情深發揮道廣但勵履冰之志敢忘報德之誠而又翠巖一行專使限近四十餘人數日之間頗多喧聒其於感愧併集山懷兼此者一行參隨高德既蘊成人之美更敦尅志之心其如跋涉長途各希愛護然出家達士以利人爲己任動若行雲止猶谷神豈有心於彼此情繫於動靜者哉既無心於彼此亦無繫於去來所以紘紘自彼於我何爲如是則冀諸上人高橫金錫輕捲雲袍明日遂行胡往弗利

三門炷香法語入院炷香佛事

密庵傑禪師蔣山指三門無礙解脫門重重寶樓閣不勞歛念八字打開信脚便行自然聲和響順若也躊躇便見撞牆撞壁  
雪巖欽禪師龍興指三門盡大地是箇院子且道門

從何入八字打開青天白日

護聖三門跨通方閭域示竭世樞機以手加額云是阿誰

仰山三門我此撥天門戶大地一網俱收若是祥麟瑞鳳從教戴角擎頭然雖如是總過者邊著

唯庵然禪師伏龍聖壽三門未跨龍門腳踏實地已跨龍門腳踏實地驟步云一聲霹靂風雲起

元叟端禪師鳳山指三門無盡藏神通門無盡藏解脫門今日向者裏八字打開蝦蟆跳上梵天蚯蚓煮過東海

笑隱訢禪師中天竺三門一彈指頃開樓閣門黃河九曲水出崑崙

無文燦禪師薦福指三門紅藕當門綠楊繞路新薦福八字打開了也者裏入得天下橫行

華藏指三門無箇入處奔走殺人有箇入處礙塞殺人彈指一下云重關擊碎了也入之一字甚處得來恕中愍禪師廣福三門入門一句有甚難見動著機關東扇西扇喝一喝

瑞巖三門盡大地是解脫門把手拽不入雪峯與麼道瑞巖不與麼道喝一喝

愚庵及禪師徑山指三門天下徑山天下龍門吐吞日月函蓋乾坤

南石琇禪師光孝三門法門廣大到者方知紅霞穿碧落白日繞須彌

萬壽山門無門法門一起直入逐電驕騁追莫及鐵關樞禪師普載三門大解脫門如地普載信步便入了無內外

石屋琪禪師指三門豁開戶牖當軒者誰喝一喝

楚石琦禪師天寧三門闔市門頭來千去萬入寺看額能有幾人復云是什麼便入

鳳山三門東門西門南門北門門門有路路頭在什麼處五鳳樓前

本覺三門蟄戶未開龍無龍句打破虛空全體顯露復云步

光孝三門無門之門不入而入雲垂四野水涵雙湖若要天下橫行親到一回始得

了庵欲禪師開福指三門我此法門直出直入中下之流自望不及喝一喝

本覺指三門門門有路達者猶迷振轉天關是誰知有喝一喝

雲巖指三門撥開向上關掃蕩聖凡轍萬古乾坤一朝風月

呆庵莊禪師雲居指三門大啓重關全提正令水赴雲趨金春玉應

徑山指三門我此法門天寬地濶汝等諸人於中出入須知有向上關板子始得喝一喝

月江印禪師育王指三門大解脫門八字打開了也彈指下喝總不消得

用彰俊禪師普慈三門百千神通門百千妙用門總落第二義如何是第一義彈指一下

筌庵問禪師金山三門玉殿瓊樓瓊樓玉殿百億化門門門有眼直得八字打開波濤潑面到者裏更須進步大眾看便入

漏澤三門惟此一門而復狹小但能得入地濶天寬

且作麼生入喝一喝

牧雲門禪師棲真三門佛語心爲宗無門爲法門還有人入得此門名麼顧衆云蛇無頭而不行

興福指三門石橋東鎮古澗西來佛祖門戶今古洞開還見麼祥麟及瑞鳳盡入此山來

#### 佛殿炷香法語

密庵傑禪師蔣山佛殿燒香因我得禮你窮源親到底禮拜了燒香自倒還自起

雪巖欽禪師龍興佛殿碧玉盤中珠宛轉琉璃殿上月徘徊是什麼人境界其或未辨端由且看新長老拈起坐具大展三拜

光孝佛殿釋迦已滅彌勒未生於此二千年內有法誰說有令誰行雲門鼻直德山眼橫

仰山佛殿東土小釋迦指佛云看來卽是你敢問夢升兜率天宮說離四句絕百非明什麼道理齊之以禮

元叟端禪師資福佛殿玉毫徧照十方金色普輝千界便禮拜

恕中愷禪師瑞巖佛殿佛是家裏人直下會得玄沙道底

了庵欲禪師開福佛殿世尊拈花迦葉微笑賴有文殊與普賢熨斗煎茶不同銚

本覺佛殿性覺妙明本覺明妙脫却鵲吳衫卸下臟脂帽

靈巖佛殿世尊三昧迦葉不知一會靈山儼然猶在呆庵莊禪師徑山佛殿燒香三世諸佛即今向香煙起處放光現瑞轉大法輪狸奴白牯呵呵大笑露柱燈籠呵呵大笑

唯庵然禪師聖壽佛殿法報化身總是者箇畢竟以何爲驗泥多佛大便禮拜

用彰俊禪師普慈佛殿不著佛求不著法求是什麼語話惟有佛菩提是真歸仗處便禮拜

瑞巖佛殿即心即佛非心非佛心在者裏佛在什麼處提起坐具幾乎當面蹉過

楚石琦禪師福臻佛殿城東老母不願見調達比丘常怒嗔信手拈一炷香也是多行春令

天寧佛殿是你是我撒土撒沙同門出生死冤家鳳山佛殿黃金殿上釋迦老子不合向者裏屈展坐具云且禮拜蓋覆却

本覺佛殿佛者覺義覺的是誰西天移來此土藕絲牽著須彌

光孝佛殿還識佛麼面如滿月目如蓮天上人間咸恭敬

鐵關樞禪師普載佛殿說著佛字漱口三年何故清平世界切忌訛言

愚庵及禪師徑山佛殿顧左右云插一莖草建瓊樓玉殿拈一莖草作文六金身山上有鯉魚井底有蓬塵

笑隱訢禪師中天竺佛殿二千年前你有伎倆我無伎倆二千年後我有伎倆你無伎倆何故入水見長人

南石琇禪師普門佛殿佛身無爲不墮諸數烏龜藉首須彌柱

徑山佛殿佛者覺義覺者何義頭上是天脚下是地



靈殿佛殿佛無去來應緣卽現展坐具大衆莫言不見

佛朗性禪師疎山佛殿靈空界是箇寶殿畢竟那箇是佛喝云出頭天外看誰是我般人

天童佛殿法報化身之乎者也齊之以禮天上天下石屋珙禪師佛殿因我得禮你自倒還自起鵲鳩樹上啼意在麻舍裏

密雲悟禪師天童入院至古佛殿基云虛空作殿日月爲燈且道是甚麼人境界還會麼設或未會且看新長老撒開坐具大展三拜

筭庵問禪師金山佛殿因我得禮你惡口小家成群作隊文殊自文殊普賢自普賢兩兩不成三三非是今日新長老要現大人之相展具九拜

漏澤佛殿德山折却者裏扶起泥王土塊放光明山僧大展具作禮

晦曇承禪師佛殿拈香云不是法身報身化身亦非金像木像土像當陽突出難知萬古人天榜樣遂展具三拜

林阜豫禪師佛殿古釋迦新長老面面相看甚爲恰好雖然禮從外來也缺者三拜不得遂展具作禮

弘覺志禪師佛殿佛者覺義杖林山下竹筋鞭三脚驢子弄蹄行麻三斤殿裏底大者如兄小者如弟且道是甚麼義一劈華山成兩路萬年流水不知春牧雲門禪師佛殿文殊騎獅子普賢騎象王釋迦老子坐寶華臺各自稱尊山僧旣入者保社未免也露些子神通展坐具云是甚麼

佛殿三面好山中一所空王殿喝退麻三斤打開乾屎橛甚處與古佛相見以坐具打圓相云交

朝宗忍禪師佛殿拈坐具云拜卽是不拜卽是旣是故人何須特地遂拜

#### 伽藍堂炷香法語

能仁元禪師初住福嚴入伽藍堂見土偶甚夥不覺失笑遂炷香小庵小舍小叢林土地何須八九人若解輪番來打供免教碎作一堆塵是少神致夢于山前禮越顯如所戒唯庵然禪師聖壽伽藍正直聰明聰明正直顯正摧邪憑誰之力喝一喝

佛朗性禪師疎山伽藍我有六通你有五通且道如何是那一通汗馬無人識重論蓋代功

南石琇禪師靈巖指土地云妙通乾坤回幹造化總不出者些子何故滴酒落地千神皆醉

報恩伽藍虛而靈寂而妙天無私益日無私照

楚石琦禪師土地堂龍王殿赫赫厥聲濯濯厥靈前

朝鳳闕萬古龍庭雨過吳山插漢青

密雲悟禪師土地堂拈香云伽藍神叢林主一瓣香

兩手舉便燒

筈庵問禪師金山伽藍殿員不掩僞曲不藏直我出

你圈續不得你出我圈續不得

弘覺恣禪師伽藍通身徧界不曾藏出入先知有甚

妨須待後來添一分不如當面爲燒香

土地堂禍不單行福無雙至叢林殃害惟我與你相

逢拍手上高臺一任波旬冷眼視

牧雲門禪師伽藍古寺高林仰惟垂護潭影山光左

鑒右顧且顧箇甚麼千年常住一朝僧剔起靈峰照

夜燈

### 祖堂炷香法語

唯庵然禪師聖壽祖堂你者一隊全無巴鼻六耳同謀有甚良計

用彰俊禪師瑞巖祖堂以心印心以法傳法一犬吠虛千猿哇實達磨不會禪六祖不會道所傳心法甚處得來

鐵關樞禪師普載祖堂馬領驢腮釘背鐵舌四七二

三證龜成鼈

楚石琦禪師云總是者一隊漢佛法不到今日不是

者一隊漢佛法不到今日且道是肯他不肯他

本覺祖堂達磨師不是祖半夜下關浮日輪正卓午

光孝祖堂一花五葉起必有因且道從什麼處起岸

上蹺踏蹺水中嘴對嘴

愚庵及禪師普慈祖堂昆明池裏失却劍曲江江頭

撈得鋸須彌峯頂浪滔天大洋海底蓬塵起大小祖

師口門無齒

恕中愍禪師廣福祖堂栗棘蓬金剛圈拋來擲去此

土西天

瑞巖祖堂心心相同眼眼相矚一等陳年爛葛藤六六依然三十六

南石琇禪師報國祖堂建立叢林傳佛心要赤脚穿皂靴露頂戴席帽

報國祖堂四七二三單傳直指南山起雲北山下雨徑山祖堂拜起收坐具云祖祖傳持只者一著耀古

繼今填溝塞壑

佛朗性禪師疎山祖堂此土西天千七百鳥豆換却人眼睛而今大地咸屏跡鼓腹高歌自太平

天童祖堂從上宗師建法社東家作驢西家馬鼻孔穿來只等閒太白一欄都收下

密雲悟禪師祖堂云西天四七東土二三盡在者裏默默商量箇事今日一時捉敗且道以何爲驗插香云以此爲驗

第庵問禪師金山祖師殿西天東土者一隊老凍儂討甚巴鼻問上座要爲祖師出氣拈香云一二三四五

晦曇承禪師祖師堂迦毗香至及梁邦累及平人不

可量今日令行壽量寺鼻孔齊穿一炷香

弘覺恣禪師祖堂靈山密付囑分布在西東流談一何長千燈續莫窮炷香云一爐香散白雲中

祖堂西東四七二三箇箇白拈無賴山僧不用操戈入室便與捉敗且道驗在於何拈香云不見賊物現在

牧雲門禪師祖堂少林風月百丈典型千百年來原來有人知在那箇插香云六耳不同謀

### 據室炷香法語

圓悟勤禪師崇寧據室指方丈云衲僧家魔宮虎穴尙乃安居何況利生接物處所還知此室麼諸天擁護諸聖證明其善知識端居此中與人解粘去縛既有如是勝相山僧於中如何施設不入驚人浪難尋稱意魚作麼生是入門句水歸巨海波濤靜雲到蒼梧氣象閒便入

大慧果禪師育王指方丈召大衆云者裏是烹佛烹祖大鑪鞴鍛生鍛死惡錯錯莫怪主人無面目法如是故非彊爲法既如是又非彊爲且道最初一句又

作麼生還委悉麼釣竿斫盡重栽竹不計功程得便休

應庵華禪師光孝據坐云現成公案坐斷諸訛錯下註脚拗折你腰掙起便行必死之疾要須英俊別有生涯忽遇衝雲俊鵲來時如何縵天網子百千重歸宗據坐云凡爲善知識居此室者須行五無間業然後示以鑊湯爐炭刀山劍樹碓磨磨謂之抽釘拔楔解粘去縛若是下劣種草必定望崖而退唯是法王眞子始可親近正恁麼時如何喝一喝便起東林據坐云西天四七唐土二三盡向者裏釘椿搖櫓新東林爲你諸人解纜放船未說超宗異目若得齊眉共矚亦可明窓下安排苟或如之若何未免攔腮搨出

報恩據坐云大衆此室深廣晝夜常放金色光明是文殊大人境界又謂之縵天網子透得過底腦後也與一縫透不過底便好丹霄獨步何故殺人須見血爲人須爲徹

密庵傑禪師華藏據坐云獅子教兒迷子訣擬前跳

擲早翻身羅文結角交鋒處鵲眼臨時失却蹤古人與麼道也是徐六擔片板

雪巖欽禪師龍興據室此是老圓悟斷佛祖命根去處今日不肯兒孫合作麼生乃袖手云有甚閒工夫護聖據室斷臂立雪負石踏碓取人心肝克由耐耐護聖者裏使不得你露面作竊以手約云且退且退光孝據室你有一丈還你一丈你有一尺還你一尺若只咬定不肯回頭白日青天霹靂

唯庵然禪師聖壽據室拈拄杖云縱也在我奪也在我鐵額銅頭也須按過卓拄杖

徑山藏叟珍禪師據室者裏是問訊燒香了來老僧身邊立地底所在麼呆子你自鈍置猶可莫來鈍置老僧

元叟端禪師鳳山據室拈拄杖掣開金殿鎖撞動玉樓鐘不是吾家種草高峰頂立深深海底行卽非本分衲僧獅子兒吒沙地吼一聲壁立千仞腦後猶欠一椎靠拄杖便起

楚石琦禪師福臻據室繩床角頭三尺地是諸人乞

命處放過一著轉見不堪你也沒量罪過我也沒量  
罪過

天寧據室者裏無密室傳授底法痛棒熱喝白日青  
天儻或躊躇君往西秦我之東魯

鳳山據室臨濟在黃檗喫六十拄杖如蒿枝拂相似  
如今莫有恁麼衲僧麼設有更須勘過始得

本覺據室踞虎頭收虎尾第一句下明宗旨直饒明  
得已是第二句若明不得更參三十年

光孝據室濶一丈高十尺是你諸人爲什麼人作不  
得鐵壁鐵壁

愚庵及禪師淨慈據室刮龜毛於鐵牛背上朝打三  
千截兎角於石女腰邊暮打八百指東畫西鼓唇搖  
舌且居門外擊石火閃電光冰稜上度過九阪劍刃  
上拾得全身君帶柄聊與三十總不與麼來時如何  
拈拄杖云吽吽

天目禮禪師廣壽據室釋迦拈室弄假像真維摩默  
然弄真像假廣壽據一條白棒佛來也打祖來也打  
因甚如此一二三四五

淨慈據室從上諸祖師天下老和尚盡向馬頭上截  
角龜背上拔毛新報恩又作麼生摘楊花摘楊花  
天童據室震忽雷飛閃電夜叉頭菩薩面是汝諸人  
向甚麼處與他相見喝一喝

恕中愍禪師廣福據室一椎便就把髻投衙不假一  
椎抱賊叫屈直饒百發百中雙放雙收向我靈巖門  
下總用不著拈拄杖畫一畫云乾三連坤六斷

瑞巖據室我者裏一切只是尋常你若來弄機關誇  
敏手向毒蛇頭上搭癢猛虎領下解鈴拄杖子未打  
你在何故有盤根錯節方可施利器有銀山鐵壁方  
可展鉗鎚

呆庵莊禪師徑山據室拈拄杖云明頭來明頭合暗  
照來暗頭合這得也二十拄杖道不得也二十拄杖  
何故重賞之下必有勇夫卓拄杖

用彰俊禪師普慈據室拈拄杖室中若無棒頭取證  
底我拄杖子誓不喚作拄杖子有麼敕點飛龍馬跛  
鼈出頭來

佛朗性禪師疎山據室殺活自由縱橫十尺上下四



維銀山鐵壁橫按拄杖云聊通一線烏藤劈脊喝一喝

石屋琪禪師據室拈拄杖云從上諸佛祖師天下老和尚總是揚蓬塵於水底摘楊花於火中新福源又作麼生卓拄杖喝一喝

無文環禪師據室山僧今日開地獄門普請盡大地人造地獄業證地獄果若有一人成佛作祖我誓不成正覺

笑隱訢禪師據室橫按拄杖顧視左右云有麼有麼卓一下云無人過價打與三百

南石琇禪師報國據室蘸蘸預預底豈堪雕琢縱有超然之作且還我本道公驗來

徑山據室以拄杖橫按云只恁麼早已鈍置汝輩了也更待搖唇鼓舌堪作甚麼以拄杖畫一畫便起了庵欲禪師開福據室真不掩僞曲不藏直石裂嵐崩雷轟電激轉得身來未有棒喫喝一喝本覺據室橫按拄杖云有正偏不犯底手具碎啄同時底用總須列在下風卓拄杖喝一喝

靈巖據室此是從上老宿烹佛煉祖煅聖鎔凡之地新長老平高就下舍窄從寬且放你諸人吐氣密雲悟禪師據室據此室行此令從教天下衲僧來乞命一一爲伊當頭按定卓拄杖遂起

筈庵問禪師漏澤據室天台來也從者裏過南嶽來也從者裏過四大部洲盈衢塞路無不從者裏驗行放開也由我捏聚也由我卓拄杖云今日不可戲論牧雲門禪師據室本分草料不顧人情你若向背地裏點胸點肋山僧也則眼如不見耳如不聞若是箇漢擬跳龍門向者裏張牙露爪未免青天轟霹靂何故不入驚人浪難逢稱意魚

據室金剛圈拋來任你跳得栗棘蓬刺來儘你吞得山僧尙有三十棒在何故臨濟門下令不虛行卓拄杖一下

弘覺恣禪師據室閉門打睡接上上機中下之流入圓鑊地若待豎拂敲床總是睦州道底喝一喝八棒對十三數來未到你

據室白雲生按下碓嘴使開花客至無禮儀蒿湯便

營茶然雖如是賣金終不和與沙

入院提綱 先德開堂必待朝命下或俟當道請方舉行故到院據室後但加尋常上堂而已

楊岐會禪師入院上堂霧鎖長空風生大野百草樹木作大獅子吼演說摩訶大般若三世諸佛在你諸人脚跟下轉大法輪若也會得功不浪施若也不會莫道楊岐山勢嶮前頭更有最高峯

保寧勇禪師入院上堂欲陞此座應須作禮須彌燈王且道須彌燈王在甚處又向什處作禮爲復心存意想爲復緣慮俱忘爲復心境一如爲復萬法空寂若與麼見解未出常流既不與麼又作麼生棒打石人頭曝曝論實事直饒博聞強識世智辯聰得大總持具無礙辯於祖師門下轉沒交涉所以此事不可以有心求不可以無心得不可以語言造不可以寂默通非得失是非緇素貴賤凡聖差降情量智解之所能及諸人到者裏如何卽是若是大丈夫兒直下真不揜僞最親切處自肯方親山僧與麼道已是相埋沒了也如今莫有不受人瞞者麼良久云平生肝

膽向人傾相識猶如不相識遂拈拄杖云無限雲山藏不得却攜藜杖入廊來千門萬戶俱敲徧今日分明卓鳳臺卓一下下座

雪竇顯禪師翠峯入院上堂未來翠峰多人疑著及手親到一境蕭然非同善財入樓閣之門暫時歛念莫比維摩掌中世界別有清規冀諸人飽足觀光以資欣慰

五祖演禪師入院上堂舉祖師道吾本來茲土傳法救迷情一花開五葉結果自然成達磨大師信脚來信口道後代兒孫多成計校要會開花結果處麼鄭州梨青州棗萬物無過出處好

眞淨文禪師聖壽入院上堂青山綠水不能住白日紅塵却自歸而今避不得也且混俗和光灰頭土面笑他林下人也要笑若解笑甚奇妙十字街頭拈得箇破布衲襖抖擻塵埃示衆人好不好曉不曉從他肉案頭歌叫喝一喝云回頭轉腦

歸宗入院上堂佛法要妙但歸其宗苟歸宗也自然無可不可一切成現海印發光今與大衆同已歸宗

住平等本際敢問何者是宗何者是要妙良久云祇爲分明極翻令所得遲

雲雲悅禪師翠巖入院上堂山僧昔年曾到今日重來非唯人事增歡抑亦林泉加秀且道不傷物義一句作麼生道良久云天高東南地傾西北下座

法輪入院法不孤起仗境方生道不虛行遇緣卽應然通方之士舉必知歸游涉之徒何妨進步有麼良久云釣竿斫盡重栽竹不計功程得便休

圓悟勤禪師夾山入院門下青山潑黛途中細雨如膏雲雲陌上桃花處處芳菲溢目香嚴巖畔翠竹時時撼影搖風直得一擊忘所知一見絕疑惑不免尙留觀聽未透色聲若能見無見之色聞無聞之聲撥轉路頭踏翻關捩句句超佛越祖塵塵耀古騰今處處離色絕名箇箇斬釘截鐵心外無法法外無心用王庫刀發千鈞弩壁立萬仞坐斷十方可以入大解脫門傳正法眼藏向堯舜日共樂昇平鼓腹謳詠歸家穩坐且到家一句作麼生道但願春風齊著力一時吹入我門來復云昔傳明有通天作略跨海神

機使無舌人說無義語收洛浦接青峰辨石霜賞佛日險崖句峻陷虎機深電激星飛珠回玉轉建茲寶刹風範具存而山僧庶事不才何以繼其高躅旣辭讓不及轉透無門不免借一條路向無言處演言無事處生事無佛處現佛無祖處示祖且貴始末相符頭正尾正敢問諸人還見夾山老子麼莫從百草嶺頭薦覲面無私亘古今

蔣山入院上堂道不虛行如風偃草緣不虛應似鏡臨形若能於心無心於已無已於彼無彼於我無我蕩蕩廓周沙界皆非外物縱歷盡乾坤際悉在目前法隨法行法幢隨處建立理亦如是事亦如是況寶公道場梁時化舒王福地聖世重興宏開選佛場宣唱大般若於其中間且作麼生是於心無心於已無已坐斷要津不通凡聖底一句三山半落青天外二水中分白鷺洲

奉勅住天寧入院上堂入門便見更不容擬議尋思開口便說亦不復周由者也假使善財入彌勒樓閣尙資歛念普眼入普賢妙境亦借威神只如今直得

八穴七穿四通五達一處透千處萬處通明一光明  
千光萬光普照且到家一句作麼生道風前有路超  
調御鼓腹謳謠樂太平復有頌云本是山中人無能  
惟守拙豈謂有虛名遠遠丹鳳闕降勅住天寧竹與  
星夜發今朝親到來一句無言說別別金色頭陀曾  
漏泄

雲居入院上堂耳聞不如眼見眼辨不如手親四百  
州天上雲居今之日竹輿親到巖巒回合林嶺崔嵬  
白雲深處見樓臺恍如別造一世界到箇裏亦不必  
窮玄說妙立境立機論性論心究理究事只如今人  
人分上一切坐斷正當恁麼時親到一句作麼生道  
佛祖妙玄窮徹底白雲深處好安居復云賜得雲居  
養病身半千衲子倍相親攀龍直上青天上投老依  
棲安樂神

奉勅住金山龍遊寺入院上堂三十年前曾到此如  
今樓閣碧參差善財參處真消息誰識德雲閒古錫  
還有識得底麼未度瓜州時有一句子已與諸人道  
了也若以心思若以意識若以眼見若以耳聞則沒

交涉直得七佛已前威音那畔薦得猶是話會在若  
委悉得更不用如之若何便請丹霄獨步苟或未然  
不免落第二義門去也江心一峯樓臺相映水面雙  
塔金碧交輝誠聖帝福田乃禪林上利爲琳宮爲佛  
宇爲淨土爲穰邦建立法幢弘荷祖道若非今上皇  
帝睿聖文明深信此道安能首降詔書復此寶坊以  
爲福地如今所以與諸人向此古道場中各得相見  
既到者裏直須念德修德知恩報恩若也如此則佛  
法付囑有在正當恁麼時一句作麼生道銀山鐵壁  
無回互草偃風行得自由

大慧杲禪師入院上堂山僧未離泉州時已與諸人  
相見了也臨安府亦與諸人相見了也及手來到山  
中擊動法鼓坐立儼然眨眼相覷爲甚麼却不相識  
只爲分明極翻令所得遲

奉旨住育王入院上堂舉南泉和尚新入院知事頭  
首請入方丈有僧問師歸方丈有何指示於人泉云  
昨夜三更失却牛天明起來失却火師云妙喜初住  
育王亦不曾失却牛亦不曾失却火或有人問師歸

方丈將何指示於人只向他道饑餐渴飲閒坐困眠  
且道與南泉是同是別若也道得許你是箇衲僧若  
道不得三十年後却來方丈裏向你道便下座

應庵華禪師處州妙嚴禪寺入院孤峯萬仞鳥道虛  
玄名利杳忘是非頓絕直得猿吟古木虎嘯幽巖碧  
落青霄道人活計雖然恁麼更須知有人境俱奪向  
上一竅乃豎拂云天上有星皆拱北人間無水不朝  
東

明果入院善言言者言所不能言善迹迹者迹所不  
能迹言迹既盡猶是就理變通向衲僧門下未足觀  
光是故從上佛祖提持正印密付要旨若不具緇素  
大眼目如何跋及豈不見世尊在菩提樹下明星現  
時成正覺爾時大地衆生同得同證於四十九年  
曲盡老婆心末後向百萬大衆前拈華獨有迦葉微  
笑便云吾有正法眼藏涅槃妙心分付摩訶大迦葉  
敢問諸人且道有分付無分付若道有分付則埋沒  
迦葉師兄若道無分付則辜負釋迦老子者裏若涇  
渭不分則靈山付囑遂爲虛設正當恁麼時還有人

道得麼若也道得明果價增十倍苟或未然雪後始  
知松栢操事難方見丈夫心復舉保壽開堂公案師  
拈云叢林中商量盡道保壽三聖是作家爐鞴本分  
鉗錘有甚麼交涉殊不知二老被者僧一拶直至而  
今扶不起今日莫有爲二老雪屈底麼出來與明果  
相見有麼薰拈拄杖擲下云龍蛇易辨衲子難瞞

上堂云天清地寧時康道泰摩醯正眼洞明肘後靈  
符光彩譬如善舞太阿終不自傷其手又如壯士展  
臂不借他力既爾水到渠成自然風行草偃豈不見  
古德道緣不虛應似鏡臨形若能於心無心於已無  
已於彼無彼於我無我塵塵壁立萬仞蕩蕩通徹十  
虛如是則法隨法行法幢隨處建立況饒戒勝境伏  
虎道場因緣時節到來大家拗折拄杖且到家據令  
一句作麼生道鍛烹佛祖大鉗錘要與楊岐作頭底  
歸宗入院上堂一句子銅頭鐵額一句子半合半開  
一句子和泥合水揭示拈花要旨洞明少室家風掀  
翻今古葛藤坐斷明暗途轍苟能直下承當頓見本  
來面目不必覺城東際始見文殊樓閣門開方參慈



氏一見一切見一聞一切聞一明一切明一用一切用豈不見昔日有僧辭歸宗宗問云向什麼處去僧云諸方學五味禪去宗云我者裏只有一味禪僧問如何是一味禪宗便打僧云莫打某甲會也宗云你作麼生會僧擬開口宗又打黃檗聞云馬祖出八十四員善知識箇箇轆轤地惟有歸宗較些子圓悟師翁道若非黃檗深辨端倪泊乎勞而無功師云二尊宿只解扶強不能扶弱若作一味禪入地獄如箭其或別有生涯何異鑊水作玉且道節角在什麼處

驀拈拄杖卓一卓喝一喝下座

光孝入院上堂古佛家風遇古佛然後拈出大人境界見大人乃可顯揚今日朝旆臨筵人天普集古佛家風既展大人境界全彰揭示摩醯正眼洞明少室真機頓契佛祖不傳妙心開悟父母未生面目直下斬釘截鐵猶是把纜放船苟若說心說性未免和泥合水者條通天活路千聖共行萬靈同轍淨裸裸沒虛空赤漚漚無空缺雖居有爲界示無爲法而不滅壞有爲之相雖居無爲界示有爲法而不分別無爲

之相如是則如鐘在簾扣之則鳴似鏡臨臺物來斯照於其中間應變萬差出沒卷舒得大自在祇如應真不借一句又作麼生雙溪源脉深無底濟物曾無有倦時復舉王常侍與臨濟至僧堂公案師云風行草偃葉落知秋臨濟雖本分鉗鎚常侍乃頂門具眼祇如今日判府殿撰正言入山與老僧相見雖無僧堂可至亦無佛法商量祇者便是出他一頭地處且道以何爲驗以此爲驗

報恩光孝入院上堂當頭坐斷千眼頓開一句投機十方通暢以無邊虛空爲正體以微塵刹海爲妙用以清淨莊嚴攝懈怠以精進行願警昏迷雖然如是若也以爲究竟向衲僧門下天地懸殊若也把斷要津於勞生界中未爲好手祇如二途不涉如何通信諸人還會麼禪月尊者用盡神通毗耶老人願海尤大因緣時節既非偶然竹杖芒鞋今日親到殿堂修廣樓閣洞開百萬家和氣霽然恒河沙諸佛圍繞光孝堂前坐見鹽梅霖雨姑蘇臺上行看玉樹花開無量殊勝併集解脫知見普熏且道恁麼時畢竟功歸

何所良久云頂門正眼分縑素天上人間不可陪復  
舉裴相國因入大安寺見壁間高僧畫像乃問主僧  
眞容可觀高僧何在主僧無語相國云此間莫有禪  
僧麼主僧云近有僧至疑是禪僧相國召至乃理前  
話禪僧云請相公垂問相國云眞容可觀高僧何在  
禪僧召相公相國應諾僧云高僧何在相國言下大  
悟禪者乃黃檗斷際禪師是也大衆黃檗布縵天網  
要打衝浪錦鱗裴相國坐籌帷幄不妨決勝千里諸  
人若也於此見得個儻分明可謂今之古之苟或未  
然三尺龍泉光照膽萬人叢裏奪高標

天童入院上堂風行草偃水到渠成正令旣行十方  
坐斷若也向上論去語默不及處棒喝未施前總是  
依草附木漢事不獲已且作死馬醫所以道隨處作  
主遇緣卽宗法幢隨處建立展臨濟三玄戈甲會曹  
洞五位君臣敲唱雙行殺活自在拈一莖草穿天下  
衲僧鼻孔布縵天網要打衝浪錦鱗是則是便與麼  
去達磨一宗掃土而盡蒿拈拄杖畫一畫云劍爲不  
平離寶匣藥因救病出金瓶以拄杖卓一卓復舉僧

問當山第一代啓禪師云學人卓卓上來請師的  
啓云我者裏一扇便了有甚麼卓卓的的僧云和尚  
恁麼答話更買草鞋行脚始得啓喚僧近前僧乃近  
前啓云老僧恁麼道過在什麼處其僧擬議啓便打  
師云啓禪師故是本分鉗鎚塞新天童口未得在者  
僧雖深入閭奧要且未具透關眼下座

密庵傑禪師華藏入院上堂昔日文殊大士三處度  
夏一月長者家一月魔宮一月姪坊末後却歸世尊  
會中解制迦葉欲白槌擯出纔舉念見無量世尊無  
量迦葉無量文殊世尊云汝欲擯那箇文殊迦葉盡  
其神力槌不能舉後來尊宿拈云好一槌又却放過  
甘作小乘人師云尊宿與麼也是盲人摸象傑上座  
今夏蔣山結夏褒禪破夏華藏終夏且道與文殊是  
同是別若道是同許他具一隻眼若道是別也許他  
具一隻眼忽有箇不受人瞞底出來道長者也好泥  
酒只向他道泥酒中有箇分曉處急須聽取三處移  
場定是非頑心全不改毫釐胡言漢語憑誰會鐵額  
銅頭也皺眉

靈隱入院上堂孤峰頂上目視雲霄未爲究竟十字街頭和泥合水轉見周遮二途不涉別有生機一路如龍得水似虎靠山把斷要津不通凡聖猶落時人升降處而今坐立儼然見聞不昧箇箇負冲天氣槩人人懷赤水之珠到箇裏如何通信如何受用所以道是法住法位世間相常住如是則山河大地不礙眼光四聖六凡互爲主伴坐見聲和響順萬法無差舉一明三目機鋒兩橫該堅括縱奪臨時且到家一句作麼生道蒲團時倚無餘事永日寥寥賀太平

列祖提綱錄卷第二十二

列祖提綱錄卷第二十三

武林十八澗理安禪寺住持婁東行悅集

拈勅黃法語

開堂祝聖佛事

圓悟勤禪師改昭覺爲崇寧勅黃到開堂拈勅示衆云市地普天皆承恩力九州四海悉稟威靈百千法門中殊特法門無量妙義中真實勝義如今從天降

下不在眼目定動唇吻合開驗在目前一時薦取佛照光禪師開堂捧勅黃示衆天書親自日邊來一道神光徧九垓爲瑞爲祥恩力大直教枯木解花開舉起便知不妨慶快苟或未然重宣一遍  
天目禮禪師住淨慈捧勅黃云九重命下四海同欽山嶽歡呼禽魚起舞且物外道人因甚也被轉却順是者提

捧御香法語

密庵傑禪師奉聖旨開堂賜御香師捧香示衆云中  
天頒降大地蒙熏聚爲光明幢散作香水海輝騰佛日丕贊皇圖天上人間開佛知見

奉聖旨就靈隱開堂賜御香師捧香示衆云御寶親封君王頒賜不是人間薰陸亦非海外旃檀持來價重娑婆熱處爲祥爲瑞光揚佛日仰祝皇圖山河大地發歡喜心蠢動含靈普薰正見

拈劄付法語

楚石琦禪師住本覺拈宣政院劄劄芥投鍼則易轉凡成聖非難不假他求盡在箇裏還見麼更聽知事

宣白

南石琇禪師住報恩剎付激濁揚清扶宗闡教澤廣藏山理能伏豹

住徑山剎付權衡佛祖船筏群生兵隨印轉將逐符行

呆庵莊禪師住雲居拈剎靈山付羈驗在今日佛法遍天下皇恩無盡時

住徑山拈剎者一句子盡大地人受不用盡老僧今日感恩有分

佛朗性禪師住疎山拈剎付國王大臣金城湯池外護何法未舉先知毛吞巨海芥納須彌

住天童拈剎付君心佛心大法綱紀符到奉行草木化被爲如來使當陽宣示

愚庵及禪師再住徑山院剎拈起云前佛性命後佛紀綱總在者裏凜然如朽索之馭六馬危乎猶一髮之引千鈞若非大丞相赤手提持全肩擔荷何處更有今日諸人還委悉麼車不橫推理無曲斷

拈公帖法語

雪巖欽禪師護聖拈帖握乾坤於掌內運日月於胸中雖用係武商君不犯之令與結繩之化元同如何見得半幅全封

楚石琦禪師住福臻行宣政院帖孤峰頂上盤結草菴有口只堪挂壁十字街頭解開布袋入水方見長人因甚麼到恁麼地度帖云只將補袞調羹手撥轉如來正法輪

笑隱訢禪師住集慶拈公帖示衆云一竿竹建精藍隨心具足八十頃布金地當處圓成今日諸官欽奉聖旨具疏敦請開山最初一句如何剖露金輪統御三千界玉曆延洪億萬春

拈護法疏法語

楊岐會禪師興化寺開堂府主龍圖度疏與師師纔接得乃提起云大衆府主龍圖駕部諸官盡爲你諸人說第一義了也諸人還知麼若知家國安寧事同一家若不知曲勞僧正度與表白宣讀且要天下人知

龍門遠禪師天寧開堂當道度疏與師接待示衆云

天不能蓋地不能載泄漏天機言堪愛且道如何  
是堪愛之言良久云分明記取舉似作家遂度與表  
白

眞淨文禪師寶峰開堂日接得左司手中疏乃示衆  
云左司傳授烜赫現前勸潭把呈分明薦取薦與不  
薦却付表白表白接復收云不見道羅網在手縱  
奪臨時非但勸潭如是左司衆官神通變化各各具  
足却度與表白

圓悟勤禪師開堂於知府手中接得疏呈示大衆云  
字字演無量義句句如優曇華佛祖鉗鎚人天標榜  
當陽拈出文彩已彰錦上鋪花請重宣過

開堂判府延康度疏與師師接了云斷盡現成公案  
擲地金聲發明古刹家風耀天光彩出自大手筆顯  
示最上乘正欲四海普聞便請僧正宣過

到南康軍開堂於知府手中接得疏示衆云見麼當  
陽顯示直截現成百千重七通八達一一宗師已  
鼻頭頭向上宗乘直下承當猶較些子苟或未證却  
請僧正重爲敷宣

大慧杲禪師明慶開堂拈疏示衆云留守相公入善  
知衆藝三昧向毛錐子上放大光明不動舌頭演說  
四十二般若波羅密門已竟還信得及麼若信不及  
却請表白重新拈出令未聞者聞未信者信

密庵傑禪師判府度疏與師師接得乃云窮諸玄辯  
若一毫置於太虛竭世樞機到底不離於正念復呈  
起疏召衆云正念生也且道其中事作麼生却煩表  
白宣讀

判府安撫尙書度疏師接呈起云釋迦老子四十九  
年橫說正說說不到處總在箇裏流出包羅萬有囊  
括十虛如是信得皇恩佛恩一時報畢設或未然何  
妨道破

楚石琦禪師住鳳山拈宣政院疏白雲出岫本自無  
心赤水求珠還他箇象萬般存此道一味信前緣  
住光孝拈行宣政院疏變理陰陽旁通造化光輝佛  
日普扇眞風還他大力量人成此大力量事召衆云  
高著眼

笑隱訢禪師住中天竺拈院疏云箇是大丞相親受



靈山記荊底句子付在山僧未聞者聞未見者見了庵欲禪師住靈巖拈院疏權衡在手與奪臨時政化宜流風行草偃

石屋琪禪師拈廣教府疏云老瞿曇二千年前未了底公案拱上座今日就廣教府官手裏與他了却呈疏云所供詣實

月江印禪師住育王拈廣教府疏揮魯陽戈重光佛日廣大教門斯爲第一

筭庵問禪師開堂拈疏寰中天子勅閫外將軍令一語定乾坤衲僧齊乞命

拈府疏自是靈山秉囑願力不忘驚拶相呈甚生光怪迴避不及潛匿無門好風相送處花雨又繽紛拈縣疏一向埋頭雲壑見面何似聞名如今信彩成輝貴在大家知有雲從龍風從虎聽價不聽聲一般是好手

住磬山護法呈疏師接疏云親見親聞言端語的斬新揭露舊彩重輝顯正摧邪揀魔辨異須是箇般人方明箇般語且道是甚麼語維那試宣看

護法疏寸絲尺錦澤媚川輝可知禮也玉轉珠回弘覺志禪師拈疏云把住上大人顯揚丘乙巳全憑者道真言若是箇拈頭識尾底直得毛錐未動前便可知禮也何須文彩全彰後依樣化三千雖然如是手執夜明符幾箇知天曉便請維那宣過

#### 拈方外交疏法語

元叟端禪師方外疏杳杳冥冥其中有精恍恍惚惚其中有物未舉先知底固不在言只者錦標玉軸甚處得來塞却耳根分明聽取

住徑山方外疏言言見諦句句朝宗西天昔日淨名老東土今朝羅蘊公

楚石琇禪師方外交疏一句子無彼此以我爲隱乎吾無隱乎爾

恕中愠禪師方外交疏夫子鼻孔達磨眼睛總在者裏論其根本同出一源較其功德各具八百中間有些子誦訛今古無人道著度疏云殺人刀活人劍

#### 拈山門疏法語

南石琇禪師住靈巖山門疏一句是一句渾不涉文

采信知家裏言自然無內外

山門疏是家裏人設家裏話山茶及時摘蒲鞋趁晴  
曬

山門疏挂眉間劍拋栗棘蓬楊岐妙喜不謀而同

恕中惺惺師住象山靈巖山門疏未入靈巖門諸人

是主山僧是賓既入靈巖門山僧是主諸人是賓且

賓主混融一句作麼生道金香爐下鐵崑崙

了庵欲禪師山門疏有主有賓有酬有唱坐斷舌頭

一椎兩當

住本覺山門疏未入門來有一句子既到者裏半字

全無畢竟如何蘇盧蘇盧

佛朗性禪師山門疏若是家裏人不守淨罏庫百草

頭邊建法幢雲從龍兮風從虎

石屋琪禪師拈山門疏鐺子大小杓柄短長是家裏

事何必論量

弘覺恣禪師山門疏在君曰制在國曰令在使臣曰

符信在山僧曰什麼佛祖聽權衡人天齊乞命

拈諸山疏法語

元叟端禪師住靈隱諸山疏提起云合郡宿德名員  
以此穿天下衲僧鼻孔西天四七出不得東土三三  
出不得

楚石琦禪師兩浙諸山疏真不掩偽曲不藏直落霞  
與孤鶩齊飛秋水共長天一色

拈諸山疏江南北浙西東同中有異異中有同野色  
更無山隔斷天光直與水相通會麼若也不會看取  
下面註脚

南石琇禪師住普門諸山疏習學謂之聞絕學謂之  
隣良久黃河九曲水出崑崙

了庵欲禪師住開諸山疏一佛出世各坐一華接  
影連輝互不相借

拈三宗疏法語

恕中惺惺師住瑞巖拈明州三宗疏祖意教意是同  
是別風范三佛地月朗四明山

佛朗性禪師三宗疏東州賊生薑大洋海底火通紅  
西縣賣皂角須彌頂上浪翻空小人隔壁異俗君子  
千里同風

拈宗利疏法語

佛朗性禪師宗利疏此是京利諸位老和尚送人上樹底梯子畢竟如何判斷復云讚歎渠者亦多罵詈渠者不少知渠俱受俱不受大地山河日杲杲南石琇禪師宗利疏建法幢於帝都扇真風於像運象王回旋獅子奮迅

江湖疏法語

南石琇禪師江湖疏古人道千里同風作麼生是同風句子定光金地遙招手智者江陵暗點頭江湖疏同心之言其臭如蘭龍蛇易辨衲子難顯了庵欲禪師江湖疏鐵心石腸河舌海口贊之則確嘴生華毀之則佛面百醜贊毀不及處面南看北斗佛朗性禪師江湖疏汝恁麼來我恁麼地公論與愛憎同歸第一義楊花霜雪天白鷺恁同戲無文燦禪師江湖疏惡毒相識惡毒呪罵通身是口分疎不下度疏云首座遮掩則箇

指座法語

神鼎遷禪師開堂日指法座云未登此座化緣已畢

諸人還委恁麼若委悉散去得也若不散去不免登於此座入方便品第二去也且不得怪山僧保寧勇禪師開堂日指法座云三世諸佛今古祖師盡在者裏轉大法輪了也却向諸人腳跟下過去還見麼若見眉毛眼睫常放光明若不見看看山僧步入泥入水去也

五祖演禪師海會開堂宣疏了乃云疏帖一時讀了若是具金剛眼睛底何必重說偈言雖然如是事無一向

眞淨文禪師開堂日宣疏罷乃云大通智勝佛十劫坐道場佛法不現前不得成佛道今日四衆圍繞佛法現前還得不得良久云欲行千里一步爲初便登座

宜翁觀禪師蘇州北禪開堂適當九日指法座云胸中一寸灰已冷頭上千莖雪未消老步只宜平地去不知何事又登高遂陞座

請主魏圮丞相聞之擊節不已

雪竇顯禪師住翠峰法座顧視大眾曰若論本分相見不必高升此座乃以手指曰諸人隨山僧手看無

量佛土一時現前各各仔細觀瞻其或涯際未知不免拖泥帶水遂陞座

圓悟勤禪師開堂指法座云三世諸佛於此轉法輪歷代宗師於此提祖印欲行千里一步爲初不免起摸畫樣去也

崇寧開堂指法座云大衆者一條路千聖共知徐行踏斷流水聲縱觀寫出飛禽跡且道如何進步要提無相毗盧印須向千峰頂上行

住蔣山指法座云高高無外深深無際更不作禮須彌燈步步增梯全體是且道是箇什麼看看

住天寧指法座云柔和忍辱衣諸法空爲座旣披此衣必據此座況佛佛祖祖藉此爲梯爲航見麼有條攀條無條攀例

入院指法座云三萬二千獅子座爭及此箇曲豕木坐斷報化佛不涉聞見知揭起鸞嶺高風仰祝南山睿筭還見麼看取令行時

住雲居先就雍熙寺受勅指法座云借雍熙寶座提楊岐金圈直下現成分明薦取還委悉麼金剛正體

露堂堂舉足無非大道場突立毗盧頂額上更於何處禮燈王看看

雲峰悅禪師上藍開堂指法座云還有不受人謾底麼有卽出來推倒禪床喝散大衆然未是作家也且救得一半還有麼良久云旣無人出來山僧今日不惜眉毛不免指鹿爲馬翻日作月去也三十年後莫錯怪人好便升座

龍門遠禪師天寧開堂指法座云古聖道爲法來耶爲床座來耶我爲法來非爲床座師咄云是何言歟大慧杲禪師徑山指法座召大衆云還見麼坐斷古佛路頭潛竄千妖百怪任是須彌燈王也須速禮三拜喝一喝

再住徑山指法座云毗盧頂額人人有志上頭行問著路頭十箇五雙不知去處諸人要識路頭麼良久云看

雪巖欽禪師龍興法座百千佛祖向者裏扇潑天臭氣徧滿娑婆新龍興未免傾湘江之水洗教淨潔去也徧藉轉多

住仰山法座寶鏡高懸寶華散亂固是人人知有且道須彌燈王畢竟說什麼法趨七踏八

唯庵然禪師聖壽指座云進一步高一踏到上頭全身獨露擊手云須彌燈王過那邊去

元叟端禪師中天竺指法座從上老禿奴向者裏轟青天霹靂鼓平地波濤新長老別資一路去也驟步云一二三四五

楚石琦禪師福臻指法座云爲法來耶爲床座耶摩霄俊鶴便合乘時止滌困魚徒勞激浪

住天寧法座靈山堂已爲諸人說法了也還聞麼若不聞未免爲蛇畫足

住本覺指法座陽春白雪唱高和寡村歌社舞到處合得著新本覺今日相席打令去也

呆庵莊禪師雲居指座從上先德推此一位以爲極則莊上座見得只是尋常

恕中愍禪師住瑞巖法座平地上險崖孤峻處平易是古今尋常用底今日終不向者裏依模脫繫瞞汝諸人雖然見之不取千載難忘且坐斷毗盧頂頭一

句作麼生道衆無語乃云泊合放過

愚庵及禪師淨慈指法座云盡十方世界是普光明藏獅子之座諸佛衆生同起同坐因甚山僧今日特地高陞只恐諸人昧其所自

石屋琪禪師指法座云人天寶座曲肱木床我今要坐即便坐更不作禮須彌王便陞座

月江印禪師育王指法座云壁立萬仞不必高陞合水和泥聊通一線

了庵欽禪師住本覺指法座云高步毗盧頂不稟釋迦文是你諸人常行三昧山僧曲順時宜和泥合水去也

佛朗性禪師天童指法座顧視大衆云千機萬機者一機千步萬步者一步坐斷十方獅子吼七通八達向上路喝一喝

笑隱訥禪師住中天竺指法座云坐斷報化佛頭不落玄妙階級寶八布衫雲門念七

住集慶指法座云抹過此土西天坐斷千差萬別就下平高看孔著楔



南石琇禪師住萬壽法座顧視左右云會麼欲提無相毗盧印須向千峰頂上行

住徑山指法座如來座者一切法空是看看平地波濤起

法舟濟禪師天寧開堂指法座云曲条木床寶華王座是恁麼人須恁麼坐喝一喝

天隱修禪師法座前云最初一步踏著須向千峰頂上提持且道是甚麼人行履處高著眼遂陞座

密雲悟禪師開堂指法座云者便是大司理大護法於丁卯秋廬山開先寺撞倒底鐵山今對人天衆前扶起去也還見麼遂陞座

筓庵問禪師指法座云須彌寶座高廣無量無邊由旬拄杖子亦高廣無量無邊由旬且道向甚麼處著足一聲霹靂風雷起

住漏澤指法座云步步登高易從空放下難從空放下有甚麼難步步登高且覓起處不得有條攀條無條攀例

弘覺恣禪師詔住大內萬善殿奉旨開堂指座云兜

率上升天王敷座不見道名稱如來聞十方諸吉祥中最無上昔曾遊此摩尼殿是故此處最吉祥以手指云大衆看看百萬億欄楯階陞百萬億天繒妙寶百萬億香光雲網百萬億殊勝莊嚴一一皆由我皇積劫修行百萬億阿僧祇善根功德所共成就于一念間於此殿中一時顯現了也還見麼遂陞

拈太上皇皇太后后妃皇太子兩宮天眷等香法語

密庵傑禪師拈香此一瓣香恭爲祝延光堯壽聖憲天體道性仁誠德經武緯文太上皇帝聖躬萬歲萬歲萬萬歲恭願堯仁廣被舜德彌新億萬斯年永隆睿筭

拈香此一瓣香恭爲壽聖齊明廣慈太上皇后中宮皇后皇太子皇孫兩宮天眷莊嚴福筭恭願壽山增峻福海彌深同明般若正因共植金剛種智中峰本禪師拈香云此香胚胎萬象化育兩儀仰祝皇太后萬歲皇后齊年太子千秋恭願天同覆地同擎海同涵春同育

弘覺忞禪師拈香云此一瓣香毗藍園裏收來無憂樹下將出爇向爐中奉爲昭聖慈壽恭簡安懿章慶皇太后次及內宮皇后伏願壽同山固福與天齊濬發長祥克昌厥後

拈今上皇帝香法語

眞淨文禪師開堂拈香云此一瓣香恭爲今上皇帝祝延聖壽萬歲萬歲伏願堯風永扇同日月之盛明湯德彌新共乾坤而久固

夢菴信禪師開堂拈香云此一瓣香恭爲今上皇帝祝延聖壽恭願御世比輪王之福統天爲大梵之尊圓悟勤禪師崇寧勅黃到開堂拈香示衆云光吞萬象氣絕諸塵始從撥草瞻風以至入鄺垂手等閒不欲全彰切恐驚群動衆今日拈來奉爲今上皇帝祝嚴聖壽

住夾山拈香云此一瓣香奉爲今上皇帝祝嚴聖壽萬歲萬歲萬歲伏願睿筭等乾坤聖明逾日月龍圖鳳曆彌億萬年玉葉金枝亘百千劫天寧開堂此一瓣香奉爲祝嚴今上皇帝聖壽伏願

金輪長御極寶祚永昌隆拱北極以稱尊空芥城而彌固

開堂拈香云大衆還見麼薰五分法身結五雲瑞彩爇向爐中奉爲祝嚴今上皇帝聖壽萬歲萬歲伏願道齊堯舜德冠羲軒南山壽逾億萬年北極尊亘河沙劫

住金山拈香云此一瓣香奉爲今上皇帝祝嚴聖壽恭願文明齊二曜睿筭等乾坤奪少康復禹跡之功成宣光興漢室之業萬邦歸聖化八表偃干戈

雍熙寺受勅住雲居拈香云虛空世界未分超然馥郁華藏圓融已現特地氤氳戒定慧解脫知見所薰百千億無量殊勝所集爇向爐中上祝今上皇帝聖壽萬歲伏願道德邁昔五帝威靈超前百王聖壽等南山蘿圖齊北極二聖早還玉駕萬國俱賀昇平永息干戈四民樂業

大慧杲禪師徑山開堂拈香云此一瓣香恭爲北闕之至尊上祝南山之萬壽

中峰本禪師開堂拈香云此一瓣香虛空包不住太

地載不起臣僧明本爇向寶爐端爲祝延今上皇帝  
聖躬萬歲萬歲萬歲陛下恭願至聖至明如日如  
月惟福惟壽同地同天

元叟端禪師開堂拈香云此香蟠根錯節在威音王  
佛以前續燄聯芳居迦文世尊之上爇向寶爐端爲  
祝延大元世界主當今皇帝聖躬萬歲萬歲萬歲陛下  
恭願統百億香水海爲一福海永永無窮聚百億須  
彌山爲一壽山巍巍不動

中天竺開堂拈香蘊盤古開天正氣仰之彌高鑽之  
彌堅均伯禹敷土大功涅而不緇磨而不磷爇向寶  
爐端爲祝延大元世界主當今皇帝聖躬萬歲萬歲  
萬萬歲陛下恭願自西自東自南自北咸歸有截之  
區乃聖乃神乃武乃文永享無疆之祚

住徑山拈香云此香蘊唐虞太和根本蕩蕩無能名  
焉協殷周至治馨香繼繼有成功也爇向寶爐恭爲  
大元世界主當今皇帝祝延聖躬萬歲萬歲萬歲  
楚石琦禪師開堂拈香云此一瓣香天上天下世出  
世間並屬照臨皆承恩力爇向爐中端爲祝延今上

皇帝聖躬萬歲萬歲萬歲陛下恭願乃聖乃神乃武乃  
文四海咸歌有道自西自東自南自北八方壽樂無爲  
笑隱訢禪師奉旨開堂拈香云此香全體全用胚臍  
大化之初至貴至尊秀發九天之上價重甄叔迦寶  
芳騰優鉢羅華與物爲春布陽和於大地應時現瑞  
開壽域於八荒爇向寶爐端爲祝延今上皇帝聖躬  
萬歲萬歲萬歲陛下欽願乾元立極景星耀而泰階平  
天曆在躬聖人作而萬物覩與天齊壽萬國來賓  
南石琇禪師住報恩拈香云至尊至貴價重百億須  
彌爲瑞爲祥陰覆大千沙界虔煇寶爐端爲祝延皇  
帝萬歲萬歲萬歲欽願堯仁天廣蕩蕩乎無能名焉湯  
德日新鰥鰥乎不可尙矣本支百世壽考萬年  
住徑山拈香云此香體鍾九五陽剛如金如玉葉覆  
大千沙界爲蒼爲雲名超優鉢曇花價重甄叔迦寶  
煇向寶爐祝延皇帝萬歲萬歲萬歲萬歲欽願壽同百  
億須彌福等三千刹海山如礪河如帶益固皇圖五  
日雨十日風仰歌聖化  
了庵欽禪師開堂拈香云此香結爲寶絲綢散作光

明雲爇向寶爐祝延今上皇帝聖躬萬歲萬歲恭  
願文明齊北極壽筭等南山

弘覺志禪師拈香云此一瓣香不自天生非從人得  
一本諸佛菩薩大慈薰種大悲植根大喜大捨之所  
灌溉滋培大願大力之所暢茂條達然後斷之以金  
剛智斧析之以方便慧刀爇向爐中結而爲蓋則覆  
被大千散而爲雲則潤流沙界端爲祝延今上皇帝  
聖躬萬歲萬歲萬歲伏願功超三后道貫百王舞  
千羽而格有苗八荒順化垂衣裳而朝萬國天下歸  
仁

拈省院臺憲郡縣文武官僚等香法語

神鼎謦禪師開堂日拈香云此一炷香奉爲府主學  
士合郡尊官伏願長光佛日永佐明君

楊岐會禪師開堂日拈香云此一瓣香奉爲知府龍  
圖駕部諸官伏願常居祿位

保寧勇禪師開堂拈香此一瓣香奉爲闔國采僚文  
資武列伏願振謨猷乎遠大流動業以綿長六軍常  
清萬姓永泰

眞淨文禪師開堂日拈香此一瓣香恭爲報寧大檀  
越主特進相公判府左丞伏願舉族享於百祥小大  
增乎善慶更冀特進相公判府左丞兄弟弟長爲  
佛法之壘牆子子孫孫永作皇家之梁棟

此一瓣香奉爲提刑大夫運判朝奉洎文武官僚常  
居祿位然提刑衆官總同二相公夙承佛記示作王  
臣佛法長興外護斯在以因向果皆成佛道

五祖演禪師開堂拈香云此一瓣香奉爲州縣官僚  
伏願乃忠乃孝惟清惟白永作生民父母長爲外護

紀綱

圓悟勤禪師夾山開堂拈香云此一瓣香奉爲權府  
通判朝清檢法在坐尊官諸衙勳貴伏願高遷祿位  
永固壽基

天寧開堂此一瓣香奉爲判府安撫侍講運使中大  
運判檢討提學刪定提舉大夫承受奉御兩廳通判  
大夫在坐勳貴伏願爲風后力牧作稷禹夔臯副具  
瞻則八座三台簡帝心乃鹽梅霖雨

開堂拈香云奉爲判府尚書諸衙勳貴伏願膺一人

簡在副四海具瞻爲周邵甫申作臯夔益禹

住金山拈香云此一瓣香奉爲判府安撫延康通判學士合郡文武官僚伏願位隆盤石功濟維城居方面則魯衛晉齊陟嚴廊則臯夔稷禹

住雲居拈香左僕射相公兩府台佐合朝百辟今日臨筵洪儒碩學諸多勳貴伏願爲霖爲雨爲機爲舟補袞乃仲山和羹卽傳說

開堂此一瓣香奉爲判府府判運使殿撰通判大夫闕郡尊官在筵僚案仍願乃忠乃孝爲國爲民爲聖主之股肱作明時之柱石

龍門遠禪師開堂拈香云此一瓣香奉爲提刑學士權郡承議洎合郡尊官伏願嘉聲藹著善政日新頻承雨露之恩坐聽鹽梅之詔

夢菴信禪師開堂拈香云此一瓣香奉爲知府承議闕郡案僚唯願壽齡堅久福海彌深常爲大國棟梁永作法門衛護

雲居元禪師西塞帥王公詔自以殺業重祈爲澡雪請說法上藍師炷香云此香爲殺人不眨眼上將軍

立地成佛大居士衆稱善詔亦悠然意消

中峰本禪師開堂拈香此香名高列國價重三韓奉爲駙馬太尉藩王廣資福壽伏願劫外乾坤榮金枝於帝苑寰中日月茂玉葉於王庭

### 拈報謝香法語

白雲端禪師開堂日拈香云奉爲過現未來大覺海中普利於含生一切聖賢及生平所參見諸善知識衆古道友曾有一言一句布施我者師僧父母一切恩親咸皆報謝

### 燒懷香法語

以上諸香皆係燒香侍者逐一度上爐嗣法香住持當從懷中拈出自掃爐中

興化獎禪師開堂日拈香云此一炷香本爲三聖師兄三聖師兄爲我太孤便合承嗣大覺大覺爲我太賒我於三聖處會得賓主句若不遇大覺師兄洎合誤却我平生我於大覺處喫棒得見臨濟先師在黃檗處喫棒底道理此一炷香供養我臨濟先師

石門照禪師開堂拈香云西天二十八祖唐土六祖過去聖人盡得傳衣付法至唐代六祖之後得道者如稻麻竹葦不傳其衣只傳其法皆以香爲信今日



一瓣香爲什麼人通信某甲雖不言大眾已委悉  
此一炷香去也

神鼎護禪師開堂日拈香云此香不是戒定慧香亦  
非旃檀沉水只是汝州土宜便燒云供養首山和尚  
以酬法乳

楊岐會禪師開堂日拈香云大眾還知落處麼若也  
不知却爲註破奉酬石霜山慈明禪師法乳之恩山  
僧不免薰天炙地去也便燒

白雲端禪師開堂日拈香云且道爲什麼人若有所  
爲雪上加霜若無所爲過莫大焉奉爲先住楊岐後  
住雲蓋親見慈明來底老古錐誰知道今日向者裏  
拋三放兩去也

眞淨文禪師開堂日拈香云大眾此一瓣香還知落  
處麼更不覆藏直爲先黃龍南禪師蘇向爐中去也  
保寧勇禪師開堂拈香云大眾此一瓣香古今無價  
佛祖不傳且道從什麼處得來還知落處麼若也知得  
祇者裏參見眞善知識若也不知蘇向爐中供養我  
先住楊岐後住雲蓋會和尚

雲峰悅禪師開堂拈香云大眾此一瓣香天不能蓋  
地不能載塵沙諸佛天下老師未敢正眼覷著諸人  
向什麼處摸索然官不容針私通車馬奉爲先翠巖  
芝禪師

五祖演禪師開堂拈香云此一瓣香得來久矣十有  
餘年海上雲遊討一箇冤讐未曾遭遇一到龍舒果  
遇其人方契憤憤之心今日對大眾雪屈須至蘇却  
爲我見住白雲端和尚從教薰天炙地一任穿過蔡  
州有鼻孔底辨取

東山開堂拈香云此一炷香在舒郡二十七年三處  
住院諸人總知遂欲燒復云不得也須說破某十五  
年行脚初參遷和尚得其毛次於四海參見尊宿得  
其皮又到浮山圓鑑老處得其骨後在白雲端和尚  
處得其髓方敢承受與人爲師今日熱向爐中從教  
薰天炙地有耳朶者辨取

圓悟勤禪師住崇寧拈香云此一瓣香不從慈嶺帶  
來亦非胸襟流出在南中見三十餘員尊宿末後撞  
著箇老作家被他一槌擊碎今日對衆說破奉爲現

住新州五祖演和尚以酬法乳

天寧開堂拈香云千佛出興何人酬價威音那畔誰辨燭倪昔年白雲一句下承當今日潭城第三回拈出奉爲新州五祖山第十二代故演禪師以酬法乳開堂拈香云昔年白雲堆裏最初一句截流今日人天衆前箇是四回拈出奉爲新州五祖山第十二代演禪師慈向爐中以酬法乳

龍門遠禪師開堂拈香云此一瓣香還知落處麼欲隱彌露在晦愈明本欲拋擲巖阿混於沙石苦爲諸人敦逼不免細說來由奉爲我先新州黃梅東山演禪師一爐慈却用陪法乳之恩聊表化儀雖然恩大難酬未免拋三放兩

虎丘隆禪師開堂拈香云此一瓣香大有人疑著三十年出一叢林入一保社遇賤則貴遇貴則賤末後撞著箇無面目老子向命脉上一剗不覺從空放下如今不免對衆拈出奉爲現住潤州金山佛果圓悟禪師大和尚用報法乳之恩

大慧杲禪師徑山開堂拈香云此一瓣香戲著則眼

◆打下盤脫瓦字

睛枯瞶著則腦門裂遇貴則價重婆婆遇賤則分文不直今日對人天衆前慈向爐中奉爲成都府昭覺禪寺先圓悟禪師大和尚用酬法乳之恩

再住徑山拈香云此一瓣香在兜率天則曰仙陀婆在善變化天則曰奪意在阿那婆達多池邊則曰蓮華藏且道在徑山手喚作甚麼良久云非但圓悟老人看卽有分便是三世諸佛出來也不敢正眼覷著便燒

應庵華禪師開堂拈香云此一瓣香奉爲先住宣州彰教後住平江虎丘山雲巖禪院隆和尚慈向爐中用酬法乳之恩一任天下衲僧敲轆打

密庵傑禪師開堂拈香云此一瓣香收來久矣欲隱彌露今日人天普集不免從頭說破昔年行脚自江西回擬往四明方抵婺州智者却被旁觀兄弟錯指路頭撞入衢州明果山中見箇老和尚列列挈挈太煞不近人情旣已將錯就錯禮了三拜直至於今悔之不及雖然如是寃有頭債有主慈向爐中供養末後住天童山第十八代應庵大和尚用酬法乳之恩

睹堂遠禪師奉詔住靈隱開堂中使降香祝聖罷拈香曰此一炷香天地莫能覆藏佛眼莫能窺測舉處滅胡種族拈來鈍置殺人累我三十年荒草裏橫身至今一平生作箇不唧噥漢就中有些子訾訛對衆也須說破山僧二十年前被業風吹到岷峨山下荆棘林中撞著箇無孔鐵鎚被他一擊半醉半醒將謂啞却口一生開不得二十年後又被業風吹去濯錦江頭葛藤堆裏逢著箇焦尾白額是時親遭一口直得喪膽亡魂開得口至今受用不盡且道此香爲二十年前提見底知識卽是爲二十年後見底知識卽是一箇不棲雙木一客不煩兩家不見道先行不到末後太過而今賊身已露賊物現前奉爲前成都府昭覺先圓悟禪師大和尚不重他對御談空橫行海上只重他胸中無物肚裏無禪薰向爐中用酬法乳

夢菴信禪師開堂拈香云此一瓣香人天未委得處何來幸有證明徒勞秘惜奉爲我前住楚州勝因戲魚堂靜和尚用酬法乳之恩

高峰妙禪師住天目拈香云此一瓣香不假壺中日

月亦非劫外春風幾番親遭毒手令得八面玲瓏如今放下也地搖六震拈來則塞破虚空且道不拈不放一句又作麼生喝一喝作女人拜薰向爐中供養前住仰山戴角披毛無鼻孔底老和尚用酬法乳之恩

元叟端禪師開堂拈香云大慧師祖道寧以此身代大地衆生受地獄苦終不將佛法當人情徑山先師藏叟和尚一生不肯四天下人縱饒釋迦老子達磨大師到來也須退身有分山僧昔年在侍者寮兩年弄盡機關做盡伎倆直是沒湊泊他處所以知其爲大慧嫡孫今有炷香供養他也要大家證明住天竺拈香云此香讚之則眼瞎耳聾謗之則口啞舌禿三世諸佛六代祖師一時現前也只瞻仰有分奉爲前住徑山臨濟直下第十五世藏叟大和尚一向薰却

無文燦禪師開堂拈香云此香戲著不得捉著不得棄舍不得冷地看來直是好笑大須三十年薰向爐中奉爲前住慶元府阿育王大廣利禪寺笑翁大和

尙用酬法乳之恩

恕中愍禪師開堂拈香云古人出世拈香酬法乳也  
今人出世拈香酬世恩也愍上座總不然昔年行脚  
到紫籜山中參箇老布衲彼亦無法可授我亦無法  
可受只向無授受中拈出供養前住崑山薦嚴禪寺  
竺元道和尙不圖報德酬恩只要大家知委

住瑞巖拈香云此香已是第二回拈出爇向爐中供  
養我前住崑山薦嚴禪寺晚年歸老紫籜峯頭西方  
廣院竺元大和尙用酬法乳之恩然冤家債主自有  
來由今日對人天衆前不妨重爲洗雪一上山僧昔  
年在彼山中咨參者老和尙爲看狗子無佛性話不  
破特去請益纔開口被他一喝直得通身汗下因進  
呈一頌云狗子佛性無春色滿皇都趙州東院裏壁  
上挂葫蘆乃發笑曰恁麼會又爭得可謂前箭猶輕  
後箭深插香云縱有伯牙琴應難寫心曲

西蜀顯禪師初印心于五祖演和尙開堂日乃拈紹  
覺白公香其詞曰一則爐韞功精一則磨淬極妙二  
功並著理孰爲先不見道本重末輕當風可辨此香

奉爲紹覺和尙爇向爐中令教普天匝地填溝塞壑  
使天下衲僧無出氣處

笑隱訢禪師開堂拈香云此香昔年大雄峰頂一句  
下承當今日鳳凰山中五衆前拈出奉爲前住徑山  
後住大仰佛智禪師晦機大和尙用酬法乳之恩

南石琇禪師開堂拈香云非從天上降來不是地中  
湧出三世諸佛莫覓其蹤天下衲僧難識其價還有  
知得落處者麼若也未知奉爲前住萬壽行中大和  
尙一爐炳却未論報德酬恩且要盡大地人咸知氣  
息

鐵關樞禪師開堂拈香云此一瓣香三世諸佛不敢  
酬價六代祖師何曾贖著昔日石門關裏得來今對  
人天衆前拈出奉爲浙西道鎮干山天池興化禪寺  
元翁大和尙用酬法乳之恩

天隱修禪師拈香云慙慙古木林間埋沒白雲堆裏  
向無所得中得來在有修證處不證今日對衆拈出  
供養荊溪龍池山禹門禪院本師大和尙幻有老人  
以酬法乳

湛然澄禪師拈香云正偏挾帶敲唱同時父子相逢  
君臣道合端爲供養北京大覺堂上傳曹洞正宗第  
三十一代清涼慈舟念和尚聊酬法乳之恩

箸菴問禪師磬山開堂拈香二十年前向者裏出二  
十年後向者裏入雖然出入有時其奈初無背向既  
無背向且道出底是入底是不惜眉毛向人天衆前  
燒一瓣香奉爲卽此磬山堂上傳臨濟宗第三十代  
上天下隱先師大和尚以酬法乳

拈香云此一瓣香疑殺天下人不爲過抹殺天下人  
不爲毒昔時有本可據如今徧界不藏任他伶俐仙  
陀誰敢正眼覷著奉爲前住荊谿磬山後住湖州報  
恩上天下隱先師大和尚以酬法乳

嵩乳密禪師拈香云這一瓣香博嶺堂前密移一步  
瀛山書內坐斷同風刀斧斫不開恩深父子外方不  
敢論功歸臣相爇向爐中端爲供養博山堂上無異  
先師大和尚用酬法乳

列祖提綱錄卷第二十三

列祖提綱錄卷第二十四

武林十八澗理安禪寺住持婁東行悅集

白椎後垂語

臨濟玄禪師府主王常侍與諸官請師開堂云山僧  
今日事不獲已曲順人情方登此座若約祖宗門下  
稱揚大事直是開口不得無你措足處山僧此日以  
常侍堅請那隱綱宗還有作家戰將直下展陣開旗  
者麼對衆證據看

道吾真禪師開堂日云便與麼觀得一時著便若論  
玄微見與不見一時敲瞎

在北禪上堂云青山峭峻白日如梭龍門無客鬧市  
人多諸人且道卽今下菜行頭有幾人納稅百姓  
法華舉禪師開堂云夫第一義諦非智辯所詮心機  
所測教外別傳不立文字旣到者裏復且如何直須  
坐斷毗盧不存凡聖還能如是麼若也未能山僧重  
說偈言去也不結毗盧卽那弘古佛心明月照幽谷  
寒濤助夜砧諸人委悉麼各希發問

大愚芝禪師開堂日云還有人委得落處麼若委得



隨機利物應化無方天上人間出沒卷舒縱橫自在若也未委落處釋迦老子三世諸佛二十八祖天下老和尚一時拋在爐中從聽老僧葛藤

慈明圓禪師南源開堂云大眾會麼宜陽秀水南嶽石橋若也不會誤你諸人去也所以道達磨西來教外別傳一句且道別傳箇什麼直指人心見性成佛祇如諸人盡是祖師指出底人還信得及麼若信得及與祖佛同參若信不及可謂自生退屈此日一會不是小緣將一瓣香爲我無得禪師且道諸人還識無得禪師麼若也不識有疑請問

雲峯悅禪師開堂日云祖禪不了殃及子孫事到如今寧容分雪所謂出世利生之事呼爲第一義門但有言說多無實義諸人若也委悉山僧出世事畢其或未然有疑請問

眞淨文禪師開堂日白椎舉師召大眾云當須自覲若此觀者名爲正觀若他觀者名爲邪觀邪正未分有疑請問

聖壽開堂白椎竟良久乃云會麼少室峯前曾示此

高安灘上復誰傳會中若有仙陀客莫學神光廢九年遂喝云有疑請問

報寧開堂白椎竟乃垂一足云大眾爲是一耶二耶良久云上士一決一切了中下多聞多不信有疑請問

白雲端禪師開堂日白椎竟顧視左右云便與麼散去自古自今如麻似粟若言更有如何若何曹溪一路平沉所以從上諸聖皆向火燄裏出來垂手只要一切人眼橫鼻直去今日衆中有大家垂手者麼出來

保寧勇禪師開堂日白椎罷顧衆云委悉麼若不委悉爲蛇畫足去也古佛殿前千華競秀曹溪源上萬派歸流莫有陟巘嶮涉涉瀾者麼不顧危亾便請相見

五祖演禪師四面開堂云若論第一義西天二十八祖唐土六祖立在下風一大藏教白雲萬里摩竭拖室毗耶杜口正在夢中千佛出世寐語未了文殊普賢拗曲作直所以道設使言前薦取猶是滯殼迷封

縱饒句下精通未免觸途狂見若也把定封疆說什麼法堂前草深一丈直得凡聖路絕鳥飛不度天下衲僧無出氣處衆中莫有不甘底麼出來相見  
海會開堂白椎罷乃云金鍤慣將平祖道鐵鞭多力恨無警莫有不顧危亾底衲僧麼出來相見

東山開堂白椎罷乃云當觀第一義寶劍霜鋒利掣電隔三千最勝無倫譬眼辨手能親出來相比試

雪竇顯禪師萬壽開堂白椎了師云宗乘一唱三藏絕詮祖令當行十方坐斷其有達士不避死生眨上眉毛出衆相見

住雪竇開堂白椎了乃云如來正法眼藏委在今日放行則瓦礫生光把定則眞金失色權柄在手殺活臨時其有作者共相證據

龍門遠禪師開堂曰白椎罷乃云觀卽不一一卽不觀第一義門今在何所

圓悟勤禪師崇寧開堂白椎竟乃云駕千鈞弩一擊便行射透鐵圍不容擬議一言之下殺活全彰寸機之中包括群象直須當頭點破可以千眼頓開更若

四顧躊躇便見撈天摸地有構得底出衆相見  
夾山入院開堂云野猿抱子歸青嶂幽鳥啼花過碧巖此地昔年曾作客今茲爲主愧無慙衆中還有辯得賓主底衲僧麼

入院開堂云炎炎伏暑離青嶂肅肅清秋渡碧湘古殿耽耽松檜密無塵金地足清涼既到者裏還有本色衲僧麼出來共相證明

住雲居先於南康軍開堂白椎竟乃云包融萬有聲振大千乃佛乃祖頂門開若天若人方寸濶便怎麼薦得不妨省要苟或踟躕落在第二義門去也還有箭鋒相拄底衲僧麼出來共相激揚

虎丘隆禪師住開聖白椎竟乃云垂鈎四海祇釣鯨鯨離鈎三寸莫有道得底出來道看

大慧杲禪師住徑山白椎竟乃云諸方舊例今古常儀直饒千佛世尊次第出世陞于此座末上也少者一杓惡水不得莫有回避得底麼出來證據

應庵華禪師明果入院開堂白椎竟乃云證第一義諦空名獅子吼獅子既吼狐狼屏迹異類潛蹤真有

共相出手底麼出來相見

住蔣山白椎罷乃云若論第一義如紅爐上一點雪相似若也聽不出聲見不超色何妨出衆決疑

密庵傑禪師靈隱開堂白椎竟乃云正令已行千差削跡佛佛從茲授手祖祖於是相傳恁麼會得便乃高揖釋迦不拜彌勒其或尙留觀聽何坊致問

住靈隱白椎竟乃云第一義諦空洞無象表裏一如佛及衆生盡爲增語且作麼生觀若有心觀屬妄想無心觀屬斷見不有不無心觀顛預佛性莫有具透關眼底衲僧出來大家擎展

了覺圓禪師開堂上首白椎竟師良久曰直饒阿那律天眼未解諦觀便是千手大悲焉能提掇衆中莫有不甘者麼出來掀倒禪床喝散大衆然雖如是未是作家且於第二門中與衲僧出氣

金山惟仲禪師開堂上首白椎竟師顧左右曰還會麼獅子奮迅象王回旋於斯明得不妨省力其或不然有疑請問

上方益禪師開堂上首白椎罷師曰白椎前觀一

又

成白椎後觀二又不是到者裏任是鐵眼銅睛也須百雜碎莫有不避危亾底衲僧試出來看

元叟端禪師住鳳山開堂云拈一機則千機萬機頓赴如刻人糞作旃檀香舉一句則千句萬句朝宗似持蠶蠶量大海水莫有淨裸裸赤洒洒獨脫無依底麼出來共相證據

恕中愠禪師住瑞巖白椎竟乃云諸佛出世是第二頭祖師西來是第三首饒你向威音那畔別立生涯百草頭邊全明殺活布袋裏老鴿子未知有出身一路在作麼生是出身一路

楚石琦禪師住福臻白椎竟乃云早是第二義了也餉間便是第三義然當爐不避火迸新長老今日性命在諸人手裏一任橫拖倒拽重賞之下必有勇夫有麼有麼

住鳳山開堂云寶印當空妙重重錦縫開不費纖毫力提掇鳳山來放行則萬象回春把住則千峰寒色且道把住好放行好試出來道看

本覺開堂云現成公案不用安排無孔鐵鎚有什麼

限稍知觸淨便好商量

光孝開堂云言迹之興異途之所由生直截根源底出衆相見

鐵關樞禪師普載開堂云火雲燒碧空長街水片片具眼底衲僧何妨出見

笑隱訢禪師集慶閉堂白椎罷乃云第一義諦明如杲日寬若太虛萬彙森然纖塵不立明今學古無非節外生枝立主立賓何異虛空釘橛然聖旨建寺諸官臨筵不可只恁麼休去還有共相激揚底麼

南石琇禪師住靈巖白椎竟乃云龍象圍繞燈燭煒煌一會靈山儼然未散還有共相證據者麼

住徑山白椎竟乃云學不顧卽差互擬思量何劫悟還有超然獨脫不落此轍者麼

月江印禪師住育王開堂云若論第一義諦譬如虛空體非群相而不拒彼諸相發揮莫有向虛空裏釘橛者麼

### 未入院當道請就別開堂提綱

大愚芝禪師筠州府主李密諫請就上臺開堂問答

畢乃云問話且止山僧道薄人微素無德行叨承密諫諸官僚同伸堅請陞於此座上答皇恩國祚永安法輪常轉且道法輪作麼生轉欲得會麼須彌山上倒懸身却來堂中疊足坐阿呵呵是什麼飯糲裏坐却受餓和泥合水與麼過上七聞之熙熙下士聞之肯可子細思量却成口過要會麼一六三四二直言曲七一桃李火中開黃昏候日出久立尊官伏惟珍重

楊岐會禪師興化寺開堂若有問話者請出來諸供養中法供養最勝若據祖宗令下祖佛潛踪天下黠黑豈容諸人在者裏立地更待山僧開兩片皮雖然如是且向第二機中說些葛藤繁興大用畢必全真既立名真非離真而立立處卽真者裏須會當處發生隨處解脫此喚作鬧市裏上竿子是人總見你道金不博金一句且作麼生道還有人道得麼試出來踏跳看如無山僧今日失利但某此際榮幸伏遇知府龍圖通判駕部泊諸官僚請住雲蓋道場可謂諸官願弘深廣爲國忠臣建立法幢上嚴帝祚然願諸

官壽齊山嶽永佐明君作大股肱爲佛施主諸院尊  
宿在會信心世生生共營大事久立珍重

雲峰悅禪師赴翠巖師在上藍開堂問答畢乃云問  
話且止佛法正論非競辨而可求擊揚鏗鏘以摧異  
學諸祖之道豈其然乎所以一大藏教不能自詮十  
方諸佛不能提唱輝騰今古迥絕見知圓滿十虛寧  
有方所只爲情生智隔想變體殊雖終日行而不自  
覺是似勞他先聖回首塵勞曲開方便方便卽有還  
證明得麼若也證明得便能隨機利物應化無方出  
沒卷舒人間天上雖然如是卽不得向衲僧門下何  
故笑破他口

同悟勤禪師奉勅赴雲居到南康軍當道先請開堂  
以祖佛爲標準與祖佛作師以人天爲梯航與人天  
作眼忽若不倚一物孤迥迥峭嶮巍千聖莫能知萬  
靈沒照鑑截斷一切不涉廉纖把斷世界不漏絲髮  
人天衆前如何剖露若向箇裏上絕攀仰下絕已躬  
等閒如金翅鳥劈海直取龍吞似獅子兒出窟妖狐  
絕跡當鋒略露不免道箇山是山水是水僧是僧俗

是俗開慈悲方便門留通途受用底忽若轉山不是  
山水不是水僧不是僧俗不是俗到箇裏還有出身  
處麼若有出身處便可以高揖釋迦不拜彌勒坐斷  
毗盧頂不稟釋迦文束虛空作拄杖也打他不得合  
百千萬聚雷作一喝也驚他不動且道此人畢竟如  
何親近只如今各各當陽不肯不向不立一絲毫頭  
解路不作一纖塵機關正當恁麼時把斷乾坤一句  
作麼生道鷗弓已挂狼煙息萬國謠謠賀太平復云  
龍床角頭親賜得天上雲居古道場安樂樹邊藏拙  
訥更無佛法可商量旣無佛法却舉箇古人公案記  
得神鼎山護禪師開堂示衆云山僧行脚也無正因  
只待向東京城裏聽一兩本經論於古寺閒房且恁  
麼過時不謂行到汝州葉縣被一陣葉風吹到首山  
曲桑木床上見箇老和尚當時把不住禮却他三拜  
直至如今悔之不得師云耆老漢參到生鐵鑄就處  
窮到無絲毫解路時所以向鐵壁銀山斬釘截鐵若  
不知有向上宗乘爭解與麼道然雖如是檢點將來  
二祖少林也禮三拜忽若水乳不分金鎗不辨有條



攀條無條攀例山僧元豐末年爲著箇祖師西來  
意十數載江表逢見大善知識便投誠咨參玄妙理  
性棒喝機關直是費盡工夫終無箇休歇去處及到  
海會遇見箇老和尚被他腦後一槌從此喪却目前  
橫去却胸中物直至如今也分疎不下且道與古人  
是同是別還委悉麼羚羊挂角千峰外更有羚羊在  
上峰

大慧杲禪師紹興七年赴徑山七月二十一日於臨  
安府明慶開堂拈香祝聖垂語問答畢復有數僧競  
出師乃約住云假使大地草木盡抹爲塵一一塵有  
一一口一一口具無礙廣長舌相一一舌相出無量  
差別音聲一一音聲發無量差別言詞一一言詞有  
無量差別妙義如上塵數諸僧各具如是口如是  
舌如是音聲如是言詞如是妙義同時致百千問難  
問問各別不消徑山長老咳嗽一聲一時答了乘時  
於其中間作無量無邊廣大佛事一一佛事周備法  
界所謂一毛現神變一切佛同說經於無量劫不得  
其邊際便怎麼去鬧熱門庭即得若以正眼觀之正

是業識茫茫無本可據祖師門下一點也用不著況  
復鉤章棘句展露鋒鋒非唯埋沒從上宗乘亦乃笑  
被衲僧鼻孔所以道毫釐繫念三途業因瞥爾情生  
萬劫羈鎖聖凡號盡是虛聲殊相劣形皆爲幻色  
汝欲求之得無累乎及其厭之又成大患看他先德  
怎麼告報如國家兵器不得已而用之本分事上亦  
無者箇消息山僧今日如斯舉唱大似無夢說夢好  
肉剜瘡檢點將來合喫拄杖只今莫有下得毒手者  
麼若有堪報不報之恩共助無爲之化如無倒行此  
令去也巖拈拄杖云橫按鎔鄒全正令太平寰宇斬  
癡頑卓一下喝一喝復舉王常侍一日訪臨濟同到  
僧堂內常侍曰者一堂僧還看經否臨濟曰不看經  
常侍曰學禪否臨濟曰不學禪常侍曰經又不看禪  
又不學畢竟作甚麼臨濟曰總教伊成佛作祖去常  
侍曰金屑雖貴落眼成翳又作麼生臨濟曰我將謂  
你是箇俗漢師云臨濟老漢握一柄金剛王寶劍氣  
衝宇宙天下橫行等閒被者官人輕輕一撈便見水  
消瓦解且道者官人有甚長處聽取一頌世出世間

希有事顯發須憑過量人只將補袞調羹手撥轉如來正法輪久立衆慈伏惟珍重

師紹興二十六年赴育王十一月二十三日於明州報恩光孝禪寺開堂宣疏拈香祝聖白椎垂語問答罷乃云佛法要妙離言說相離文字相離心緣相不可以有心求不可以無心得不可以語言造不可以寂默通如塗毒鼓聞著則腦門百裂似猛火聚近之則燎却面門實謂壁立萬仞勦絕聖凡假使智如鶩子辨若維摩與三世諸佛同時出來也須入地三尺有如是自在有如是威神只許老胡知不許老胡會到者裏如何啓口然官不容針私通車馬放一線道却有商量焉拈拄杖卓一下云還聞麼一切障礙即究竟覺得念失念無非解脫成法破法皆名涅槃智慧愚癡通爲般若又卓一下云太陽溢目萬里不挂片雲古佛與露柱相交新羅共占波鬪額即不問汝諸人只如馬祖道即心是佛作麼生商量還委悉麼太平本是將軍致却許將軍見太平復卓一下復舉西天國王問波羅提尊者曰我欲作佛不知何者是

佛尊者曰見性是佛王曰師見性否尊者曰我見佛性王曰性在何處尊者曰性在作用王曰是何作用我今不見尊者曰今現作用王自不見王曰於我有否尊者曰王若作用無有不是王若不用體亦難見王曰若當用時幾處出現尊者曰若出現時當有其八王曰八處佛性當爲我說尊者曰在胎曰身處世名人在眼曰見在耳曰聞在鼻辯香在舌談論在手執捉在足運奔徧現俱該沙界收攝在一微塵識者知是佛性不識喚作精魂王問是言心即開悟師云敢問法筵大衆且道西天國王悟得佛性耶悟得精魂耶若道在八處悟得只是精魂若離八處却喚甚麼作佛性於斯薦得皇恩佛恩一時報足若薦不得育王今日爲諸人下箇註腳良久云鸞鷟麒麟俱是瑞旃檀薔薇一般香天童和尚再白槌云諦觀法王法法王法如是師召大衆云記取天童和尚語師又於明州育王受敕再住徑山到臨安景德靈隱寺開堂問答罷乃云問話且止縱饒問處如百川競注答處似巨海吞流直得維摩結舌驚子無言於本

分事上了無交涉且道本分事上合作麼生提持乃  
與拂子云還見麼又擊禪床云還聞麼聞見分明是  
箇甚麼當今聖主於此得之以妙明心印印十方華  
藏世界海只在一塵中於一塵中垂衣治化演出無  
量無邊廣大如虛空不可思議殊勝功德益利法界  
一切有情所謂聖壽廣大如虛空不可思議聖量廣  
大如虛空不可思議聖德廣大如虛空不可思議聖  
學廣大如虛空不可思議乃至聖智聖慧聖慈聖聰  
皆悉廣大如虛空不可思議只者不可思議底亦不  
可思議都盧只在一塵中皆聖心之常分非假於他  
術滿朝文武諸貴官得之以妙明心印向各各當人  
脚跟下一印印定更無秋毫以爲透漏所謂王事民  
事一一明了一一無差然後卷舒自在縱奪臨時皆  
吾心之常分非假於他術今日一會若僧若俗若男  
若女若貴若賤得之各以妙明心印印之則隨其根  
性悉得受用一一明了一一無差皆吾心之常分非  
假於他術且道徑山長老得之又作麼生還相委悉  
麼惟憑一滴曹溪水徧界爲霖報吾皇即將上來舉

揚般若所有一毫之善祝延今上皇帝聖壽無疆恭  
願堯仁廣被齊日月之盛明湯德彌新竝乾坤之久  
固皇太后中宮皇后大內天眷伏願同明般若正因  
悉獲金剛種智復學波斯匿王問佛勝義諦中還有  
世俗諦否若言其有智不應一若言其無智不應二  
一二之義其義云何佛言大王汝於過去龍光佛所  
曾問此義我今無說汝亦無聞無說無聞是名一義  
二義師召大眾云明明向道尙自不會豈況蓋覆將  
來今日或有人問徑山勝義諦中還有世俗諦否若  
言其有智不應一若言其無智不應二一二之義其  
義云何只向他道元首明哉股肱良哉是名一義亦  
名二義正當恁麼時還有向上事也無良久云任大  
也須從地起更高爭柰有天何久立衆慈伏惟珍重  
入院後當請開堂提綱

臨濟玄禪師府主王常侍與諸官請師開堂問答畢  
乃云此日法筵爲一大事故更有問話者麼速致問  
來你纔開口早勿交涉也何以如此不見釋尊云法  
離文字不屬因不在緣故爲你信不及所以今日葛

藤忍滯常侍與諸官員咏他佛性不如且退喝一喝  
云少信根人終無了日久立珍重

雲門偃禪師廣主命師出世靈樹開堂曰莫道今日  
謾諸人好抑不得已向諸人前作一場狼籍忽遇明  
眼人見成一場笑具如今避不得已且問你諸人從  
上來有甚事欠少甚麼向你道無事已是相埋沒也  
雖然如是也須到者田地始得亦莫逞口快亂問自  
己心裏黑漫漫地明朝後日大有事在你若根思遲  
回且向古人建化門庭東觀西觀看是箇甚麼道理  
你欲得會麼都緣是你自家無量劫來妄想濃厚一  
期間人說著便生疑心問佛問法問向上向下求覓  
解會轉沒交涉擬心即差況復有言有句莫是不擬  
心是麼莫錯會好更有甚麼事珍重

清涼益禪師初開堂日中坐茶筵未起四衆先圍遶  
法座時僧正白師曰四衆已圍繞和尚法座了師曰  
衆人却參眞善知識少頃升座大衆禮請訖師謂衆  
曰衆人既盡在此山僧不可無言與大衆學一古人  
方便珍重便下座

神鼎誼禪師開堂云齋會已具僧俗已集問答已畢  
佛法成辦只將此著上祝今上皇帝聖壽無疆便下  
座

白雲端禪師云昔日靈山會上世尊拈花迦葉微笑  
世尊道吾有正法眼藏分付摩訶大迦葉次第流傳  
毋令斷絕至於今日大衆若是正法眼藏釋迦老子  
自無分將什麼分付將什麼流傳諸人分上各各自  
有正法眼藏每日起來是是非非分南道北種種施  
爲盡是正法眼藏之光影此眼開時乾坤大地日月  
星辰森羅萬象祇在目前不見有毫釐之相此眼未  
開時盡在諸人眼睛裏已開者不在此限未開者山  
僧不惜手爲諸人開此法眼藏看乃豎起兩指云看  
看若見得事同一家其或未然不免重說偈言諸人  
法眼藏千聖莫能當爲君通一線光輝滿大唐須彌  
走入海六月降嚴霜法華恁麼道無句得商量既滿  
口說了爲什麼無句得商量喝一喝云分身兩處看  
海會開堂云善言者言所不能言善跡跡者跡所  
不能跡每日開口動舌無非是言作麼生說箇言所

不能言既喚作言卽便是跡作麼生說箇跡所不能跡到者裏一大藏教用一點不著到者裏一大藏教字字用得著爲什麼先用不著後又却用得著且道諸訛在什麼處不見道千峰勢到嶽邊止萬派聲歸海上消自古自今向其間鑽仰者如稻麻竹葦實端的透徹者百中無一二若果然透得十二時中不妨慶快應機接物利樂有情盡乾坤星辰日月盡大地草木叢林都作一箇出入遊戲之場古者道玉轉珠迴佛祖言精通猶是汚心田老盧祇解長春米何得黃梅萬古傳山僧在庵中亦有示徒直下雖然沒許般透如未盡活還難海門昨夜狂風起無限波瀾一掃乾恁麼地先與人開却路然後兩手援向人前伶俐底不用絲毫氣力便提得去還有麼若提不去敢問諸人十二時中應用施爲分賢別愚是是非非是箇什麼

保寧勇禪師開堂云問答已周何不散去既不然者更引些葛藤向淨地上作一場狼藉去也正法眼藏亘古亘今祖祖密傳印印相可語言路絕思慮情忘

一切群生各具斯事然難信之法措者還稀上上之機方能湊泊若湊泊得去便與三世佛祖有情無情悉皆同參無自無他非前非後有何生死可出佛道可成不假多劫修行彈指悉皆具足行住坐臥任運施爲見聞覺知隨緣應用睡來合眼飯來開口寒卽向火熱卽取涼既到者箇平實田地匹上不足匹下有餘若是祖宗門下客直須向火燄裏藏身微塵裏走馬東涌西沒同死同生爍迦羅眼不能窺千手大悲把不住裂破毗盧印掃盡衲僧蹤雖然雖如是劍閣路危終易度趙州關險大難行但仁勇生而且味長又寡聞雖挹宗機擬終深數比奉知府龍圖特垂台命闔府采僚同賜僉俞命某繼此道場實增忝幸敢將上善仰延宸筭傍祝府僚伏願知府龍圖早陞陞闕榮陟鼎槐運使郎中亟聞漕最殊被帝恩運判都官英聲遐播清職驟躋通判駕部闔府采僚理狀彌光亨衢驟進更願今辰席上外府尊官永心腹於王家常眷隆於釋寶又承僧職大師蔭山清涼和尚同垂象駕共建法筵諸多檀越惟願常臻福慶永貫佛



乘復云大化無爲道太平閭浮日月轉分明豐年野  
老謳謠甚在處嘉禾合穗生久坐尊官伏惟珍重

五祖演禪師四面山開堂日更有問話者麼若無雙  
泉今日向第二義門放一線道與諸人相見和泥合  
水一上且要釋迦彌勒動地雨花文殊普賢觀音勢  
至各臨一方助佛揚化皆務本事器量堪任雙泉不  
免也八一分共說東家杓柄長西家杓柄短任從春  
草青青炎光燦燦秋樹葉零冬冰片薄何故如是且  
要諸人順時保愛復拈起拄杖二古人道拈起也天  
回地轉放下也草偃風行四面卽不然拈起也七穿  
八穴放下也錦上鋪花且道還有爲人處也無良久  
云來年更有新條在惱亂春風卒未休

黃梅東山開堂日適四祖師叔白鵝云當觀第一義  
只如第一義且作麼生觀要會麼三世諸佛若無第  
一義將什麼化度有情西天四七唐土二三乃至天  
下老和尚若無第一義將什麼建立宗風只如當今  
聖帝若無第一義將什麼統御天下知郡學士知縣  
宣德合座尊官若無第一義將什麼爲民父母乃至

在會施主若無第一義將什麼崇敬三寶然雖如是  
也須各各自悟始得

雪竇顯禪師雪竇開堂云人天曾集合發明箇什麼  
事焉可互分賓主馳騁問答便當宗乘去廣大門風  
威德自在輝騰今古把定乾坤千聖只言自知五乘  
莫能建立所以聲前悟旨猶迷顧鑑之端言不知宗  
尚味情識之表諸人要知真實相爲但以上無攀仰  
下絕已躬自然常光現前箇箇壁立千仞還辯明得  
也無未辯辯取未明明取既辯明得能截生死流同  
踞祖佛位妙圓超悟正在此時堪報不報之恩以助  
無爲之化

雲峰悅禪師法輪開堂日且住具住大象旣消希音  
杳絕旁通實化開拓權門於是三藏五乘對機設教  
猶國家兵器不得已而用之爾後達磨西來單傳心  
印一花五葉分布寰中大似持顰作啞何故況你諸  
人各有一段事耀古騰今通廓等於太虛明淨同乎  
皎鏡現在可驗固是瞞人眼不得且何者是諸人眼  
還驗得麼若也驗得塵沙諸佛三乘十二分教六代

祖師天下老和尚盡向諸人眼裏百雜碎若驗不得  
前是案山後是主山復云此日一會固非小緣匝地  
普天孰不欣慶更不敢祝贊皇風回向諸僚何故古  
人道吾禱久矣豈況當今聖主賢臣者哉久立大眾  
伏惟珍重

上方益禪師開堂日問答罷左右顧視云黃面老周  
行七步脚跟下正好一錐碧眼胡兀坐九年頂門上  
可惜一割當時若有箇爲衆竭力底衲僧下得者毒  
手也免得拈花微笑空破面顏立雪齊腰翻成轍迹  
自此將錯就錯相襲打簍遂有五葉芬芳千燈續燄  
向曲象木上唱二作三於榔栗杖頭指南爲北直得  
進前退後有問法問心之徒倚門傍牆有覓佛覓祖  
底漢庭前指栢便喚作祖意西來日裏看山更錯認  
學人自己殊不知此一大事本自靈明盡未來際未  
嘗間斷不假修證豈在思惟雖鷲子有所不知非滿  
慈之所能辯不見馬祖一喝百丈三日耳璽寶壽令  
行鎮州一城眼瞎大機大用如迅雷不可停一喝一  
提似斷崖不可履正當恁麼時三世諸佛祇可旁觀

六代祖師證明有分大眾且道今日還有證明底麼  
良久云剗

眞淨文禪師聖壽開堂日問答畢乃云問話且止祇  
知問佛問法殊不知佛法來處且道從甚麼處來乃  
垂下一足云昔日黃龍親行此令十方諸佛無敢違  
者諸代祖師一切聖賢無敢越者無量法門一切妙  
義天下老和尚舌頭始終一印無敢異者無異卽且  
止印在什麼處還見麼若見非僧非俗無偏無黨一  
分付若不見而我自收遂收足乃喝云兵隨印轉  
將逐符行佛手驢脚生緣老好痛與三十棒而今會  
中莫有不甘者麼若有不妨奇特若無新長老謾你  
諸人去也故我大覺世尊昔日於摩竭陁國十二月  
八日明星現時豁然悟道大地有情一時成佛今有  
釋子沙門克文於東震旦國大宋筠陽城中六月十  
三日赫日現時又悟箇甚麼以拂子畫一畫云我不  
敢輕於汝等汝等皆當作佛下座

保寧開堂日欲議佛性義當觀時節因緣時節既至  
因緣自會大眾今日一會要知麼是大衆成佛時節

淨緣際會大丞相荊國公及判府左丞施宅舍園林  
爲佛刹禪門固請大善知識開演西來祖道所以教  
外別傳直指大衆卽心見性成佛大衆信得及麼若  
自信得及卽知自性本來作佛縱有未信亦當成佛  
但爲迷來日久一乍聞說誠難取信以至古今天下  
善知識一切禪道一切語言亦是善知識自佛性中  
流出建立而流出者是末佛性是本近代佛法可傷  
多棄本逐末背正投邪但認古人一切言句爲禪爲  
道有甚干涉直是達磨西來亦無禪可傳惟只要大  
衆自悟自成佛自建立一切禪道況神通變化衆生  
本自具足不假外求如今人多是外求蓋根本自無  
所悟一向客作數他人珍寶都是虛妄終不免生死  
流轉大衆今二相公特建此大道場作大佛事出大  
衆生死流轉復大衆本來廣大寂滅妙心開發本來  
神通大光明正法眼藏但迷則長居凡下悟則卽今  
聖賢大衆言多去道轉遠笑他明眼進人衆中莫有  
明眼道人麼今時佛法混濫要分邪正使大衆不墮  
邪見作人天正眼有麼良久云我終不敢輕於汝等

汝等皆當作佛下座

圓悟勤禪師蔣山開堂云曠劫來事只在如今威音  
那邊全歸掌握頭頭物物成現明明了了無差獨用  
宏機全提祖卽設使奮逸群作略施竭世樞機未免  
節外生枝水中捉月所以諸佛出世罕遇作家祖師  
西來承虛接響向上一路千聖不傳學者勞形如猿  
捉影到者裏不拘格式不躡前蹤不昧當機如何舉  
唱明眼漢沒窠臼本分事絕羅籠幸遇帝道平平皇  
風蕩蕩祝嚴聖壽爲國開堂台旃光臨皇華作證鐘  
山頂上寶公塔前八字打開分明顯示去遂拈起拄  
杖云還見麼諸佛構不著祖師提不起千日竝照萬  
鏡臨臺不隔纖毫當陽薦取且不涉諸緣一句作麼  
生道八方霹靂無爲化萬國謠謠樂太平  
東京天寧開堂日問答畢乃云問話且止大衆秘密  
妙嚴深機莫能考究淨圓超證諸聖無以擬倫靈山  
單傳正音少室密付的旨洞明如果日寬曠若虛空  
把斷諸法無遺蔭覆群靈有作頂門上如如不動脚  
跟下了了常知今朝幸遇祝聖開堂對衆分明剖露

遂拈拄杖卓一下云大衆還知落麼諸佛心髓祖  
師淵源十成八字打開徧界全彰勝相纖洪長短黑  
白方圓一一絕羅籠處處無回互澄澄湛湛密密堂  
堂無深可深無妙可妙是故佛佛授手惟授此心祖  
祖相傳惟傳此妙上根種智略請回光可以千眼頓  
開可以萬緣透脫豈不見阿難問迦葉世尊傳金襴  
外別傳何物迦葉召阿難阿難應諾迦葉云倒却門  
前刹竿著三要印開十方通透直得王舍城裏萬壽  
堂前瑞氣凝九重祥光朝鳳闕一一發揮正法眼藏  
傳持涅槃妙心了也且當陽不昧一句作麼生道太  
平瑞氣無邊表航海梯山仰聖朝以此開堂一毫善  
利上祝今上皇帝聖壽伏願金輪永固寶祚殊昌四  
海樂文明萬邦陶至化復舉昔有僧問投子如何是  
一大事因緣投子云尹司空與老僧開堂師云投子  
古佛叢林中推其得逸群之辯得樸實頭道用看其  
等閒拈掇不妨世法佛法打成一片雖然如是惜其  
不甚寬廓今日忽有人問天寧如何是一大事因緣  
卽對他道手握金輪清四海聖躬彌億萬斯年

金山開堂大道絕中邊至真離言說諸佛莫能提祖  
師莫能傳透聲透色絕遮欄蓋地蓋天無向背豈止  
棒頭取證喝下承當直饒千眼頓開未免依草附木  
到者裏要須是鍼劑不入風吹不到把斷要津不遁  
凡聖底始得是故靈山會上廣額屠兒放下屠刀云  
我是千佛一數大集會中大力魔王云待一切衆生  
盡皆成佛了然後發菩提心豈不是龍象蹴踏獅子  
嚙啞敵勝驚群蘊大丈夫意氣始可承當擔荷所以  
道殺人不眨眼底立地成佛立地成佛底殺人不眨  
眼還他過量人提持過量智發明過量機展演過量  
用正當恁麼時向過量境界中作麼生道還知麼仰  
祝聖君無量壽河清海晏樂昇平

密庵傑禪師烏巨開堂上堂祖師心印狀似鐵牛之  
機去則印住住則印破森羅萬象明暗色空情與無  
情一印印定更無絲毫透漏更無絲毫走作更無絲  
毫起滅更無絲毫動搖如金博金似水洗水了絕異  
緣迥超諸有以此壽聖人則天長地久以此祝賢守  
則伊尹周公以此安樂生民以此康福天下以此播

揚大教以此扶豎正宗雖然如是且道印子卽今在什麼處良久擊拂子云鵬弓高挂狼煙息萬國訶謠樂太平復舉保壽開堂公案師云二尊宿美則美矣若要扶臨濟正宗俱各欠一頓棒在且道那裏是他欠處具擇法眼者試定當看

中峯希聲禪師開堂雲生大野霧鎖長空三草二木悉歸獅子吼露滴庭莎盡稱無邊妙相猿啼鳥噪皆談不二圓音乃拈拄杖曰無邊妙義盡在山僧拄杖頭上若也會得可謂應時應節若不會萬年松在祝融峯卓一下

別峯寶印禪師開堂陞座云世尊初成正覺於鹿野苑中轉四諦法輪憍陳如比丘最初悟道後來眞淨禪師初住洞山拈云今日新豐洞裏祇轉箇拄杖子遂拈拄杖著左邊云還有最初悟道者麼若無丈夫自有衝天志莫向如來行處行遂喝一喝下座若是印上座則不然今日向鳳凰山裏初無工夫轉四諦法輪亦無氣力轉拄杖子祇教諸人行須緩步語要低聲何故欲得不招無間業莫謗如來正法輪

獅子端禪師章丞相子厚請開堂陞座俞秀老撰疏叙師生平事跡曰推倒回頭趨翻不托七軸之蓮經未誦一聲之漁父先聞師聽僧官宣至此以手耶揄曰止止乃坐引聲吟曰本是瀟湘一釣客自東自西自南北大衆雜然稱善師顧衆笑云我觀法王法法王法如是下座

玉泉皓禪師因張無盡請開堂曰衆官畢集師陞座顧視大衆曰君不見良久又云君不見張操蜀音曰和尚見皓應聲曰但得相公見便了下座

雲居祐禪師開堂問答罷乃曰新啓法筵人天會集稀逢難遇正在此時還更有乘時適變底衲僧麼出來與汝證據良久曰不出頭者是好手雖然如是道林今日已向平地上喫交了也賴遇金粟大士有不二法門放一線道道林方解開布袋頭足可以施展家風向無佛處稱尊便乃指點三界目視四維偃仰堯天高歌舜日舉音王調唱菩薩蠻奏沒絃琴含太古意當是時文殊休惆悵普賢謾沉吟任是千聖出頭異口同音也不消一剎久立珍重



佛心才禪師開堂示衆曰百千三昧門無量福德藏  
放行也如開武庫錯落交輝把住也似雪覆蘆花通  
身莫辯使見之者掾起便行聞之者單刀直入箇箇  
具頂門正眼人人懸肘後靈符拂佛祖見知作叢林  
殃害憶得寶壽開堂日三聖推出一僧寶壽便打三  
聖云與麼爲人瞎却鎮州一城人眼去在且如乾元  
今日開堂或有僧出來山僧亦打不惟此話大行且  
要開却福州一城人眼去在何也劍爲不平離寶匣  
藥因救病出金瓶

欽山普初禪師開堂上堂良久曰舉揚宗旨上祝皇  
基伏願祥雲與景星俱現醴泉與甘露雙呈君乃堯  
舜之君俗乃成康之俗使林下野夫不覺成太平曲  
且作麼生是太平曲無爲而爲神而化之灑德雨以  
霽霽鼓仁風而雍熙民如野鹿上如標枝十八子知  
不知哩哩囉邏囉哩拍一拍下座

列祖提綱錄卷第二十四

列祖提綱錄卷第二十五

武林十八澗理安禪寺住持婁東行悅集

卽入院日請開堂提綱

五祖演禪師海會入院開堂問答畢乃云問話且止  
夫第一義適來若於四面墮下薦得千聖不能近祖  
師言不到天下作者拱手歸降何也況第一義本來  
清淨不受諸塵如何說得同道方知今日放過一著  
向建化門中別作箇解話會是以紹先聖之遺蹤稱  
提祖令爲後學之模範建立宗風若非常人曷能傳  
授謝詞不錄乃云陳謝旣畢不可空然有一頌學似大衆  
日暖風和花正開七重山鎖白雲堆纓思城市繁華  
處又出松門步一回

夢庵信禪師萬壽入院上堂淵默難明旁求可顯卽  
事造理隨處圓成雖萬變之有殊且一眞而不別所  
以道青青翠竹盡是眞如鬱鬱黃花無非般若旣能  
如是何待三祇果滿萬行因圓漸證無生方成正覺  
便能高超世表獨步大方任運昇騰隨緣自在然後  
和光同塵周旋五趣出生入死接物應機利樂有情

報恩醮懺然雖如是且如皇恩聖德又作麼生報良  
久云一炷香雲騰碧漢願王聖壽與天齊是事且置  
某叢林日邊道荒蕪只欲隨衆延時易有利生之  
望茲者伏蒙軍使承議付以疏帖令於當寺住持實  
媿非才誠難當克卽將此日開堂少善恭爲祝延今  
上皇帝聖壽無窮玉葉金枝長芳永茂軍使承議闔  
那家僮惟願永佐聖君常居祿位諸院宿德僧職名  
員勤舊高人滿筵清衆舉郡檀那隨喜衆信伏願般  
若光中常相會遇久佇衆慈伏惟珍重

雪巖欽禪師龍興入院上堂少林一曲五傳至于六  
祖山深水寒發太古之清音調翻南嶽九世至於慈  
明唱高和峻奏絕聽之希聲所以佛法盛於江西湖  
南恢恢然浩浩然不可得而名焉豈料三百年後土  
曠人稀道隨時變黃鐘大呂寂而不作鄭音衛帶亦  
乃不聞欽上座固無長處既在浙江那畔被一陣業  
風吹到潭州城裏只得改聲換調向十字街頭重翻  
此曲去也且道是何節拍擊拂云萬年歡復舉趙州  
三佛師拈云揭示如來正體發明向上宗猷趙州固

是好手只是不合強生節目新龍興見處又且不然  
金佛度爐木佛度火泥佛度水眞佛你切忌話墮忽  
有箇漢出來道你怎麼說正是強生節目拍膝一下  
將謂無人證明

道林入院上堂老屋半千間啓煨聖煨凡潑天爐輔  
烏藤六七尺振乃佛乃祖墜地宗綱風高月冷海濶  
山遙逆順卷舒縱橫在我有時怎麼有時不怎麼家  
家門首透長安怎麼也得不得怎麼也得處處綠楊堪  
繫馬只如高超物表不墮見知畢竟如何是六國晏  
清一句寺門高開洞庭野殿脚插入赤沙湖復舉保  
壽開堂公案師拈云一收一放有主有賓蓋是尋常  
茶飯就中保壽三聖猶較一著且如何見得若無舉  
鼎拔山力千里烏雞不易騎

護聖入院上堂皇圖更統綿運亦新四海八蠻咸傾  
化日窮巖絕壑共舞陽春豎起拂子云直得拂子頭  
上百億毫端示現百億國土莫不梯山入貢率土來  
賓擊拂子一下云同轉如來正法輪復舉法燈開堂  
話師拈云跨龍起家法燈是則好手其奈自身不了

殃及祖翁若是新護聖欲了先師公案別有人在且道是阿誰乃噴嚏一下

光孝入院上堂伏虎巖前駱駝橋畔有一句子去來不以象動靜不以心直得囊藏大地該抹古今三世佛望風斂影六代祖却步沉吟欽上座固是向文彩未彰以前和聲嚼碎忍俊不禁且聽拂子點頭自許臨風對月流出胸襟擊拂子云四海五湖歸至化更看此屋是黃金復舉興化和尙云三聖道逢人則不出出則便爲人與化則不然逢人則出出則不爲人師拈云二大老所謂一條拄杖兩人舁被天寧幻作兩橛了也以拄杖倚左邊云且聽各自平分

仰山入院上堂日中一食夜後一息只得其體不得其用鋤一片畚下一籬種只得其用不得其體假使掀翻大地撥轉晨昏體用雙全人法雙泯在我臨濟門下正是萬里望崖州大遠在如何見得皇風蕩蕩皇天濶和煦發生晴晝長復舉興化道三聖云我逢人則不出出則便爲人與化則不然我逢人則出出則不爲人師頌云弄晴微雨濕春風柳自青青花自

紅寄語遊人急回首哥樓不在畫橋東

尼無著妙總禪師入院上堂宗乘一唱三藏絕詮祖令當行十方坐斷二乘間之佈走十地到此猶疑若是俊流未言而驗設使用移星換斗底手段施攪旗奪鼓底機關猶是空拳豈有實義向上一路千聖不傳學者勞形如猿捉影靈山付囑俯仰時機演唱三乘各隨根器始於鹿野苑轉四諦法輪度百千萬衆山僧今日與此界他方乃佛乃祖山河大地草木叢林現前四衆各轉大法輪交光相羅如寶絲網若一草一木不轉法輪則不得名爲轉大法輪所以道於一毫端現寶王刹坐微塵裡轉大法輪乘時於其中間作無量無邊廣大佛事周徧法界一爲無量無量爲一小中現大大中現小不動步遊彌勒樓閣不返聞入觀音普門情與無情性相平等不是神通妙用亦非法爾如然於此個儻分明皇恩佛恩一時報足且道如何是報恩一句天高群象正海濶百川朝尼妙道禪師開堂云問話且止直饒有傾湫之辯倒嶽之機衲僧門下一點用不著且佛未出世時一事

全無我祖西來便有許多建立列刹相望星分派列  
以至今日累及兒孫遂使山僧於人天大眾前無風  
起浪向第二義門通箇消息語默該不盡底彌亘大  
方言詮說不及處徧周沙界通身是眼覲面當機電  
捲星馳如何湊泊有時一喝生殺全威有時一喝佛  
祖莫辨有時一喝八面受敵有時一喝自救不了且  
道那一喝是生殺全威那一喝是佛祖莫辨那一喝是八面受敵那一喝是自救不了若向者裏薦得堪報不報之恩脫或未然山僧無夢說夢見刺所障擊禪床去也拈起拂子云還見麼若見被 云還聞麼若聞被聲塵所惑直饒離見絕聞正是二  
乘小果跳出一步蓋色騎聲全放全收主賓互換所  
以道欲知佛性義當觀時節因緣敢問諸人卽今是  
甚時節蕩蕩仁風扶化日熙熙和氣助昇平擲拂子  
下座

松源崇嶽禪師上堂大凡扶豎宗乘須具頂門正眼  
懸肘後靈符只如寶壽開堂三聖推出一僧寶壽便  
打三聖道恁麼爲人瞎却鎮州一城人眼去在寶壽  
擲下拄杖便歸方丈二尊宿等閒一拶一挨便乃發  
明臨濟心髓只是不知性命總在者僧手裏還有檢

點得出者麼昔年覓火和煙得今日擔泉帶月歸  
無準範禪師住徑山入院上堂靈山指月曹溪話月  
遞代相傳證龜成鳖範上座尋常有一張口挂在壁  
上未曾動著今日無端入者行戶事到如今只得東  
簾西簾未免拈起多年曆日於中點出些子悞賺處  
說似諸人且要郭大李二鄧四張三知得江南兩浙  
春寒秋熱雖然如是黃河三千年一度清

天目禮禪師廣壽入院上堂從上來事迥絕名模列  
祖出與卒難啓口迫不得已向第二義門拈椎豎拂  
棒喝交馳或擎叉或輓毬或拽石或搬土禮上座尋  
常橫草不敢拈豎草不敢踏今日被人推出不顧危  
亡露箇消息使諸人知道眉毛在眼上豎拂子云千  
峯勢到巖邊止萬派聲歸海上消復舉玄紹二上座  
參烏白白問二上座發足甚處玄云江西白便打玄  
云久知和尚有此機要白云汝既不會後面箇僧抵  
對看紹擬近前白便打云同坑無異土師云人人盡  
道烏白用處如燒尾霹靂殊不知性命落在二僧手  
裏似敗陣將軍投戈散地

愚庵及禪師隆教入院開堂海日高明海天空濶峰  
巒海湧樓閣天開頭頭無上妙門在在金剛正體諸  
佛出世以訛傳訛祖師西來將錯就錯一大藏教誑  
赫閭闔明眼衲僧自救不了但能無心於事無事於  
心便見堯風蕩蕩舜日熙熙天清地寧民康物阜山  
僧道薄人微遠承院命三江九堰航海梯山爲國開  
堂舉揚宗旨無一絲毫瞞諸人諸人亦無一絲毫瞞  
山僧冀各存誠共相委悉復舉僧問百丈如何是奇  
特事丈云獨坐大雄峰僧禮拜丈便打師云大小百  
丈只好無佛處稱尊今日忽有問新隆教如何是奇  
特事但對他道汝等皆當作佛他若禮拜更向他道  
但辨肯心必不相瞞

普慈入院開堂道業無成愧昔賢行藏去住讓隨緣  
自憐宿債難逃避又向滄溟駕鐵船其奈大法陵遲  
時當象季新長老用盡神通又且如何施設敢請文  
殊普賢爲普慈打篙搖魯勢至觀音張帆把柁見前  
勝流交相唱和但能同德同心自然無可不可不住  
此岸不住彼岸不住中流直教盡十方塵毛利海愚

癡下劣貧苦疲乏穢惡不淨衆生任運流入薩婆若  
海爲依爲怙正與麼時且風恬浪靜共樂清平一句  
又作麼生道豎拂子云天高群象正海濶百川朝  
淨慈入院上堂皇皇南宕勝覺場奕奕永明高廣座  
山僧才疎德薄豈敢躋扳然遇緣卽宗難爲辭讓湖  
光潋灩山色空濛廓示眞如境界宗鏡高懸慧日朗  
耀恢張少室風規一一騰今煥古頭頭玉轉珠回直  
得釋迦彌勒共樂堯年文殊普賢同傾舜日雖然如  
是猶未撥動向上一竅在喝干戈才偃息四海樂昇  
平師復舉當山智覺禪師示衆云欲識永明旨門前  
一湖水日照光明生風吹波浪起師云諸人還見祖  
師麼卓拄杖云要識是非面目現在

徑山上堂通上徹下迥絕羅籠匝地普天了無朕跡  
識不可識智莫能知一自拈花微笑面壁安心但見  
五葉流芳千燈續焰體究將來總是強生節目直饒  
上無扳仰下絕已躬常光見前壁立萬仞何異癩馬  
繫枯椿黑牛臥死水借使斬新日月逸格風規水棧  
上度過九阨劍刃上拾得全身正好朝打三千暮打



八百豈不見雲門大師道盡乾坤大地無纖毫過患  
猶是轉句不見一色始是半提須知更有全提時節  
雖然一向與麼去法堂上何啻草深一丈官不容針  
私通車馬五峰突兀雙徑回環大覺國師願力宏深  
孚佑龍王添緣際會維禪林之首刹實天下之名山  
不妨與諸人高挂鉢囊拗折拄杖直得八方寧謐萬  
姓歌謠鴉鵲噪總契真源風動塵飛皆明佛事揚  
不揚之正化報不報之深恩正與麼時且開堂祝聖  
一句如何學似擊拂子黎元頓息三災劫睿筭延洪  
億萬春復舉僧問當山謹禪師掩息如灰時如何謹  
云猶是時人功幹僧云幹後如何謹云畊人田不種  
僧云畢竟如何謹云禾熟不臨塲師云謹禪師與麼  
答話勞而無功者僧若是箇漢決不依他作解後來  
應庵和尚道鳳閣香沉雪巢夜冷半窻明月和氣藹  
然正與麼時且道歸宗與徑山還有相見分也無喝  
直饒相見也是蝦蟆窟裏作活計要見四方八面逸  
格變通別著箇眼始得新徑山莫有長處麼拍禪床  
云敲出鳳凰五色髓擊碎驪龍明月珠千古華山山

脚下只應潘閬倒騎驢久立珍重

楚石琦禪師福臻入院上堂未離兜率已降王宮未  
出母胎度人已畢三世諸佛歷代祖師天下老和尚  
說心說性舉古舉今總是無風匝匝之波實情好與  
二十拄杖新福臻今日不是盡法無民打頭不遇作  
家到底翻成骨董人若相委悉拈却炙脂帽子脫却  
鶻鼻布衫其或未然明朝後日大有事在復舉臨濟  
示衆赤肉團公案師云臨濟若無後語洎被打破蔡  
州雖然家有白澤之圖必無如是妖怪

永祚入院上堂山僧昔在此山得度是箇脫白沙彌  
無端被人推出人天衆前稱爲長老泥猪疥狗還避  
得麼今日撥向曲肱木床指東畫西是最初入門第  
一杓惡水到者裏事不獲已只得壁破面皮將些葛  
藤東葛西葛是以釋迦老子在正覺山前明星出時  
忽然大悟且道悟箇什麼山僧今日開堂說法又說  
箇什麼不免將第二杓惡水澆潑諸人去也拈拄杖  
卓一卓喝一喝復舉六祖風幡公案師云諸禪德風  
動幡動心動爲你拈了也向什麼處見祖師

上堂孤迥迥峭巍巍聖賢罔措活滾滾明落落周而無餘有世界以光明爲佛事有世界以莊嚴爲佛事有世界以香飯爲佛事有世界以音聲爲佛事有世界以寂默爲佛事且道報恩者裏以何爲佛事以不可思議爲佛事所謂諸佛出現不可思議衆生業果不可思議世界成壞不可思議此不可思議亦不可思議是故一爲無量無量爲一大中現小小中現大方一毫端現寶王刹坐微塵裏轉大法輪畢竟承誰恩力喝一喝復舉南堂云君王了了將帥惺惺一回得勝六國平寧師云雖然如是堯舜之君猶有化在大勳不豎賞一句作麼生秋風吹渭水落葉滿長安報國人院上堂三世諸佛橫說豎說不曾道著一字六代祖師全提半提不曾接得一人雖然不接一人各各眼橫鼻直雖然不道一字言言玉轉珠回雙放雙收同生同死全明全暗有殺有活德山入門便棒臨濟入門便喝睦州見僧便道現成公案資福道隔江見刹竿便回去脚跟下好與三十棒八十翁翁入場屋眞誠不是小兒戲你若對衆決擇分明山僧分

付鉢袋子復舉白雲端和尚示衆云若端的得一回汗出便向一莖草上現出瓊樓玉殿若未端的得一回汗出縱有瓊樓玉殿被一莖草蓋却師云拈却一莖草瓊樓玉殿在什麼處到江吳地盡隔山越山多本覺入院上堂百尺竿頭進一步海濶天寬萬人叢裏奪高標眼親手辦空劫已前自己即是日用自己日用自己即是空劫已前自己不可說不可說香水海浮幢王刹都盧在你眉毛眼睫上普光明殿本是盧舍那與文殊普賢觀音彌勒目連鶻子馬鳴龍樹一一爲諸人演說心地法門了也還聞麼若聞去不妨隨處度生若不聞壽山入院事繁未有工夫與你說在復舉僧問曹山諸佛未出世時如何山云曹山不如僧云出世後如何山云不如曹山師云大小曹山口甜心苦或有人問壽山諸佛未出世時如何向他道好出世後如何好與他三箇好且聽一生參石屋拱禪師入院上堂把拄也鋒銳不露放行也十字縱橫水雲深處相逢却在千峰頂上千峰頂上相逢却在水雲深處今朝福源寺裏開堂演法昨日天

湖庵畔墾土耕煙所以道法無定相遇緣卽宗可傳  
眞寂之風仰助無爲之化正與麼時如何拈拄杖卓  
一下云九萬里鵬纔展翼三千年鶴便翱翔

雲峰高禪師蔣山入院上堂世界未形乾坤泰定生  
佛未具覲體全眞無端鏡容大士鷹巢躍出劈破面  
皮早是遭人描邈那更缺齒老胡不依本分遙望東  
震旦有大乘根器迢迢十萬里來意在攬行奪市直  
得鳳堂鼓響阿闍鐘鳴轉喉觸諱插脚無門合國難  
追重遭許露新蔣山迫不得已跨他船舡入他界分  
新官不理舊事畢竟如何拍禪床云戊樓靜貯千峰  
月塞草閒鋪萬里秋

徑山入院上堂五峰峭峙到者須是其人一鏡當空  
無物不蒙其照祖師基業依然猶在衲僧活計何曾  
變遷著手不得處正要提撕措足無門時方堪履踐  
直得山雲淡泞澗水潺湲一曲無私萬邦樂業正恁  
麼時功歸何所車書自古同文軌四海如今共一家  
呆庵莊禪師奉勅住徑山入院開堂山僧道漸先哲  
跡混叢林任運度時貴圖藏拙何期京師宿德謬采

虛聲俾預高僧之選叨蒙聖主之恩召對禁庭親承  
睿獎法衣特賜光揚少室宗風龍命載頒來主國一  
祖席教中所謂我本無心希求今此法王大寶自然  
而至當此之時下情惟知忻感而已若曰闡揚佛法  
報答皇恩且佛法如何闡揚皇恩如何報答到者裏  
也要諸人共相知委擊拂子萬派千溪皆渤澥七金  
五嶽盡須彌復說偈曰親奉綸音出禁闈凌霄峯頂  
唱玄機報恩一句能相委選佛場中及第歸

恕中愍禪師廣福入院上堂靈山奧旨少室眞機日  
月不足喻其明虛空不足喻其廣巍巍獨運蕩蕩無  
私思之則差議之則錯五千四十八卷說食向人一  
千七百葛藤持蠡測海在今諸方莫不盡謂驅其耕  
奪其食貴圖宗風不墜殊不知正是救渴進火禦凍  
贈冰愈增其劇新靈巖與麼道不是壓良爲賤取笑  
大家臂三折而知醫閔多人而曉相伶俐底不用如  
何若何便請單刀直入掃蕩機槍坐享太平豈不快  
哉少涉遲鈍白雲萬里復舉臺山婆子公案師拈云  
婆子如蟲蝕木偶尙成文趙州見義勇爲翻成特地

諸人還會麼雲收雨霽長空濶一對鴛鴦畫不成  
無文燦禪師薦福入院上堂天高地厚日盈月昃全  
提半提天地懸隔燦上座平生只會著衣喫飯聞人  
說佛法二字如風過樹頭如水澆頑石今日裂破面  
皮喚作長老也欲與諸人論說一上無端冒五六月  
大熱行二千里修途一時打失了也雖然賴有拄杖  
子在拈拄杖云拄杖子試說看卓一下清平世界切  
忌訛言復舉三聖道我逢人則出出則不爲人興化  
道我逢人則不出出則便爲人師頌云弟兄財本不  
多爭共駕官船各自撐撐去撐來回首看依前不出  
蓼花汀

了庵欲禪師開福入院上堂建法幢立宗旨拓開無  
上妙門顯示第一義諦天何寬地何窄青山不青白  
雲不白十字街頭醉翁子夢裏惺惺三家村裏吳胡  
獠甚生標格掀翻是非窠窟截斷凡聖蹤由德山棒  
頭全彰大用臨濟喝下脫體風流垂衣正裳聖天子  
繼唐虞之化修文偃武賢宰相霽霖雨之秋所以道  
一毛現神變一切佛同說經於無量劫不得其邊際

喝一喝云將謂合有恁麼說話拈拄杖云拄杖子穿  
過諸人鼻孔卽不問梁寶公騎佛殿出山門畢竟成  
得箇什麼事卓拄杖云千尺鯨噴洪浪飛一聲雷震  
清森起復舉祖師云吾本來茲土傳法救迷情一華  
開五葉結果自然成五祖演和尚云達磨大師信脚  
來信口道後代兒孫都成計較諸人要會開花結果  
處麼鄭州梨青州棗萬物無過出處好師云提本分  
鉗鎚碎情解窠窟還他五祖老人要見開花結果處  
則大遠在諸人要會開花結果處麼拈却鄭州梨放  
下青州棗出門便是長安道久立珍重

靈巖入院上堂石門巖險鐵關牢舉目分明萬仞高  
四十年中重到此始終不隔一絲毫好大衆湛湛湖  
光平開鏡面青青山色上插雲霄乃智積應現之方  
誠圓照嘉遁之所繼茲芳躅實愧非才不免向普賢  
毛孔寬著程途維摩掌中拓開世界直教四聖六凡  
重重普會風不鳴條雨不破塊天清地寧時康道泰  
報不報之深恩揚不揚之教化拈起鐵蒺藜驪珠盡  
擊碎千古萬古黑漫漫填溝塞壑無人會喝一喝

月江印禪師育王入院上堂佛法徧在一切處一切山河及國土無他方此土之殊無過現未來之異雲門大師云你諸人擔鉢囊行脚不知有佛法佛殿上鷄吻却知有佛法上是天下是地日月星辰森羅萬象各依定位喚甚麼作佛法馬祖大師道我自從胡亂後三十年不少鹽醬喚作佛法得麼大梅云任你非心非佛我只是即心即佛喚作佛法得麼楊岐云金剛圈要你透栗棘蓬要你吞喚作佛法得麼東山五祖云我向白雲門下咬破一箇鐵酸餚直得百味具足喚作佛法得麼且喜沒交涉須知生佛未具已前八萬四千舍利光明常在你諸人面門出入自是諸人不覺不知當面諱却山僧到者裏說箇什麼即得所以道我若坐時你須立我若立時你須坐我若野干鳴你即獅子吼你若野干鳴我即獅子吼可以光揚佛日大振立風建立法幢發揮宗旨即辰秋高氣清伏惟諸山和尚合山大衆各各起居輕利拈拄杖浙東山浙西水四海五湖皇化裏卓拄杖一下用彰俊禪師瑞巖入院上堂釋迦世尊未離兜率已

自七錯八錯何況連磨航海東來其錯尤甚俊上座既是他家兒孫只得將錯就錯拈拄杖提向上樓指其中事無過只要諸人明白本心證自本法薰忽一箇半箇心法雙忘解道穿山渡口虎咬大蟲剪月亭前蛇吞鼈鼻如此則三世諸佛六代祖師總在新瑞巖拄杖頭上乞命雖然祇如西天廣額屠兒放下屠刀道我是千佛一數且道是從本心中發現耶從本法中發現耶以拄杖畫一畫天上有星皆拱北人間無水不朝東復舉外道問佛昨日說什麼法佛云說定法又問云今日說什麼法佛云說不定法再問昨日定今日因甚不定佛云昨日定今日不定師拈云大小釋迦龍頭蛇尾忽有問新瑞巖昨日說什麼法只答道說法又問今日說什麼法亦答云說法但只與麼答去教他外道無人作處無湊泊處不見道無法可說是名說法

季潭宗泐禪師於洪武元年戊申四月十五日住中竺入寺上堂金剛王劍橫揮千妖屏迹爍迦羅眼洞照萬物潛形到此卷舒在已殺活臨時直得千歲巖



中天踳跳錢塘水東海逆流諸人還知也無遂豎拂  
子云庭前石笋抽條也會見高枝宿鳳凰復舉南泉  
初入院大衆送歸方丈僧問端居丈室將何指示於  
人泉云昨夜三更失却牛天明起來失却火師云大  
小南泉不惟瞞人亦且自瞞新天竺用處也要大家  
知有忽有問端居丈室將何指示於人劈脊便棒且  
道與古人是同是別卓拄杖下座

石林鞏禪師住淨慈入院上堂橫眸碧漢萬國風清  
垂手紅塵千峰日出纔怎麼便不恁麼所以道我此  
法印爲欲利益世間故說在所游方勿妄宣傳橫按  
拄杖云佛滅二千二百單六載沙門行鞏今於蒼雪  
盡頭破鐘清處顯示此印絲毫無有妄者卓拄杖云  
謹白

笑隱新禪師烏回入院拈花付法面壁安心列派分  
宗遞相鈍置拈拄杖畫一畫云一畫畫斷了也且喜  
天下太平然則兵隨印轉將逐符行新長老出世爲  
人畢竟明什麼邊事不見保壽開堂三聖推出一僧  
壽便打聖云與麼爲人非但瞎却者僧眼瞎却鎮州

一城人眼去在壽擲拄杖便歸方丈斬釘截鐵發揮  
格外真機捏聚放開顯示當陽正眼直得龍吟霧起  
虎嘯風生一道神光貫通今古如斯舉唱猶涉程途  
且到家穩坐一句作麼生道三事衲衣青嶂外一爐  
沉水白雲中

天竺入院上堂夫爲宗師者提持綱要接物利生豈  
是細事況茲山千載名藍五天化境大丞相號令明  
肅出於至公山僧旣已迴避無門諸人亦要知時識  
節拈拄杖云卽心卽佛非心非佛不是心不是佛不  
是物三千年黃河清五百載聖人出復舉僧問投子  
諸佛出世爲一大事因緣和尙出世當爲何事投子  
云尹司空爲老僧開堂投子老人可謂應機施設不  
犯鋒鏑中峰不免因齋慶讚一髮絲來引萬鈞全肩  
荷負見當人通身手眼重拈撥枯木花開大地春  
集慶入院上堂釋迦世尊捨金輪而登佛位今上皇  
帝從佛位而御金輪收攝三千刹海於一印中具足  
八萬法門於一毫上如華嚴會上菩薩得無盡福德  
藏解脫門於一器中出生種種美味飲食又於衆會

仰觀空中而雨種種珍寶隨衆生心悉令滿足然後得其寶者盡證法門食其味者咸成妙道無一塵而不具足佛事無一法而不圓滿正宗卽今崇建寶坊闡揚法施諸天音樂不鼓自鳴梵唄詠歌自然敷奏十方菩薩咸集道場八部天龍同伸慶讚還有不歷化城徑登寶所者麼擊拂子云四海已歸皇化裏時清休唱太平歌復舉世尊與衆行次以手指地云此處宜建梵刹時天帝釋將一竿竹插地上云建梵刹竟世尊微笑師云帝釋爲三十三天之主雖則一期施設其奈理事未備今上皇帝以興龍潛邸改創梵宮復命禪宗發揚向上宗旨與天帝釋所成功德何啻百千萬億倍縱使虛空爲口讚歎莫窮臣僧借水獻花輒成一頌丈六金身一莖草瑤樓玉殿恰相當交羅帝網山河景旋繞須彌日月光華雨晝飄龍座暖天風時送御爐香僧共仰恩光近五色祥雲擁帝旁

南石琇禪師普門入院如來出世是擔屎漢祖師西來是賣卜人自餘德山臨濟雲門潯山雪峯玄沙南

泉趙州各逞機鋒互分照用盡是販私鹽賊新普門者裏一時與他掃蕩何故幸逢堯舜世自合樂無爲復舉僧問楊岐如何是佛岐云三脚驢子弄蹄行僧云莫者便是岐云湖南長老師云大小楊岐被者僧一問未免手脚俱露

靈巖入院上堂正法眼藏亘古亘今般若真燈照天照地當陽無向背直下絕承當靈然獨露透色透聲廓爾現前絕聞絕見常在一切處不爲一切處所拘非離一切時不爲一切時所攝者裏見得無迷無悟非後非先百千法門無量妙義不假思惟悉皆具足建化法中斯爲可矣若是衲僧門下直須向百尺竿頭澗步蟬蜩眼裏藏身娑婆擲去他方妙喜拈來此土不知承什麼恩力得恁麼奇特良久慣從五鳳樓前過手握金鞭賀太平復舉妙喜竹篋話師云靈巖今日開堂不舉竹篋亦不分背分觸且道有何長處萬壽和尚復白槌諦觀法王法法王法如是便下座徑山入院上堂如來四十九年說法不曾道著一字達磨十萬里西來何曾遇大乘器自餘德山臨濟雲

門趙州天下善知識設大機施大用盡是青天霹靂  
旱地波濤正眼觀來不直一笑雖然爐韜之所多鈍  
鐵良醫之門足病人縱是舉一明三日機銖兩之士  
於毫毛未動之先便解承當早已不堪種草所以道  
言前薦得猶爲滯殼迷封句下精通未免觸途狂見  
古人爲誘接方來多向第二義門拋三放兩一向拖  
泥帶水山野曩於智積峰頂禪月山中曾開皂角燈  
心舖子聽他要者來買縱是法堂前草深一丈終不  
將佛法當人情三載之中於九重城內日與陶泓毛  
穎對談亦不煩略動一念今到凌霄峰頭更是不勞  
心力何故幸有吾通祖妙喜佛照寂照舊化儼存麻  
三斤乾屎橛不用提持黑竹篋碁盤石何須拈出人  
人鼻孔遼天箇箇腦門著地行則同行坐則同坐自  
然上古風規灼爾西來的意且喜四海八紘風恬浪  
靜含齒帶髮盡樂無爲且道應時及節底句子作麼  
生舉拈起少林無孔笛等閒吹出萬年歡復舉保壽  
開堂公案雪竇拈云保壽三聖雖發明臨濟正法眼藏  
要且只解無佛處稱尊當時者僧若是箇漢纔被推

出便掀倒禪床直饒保壽全機也較三千里師云保  
壽三聖發明臨濟正法眼藏直是斬釘截鐵爭奈承  
當者少雪竇既是權柄在手便合與者僧雪屈說什  
麼當時諸人還會麼若無舉鼎拔山力千里烏雞不  
易騎

列祖提綱錄卷第二十五

91

列祖提綱錄卷第二十六

武林十八澗理安禪寺住持婁東行悅集

卽入院日請開堂提綱

筓庵問禪師金山入院開堂神龍窟宅古佛名藍我  
二十世祖圓悟禪師重開正覺之場十八高人打失  
鼻孔眼睛一回徹證之地洵江南之巨剎誠衲子之  
寶坊不勞彈指樓閣門開無所希求風雲際合據此  
位者顯示不言正令導此機者激揚向上宗乘明如  
杲日皎若太虛一語歸宗千差坐斷迴千百年既倒  
之瀾挽今時世已繫之轍直得臨濟有喝倒退三千  
德山棒有無敢動著抹過建化門裂破圓圖句風高  
浪湧水沸波騰正當恁麼時且妙高已到寶所親登  
刹影高揚誰遭毒手劈開華嶽連天色放出波濤動  
地雷謝詞不錄復尋三聖開堂云我逢人卽出出卽不爲  
人與化云我逢人卽不出出卽便爲人師云綱宗在  
握正令當行照用全提拳踢相應三聖與化是他臨  
濟的子方敢向人天衆前激揚箇事山僧要將二大  
老肝膽一時揭露擲向人前莫有辨得者麼有不犯

之威乃能樹起屍之德有不言之化始可成歆血之  
功太平只用垂裳治建土分疆列下風

磬山入院開堂四十九年全成露布末後一句曳尾  
靈龜西天四七東土二三總是接響承虛據實而論  
諸佛諸祖無出頭分自古至今無語話分翻轉劫初  
田地撥開向上宗猷突出頂額一機顯示金剛正眼  
臨濟三玄三要消一割洞山五位君臣不直一唾  
迴真風於既墜續慧命於將殘還他實地行來自然  
有本可據拈起也剗斷天下命根放下也振轉衲僧  
鼻孔饒伊牙如劍樹口似血盆底到來也須讓他一  
頭地何故綱宗在握寶劍橫揮正印全提十方坐斷  
莫有同明大機同徹大用爲先師吐氣者麼從前汗  
馬無人識且要重論蓋代功復舉法燈禪師開堂山  
僧卓志本欲深棲嚴壑隱遁過時柰緣先師有未了  
公案出來爲他了却僧問如何是未了公案燈打云  
祖禪不了殃及兒孫僧云過在甚麼處燈云過在我  
殃及你師云古人恁麼提持要且未稱衲僧本色豈  
知者箇門戶從來潑開要避避不得要談談不得卽



如山僧今日領衆入此先磬山來且道是隱遁過時耶出來了却耶山僧却也不行棒也不殃及大眾一總既到者裏誰敢不爲先師竭力若只平地上展演佛法寧有今日薦擲拄杖云三十年後莫道不與諸人舉似結座云諦觀法王法王法如是下座

漏澤入院上堂此日無問話者師乃顧左右云今日一衆可謂善說法要何故問如瓶瀉答似雲興簇錦攢華牽來拽去滿慈驚子利智利能共展奇猷各興神用於宗乘中事天地懸殊爭之不足讓之有餘拈一機則機機普應建一法則法法周圓掀翻露布葛藤決斷現成公案何妨就荊棘爲旂檀林卽瓦礫爲黃金地開四生門戶作九有梯航直教不蓄一粒不聚一莖願使天下衲僧箇箇飽麴麴地繡湖南畔花滿郊垌煙水城東春連雉堞是處有慈氏無門無善財何必東涌西沒南涌北沒中涌邊沒普天匝地不動一毫頭全成殊勝利到者裏報不報之恩助無爲之治亦非爲分外事且道法筵初啓法鼓方聞條令斬新一句又作麼生快逢野老謳歌日喜見嘉禾合

穩生

玉林琇禪師報恩入院上堂師卓拄杖云去歲元公黃居士祈遠唐居士暨衆居士等要某舉揚此事某以先師會下頗多精鍊之士大瞻小覷不妨暫時鈍置誰知先師有識云不是我兮便是你今日拓開潑天門戶萬不可謾衆檀護諸弟兄仍推向人前不可囊藏被蓋也薦豎拄杖云看看乃橫云不直前薦取向門外打之遶先師隱入某上座拄杖裏去也復舉臨濟大師初住河北謂普化克符二上座曰我欲於此建立黃檗宗旨汝二人成禪我二人珍重下去三日後普化上來云和尚三日前道甚麼濟便打三日後克符上來云和尚三日前打普化作甚麼濟亦打師云臨濟大師眼孔太窄欲立先宗止望那兩人成禪某上座則不然今欲於此建立先報恩宗旨仰望大眾盡皆成禪我若或擬議遲疑各自領三十棒薦卓拄杖喝一喝下座

牧雲門禪師住破山興福入寺上堂出山髮尙青還山齒半落入門仔細看青山宛如昨黃葉打頭來高

林風索索馳騁不知休當初悔行脚昔有梵志出家  
白首而歸鄰人見之曰昔人尙存乎梵志曰吾猶昔  
人非昔人也鄰人愕然非其言大衆鄰人只知百年  
一身不知念念遷變新新不住梵志雖知當體無常  
有變有滅不知有不變者存於出家法中尙欠一著  
且如何是不變者死生老病非他物渴飲饑餐祇舊  
人下座

弘覺恣禪師天童入院上堂古殿洞開明同杲日玲瓏八面寬若太虛風送寶鐸聲搖夢回家園春曉一脚跟下重重樓閣門太煞現成十分受用因甚諸人到此排身不進入作無門蓋緣執恪情存尙留觀聽以致零星家寶自味衣珠苟能上無攀仰下絕已躬一肩擔荷將來赤手提持得去則事出當然宛同本得何勞三登九上一任七縱八橫便見大地全收十方坐斷然後奮金剛杵現自在身向虎穴魔宮爲人作主坐浮幢王刹轉大法輪直得如明鏡當臺千妖百怪莫能逃其影質春風匝地三草二木咸悉賴其栽培正當恁麼時貨舖初開斬新條令一句作麼

生道但願東風齊著力一時吹入我門來起身云道  
恣向緣薄福自揣無能業通跡嚴阿深藏愚拙不意  
人天眼滅法社中虎誼當諸位法兄則又固爲辭讓  
所以古南和尚靈鷲大師與諸同門季昆在郡檀越  
一時把住驢脚生按牛頭必欲道恣繼席先人高陞  
此座深愧恩光過溢況當象駕簇臨今則祝聖開堂  
爲衆演法一期佛事幸已云周敬回以上善緣用培  
巨嶽邊土伏願一人有慶萬國咸寧在筵群公觸目  
證無生之旨現前知識普天建最勝之幢有煩久立  
伏惟珍重復據座云昔日臨濟大師至潯沱河側住  
一小院名曰臨濟座下亦有三百來衆一日謂普化  
克符曰我欲於此建立黃檗宗旨你二人須成視我  
二人珍重下去三日後普化上來三日前和尚道甚  
麼臨濟拈棒便打三日後克符上來和尚三日前因  
甚打普化濟亦打師云一賓一主一挨一拶生鐵鑄  
就鈍綱打成建立黃檗宗旨發明從上心髓須是者  
般漢但惜二人珍重下去臨濟不與當下勦絕致令  
後人向三日前三日後弄精魂今日山僧路見不平

不免爲伊勸絕去也諸仁者山僧亦欲於此建立天  
童宗旨敢問諸人作麼生成祝山僧好爲優珍重下  
去耶爲復三日後上來耶爲復從東過西耶爲復默  
然良久耶爲復拂袖出堂耶爲復繞座三匝作女人  
拜耶爲復揚眉瞬目豎指擎拳耶爲復掀倒法座喝  
散大眾耶上來做處總不出弄精魂畢竟作麼出隻  
手眼共山僧建立宗旨會麼鶴有九臯難翥翼馬無  
千里謾追風白槌諦觀法王法法王法如是師下座  
費隱容禪師住天童上堂入大寶剎登大法壇吹大  
法螺擊大法鼓演大法義顯揚臨濟宗猷提持向上  
一路指蹤則萬別千差透脫固一字也無到者裏先  
師面目現在太白風規鑑古所以法隨法行法幢隨  
處建立遇緣卽宗隨處作主摧邪挽正據真鋤僞直  
得四海沸騰五嶽起舞佛祖於時歡呼龍象自此奔  
馳乃至若貴若賤是聖是凡四衆普集俱在一處人  
天交接兩得相見都教箇箇契契單傳人人悟同本  
得然則卽此大寶剎大法壇鐘鼓喧天法雷震地靈  
山勝會宛然見深沐皇恩不等閒

石奇雲禪師雪竇開堂日陞座云當陽一著獨露無  
遮八面玲瓏十方軒豁明眼作證豈敢囊藏直得瓊  
樓玉殿百草頭上全彰千丈報身瓦礫堆邊頓現塵  
塵爾利利爾突出無位真人發明現成公案直饒三  
世諸佛歷代老古錐到來箇箇退身有分正當恁麼  
時如何水歸大海波濤靜雲到蒼梧氣象閒  
浮石賢禪師報恩入院上堂假使頂戴經塵劫身爲  
床座遍三千若不傳法度衆生畢竟無能報恩者鄉  
下拂曰新報恩今傳法了也大眾一時擔荷

#### 載住入院提綱

雲峰悅禪師載住雲峰上堂古者道風動心搖樹雲  
生性起塵若明今日事昧却本來人今日事且置作  
麼生是本來人良久云鶴有九臯難翥翼馬無千里  
謾追風珍重

棲賢舜禪師南康守因私忿民其衣後仁宗勅賜依  
舊爲僧特旨載住棲賢入院上堂無端被謫枉遭迤  
半載有餘作俗人今日載歸三峽寺幾多歡喜幾多  
嘆

佛眼遠禪師知府錢公奏請載住褒禪上堂君命重  
宣降薛蘿不容靜處薩婆詞襴衫席帽寒酸甚又向  
人前唱哩囉哩哩囉拍一拍囉哩囉又拍一拍云去  
年梅今歲柳顏色馨香依舊人漸老水長流無心道  
合頭下座

大慧杲禪師載住徑山入院上堂古人道去去實不  
去途中好善爲來來實不來路上莫虧危敢問大衆  
既不去善爲箇甚麼既不來有甚麼虧危妙喜離徑  
山十八年今日歸來亦不見有善爲亦不見有虧危  
三門依舊向南開爲甚麼如此良久云而今四海清  
如鏡行人莫與路爲嫌

應菴華禪師載住歸宗入院上堂大道無方所從容  
寰海間幾思歸隱處安樂在廬山如是也周旋舊日  
家風豈敢妄更途轍再禮耶舍相好重瞻拭眼慈容  
祇要聲和響順形直影端所以道拈起也天回地轉  
應須拱手歸降放下也草偃風行必合全身遠害在  
彼在此本無間然一去一來豈有二相雖然猶是業  
識茫茫且風恬浪靜一句作麼生道雲靜日月正雪

晴天地春

愚庵及禪師載住徑山山僧隨緣受報蓋此承乏坐  
嬰宿障誓欲投閒茲承監察御史太尉柱國丞相不  
忘靈山付囑協心削牘復任住持難爲迴避只得免  
循舊例陞於此座虔焚寶香祝延今上皇帝聖壽萬  
安皇后齊年太子千秋文武官班同增祿筭欽願皇  
圖永固帝道遐昌武偃文修河清海晏風調雨順物  
阜民康便恁麼散去一期事畢寧不盡善盡美更教  
山僧說箇什麼卽得且山僧雖離此山恰恰二年朝  
夕與諸人眉毛厮結行則與諸人同行坐則與諸人  
同坐覓一絲毫隔礙底道理了不可得此日歸來依  
然只是舊時人不改舊時行履處所以道往復無際  
動靜一源去來不以象動靜不以心覓一絲毫動靜  
去來之相了不可得若信得及便好各各安家樂業  
恢張祖父田園吹無孔笛唱太平歌驅逐文殊普賢  
走使觀音勢至於一毫端見寶王刹坐微塵裏轉大  
法輪任運優游隨緣自在雖然如是若衲僧分上要  
且未夢見他汗臭氣在豈不見江西馬大師昔日令

西堂智藏馳書到當山大覺欽禪師大覺開緘見一圓相索筆於圓相中點一點可謂龍驤虎驟玉轉珠回好手手中呈好手紅心心裏中紅心因甚南陽忠國師却道欽師猶被馬師惑後來雪竇道徑山被惑且置若將呈似國師別作箇什麼伎倆免被惑去敢謂天下老和尚各具金剛眼睛廣作神通變化還免得麼雪竇見處也要諸人共知卽者馬師當時畫出早是惑了也且道雪竇與麼批判還能自免也無山僧今日因齋慶讚舉似諸人以拂子折圓相云莫有不受惑者麼喝一喝復舉應庵和尚載住歸宗上堂舉南禪師出城還山有頌示衆云去日一溪流水送回時滿谷白雲迎一身去住非去住二物無情似有情應庵道南禪師好則好只是愛便宜歸宗亦有一頌舉似大衆去時冒雨連宵去回時帶水又拖泥自怪一生無定力尋常多被業風吹過庵今日載住徑山亦有一頌舉似大衆去日應須償宿債回時宿債本來空山上鯉魚打踣跳一國之師展笑容弘覺恣禪師載住天童入院上堂潑天門戶開張千

聖仰攀不及廣大家風浩浩含靈依蔭何窮所以從上先德莫不蔭茲長育群萌王有三界禪成佛祖流出萬宗其柰草庵止宿人多門外周遊者衆遂使弘規罔紹大業就荒衆中莫有法王眞子克承厥家者麼出衆相見衆問話次又一僧出師拈拄杖便打復喝一喝須知海嶽歸明主未信乾坤別有天卓拄杖下座

當晚小參提綱

圓悟勤禪師蔣山寺小參相逢不拈出舉意便知有萬人衆前顯顚顛不是目前機亦非目前事三千里外納敗闕直得盡乾坤大地無絲毫法可當情靜悄悄地絕諸訛千聖不敢擬議致之諸佛頂顚上到者裏更說什麼行棒行喝論正論備有語有默絕玄絕妙雙放雙收同死同生向窠窟裏作活計正當恁麼時且作麼生參究且作麼生捉摸作麼生弄拈作麼生證入若有一絲頭伎倆去便見神見鬼更不作一絲頭伎倆未免墮在無事界裏箇事如壺公瓢中自有天地日月所以雪峰和尚道盡大地撮來如粟米



粒大又道盡大地是沙門一隻眼鹽官又道虛空爲  
鼓須彌爲槌什麼人打得南泉道王老師不打者破  
鼓法眼道王老師不打立沙道深山巖崖千年萬年  
無人到處還有佛法也無雲門大師道日裏來去日  
裏辨人忽然教夜中取箇物無日月燈不曾到處作  
麼生取似此若不通透有纖毫隔礙則如山如獄或  
若盡情透得要行便行更疑什麼雖然如是直須是  
真實到者田地始得向萬丈懸崖處撒手百尺竿頭  
進步且道此事畢竟如何委悉撞著道伴交肩過君  
向瀟湘吾向秦下座

大慧杲禪師住徑山當晚小參大道只在目前要且  
目前難觀欲識大道真體不離聲色言語學起拂子  
云者箇是色擊禪床云者箇是聲山僧只今口吧吧  
地是言語那箇是大道真體喝一喝云卽此見聞非  
見聞無餘聲色可呈君箇中若了全無事體用無妨  
分不分若也分去雨下地上濕天晴日頭出小盡二  
十九大盡三十日若也不分金剛與土地揩背一擦  
骨出復云古者道末後一句始到牢關把斷要津不

通凡聖作麼生是末後一句良久云且莫說夢拍禪  
床下座

雪巖欽禪師住道林當晚小參濟北之道出乎平常  
語默動靜脫體全彰三玄三要松直棘曲四賓四主  
晷短鶴長所以老圓悟於諸佛出身處道薰風自南  
來殿閣生微涼帶累妙喜打失鼻孔徧界難藏山蒼  
蒼水茫茫無朕迹絕承當竹籬茅舍江村外遠浦歸  
帆挂夕陽復舉麻谷訪臨濟問大悲千手眼阿那箇  
是正眼速道速道谷拽濟下禪床却坐濟起云不審  
谷擬議濟拽谷下禪床却坐谷便出師拈云二大老  
恁麼激揚雖則百千手眼一時俱露又爭免得箇二  
俱瞎漢且道還有檢點得出底麼瞎

住光孝云佛法本無多子堂堂日用之間只因自信  
不及却於易處艱難今夜不免作此方便爲諸人豁  
開戶牖拶碎疑團擊拂子云星在稱兮不在盤復舉  
雲門大師示衆問聲悟道話拈云跛脚阿師撫憐愛  
子動是倒腹傷腸只是做造忽忙帶些粘牙綴齒欽  
上座則不然聞聲悟道見色明心卓拄杖云家家觀

世音

住仰山云佛法徧在一切處豈間七閩二浙江東江西無過只是一箇夜暗晝明春寒秋熱而已就中忽有通方上士在背地裏拍手一下咳嗽一聲道長老將謂你來自冷泉亭上必新言語必異見聞元來伎倆也只恁麼拍頰一下云仰山罪過復舉僧問先仰山法身還解說法也無山云我說不得別有一人說得僧云說得底在什麼處仰山推出枕头瀉山聞得云寂子用劍刃上事師拈云法身說法已於問處流通推出枕头也只是箇信受奉行瀉山老漢用劍刃上事雖曰列段分科若是正文敢道不事落處

元叟端禪師住中天竺云一切諸法本無自性亦無生性菩提涅槃等名從淨法中得貪瞋愛取等名從穢法中得靜穢南邊俱莫依怙但有空名名字亦無三藏十二分種種名言種種句義總不出此箇元由所以古聖有言若心想所思出生諸法虛假皆不實心尚無有云何出生諸法如人取聲安置篋中又如吹網欲令氣滿此是諦實之說若以爲實大錯了也

開山寶掌和尚年一千七十二歲三藏五乘十二分種種名言種種句義靡不練磨靡不究竟後於梁武城中得遇缺齒老胡方乃頓明大法不是容易直須仔細復舉寶掌和尚偈云梁武遇導師參禪了心地飄飄二浙游更盡佳山水師亦說偈云參禪只要了心地心地了時諸法空南山昨夜日卓午白額咬殺焦尾蟲

楚石琦禪師住天寧當晚小參舉同安丕和尚因僧問如何是和尙家風安云金鷄抱子離霄漢玉兔懷胎入紫微僧云忽遇客來將何祇待安云金果早朝猿摘去玉華晚後鳳啣來師云正偏回互不犯鋒銳問答縱橫性明尊貴同安老人慣得其便或有人問天寧如何是和尙家風向道鉢孟饋子忽遇客來將何祇待飯後一盃茶且道與古人是同是別住本覺云眼裏著沙不得耳裏著水不得恁麼來者不向一人眼裏著得須彌山耳裏著得大海水恁麼去者不肯一人無言處演言無事處成事無佛處作佛無生處度生卷舒立方外乾坤縱橫挂域中日月

得失俱喪是非杳忘撥轉向上關敲瞎頂門眼拋却  
空王殿卸下本來衣猶未是衲僧受用處還委麼麼  
家無小使不成君子復學智者詮和尚示衆云要扣  
玄關須是有節操極慷慨斬得釘截得鐵硬剝剝地  
漢始得若是畏刀避箭之徒看卽有分師云大小智  
者用盡自己心笑破他人人口壽山別無奇特朝晨熱  
水洗面黃昏脫襪打睡大海從魚躍長空任鳥飛  
住光孝舉臨濟四喝話畢師便喝云且道者一喝落  
在什麼處爲復是金剛王寶劍爲復是踞地獅子爲  
復是探竿影草爲復是一喝不作一喝用試辨看若  
辨不出報恩與你註破金剛王劍目前可驗擬議不  
來墮坑落塹踞地獅子直下便是打破觸體拈却牙  
齒探竿影草好也不好左手扶起右手推倒有時一  
喝不作喝用大小臨濟只管說夢便與麼會猶欠一  
喝在喝一喝

恕中愷禪師靈巖當晚小參靈巖峭絕到者應難已  
到者享用安然未到者玲瓏孤露孤露底正好踏步  
向前享用底更須退步就已所以道事無一向有時

翻頭作尾有時翻尾作頭收放縱橫寧存軌轍摩竭  
掩室毗耶杜詞雖曰正令全提要且未臻其極山僧  
今夜入門之始聚首之初與汝諸人約法三章第一  
不得起佛見第二不得起法見第三不得道不起佛  
見法見若也依而行之管取眉毛厮結驀拈拄杖云  
明眼漢沒窠臼高高處觀之不足低低處平之有餘  
卓拄杖鐵牛不喫欄邊草直向須彌頂上眠

住瑞巖云瑞巖山中阿練若堂殿玲瓏絕點塵昔日  
暫游今載到到來只是舊時人既是舊時人且說舊  
時話山川秀發龍象駢填入境宛然如昔風光不減  
當時顯揚少室微猷揭示靈山奧旨無絲毫同相無  
絲毫異相全體是箇金剛正體全體是箇大解脫門  
全體是箇華藏世界海是以從上老宿競出頭來激  
揚鏗鏘只要各各當人明自本心見自本性高聳人  
天壁立萬仞睦州和尚云汝等諸人還得箇入頭處  
也未若未得箇入頭須得箇入頭若得箇入頭不得  
孤負老僧玄沙和尚云我若舉揚宗教法堂前草深  
一丈二大老一人牢關把斷水泄不通一人入草求



是爲人不爲人良久云萬古碧潭空界月再三撈攬  
始應知復舉投子因僧問和尚住此山有何境界投  
子云丫鬢女子白頭絲師頌云住山境界問如何女  
子雙鬢鬢已蟠觀面不逢休更會白雲飛過舊山阿  
愚庵及禪師淨慈入院小參馬祖百丈已前無住持  
事道人相尋於空閒寂寞之濱其後雖有住持王臣  
尊禮爲人天師今則不然挂名官府如有戶籍之民  
此晦堂不赴大瀉之招而致斯語觀此則知住持之  
道那時已是不堪著眼了也更教看著今時做處也  
好慙惶煞人明教謂住持者持其法使之永住而不  
滅所以法隨法行法幢隨處建立永嘉道建法幢立  
宗旨明明佛勅曹溪是世降俗末名存實亡大法涓  
瘳無甚今日山僧道慙涼薄行愧荒疎誓欲深藏嚴  
壑隱遯過時俟蒙柱國丞相不忘靈山付囑遠勞使  
命推輓來此住持是猶使蚊負山螳螂怒臂以當車  
轍却不似法燈和尚道爲緣先師有未了公案出來  
爲他了却所謂王臣尊禮爲人天師建法幢立宗旨  
則吾豈敢雖然南屏勝地衲子淵藪人能弘道非道

弘人佛運垂秋宗綱委地冀諸勝衆勦力匡持弘贊  
法社驀拈拄杖你有拄杖子與你拄杖子你無拄杖  
子我奪却你拄杖子卓拄杖云三汲浪高魚化龍癡  
人猶辱夜塘水復舉德山小參不答話公案法眼益  
云大小德山話作兩橛圓明密云大小德山龍頭蛇  
尾雪竇拈云二尊宿雖善截長補短捨重從輕要見  
德山老漢亦未可在何故殊不知德山握閫外之威  
權有當斷不斷不招其亂底劍諸人要識新羅僧麼  
只是撞著露柱底瞎漢師云者箇公案諸方老宿每  
至小參未嘗不拈出註解一上雖則各資一路未免  
所見不同互有得出法眼云話作兩橛易分雪裏粉  
難辨墨中煤圓明云龍頭蛇尾只見波濤湧不見海  
龍宮雪竇道德山握閫外之威權有當斷不斷不招  
其亂底劍正是扶強不扶弱殊不知大小德山當斷  
不斷自招其亂諸人要識者僧麼鷗子過新羅

列祖提綱錄卷第二十六



列祖提綱錄卷第二十七

武林十八澗理安禪寺住持婁東行悅集

當晚小參提綱

石屋珙禪師當晚小參現前一衆久在叢林謂之參禪謂之辦道殊不知一念未生已前更無別物纔擬心時錯了也雪峰和尚三登投子九到洞山如渴鹿越陽焰不知費了多少脚頭如今要得現成直下自家看取復有何事無事切莫妄求妄求而得終非得也復舉南泉水牯牛公案師頌曰南泉放牧沒東西兩岸春風綠草齊總是國王家水土不如隨分納些些

古林茂禪師開元入寺小參舉雪峰問德山從上諸聖以何法示人山云我宗無語句亦無一法爲人後僧問雪峰云和尚見德山得箇什麼峰云我當時空手去空手歸五祖拈云如今說與透未過者有兩人從東京來問伊近離何處却云蘇州便問蘇州事如何伊云一切尋常雖然謾山僧不過何故只爲語音不同畢竟如何蘇州菱邵伯藕師云從門入者不是

家珍自己流來還同瓦礫老東山依模脫鑿殊不知二大老正是食飽傷心雖然既是東京來因甚却說蘇州話

永福入院小參紅塵鬧市十字街頭百草頭邊孤峰頂上若作佛法商量入地獄如箭射直得萬機休罷千聖不攜聲前非聲色後非色檢點將來正是觸體前妄想借使打破觸體揭却腦蓋躍倒須彌踏翻大海脚跟下推勘得出也是落七落八通方上士出格高人除非自有生涯終不守他窠窟現前大眾冀善參詳山僧二千里水陸間關來此聚頭不爲別事復偈云處世行藏各有由老來誰不愛心休爲圓鄮嶺先師話來結鄱陽衲子警跛驚但隨他逐浪錦鱗終是解吞鉤相逢試把家私展蜜菓時懸檠樹頭保寧入寺小參當軒大坐百市千重一句全提該天拈地佛眼覷不見海口難宣今古不同途凡聖罔測直得麒麟現瑞鳳凰來儀山色呈祥人煙雜還其柰梁寶公蹉過達磨雖云觀音大士傳佛心宗畢竟不識者箇消息是汝諸人還猛省麼卓拄杖若不同床

睡焉知被底穿復舉當山勇禪師示衆云大方無外  
大圓無內無內無外聖凡普會互臻生光須彌粉碎  
無量法門百千三昧拈拄杖云總在衲裏會麼蘇盧  
蘇盧噫哩噫哩婆訶松源和尚拈云耆老漢業識茫  
茫無奈船何打破屏斗師云老松源撲出心肝要且  
未見先保寧在山僧今日重爲拈出會盡萬法一如  
拈却金圈栗棘也是泗洲人見大聖

無文璨禪師住薦福當晚小參鼓棹揚帆駕沒底船  
橫行海上神頭鬼面用無文印勘驗諸方二千里遠  
來住山單單地提持此事舉拂子云看看印文已露  
劃一劃錦縫已開若佛若祖若聖若凡盡向者裏一  
印印定直得盡乾坤大地風颯颯地衆中忽有一箇  
犯衆出來道長老你且莫要大驚小怪我在威音佛  
世已證是三昧又作麼生以拂子擊禪床下座  
了庵欲禪師住靈巖云只者是只者是金不博金水  
不洗水是句亦刻非句亦刻揭開萬里神光提出倚  
天長劍三登九到滯澁迷封撩起便行白衣拜相山  
僧今者椎碎蟠桃核得見舊時仁拽將師子峰與天

平山關額且貴大家知有自餘七十三八十四額馬  
繫枯椿黑牛臥死水有甚麼共語處拍禪床云好雨  
洗將殘暑去涼風吹得早秋來復舉僧問雲門佛法  
如水中月是否門云清波無透路僧云和尚從何得  
門云再問復何來僧云便與麼去時如何門云重疊  
關山路師云雲門善舞太阿著著有出身之路者僧  
貪觀白浪失却手橈靈巖不惜眉毛與汝拈却水除  
却月還見佛法麼喝一喝久立珍重

南石琇禪師住萬壽云塵劫來事只在于今緇素駢  
集燈燭煒煌萬歲山從地而起雙石幢屹立層霄是  
禪月之道場蘇城之勝地殿堂虛敞煙雲蔽虧紅闌  
三百九十橋綠浪東西南北水頭頭顯露法法全彰  
黃面瞿曇何煩出世缺齒老漢安用西來天下善知  
識分宗列派各立門庭具驅耕奪食之機有摧邪顯  
正之用正眼觀來總不消得須知我此門中別無奇  
特只貴明自本心見自本性聞聲見色總是尋常喫  
飯著衣色色仍舊初不用希求勝妙以爲有得豈不  
見大茅和尚示衆云欲識諸佛心向衆生心行中識

取欲識常住不凋性向萬物邊處處會取古人怎麼說話多少現成多少明白今人不能洞曉蓋是生知解障却本有一段光明山僧今夜入門之始聚首之初終不肯說玄說妙愈增知解只將現成句子觀面拈出且作麼生是現成句子以拄杖卓一下復舉僧問趙州和尚云萬法歸一一歸何處州云我在青州做一領布衫重七觔者箇公案諸方據曲豕木床者往往皆曾拈撥多向此僧言下卜度貴易起疑不能於趙州未開口前一截截斷大似楚人認山鷄以爲鳳獨有妙喜老子較些子嘗有頌曰青州七觔衫盡力提不起打破趙州關元是自家的新萬壽效顰亦有一頌青州七觔衫年深黑如漆颺向屋角頭光明耀紅日

住徑山云十字街頭紅塵浩浩孤峰頂上白雲依依不是目前法非耳目之所到不是靈山拈花之旨不是少室面壁之機不可以智知不可以識識不可以語言造不可以寂默通直得十方無影像三界絕行蹤正是黑山下活計設使掀翻宇宙打破虛空坐斷

古今高超物表也知未出常情若是通方作者俊快衲僧別有出格神機焉肯循途守轍現前大眾合知時山野遠離蘇城來此凌霄峰頂且道爲什麼邊事良久從前汗馬無人識只要重論蓋代功復舉臨濟示衆云我於先師處三度問佛法的的大意三度喫六十棒如蒿枝拂相似如今再思一頓誰爲下手時有僧出云某甲下手臨濟拈棒度與僧擬接濟便打臨濟大似貧人思舊債者僧渾若餓狗喫絳纒雪竇道臨濟放處較危收來太速醉我落花天借他絃管裏

笑隱訢禪師中天竺入院當晚小參凡夫色礙二乘空礙菩薩色空無礙拈拄杖云拄杖子列列掣掣不入衆數有時十字街頭橫挑布袋有時白雲景裏打雨敲風法隨法行法幢隨處建立有佛處不得住無佛處急走過三千里外一向全提畢竟如何話會卓拄杖云一六三四二直言曲七一桃李火中開黃昏候日出復舉南泉初入院大眾送歸方丈僧問端居丈室將何指示於人泉云昨夜三更失却牛天明起

來失却火師云大小南泉和泥合水中峰則不然忍  
有問端居丈室將何指示於人卽向他道拄杖子今  
日開封

筇庵問禪師金山入院當晚小參機不到處萬境縱  
然境不留時一機獨現機境互用人法變彰機境俱  
泯衲僧向什麼處出氣者裏著得隻眼人人常光現  
前箇箇壁立萬仞所謂據虎頭收虎尾第一句下明  
宗旨你面前無我我面前無你得路填路過橋拔橋  
騎賊馬捉賊刀萬人叢裏揭高標者回不是虛相識  
眨眼流沙萬里遙卓拄杖復舉當山達觀曇顒禪師  
僧問如何是長法身觀云拄杖六尺僧云如何是短  
法身觀云筭子三寸僧云怎麼則法身有二也觀云  
更有方圓在師云古人一期施設可謂四稜踢地仔  
細檢點將來也是隨他語脉展演設或有人問山僧  
如何是長法身拄杖六尺如何是短法身劈脊便打  
怎麼則法身有二也擲拄杖云兵隨印轉將逐符行  
且道與古人是同是別更聽一頌萬疊長江浪裏游  
月隨漁父上扁舟釣竿收放憑吾手不計工程得便

休顧左右云珍重

牧雲門禪師天童入院小參舉雪峰示衆云望州亭  
與汝相見了也烏石嶺與汝相見了也僧堂前與汝  
相見了也新天童則不然小白嶺與汝說法了也隱  
蓋亭與汝說法了也萬工池與汝說法了也敢問諸  
人作麼生是小白嶺說底法作麼生是隱蓋亭說底  
法作麼生是萬工池說底法久參先德試通消息後  
學初機直須仔細

弘覺恣禪師當晚小參人人衣線下各有一坐具地  
生佛未彰早已開闢虛空壞爛湛爾獨存辟之乎大  
能仁一巨刹當許玄度舍宅爲寺之日而此地不加  
增泊呂相國改寺爲宅之時而此地不加減然雖無  
有增減而證明金殿燭與夫華笑玉樓人不大相懸  
隔耶向非德公長者呂氏亢宗盡底掀翻揮千金而  
不吝和盤撥轉化火宅爲清涼則金屋長貯阿嬌碧  
池半流香膩而山僧與諸人又安得經行坐臥燕默  
禪思於此中也然則爾我衣線下地雖則富有萬德  
蕩無纖塵而七情擾擾六賊紛紛苟不直下親自識

取常自守護勤自修葺力自莊嚴則如能仁之廢爲民業者幾希求其頭頭皆實所觸處有風光又安可得者乎不見東山演祖和尚道山前一片閒田地叉手叮嚀問祖翁幾度買來還自賣爲憐松竹引清風清風徐引松竹交加受用則是天然受用畢竟如何得一肩承紹去萬古碧潭空界月再三撈攬始應知復學世尊在靈山會上拈起一枝花以青蓮目普眎人天大衆惟迦葉破顏微笑世尊乃曰吾有正法眼藏涅槃妙心實相無相微妙解脫法門今付與汝汝當護持流通毋令斷絕師云從上祖禪不了至今殃及兒孫則且置且道靈山有付囑無付囑若道有付囑埋沒迦葉師兄若道無付囑爭奈孤負釋迦老子試問諸人作麼生道得出格一句良久喝一喝云千聖不知何處去倚天長劍逼人寒

載住當晚小參提綱

無文燦禪師載住當晚小參去去實不去是法住法位來來實不來世間相常住山僧屈指五載重到東湖荷盡已無擎雨蓋春風猶在柳梢頭無一絲毫去

來相無一絲毫新舊相見則與諸人共見聞則與諸人共聞箇中忽有箇漢出來道無文將常住物作自己用者固有之你也忒煞忒煞啞元來衆中有人在復舉德山小參不答話鈞在不疑之地時有僧出著了也山便打果然僧云某甲話也未問因甚打某甲不識痛癢漢山云你是什處人第二下鐵鎚來也僧云新羅人和聲送出山云未跨船舷好與三十棒雷聲浩大雨點全無大衆大小德山可惜龍頭蛇尾却引者僧向草窠裏頭出頭沒當時待他道某甲話也未問因甚打某甲脚跟下痛與三十何故爲人須爲徹

愚庵及禪師載住徑山小參僧問大慧和尚昔日載住此山有云去是住時因住是去時果去住與果因無可無不可且如何是去是住時因師云五九盡日定逢春進云如何是住是去時果師云飯顆山頭逢杜甫進云去住與果因無可無不可還端的也無師云者裏是甚麼所在說去說住說因說果乃云去是住時因住是去時果去住與果因無可無不可喝者



裏是甚麼所在說去說住說因說果說可說不可雖然如是者裏却有箇好處且道好在甚麼處良久云再理舊詞連韻唱村歌社舞又重新舊拈拄杖大慧祖師來也大慧好處山僧與麼學似彼此共知好則好且道還有爲人處也無愚庵固是無些子好處忝爲大慧嫡孫也要與諸人露箇消息去住休論果與因拈拄杖云一回拈起一回新卓拄杖若知撲落非他物擲下拄杖始信縱橫不是塵復舉乾峰示衆云舉一不得舉二放過一著落在第二師云乾峰與麼道入地獄如箭射畢竟如何二由一有一亦莫守日午打三更面南看北斗

### 爲建寺檀越陞座提綱

密庵傑禪師爲太師循忠烈王陞座心生種種法生心滅種種法滅心法兩忘如搗塗毒鼓聞者皆喪又如大火聚近之則燎却面門悟之者立地成佛迷之者永劫輪迴所以諸佛所說惟說此心祖師所傳惟傳此法靈山會上五百比丘得之自悟本心如夢如幻於夢幻中不見有我人衆生廣額屠兒得之拌下

屠刀叉手云我是千佛一數大集會中大力魔王得之便道我待一切衆生成佛淨盡衆生界空無有衆生名字我乃發菩提心豈不是大丈夫能爲大丈夫事於過量塵沙劫作過量殊勝佛事山僧今日以如是心說如是法普請大地衆生有情無情同入清淨大解脫門與太師循忠烈王爲不請友同一眼見同一耳聞同一受用作廣大殊勝利益不可思議且憑箇什麼道理便能如是利劍拂開天地靜霜刀纔舉斗牛寒復舉世尊因地布髮掩泥獻花於燃燈如來燃燈見布髮處遂約退衆乃指其地云此一方地宜建梵刹衆中有一賢于長者持標插於指處云建梵刹已竟時諸天散花讚言庶子有大智矣師云大眾燃燈指處滴水氷生賢于插時天迴地轉於斯見得古釋迦不先今太師不後其或未然更聽重下註脚芟除荆棘建伽藍七佛常來此處參地久天長功不墜天花時復雨穆穆

### 管待專使提綱

恕中惺惺師謝專使上堂達磨大師十萬里西來要

作箇馳書達信漢及乎面對梁王盡力只道得箇不  
識拈拄杖有賓有主有禮有樂手面分開白月圓頂  
門撼動黃金鐸

石屋瑛禪師謝專使并三塔和尚首座都寺上堂睦  
州峻臨濟喫棒不是好心楊岐逼慈明晚參不是好  
心趙州訪道吾不是好心福源專使逼人住院且道  
是好心不是好心珊瑚枕上兩行淚半是思君半恨  
君

月江印禪師謝育王專使上堂舉東山謝積善偈云  
積善山中有膽如天大敢持居士書來覓空王座  
跨門不肯休看了方知道歸語晉江人大蟲裹紙帽  
雲峰亦成一偈玉几山人老眼光燦燦遠持教曆  
文與我長柄杓柄長把不下還歸舊處著寄語甬東  
人莫莫莫莫莫

### 留請兩序提綱

保寧勇禪師留請兩班上堂橫身荷衆不顧危亡割  
起布裙入泥入水分毫上定當升合裏論量折東籬  
補西障若解與麼循塗守轍也可當風抵浪雖然如

是猶未是咬猪狗底手脚作麼生是咬猪狗底手脚  
要會麼殺人不眨眼氣宇大於王

天目禮禪師上堂東西兩序左右十人同建法幢共  
扶叢社且道文殊維摩還來證明也無月明照見夜  
行人擊拂一下

雲外岫禪師留請兩班上堂以拂子打圓相云摩訶  
衍法離四句絕百非又打一圓相云禮之用和爲貴  
先王之道斯爲美又打一圓相云摩尼珠人不知如  
來藏裏親收得諸人還見麼所見不同互有得失天  
童者裏毋固毋必

筭庵問禪師留請兩序陞座從上來事只在而今祇  
貴當人直下承荷更莫遲疑迴避不得處手眼通身  
目睛定動時白雲萬里扶持大樹接引後生拶入紅  
爐撥開烈焰方能發大機展大用立人天標準爲法  
社弘規一搥毒鼓拄杖勒回擲金剛圈拋栗棘蓬續  
臨濟將殘之緒起少林未墜之宗大非細事棒罰錢  
甘出院知恩方解報恩賊來須打客來須看等是共  
行山下路嶺頭須自看風煙來日不曾請且莫展炊

巾說甚如來禪祖師意一口吞盡何處更有閒言剩語在高聲喚侍者云分明記取三十年後此話大行莫有不甘者麼拈拄杖云龍得水時增意氣虎逢山勢長威獐下座

請兩序上堂隔山見煙便知是火隔牆見角便知是牛伶俐漢一達到手便能卷舒立方外乾坤縱橫挂域中日月多處添少處減明頭合暗頭合進退各有其時東西不失其序如斯標格足可觀光是者般人說者般話

### 報謝出入提綱

雪竇顯禪師到秀州百萬道者備茶筵請陞座山僧此者承鄞江太守之命俾赴雪竇住持再至嘉禾彌增嘉幸仍承百萬道者曲賜周勳仰荷之懷無以忘也兼勞廣命碩德抑令舉唱宗乘況達士相逢非存目擊若云言中有嚮句裏呈機猶曲爲中下之流向本分衲僧遠之遠矣祇如適來僧問教外別傳一句對云三生六十劫諸人還知落處也無且驚池鷺嶺海甸庵園三百法會之中甚處有者箇消息所以道

三世諸佛不能自宣一代時教詮註不及除非知有莫能知之久立衆慈伏惟珍重

大慧杲禪師到臨安縣當道請就海會寺祝聖開堂佛法至當不在問答處直饒問似普慧雲興答如普賢瓶瀉若不識其要妙只成戲劇之談於道有何所益據實而論盡是癡狂外邊走所以大覺世尊爲一大事因緣故出現於世以種種微密善巧方便成就衆生開示悟入佛之知見起道樹詣鹿苑先爲憍陳如等轉四諦法輪四十九年三百六十餘會隨衆生根器所宜次第開演令其各聞法解悟出離生死末後臨般涅槃於人天百萬衆前拈華普示惟金色頭陀破顏微笑遂云吾有正法眼藏涅槃妙心分付於汝自是西天四七東土二三天下老和尚各各以心傳心相續不斷若不識其要妙一向溺於知見馳騁言詞正法眼藏流布豈到今日到老裏須是箇不求諸聖不重己靈底出格道人方能荷擔此箇大事且那箇是出格道人不見昔日江西馬大師遣西堂智藏馳書上徑山國一禪師國一開緘見一圓相遂

案筆對智藏於圓相中點一點智藏罔措者箇豈非格外消息若作格外商量又却不是諸人且作麼生辯明時中如何受用適來知縣學士疏中有言馬師圓相遠緘千里之清規欽老機鋒點破一時之群惑群惑既破則人人脚跟下大事洞明大事既明則十二時中折旋俯仰彈指警欬無非佛之妙用既是佛之妙用則不從人得既不從人得亦不在已躬既不在已躬則內不放出外不放入既外不放入則外息諸緣內不放出則內心無喘既內心無喘外息諸緣則一切智通無障礙既無障礙則一切智智清淨無二無二分無別無斷故正當恁麼時不是世間法亦非出世間法據取占波國與新羅鬪額豈是分外雖然如是更有事在敢問諸人只如忠國師爲甚麼却道欽師猶被馬師惑卽今莫有定當得出底麼若定當得出許你諸人盡是出格道人其或未然徑山據款結案去也良久云在舍只言爲容易臨筌方覺取魚難

到寧國衆道友請陞座只者些兒住處是吾生長之

地別去二十七年日月疾如彈指走遍天下叢林意圖出離生死報答父母重恩不是等閒遊戲平生得箇剛強方與佛祖出氣今朝依舊還鄉親戚百無一二道是昔人猶非道非昔人猶是莫作是非論量透過世間出世殷勤普勸諸人急著眼睛看取

師子端禪師到華亭衆請上堂靈山獅子雲間哮吼佛法無可商量不如打箇筋斗便下座

箸庵問禪師到寶興上堂卓拄杖云昔日溪山不改舊時面目宛然分明一段家風舉處全超途轍孤迥迥地卓絕寧彰七縱八橫了無畔岸不落今事門頭亦非威音那畔正如獅子一吼衆响皆絕好不資一毫醜不資一毫天人無路拱手歸降截群機思議之端挫物理不齊之軌超宗異目獨振宗猷共躋齊肩紹隆統系若不是恁麼人未免瞻前顧後所以道若向佛祖行說不到處踞地方敢向他佛祖頂額上提持山僧二十年前向者裏打失一隻眼直得上無攀仰下絕已躬倒握太阿孤行湖海今日被衆檀護逼勒回來依然山是山水是水人是人物是物男是男

女是女僧是僧俗是俗且道還有爲人處也無還鄉一曲乘時唱會有知音暗點頭

棲水大善寺卓去病仲期諸護法請陞座師云談玄談妙羅穀一重說道說禪白雲萬里三乘十二分教經有經師論有論師內聖外王百家諸子自是諸檀獲家常茶飯臨濟喝德山棒火上添油雲門餅趙州茶眼中著屑且道山僧今日將甚麼爲人好彼自無瘡勿傷之也雖然如是拈拄杖云拄杖子忽然踴跳出來道今日一會若緇若素若老若少咸深諦信願聞法要請和尚普爲大衆廣開方便令諸有情各各信入卓拄杖云還知麼水歸大海波濤靜雲到蒼梧氣象閒便下座

玉林琇禪師到彌勒寺上堂卓拄杖云報恩新長老本來無住握根拄杖倒用橫拈把箇斗笠遮却一切人眼孔東西南北少有識者到者裏遇著同門老道兄瞞他不得被推向人前要某舉揚先師現成句子召衆云擲箇蒲團說法隨處驚喝一喝卓拄杖一下復倚杖云今日陞座於彌勒殿中更爲大衆舉則古

話當初布袋和尚亦與新報恩一般行脚常自述行由云一鉢千家飯孤身萬里遊後來爲慈悲之故更有落草之談云彌勒眞彌勒分身千百億時時示時人時人自不識咄哉者阿師慈則大慈恪亦少恪新報恩今日既與大衆有緣同此一會一發打開布袋更不露頭藏尾去也大衆諦聽彌勒眞彌勒分身千百億額橫兩道眉面豎一箇鼻阿呵呵笑不輟掀起嘴唇片片皮露出牙齒許多骨展手云大家施我一文錢更有一句爲君說十箇指頭八箇了誰人平易誰奇特擲拄杖下座

#### 報謝回寺提綱

楊岐會禪師參駕部歸上堂釋迦老子爲先鋒彌勒大士爲殿後衆中還有著力者麼出衆來與雲蓋著力看如無雲蓋自逞神通去也三五日出入相看首座大衆你且道於者裏還有隔礙底道理麼上座僧堂裏展鉢時與上座同展睡時與上座同睡立地時與上座同立地長者長法身短者短法身彌勒運用與去來何處有間隔雖然如是你且道雲蓋在船頭



在船尾衆中還有靈利底衲僧覷得見麼良久云人盡道平地險登樓方覺遠山青參

眞淨文禪師出州回上堂山中城裏事不相知有一句子未敢泄機候遍到寮中一一當面分付直是臨時各各自著精彩莫教蹉過

出州回上堂古人道去去實不去途中好善爲來來實不來路上莫虧危古人見不透脫強生節目惑於後人洞山卽不然來但言來去但言去有什麼過老僧入州途中晚便住曉便行又善爲箇什麼歸來路上困便歇饑便飯又有什麼虧危今復林下與諸道人相見又有什麼事參退喫茶

出外歸上堂歸來閏二月間寂寶山中城隍耳目盡塵勞萬事空春水綠野花紅須信禪家道莫窮信手拈來一枝草臨機生殺任西東

出外歸上堂古人所謂有物流動人之常情情若不生則老僧出入動靜無去來之作自然人事周徧又何妨遊戲神通藏法喜禪悅樂則與大衆同住如來寂滅海究竟覺喝一喝下坐

保寧勇禪師莊上回上堂記得藕湖和尚一日點淨後不赴堂遂入方丈裏睡齋後知事來白云和尚何不赴堂藕湖云莊上喫油糍來晚間莊主到云今日謝和尚喫油糍大衆爲復是神通妙用本體如然平地上剛然捏怪既不與麼又作麼生良久云者箇公案一任天下人批判保寧也無神通妙用亦無宿命他心院在江寧府莊屬宜興縣水路一千陸路四百孤舟野渡處處經過堤柳巖花時時間發前月出去昨日歸來莊上也不曾喫他油糍祇是炊白米飯煮野菜羹療飽充饑隨家豐儉然雖如是更有一般堪笑事米中粒粒偏生蟲參

出歸上堂霜風浩浩葉紛紛曉入深村野老門相見但知俱默坐更無一事可談論良久云入山擒虎易開口告人難

雪竇顯禪師歸寺上堂甚生標格還知也無諸禪德祖佛不能宣傳天地不能覆載二乘聞之膽裂十地到此魂驚其或達士切磋頗逢決戰一撈一捺路露風規句滯則岳立磨空源迷則雲橫布野所以先聖

道一言纔學千車同轍該括微塵猶是化門之說你  
衲僧合作麼生覲自知時便下座

列祖提綱錄卷第二十七

列祖提綱錄卷第二十八

武林十八澗理安禪寺住持婁東行悅集

報謝回寺提綱

五祖演禪師郡中同上堂船上無散工時時事不同  
昨朝城郭裏今日白雲中且道不動尊在什麼處自  
云氣似韜袋令人可愛

密庵傑禪師府中歸上堂一出入一動一靜酒肆  
茶坊紅塵鬧市猪肉案頭蒸然築著磕著如虎帶角  
凜凜風生及乎歸來相見依舊眉毛烏峰嶺地且道  
是佛法耶世法耶記得修山主云具足凡夫法凡夫  
不知具足聖人法聖人不會卓拄杖云一不知二不  
會東西南北轉霧縠

夢庵信禪師出外歸上堂多日出郊說盡天寒日暖

今朝歸院又豈免漢語胡言既知句句見諦朝宗方  
信道言言斬釘截鐵若也領略去說者聽者功不唐  
捐苟或未然乃主乃賓二俱失利下座

元叟端禪師城歸上堂去時夏暑侵衣熱歸日秋風  
滿面涼彈指聲中便差別百年能得幾時長

城歸上堂華街柳巷恢張本地風光酒肆茶坊突出  
衲僧巴鼻人人八面玲瓏箇箇十方通暢何必覺城  
東際始見文殊樓閣門開方參慈氏拈拄杖云三箇  
童兒抱花鼓莫來闌我毬門路

楚石琦禪師省中把茶同上堂舉風穴在郢州衙內  
上堂云祖師心印狀似鐵牛之機去卽印住住卽印  
破只如不去不住印卽是不印卽是時有盧陂長老  
出問某甲有鐵牛之機請師不搭印風穴云慣釣鯨  
鯢澄亘浸却嗟蛙步輾泥沙陂佇思穴喝云長老何  
不進語陂擬議穴打一拂子云還記得話頭麼試舉  
看陂擬開口穴又打一拂子牧主云將知佛法與王  
法一般穴云見箇什麼道理牧主云當斷不斷反招  
其亂穴便下座師云鑿石火閃電光搆得搆不得未

免喪身失命風穴壁立千仞坐斷廬陂舌頭廬陂若是箇人未到牧主檢責纔見他道祖師心印狀似鐵牛之機呵呵大笑若擬議拍一拍便行無端請師不搭印倚他門戶傍他牆剛被時人喚作郎如今有人與風穴作主我要問他心印在什麼處

同諸山探院官同上堂舉石門聰和尚入州看官路逢延慶長老問云中路相逢一句作麼生道門云某甲禮拜和尚有分明日到院茶話次慶云昨日聞學士說新石門和尚和尚久在石門爲什麼却新去門云腦後合掌問云來時無物去時空二路都迷且如何得不迷去門云秤頭半斤秤尾八兩師云石門道某甲禮拜和尚有分延慶著賊也不知要識石門麼李靖三兄久經行陣雖然如是未免倚勢欺人

探元帥同上堂兵隨印轉紀信登九龍之輦將逐符行霍光賣假銀之城然則有符必有將有印必有兵兵在者裏印在什麼處良久云報恩今日小出大遇初冬回寺上堂一毫吞却山河大地則易山河大地吞却一毫則難也不難也不易鋪箇破席日裏睡料

想上方兜率宮也無如此日炙背復舉青羅衾祿直上寒松之頂白雲淡泞出沒太虛之中萬法本閒而人自鬧黃龍云鬧箇什麼師云莫道無事好

朝京同上堂風不鳴條雨不破塊民不失所路不拾遺正恁麼時好箇太平時節山僧近承使命遠屆上京面對龍顏親聞詔旨風雲慶賀千載一時及此還山將何報答也不出者箇時節諸佛出世祖師西來天下老和尚直指曲說總不出者箇時節所以道欲識佛性義當觀時節因緣時節若至其理自彰且作麼生是自彰底理皇圖齊北極聖壽等南山

石屋琪禪師回院上堂老枯偷閒去半年祖翁田地草芊芊歸來懶更重還債犁耙春風又上肩是即是祖禪不了難逃宿業拘牽四蹄耕白水兩角指青天拍膝一下云可惜無人知此意風前令我憶南泉愚庵及禪師出莊歸諸知客上堂昨日過南莊今朝又東郭動靜與去來何曾有間隔然動則涉塵勞之境靜則沉昏醉之鄉動靜雙泯則落空亡動靜雙行則顯預佛性七十三八十四途路之樂不如在家喝

一喝云誰在畫樓沽酒處相邀來喫趙州茶

無文璨禪師入浙歸上堂一出五六月往返三千里  
信脚踢得著信手提得起不曾輕示人深藏懷袖裏  
歸來普請大眾做箇入門歡是甚麼浙東山浙西水  
了庵欲禪師上堂入城思量上堂歸來舉似大眾只  
恐聽事不真未免喚鐘作甕便下座

南石琇禪師京都回兼謝書記知事上堂動若行雲  
止猶谷神既無心於彼此寧有象於去來山野去年  
五月初赴召入文淵閣圈點永樂大典出入禁庭波  
波挈挈繼預大會蒙賜華嚴大經動經八月回來姑  
蘇訪舊又過兩月及到山中恰值仲春且道有心於  
彼此耶無心於彼此耶有象於去來耶無象於去來  
耶靈利衲僧未言先領未舉先知便能伸出佛手抹  
過祖關滅却老胡種族扶起千古叢林雖然國恩深  
重言思莫窮敬成一偈以述鄙懷經從內府特頒賜  
人自九重城裏歸五髻峰頭春日暖山林泉石盡光  
輝

筌庵問禪師還山上堂威音王已前涅槃心易曉威

音王已後差別智難明如何是涅槃心今日雨昨日  
晴如何是差別智昨日晴今日雨忽有箇衲僧出來  
道和尙怎麼說話於唱教門中則不無未夢見衲僧  
本分事在且作麼生是衲僧本分事歸來庭院閒方  
得嫩綠駸駸已過牆

牧雲門禪師參假歸上堂去去實不去途中好善爲  
來來實不來路上莫虧危山僧出外五六日恭惟頭  
首執事大眾尊慈各各萬福記得前晚在檀越家一  
陽將復未復之際桑林閒曠星漢寥廓幽懷頗愜不  
覺口占半偈此夜月殊好輕雲薄似秋說猶未了只  
見大風從西北來忽然一陣大雨轟兩箇霹靂未審  
此間還有者箇消息麼有僧便喝師云爲汝徹因便  
下座

### 白衆出隊提綱

五祖演禪師白衆出隊上堂明日足馬單鎗爲國出  
戰得勝回戈之日滿路歌謠大眾作麼生是歌謠一  
曲乃云囉邏哩囉邏哩還有和得麼良久云鴛鴦繡  
了從君看莫把金針度與人

圓悟勤禪師出隊小參開佛祖鑑鑰用向上鉗鎚擬議不來則千里萬里當鋒薦得則坐斷要津此猶是化門之說若確實而論山僧有口無說處諸人有耳無側聆處乃至日月未足爲明虛空未足爲廣乾坤未足爲大萬象未足爲衆到者裏一搓一捺一挨一拶要見本分事且問如何是本分事大千沙界海中瀉一切聖賢如電拂

夢庵信禪師出隊白衆上堂長街短巷裏轉大法輪須是大家出手酒肆魚行中建立佛事不可獨自趨前如今同共入鄽中願見懽喜牟尼寶積佛下座

密庵傑禪師出鄉上堂六月炎炎如火熱誰知冷處勝冰雪紅塵鬧市等箇人七佛軌儀都漏泄報龍王須福護大千捏聚爲檀度一言割住萬機通自然光壯少林風復舉世尊勅阿難持鉢公案師云大小世尊被阿難輕輕靠著未免喚鐘作甕

月江印禪師七月旦行道上堂三十年來住子胡二時粥飯氣力纔無事下山行一轉借問時人會也無子胡大似年老心孤雲峰則不然三四年來住道場

二時粥飯氣力强普請下山行一轉萬頃田疇耙耪香

玉林琇禪師白衆出隊上堂西天佛祖多行化而不興道場東土知識多興道場而不行化雖是殊方合天仔細簡點將來也是各守一隅不善通變新報恩則不然興道場不妨隨時行化隨時行化原爲興道場且遣新報恩是什麼人有恁麼力量惟憑一點報恩心身命全將奉塵刹拈杖竟行

劍門分禪師行化上堂架造劍門庵老僧自行疏慳鬼絕蹤由施主開門戶佛國共安居大哉永堅固利益無有窮古今無別路多時不下山明日下山去從他富與貧拈出無回互下座

五祖演禪師出隊歸上堂出隊半箇月眼不見鼻孔忘却祖師禪拾得箇骨董且道向什麼處著一分奉釋迦牟尼佛一分奉多寶佛塔

緣化回上堂白雲海會院足水兼柴炭惟少麻與麥衆人皆盡見親去化檀那疎却阿羅漢且望大慈悲一一看佛面大衆佛身充滿於法界且作麼生看我



道不隔一條線

佛眼遠禪師出隊歸上堂迎日出門去已覺披煙霧  
冒月望山歸重露濕禪衣心悄悄步遲遲無孔遂再  
三吹哩哩囉囉哩遊子乍聞征袖濕佳人猶唱翠  
眉低君更聽莫狐疑是何曲歸堂去

大慧杲禪師出鄉歸上堂舉肇法師道動若行雲止  
猶谷神既無心於彼此豈有象於去來修山主道去  
去實不去途中好善爲來來實不來路上莫虧危師  
云者二老漢惜乎不與徑山同時若也同時便與縛  
作一束送在錢塘江裏何故古今山河古今日月古  
今人倫寒則普天普地寒熱則普天普地熱去去來  
來動動靜靜又有什麼過或有箇衲僧出來道徑山  
怎麼說話也好縛作一束送在錢塘江裏山僧却熱  
炙盞子點茶與伊喫爲什麼如此大丈夫兒捋虎鬚  
豈是分外

出鄉歸上堂舉五祖師翁出隊歸示衆云出隊半箇  
月眼不見鼻孔失却祖師禪拾得箇骨董且道向甚  
處著一分奉釋迦牟尼佛一分奉多寶佛塔徑山法

孫出隊八十餘日鼻孔常與眼睛相見亦無祖師禪  
可笑亦下曾拾得骨董既無骨董則無以奉釋迦牟  
尼佛亦無以奉多寶佛塔畢竟得箇什麼夜深靜水寒  
魚不食滿船空載月明歸

應庵華禪師出隊歸上堂透過鐵壁銀山紅塵鬧市  
全彰古佛家風經過酒肆茶坊突出鶻僧巴鼻冷笑  
諸方寒灰枯木坐在無魂必死之地妙嚴有些子禪  
通爲汝諸人出氣卓拄杖云三十年弄馬騎却被瞎  
驢受記又卓一下下座

密庵傑禪師出鄉歸上堂持鉢去持鉢歸草鞋痕所  
通消息玲瓏八面盡光輝遊魔宮入虎穴當機撞著  
惡聲頭直教心地盡休歇且據箇什麼道理便乃如  
是老不以筋力爲能

天目禮禪師出隊歸上堂移舟行化水雲鄉逆順風  
波已慣管今日歸來湖上寺更無一法可商量既無  
一法商量且將什麼供養大衆僉任袁柳豐鮑史唐  
雲外岫禪師出隊歸上堂鬧市紅塵裏有鬧市紅塵  
裏佛法深山巖崖中有深山巖崖中佛法山僧昨日

出城門鬧市紅塵裏佛法一時忘却了也行到二十里松雲便見深山巖崖中佛法大衆且道如何是深山巖崖中佛法良久云白雲淡泞出沒太虛之中青蘿黃緣直上寒松之頂

師子端禪師化緣回上堂元豐七年中秋上旬忽因四大相逼思昔日之願心換寶殿之大柱修僧堂之正門箱無一寸之帛囊無挑藥之金不免入城乞化徧叩豪門莫非人人歡喜處處相忻盡道承長老親自到及拈捨五文十文纔問求千錢百貫一似抽筋蓋是我福緣淺薄莫怨他人自知蒲繩子短爭嫌枯井源深不如早歸巖畔作箇閒人觀月色之清輝望孤鶴以爲隣誓弘般若報佛深恩奉勸後代兒孫莫打此般鼓笛聒噪他人

月江印禪師行化歸上堂有佛處不得住無佛處急走過三千里外逢人不得錯舉趙州老人大似抱橋柱洗澡把纜放船山僧一出四十餘日有佛處與他雖破卦文無佛處也曾勘過歷了三州五縣逢人也曾錯舉來只是土曠人稀知音者少摘楊花摘楊花

青山忽憶便歸去塵世要看還下來

重建上塔緣化歸上堂鐵輪王使鬼神功靈塔飛來鄧嶺東有客不隨流水去磬敲疎雪細雲中乃豎拂子云看看大權菩薩歸也與耶舍尊者只今在山僧拂子頭上相見尊者云菩薩一出月餘四大輕安否世事可忍否衆生易度否菩薩云你在屋裏受人天供養坐致太平茄子瓠子那得知阿育王聞得出來道你二人何必之乎者也若無我釋迦如來真身舍利寶塔縱有神通妙用也無施展處三人撫掌呵呵大笑且道笑箇什麼夜靜水寒魚不食滿船空載月明歸

佛朗性禪師化緣歸上堂一切破慳貪真人赤骨律生死爲活計赤手擎飛日撲碎鐵心肝推倒銀山壁金穀寶鈔綾羅緞匹索取無厭眞白拈賊囊括一布袋大地總收拾不觸成我法堂且要散汝牢宅化得衆生世界空管甚檀度波羅密擲拄杖下座

修蓋萬佛閣重裝佛像化緣歸上堂不動雙足踏遍娑婆壁立萬仞和和囉囉拋三放兩減少添多聖主

冥符剎土恩波十方圓鑑融徹太和大衆會麼卓拄杖云化得大千無一物情與無情證佛陀

南石琇禪師行化歸上堂教中道無所從來亦無所去故名如來山僧出去已得兩箇月歸來恰值殘冬且道有去來相也無衆中忽有箇英靈底出來道長老長老者箇是三家村裏十字街頭欺謾胡漢誑說閭閻底說話人天衆前不勞拈出山僧便須分付明窓下如法安排何故不貪香餌味可謂碧潭龍

### 立聖像胎骨法語

無用寬禪師立金剛胎骨一對大漢生得大善鼻孔吞却須彌驚得虛空慄戰良久露捉住清風剝了皮立伽藍胎骨會得瞿曇那一通幾手蹉過主人翁本來骨格天然別永護伽藍振祖風

立羅漢胎骨十六應真萬斧千斤銅頭鐵額鵠眼鷹睛喝一喝云豎起脊梁火急翻身雨順風調祝聖恩立佛胎骨潦倒瞿曇不識羞通身擔版逞風流香嚴寺裏重打起坐斷毗盧頂額頭

### 入聖像腹臍提綱

應庵華禪師入羅漢五臟示衆云黃面老人乾屎橛參隨一火爛泥團心肝腸胃皆條直蔬飯茶華照膽寒佛法雖然未夢見神通却許入雲端應須痛念歸宗寺時復持盂下翠巒

密庵傑禪師寶鑑大師請入金剛五臟師指金剛云賢劫千佛數末後最慙慙倒握降魔杵高標利物拳心肝無屈曲腸胃有區分神通願力雖無盡且爲山僧護法門

佛朗性禪師靈山一會湧壁觀音羅漢祖師諸天聖衆同入腹藏上堂實際理地不受一塵萬行門中不捨一法如是薦得摩醯三眼高低普觸無法不圓無功不周坐大道場應微塵國演色演空爲一切有情轉大法輪淫坊酒肆奴呼文殊普賢柳巷花衢婢使釋迦觀音祖師羅漢到處做驢做馬諸天龍神隨身執鞭墜甕無明三毒忤訶叱熱喝噴拳常逼拶盡十方虛空撮來置毛端極無邊法界一撚投于針鋒有時諸佛菩薩祖師羅漢無自無他無取無捨無彼無此無內無外法法全彰正體頭頭妙化莊嚴普薰諸

聖凡平等真寂滅共成無上覺圓明一切智其或未然更聽一偈大千俱入如來腹銷盡衆生界卽休過現未來同授記萬象森羅笑點頭卓拄杖下座

聖像開光明提綱

大慧杲禪師江給事請開佛光明師執筆云教中道清淨慈門刹塵數共生如來一妙相一一諸相莫不然是故見者無厭足又道如來眼有大人相名自在普見雲以衆妙寶而爲莊嚴摩尼寶光清淨瑩徹普見一切皆無障礙既然如是爲甚麼却妄他人點眼還有道得底麼若也道得非獨爲黃面老子出氣亦使徧法界衆生悉沾利益若道不得聽取一頌學頭忽覩明星現因茲病眼見空華遂以筆點云今日還渠舊光彩碧眸炯炯照塵沙

應庵華禪師塑佛開光明示衆云達之居士以無礙智力洞明吾佛相好以無礙辯才成就一切奇特殊勝不可思議解脫門設使虛空爲口江海爲舌盡塵沙劫讚歎而莫得其彷彿矣且道釋迦老子是有光明可開是無光明可開若道有光明可開歸宗當墮

五無間獄若道無光明可開盡乾坤大地無一人發菩提心到箇裏苟非契證從上諸佛妙心又焉能觀瞻如來勝妙頂相正當恁麼時如何當陽拈出眞消息豈教辜負釋迦文

法舟濟禪師精巖寺佛開光示衆南寺佛點眼北寺佛放光若作奇特商量大似白日著鬼咄且置是事只如教中道佛眞法身猶若虛空應物現形如水中月又云佛身充滿於法界且道者光明向甚麼處點卽是以拄杖作點勢云今佛放光明助發實相義南石琇禪師粧達磨百丈圖一三祖師像完開光明拈筆示衆云達磨大師與大智國一卽今在毫端上現大人相大衆還見麼若道見向甚麼處見若道不見蹉過三大祖師畢竟作麼生海神知貴不知價留與人間光照夜

元叟端禪師爲佛開光云我如來以清淨天眼普觀大地衆生去劫已前來劫已後纖塵無有障礙徑山今日因甚爲他重新點出只恐諸人昧其所自千巖長禪師檀越樓清翁一得建山門塑金剛開光

明示衆以筆點一點云者一箇莫道不曾相識好又點一點云者一箇却是樓一得外護山門內承佛記金剛正體洞徹十虛大用現前威而不猛有爲界中不壞無爲之相無爲界上不宰有爲之功爾能借我神通我亦助君精彩所以道眼眼相觀面面對灼然不在筆尖頭自有光明動天地

檀越樓文翁造殿又塑佛開光明示衆云德山拆卸殿丹霞燒却佛樓文翁造殿又塑佛且道拆卸燒佛底是起殿塑佛底是以筆點云者裏見得靈山一會儼然未散若也不見是真精進是名眞供養如來若要分明更下註脚作福者作福造罪者造罪張公喫酒李公醉總不干無明一星子事乃呵呵大笑天衣聰禪師因裝普賢大士開光明次師登梯秉筆顧大衆曰道得卽爲下筆衆無對師召侍者與老僧牢扶梯子遂點之

笑隱訢禪師開佛光明示衆云體虛常照現毗盧頂後神光妙應無私開舜若身中正眼密覆千華羅網光生七寶金山九重之尊貴難名萬德之莊嚴莫及

而憫物願深利生情急示同居士隱尊特軀一身變現百千萬億應身八十相好塵塵具足一目普攝八萬四千寶目八百功德法法圓通恢恢焉有願皆從晃晃焉無幽不燭且道今日因甚却要重新點眼於斯明得便見欽奉聖旨鑄造佛像圓成臺官慶讚皇恩佛恩報畢倘或未明更看山僧筆頭點出頂門正眼明如日觀面當機見得親正法萬年宣聖化山河國土現全身

落庵問禪師盛川到岸菴佛開光請小參佛眞法身猶如虛空應物現形如水中月拈筆云大衆此豈不是法身作麼生說箇應物現形之理莫是秋水長天落霞孤鶩是應物現形麼莫是鐘魚互答梵唄交加是應物現形麼莫是緇素駢臻人天聚會是應物現形麼若也是去則一切色是佛色一切聲是佛聲一切若色若聲若有若無若隱若現咸是佛光之所顯煥諸人於佛光中影現諸佛于諸人影中發光彼彼無雜彼彼無壞彼彼圓滿彼彼充足又教山僧向什麼處點出若不點出諸人有眼共見有耳共聞若點



出諸人又向什麼處見若以眼見眼不可見若以耳聞耳不可聞若以智知智不可知若以識識識不可識山僧不惜眉毛爲諸人竭力去也乃點云普令今佛放光明助發如來實相義喝

像成檀越請提綱

應庵華禪師檀越裝佛上堂云正眼洞明十虛無間直下坐斷情塵意想不落玄妙機關只向生佛已前識取本來面目不是心不是佛不是物恁麼中不恁麼剗草除根不恁麼中却恁麼同生同死正如壯士展臂不假他力又如師子王游戲得大自在有時拈一莖草作丈六金身有時將丈六金身作一莖草亦能殺人亦能活人正恁麼時歸宗如何折合百寶莊嚴無相身一超直入如來地復舉昔毗藍園裏摩耶聖母左手攀枝釋迦老子右脇降誕九龍吐水沐金軀四顧周行各七步作大獅子吼天上天下唯我獨尊後來雲門大師道我當時若見一棒打殺與狗子喫却貴圖天下太平師云達之居士打開無盡寶藏運出自己家珍裝嚴釋迦老子且道與雲門是同是

別若道是同一人打殺一人成就若道是別佛法豈有兩般者裏覷得透去堪爲如來種草苟或未然山僧有一頌舉似諸人跛脚雲門言打殺達之居士示全身當陽出格無多子報佛深恩只兩人

檀越張子明裝佛慶懺請小參示衆云如來密語初不覆藏觀體無私當陽顯示祇如一大藏教從甚處得來非頂門具眼肘後有符又安能洞明者一著子祇今坐立儼然各各項天立地含齒戴髮且作麼生說箇初不覆藏底道理真是一動一靜告往知來是麼莫是折旋俯仰周徧一切處是麼莫是一語一默坐臥談笑是麼若把者箇作不覆藏底無異吹毛覓縫撥火求漚殊不知正是業識茫茫無本可據豈不見長沙和尚道學道之人不識真祇爲從前認識神無量劫來生死本癡人喚作本來人是他古人見得如來密語徹底無疑等閒拈一機示一境無不透頂透底終不向夢幻殼子裏顛倒肉團心識上捏怪也又有僧問古德學人有一問在和尙處時如何古德云設有也斬爲三段看他得底人趨出來不妨烜赫

何嘗有一絲頭許與學者作道理直是乾曝曝地如一座須彌山相似世間一切逆順境界搖撼不動善惡因緣籠罩無門豈不是大丈夫格外道人也敢問諸人祇如釋迦老子未入母胎時三十二相八十種好又向什麼處塑裝者裏見得徹去便見得大心檀越張子明同妻趙氏裝嚴釋迦老子最初一念起處祇如子明未起裝嚴最初一念釋迦老子又在甚處切忌向夢幻穀子裏顛倒肉團心識上捏怪到者裏莫問釋迦老子如之若何但直下了却最初一念此念若了未入母胎底也不是入母胎後底也不是從母胎出底也不是塑底也不是裝底也不是最初一念也不是了却最初一念也不是然後張子明與妻趙氏男宗朝舉家眷等却有與釋迦老子相見分既是從頭俱不是了又向什麼處相見還委麼將此身心奉塵刹是則名為報佛恩喝一喝下座

無用寬禪師金牛離相寺塑佛請陞座大寶華王座從地湧出法報化三身自天降下大眾釋迦老子來也急著眼看靈山一會泥團土塊明月清風威音劫

外喝一喝云離相離名萬年千載下座

楚石琦禪師施主裝佛上堂舉昔有秀才問長沙某甲曾看千佛名經百千諸佛但見其名未審居何國土長沙召秀才才應諾沙云黃鶴樓崔顥題後秀才還會題否才云不曾題沙云得閒題取一篇好師頌云百千諸佛但聞名國土從來作麼生黃鶴樓中詩一首任教今古競頭爭

鑄佛上堂僧問如何是金佛不度鑄師云填溝塞壑進云如何是木佛不度火師云正是時進云如何是泥佛不度水師云東西南北十萬八千乃云泥佛浸了也木佛燒了也金佛鎔了也真佛勘破了也趙州老漢趨出院了也一去更不再來咄

造萬佛上堂夜夜抱佛眠喚什麼作佛朝朝還共起莫錯認定盤星起坐鎮相隨畢竟是阿誰語默同居止非一亦非二纖毫不相離如身影相似只者一段虛空多少人摸索不著任是精金百煉巧計千般鑄也鑄不成雕也雕不就傳大士纔開橐籥便見精神直得鑑地輝天騰今耀古雖然也祇寫得一半你諸

人從朝至暮陞堂入戶開單展鉢本來面目有甚掩  
處還見麼如今若不究根源直待當年問彌勒

雕千手千眼大悲像上堂舉南泉喚院主主應諾泉  
云佛昔九十日在忉利天爲母說法時優填王思佛  
請目連運神通三轉攝匠人往彼雕佛像只雕得三  
十一相爲什麼梵音相雕不得院主問云如何是梵  
音相泉召院主主應諾泉云賺殺人師召衆云若議  
得梵音相應以佛身得度者卽現佛身而爲說法乃  
至應以天龍夜叉乾闥婆阿修羅迦樓羅緊那羅摩  
睺羅伽人非人等身得度者卽皆現之而爲說法且  
道說什麼法便下座

鑄千手大悲像上堂據教中道衆生妄見不離前塵  
開眼見明明不是明合眼見暗暗不是暗在佛殿前  
過不見佛殿後事在佛殿後過不見佛殿前事皆屬  
妄見前塵所遮若離前塵無佛可見約永祥見處大  
悲菩薩本自無身亦無手眼有底便道我會也我會  
也打二十九棒趂出留一棒自喫莫有人下得手麼  
如無今日失利舉麻谷問臨濟大悲千手眼阿那箇

是正眼濟云大悲千手眼阿那箇是正眼速道速道  
谷拽濟下禪床谷却坐濟云不審谷便喝濟拽谷下  
禪床濟便坐谷便出去濟歸方丈師云二大老主賓  
互換縱奪可觀如猛焰燒空忽雷震地相似雖然與  
他大悲千手眼有何交涉只見波濤湧不見龍王宮  
雪關閭禪師旃檀像成檀越請上堂趙州云我有時  
將一莖艸作丈六金身用有時將丈六金身當一莖  
艸用曹山問僧云佛真法身猶若虛空應物現形如  
水中月作麼生說個應底道理僧云如驢覷井山云  
道也太煞道祇道得八成僧云和尚作麼生山云如  
井覷驢山僧道善塑無如曹山善彫無如趙老不露  
些子刀痕真個手段高妙若會得如驢覷井便曉莖  
草化作金身若會得如井覷驢便曉丈六金身當草  
目健連枉運神通優填王徒煩匠巧丹霞正令劈頭  
行誰道子孫賢不肖然則理無二般爭奈法無一向  
丁蘭刻木事親鍼刺血流異樣忉利天宮轉下來像  
迎佛兮佛迎像若將情識妄分疎隔靴搔癢徒瞻仰  
今日是新安洪惟心居士設齋爲報薦先慈敬塑旃

檀尊像一軀送入先師塔院供養仍勞書幣殷勤以  
山僧誕辰懇請爲衆說法說法且置畢竟造像齋僧  
有何功德卓拄杖云不求有漏人天福大孝全彰古  
佛心

嵩乳密禪師大士誕日像成開光上堂春氣晴和衆  
鳥鳴煙邨一帶柳拖青色聲堆裏分明現觸著通身  
是眼睛諸人若恁麼會得聞聲時妙智降生見色處  
圓通示現總持權柄密運大機通乎上徹乎下天地  
不能蓋載萬物豈能覆藏顯而不露隱而彌彰古今  
不異達者同途諸人要知同途底事歷良久云伯樂  
一過驚馬皆嘶下座

列祖提綱錄卷第二十八

列祖提綱錄卷第二十九

武林十八澗理安禪寺住持婁東行悅集

請藏經提綱經函 迎經 開經 閱經  
焙經 補經 麗經

楚石琦禪師新贖藏經上堂舉雪峰一日普請搬柴  
次路逢一僧乃擲下一段柴云一大藏教只說者箇  
後來真如詰云一大藏教不說者箇師云只者箇是  
什麼說與不說且諸人向什麼處見二大老中獄能  
豎起拂子云提起則如是我聞放下則信受奉行師  
云若作佛法商量眉鬚墮落

眞淨文禪師施主捨大藏經函上堂世出世間法立  
處皆相參舉天便有地舉北便知南舉僧便見俗舉  
聖便明凡以新當見舊以經方顯函宜哉一一法所  
立皆雙兼雙兼不涉二所立無不堪此大解脫門智  
者乃深諳故石頭禪師云當明中有暗勿以暗相觀  
當暗中有明勿以明相遇明暗各相對比如前後步  
乃拈拄杖云且道是明是暗跳得出也大奇跳不出  
且在明暗裏只者明暗也大難明遂擊香桌下座  
筈庵問禪師迎藏經到山示衆玉軸金函古佛心萬

年長祝聖明君林泉幸荷沾恩澤永日寥寥謝太平  
開藏示衆毗盧寶藏八字打開半滿偏圓一句具足  
盈龍宮溢海藏總在者裏還有委得底麼鯨吞海水  
盡露出珊瑚枝

朝宗忍禪師開藏上堂捧起經云始自鹿野苑終至  
跋提河其間大小頓漸半滿偏圓盡在者一毫頭上  
所以道摩尼珠人不識如來藏裏親收得遂打開云  
我今對衆打開時一會靈山難辨別休辨別一切數  
句非數句與吾靈覺何交涉直須言外更迷情破塵  
出經能事畢其或未然一任長期短期尋行數墨尋  
到臨末稍頭依舊一卷是一卷一帙是一帙何故濟  
五千餘卷非文字四十九年未曾說下座

愚庵及禪師閱藏上堂終日看經經頭一字因甚不  
識常年喫飯千粒萬粒從一粒生因甚不知卓拄杖  
云打破兩重關泗州人見大聖

竺雲曇禪師焙經上堂海藏靈文經天緯地琅函玉  
轉塞壑填溝如來不說說敲出鳳凰五色髓迦葉不  
聞聞擊碎驪龍頷下珠火燄爲三世諸佛說法義天

七線羅綿

朗耀揭坤維三世諸佛向火燄上說法字脚不留空  
法界兜羅線裏玉轉珠回文武火中星移電捲行行  
鑄出黃金字朵朵花開白玉蓮湛寂凝然應真不借  
只如經歸藏禪歸海又作麼生五千餘卷瘡疣紙一  
衆傳來耿夜光

弘覺恣禪師請諸禪補書大藏上堂三轉法輪於大  
千其輪本來常清淨天人得道此爲證三寶於是興  
世間三寶既興乾坤夷廓天人得道萬類昭蘇是故  
照燭昏衢法爲明炬津梁險道法爲輿橋高登彼岸  
法爲舟航眼目人天法爲開鑿諸仁者法利無窮贊  
揚莫盡則置只如威音那畔空劫已前未有三寶名  
字之時佛在法先耶法在佛先耶若法在佛先誰爲  
宣說之人若佛在法先尙昧進修之路者裏得迸開  
隻眼親見佛法根源則法自本來法非從佛而流布  
佛自本來佛非因法而禪成非因法而禪成則未離  
兜率早降王宮未出母胎度人已畢非從佛而流布  
則始從光耀土終至跋提河如是二時間未曾說一  
字恁麼則周金剛將青龍疏鈔一炬焚燒小釋迦目



大般涅槃盡皆魔說復有何過其或未然一毫頭上  
重宣出月指從教萬古標

營建提綱

劈草 開基  
立碑 堅柱

劍門分禪師斬草云皎皎明明非欠餘千差萬別莫  
能拘卓庵斬草壺山頂笑問時人見也無

呆庵莊禪師開寺基示衆昨日開荒地請諸人刻却  
荆棘除却瓦礫本來基址已見分明只有中間樹子  
無人拔得山僧今日未免開行方便利刀剪盡繁枝  
葉鈍鋤深鋤邪倒根實地工夫成一片住山鉏斧子  
無痕

元叟端禪師普慶請開山上堂法身無相融攝十虛  
法眼無瑕包羅萬象淨裸裸絕承當赤洒洒無空闕  
如天普蓋似地普擎直得一爲無量無量爲一小中  
現大大中現小於一毛端現寶王刹坐微塵裏轉大  
法輪正恁麼時還有與子愚能長老相見者麼若也  
見三十棒一棒也不較若也不見三十棒一棒也不  
較何故知恩方解報恩復舉世尊因地中布髮掩泥  
公案師云適間禪客問一句來老僧答一句去可謂

徹頭徹尾苟或遲疑更聽一頌無上寶王利當機詎  
解看然燈纔舉手長者便標竿解起天人敬能摩星  
斗寒埋頭火宅者今古自顛頂

無用寬禪師太平乳山大佛殿立石礫割脚埋根永  
不移擎天拄地用施爲看他結頂誦訛處萬古清風  
播四維

劍門分禪師豎柱云法門傑出梁棟高鎮群生福基  
不屬陰陽得失不屬凡聖是非以拄杖拄云八面四  
方承此力茫茫宇宙幾人知

林臯豫禪師佛殿豎柱上堂此事如構大厦相似是  
柱作柱是梁作梁全憑良匠權衡在手規矩方圓無  
不中的今日夾山古蹟佛殿新成護法光臨三門增  
色非惟叢林仰賴十方諸佛異口同音高聲讚歎道  
佛子住此地則是佛受用常在於其中經行及坐臥  
喝一喝下座

上梁提綱

無用寬禪師大覺上梁突出機先一著徹頂如何撈  
摸看他越樣施爲超過毗盧樓閣輕輕置在上頭一

任橫拈豎握大衆見麼聖壽無疆萬民安樂

三門上梁法界全彰大施門未曾舉起早驚人眉毛  
蹙上威音國雨順風調賀聖明

太湖大殿上梁撐天拄地立門庭信手拈來用處親  
玉殿瓊樓一莖草普天匝地放光明良久云起蓋覆  
黃金丈六身

淨戒寺鐘樓上梁者箇大梁誰敢摸索進則無門退  
之則錯輕輕置之頂顛頭四面清風動寥廓大衆見  
麼無用與你拈起向上一著喝

正覺寺大殿上梁今日弘開正覺門巍巍佛殿鎮乾  
坤一梁一柱天然好突兀虛空四海尊大衆見麼玉  
殿瓊樓草一根梵音千載祝皇恩

太湖選佛場上梁正令單提向上機當頭一著有誰  
知太湖吞却虛空了正是心空及第歸

夢庵信禪師大殿上梁陞座側金布地功名遠疊木  
如山利益高箇事若非斤斧手何緣海岸鎮波濤永  
寧如斯建立全仗斤斧而成若論福報人天決定風  
行草偃還委悉麼報佛只憑三寸舌逢人傾盡一生

心叙陳罷師復云寶殿成功首尾不過一載同心共  
力敢言獨比無雙今朝慶贊會齋縉素竝臻於此山  
僧隨時應節且要混俗和光適來因見拋梁豈免隨  
波逐浪所謂法不孤起仗境方生觸處圓成隨宜建  
立敢問諸人且道卽今建立箇甚麼不見道拋梁東  
禪門別是一家風爐爇沉煙滄海岸願王聖筭永無  
窮拋梁西少林節上轉生枝一花五葉開敷後結果  
圓成處處奇拋梁南善財當日設咨參踏破草鞋歸  
計日千峰依舊色如藍拋梁北趙州庭栢人難識青  
蒼多愛歲寒心認著依前還不得拋梁上佛事門中  
無一向夜叉魔黨與修羅龍天八部皆歸仰拋梁下  
一片堅牢無縫罅地神捧出聳天心永鎮滄溟歌聖  
化大衆四方上下俱周徧也乃畫一圓相云且如者  
箇饅頭又向什麼處拋要知落處麼如今普施諸人  
去覲面相呈不覆藏咬著始知滋味好百千萬劫轉  
馨香

挂寺額提綱

圓悟勤禪師蔣運使寄雲居山三大字仍請陞座云

法法圓融心心虛寂大包無外文彩已彰細入無間  
眼莫能觀所以道萬法是心光諸緣惟性曉本無迷  
悟人只要今日了今日便與麼坐斷報化佛頭喚什  
麼作心喚什麼作性怎麼說話已是截斷諸根了也  
且作麼生是截斷諸根處放一線道通箇消息還委  
悉麼大旱得甘雨大熱得清涼復有頌云衆峰盤屈  
屋耽耽天上泓澄雨碧潭渴驥怒倪三大字高蹤千  
古振名藍

笑隱訢禪師挂立寺額示衆金輪天子之勅帝釋梵  
王之宮金榜昭回雲漢銀鈎盤屈蛟龍朝夕百靈拱  
護人天萬福攸同社稷山河鞏固天曆永保帝躬江  
南諸道行御史臺欽奉聖旨以集慶路興龍潛邸改  
建大龍翔集慶寺今辰挂立勅賜牌額住持臣僧某  
望闕謝恩祝延今上皇帝聖躬萬歲萬歲萬歲萬歲欽  
惟陛下聖哲生知神武天縱臨馭八極察民物之微  
情掃蕩群兇復祖宗之正統故自卽位薦降休祥海  
水不溢而百川安流歲時告豐而五穀大熟至若光  
武復興猶崇赤伏之符肅宗保唐尙刻中興之頌皆

誇一時之虛美未有今日之聖明爰作蓮宮開八荒  
之壽域載揚竺典壯萬世之不圖用答神庥以祈民  
福臣僧旣已對衆敷揚復進一偈上天寶書祈雨露  
金陵潛邸舊江山九重閭闔香雲近對越天威咫尺  
間

#### 落成提綱

海會演禪師歸新僧堂上堂十月今朝初一新構雲  
堂已畢聖衆已得安居雅麗全勝舊日於中受用之  
時凡百互相愛惜願存古佛家風三有四恩獲益慶  
懺別有上聞具位題名立石敢勸遠近諸檀越取  
摩訶般若波羅密忽有箇出來道長老不妨好文章  
乃云咄白雲口裏道誰敢道不好

夢庵信禪師祖師閣畢工如義道者感夢送到諸散  
祖師四十軸因陞座云虛空裏釘橛誰信有之平地  
上生堆目前可驗永寧無一錢建閣建立而倏忽鼎  
新閣中無一像可歸不期而聖師自至仰瞻殊相箇  
箇古怪清奇共慶遭逢人人手舞足蹈歎之不已欣  
悟交懷從前慕德之心一時放下今則偏參知識寸

步不移名山異嶽休更他遊總向此中坐觀風彩莫  
非因緣會遇時節使然故得闢就功成聖賢萃於茲  
矣還相委悉麼鑿池不待月池成月自來

千巖長禪師新建僧堂上堂豎拂子召大眾云本來  
無一物赫赫動乾坤擬議不來時迢迢十萬里無明

者裏只有一口劍劍下有分身之意亦有出身之路

你若向活潑處着倒我便教你性命不存你人境  
若在淨無處坐地我便教你雲生脚下直須

俱奪殺活同時自然海晏河清日上月下何故宏開

選佛場心空便作狀元郎傳來只箇無文印桂子香

中舉手忙乃喝云文生也汝諸人是拖白是末名是

頭名良久云龍生金鳳子衝破碧琉璃復云茲承天

龍禪寺無用貴首座偕生首座入山設齋俵觀持大

道平長老香請曰今春蒙松江蔡媽媽李氏淨心施

財建新僧堂完備請和尚向彼中開堂說法與淨心

相見師曰諸於是過鼓陸堂集衆而告之曰無明以

十方世界作一箇僧堂行與諸人同行坐與諸人同

坐乃至語默動靜折旋俯仰未嘗與諸人有絲毫間

隔所以雪峰云僧堂前與汝相見了也汝若頂門具

眼便見無明與淨心在僧堂前相見汝若更道在天  
龍僧堂前相見在伏龍僧堂前相見我也知你是箇  
瞎漢不惜眉毛復示一頌處世界無所著圓陀陀光  
燦燦大中大窄中窄李氏淨心雖女流宛有丈夫之  
作略針鋒上挂須彌盧微塵中現寶王刹天龍道用  
不帶添得伏龍背地晒赤肉團上壁立千仞阿呵呵  
哩哩囉東家作牛西家作馬衲僧鼻孔一時穿眼光  
燦破四天下復召大眾云是甚麼

石屋琪禪師入新僧堂上堂直爲柱曲爲梁規中圓  
矩中方匠氏取材之良也歸其圓泯其方捨其短取  
其長主人立法之妙也所以福源僧堂建柱石于丙  
子之孟春畢斧斤于戊戌之重九六窓爛爛洞一色  
之虛明萬瓦鱗鱗絕三種之滲漏低頭不見地還他  
擔板禪和仰面不見天却許蒙頭衲子老竹溪豈止  
一生行願憍陳如頓增萬倍威光遵行百丈叢林壯  
觀千年常住直得十方諸佛異口同音宣說偈言佛  
子住此地則是佛受用常在于其中經行及坐臥又  
有龐居士說箇頌子讚歎云十方同聚會箇箇學無

爲此是選佛場心空及第歸然雖如是其奈張無盡  
忍俊不禁出來道汝等諸人卽解樹頭喫菓子不知  
樹曲彖殊不知作此堂者有損有益居此堂者有利  
有害者般說話也怪伊不得何故人無遠慮必有近  
憂此事且拈放一邊祇如衲僧自己分上得力句子  
作麼生道良久饑餐渴飲渾無事聽雨聽風閒打眠  
長翁淨禪師新起妙嚴慶懺陞座推倒多年老鼠窠  
掃空平地笑呵呵從頭架起生頭角蓋覆驢牛不厭  
多今朝成就大緣千古發揮大事且道如何祈願任  
他門外客到家還我箇中人復舉文殊問無著近離  
甚麼處著云南方殊云南方佛法如何主持著云末  
法比丘少奉戒律殊云多少衆著云或三百或五百  
師云春風勾引鷓鴣啼著問文殊此間佛法如何主  
持殊云聖凡同居龍蛇混雜著云多少衆殊云前三  
三與後三三師云平地波瀾鈎鐵船者兩轉語要與  
諸方眉毛拈結更有兩轉語要與諸方點眼或三百  
或五百銅錢鐵錢省數足陌前三三與後三三薑蔔  
芋爛淺貯滿擔諸方忽然眼開決定拍手大笑笑箇

甚麼不笑巴叉便笑杜撰雖然笑者還稀忽有人問  
天童多少衆便向他道新起妙嚴誇第一一齊都在  
畫圖中

劍門分禪師建千眼大悲殿上堂靈筵今古絕依附  
普天匝地從教舉南無大悲觀世音咄咄何曾在別  
處南無大悲觀世音大通大願接迷情口口念來知  
幾幾何如菩薩現全身觀音菩薩鎮長在寶殿與崇  
無望礙上答皇恩無盡齡情與非情同一會

楚石琦禪師建萬佛閣上堂一拽石二搬土發機不  
用千鈞弩無邊樓閣滿虚空曠大劫來誰是主誰是  
主須辨取最好一梁對一柱便下座

筈庵問禪師進新齋堂示衆古德不赴堂蝦爲子曲  
侍者云和尚不曾出入因甚莊上喫油糲事因叮囑  
起教伊問庄主大似詐明頭侍者纔出門庄主謝臨  
屈兩彩一賽山僧今日將古人一副肺腑盡情揭露  
爲諸人應箇時節烹拈拂子巍巍堂堂輝輝煌煌晨  
時有粥齋時有飯汝諸人切忌違時失候設或有箇  
違時失候底山僧也不罰伊但喚行者多與他一杓



殘盆菜汁若受用得著也許伊向磬山門下提瓶挈鉢喝一喝擊拂子

鑄鐵提綱結龍進火

虎丘隆禪師謝鑄鐵街坊上堂渠無面目底千聖不敢近方解入林不動草入水不動波變大地作黃金攪長河爲酥酪寸絲不挂通身無影像便能入荒田不揀信手拈來頭頭上顯物物上明收放臨時更無滲漏所以道諸方說禪浩浩地爭如我栽田博飯喫直饒居士深懷樂施也未免剋肉成瘡箇點將來未忘取捨南泉打破粥鍋雖然光前絕後因甚衆人之物將爲自己受用如今要全舊日家風須是重新鑄造雖然一動一靜一進一退總未有事在畢竟作麼生還會麼有意氣時添惹氣不風流處也風流劍門分禪師結龍示衆云家常爐竈箇中開一味馨香養道胎頓絕諸方膾炙氣飽駒駒地笑哈哈山茨際禪師繼隱庵進火示衆借得嶽山南一片縛成茅屋伴雲閒今朝拈起無煙火朶朶晴峰開笑顏

法座成提綱

南石琇禪師法座成示衆劫初有箇寶華座孰謂今朝始作成爲念衆生猶未了故將隻手特經營聲聞欲上心先怯列祖高陞話大行謂是法空還不得從來佛道絕途程

月江印禪師法座新成上堂大衆此處卽是毗盧遮那如來所處橋尸迦須彌山頂善法之堂此座卽是普光明藏獅子之座此蓋卽是寶積長者所獻之蓋徧覆三千大千世界此座高出八萬四千由旬其堂高一十六萬由旬一一軒窗一一欄楯一一莊嚴藏交光相羅如寶絲網如普賢毛孔如彌勒樓閣諸佛刹海一一現前無壞無雜所謂諸佛曾來入此堂是故此堂最嚴淨諸佛曾來入此座是故法座最吉祥諸佛曾受此寶蓋是故此蓋最殊特須知此堂此座此蓋不從天降不從地涌皆從我山中牧石老禪根本智中之所流出豎窮三際則三際圓融橫亘十方則十方通暢擊拂子虛空可量風可繫無能盡說佛功德

漢月藏禪師法座成上堂嚴嚴獅子座涌堂中老衲披

衣坐法空跨下狻猊忽返擲一聲哮吼見威雄喝一  
喝曰獅子踞地吼佛祖倒身走出頭天外看只有萬  
峰叟喝一喝

建寶塔提綱上塔珠寶索  
相輪塔告成

楚石琦禪師建寶塔上堂僧問昔日南泉和尚因趙  
州問云如何是道泉云平常心是道如何是平常心  
師云敲水取火掘地覓天進云大好平常心師云我  
不如你你自會得好乃云問既不弱答得又奇你道  
契二大老不契二大老還有道得者麼試出來道看  
如無人道自道去也一分奉釋迦牟尼佛一分奉多  
寶佛塔

南石琇禪師雙塔壽寧禪寺上塔珠誦法華經誦陞  
座師拈香祝聖畢乃云此法非思量分別之所能解  
惟有諸佛乃能知之上是天下是地喚甚麼作此法  
若向者裏領略得去便見靈山一會儼然未散其或  
未然徑山未免畫蛇添足去也須知此法頭頭上顯  
物物上明無一塵不是此法顯現之處無一時不是  
此法出生之時所以世尊得之從兜率降王宮逾城

出家苦行成道住世七十九年說法三百餘會末後  
拈花示衆以正法眼藏獨付飲光諸祖得之各立化  
庭共揚法道或立一心三觀或說十立六相或只直  
指單傳或設三立五位聖天子得之仁及四海化及  
萬邦騶虞忽現而黃河澄清鳴谷來朝而虞淵入貢  
百僚得之坐朝堂而揚政化變陰陽而撫黎庶金湯  
吾教柱石邦家住持一源禪師得之不動聲色檀施  
雲歸重修寶塔不日成之現前大衆得之不勞跬步  
入此道場六萬餘言若建瓴水施財施力若見若聞  
無不是此法施設無不是此法圓成雖然若喚作此  
法則落聖解不喚作此法則墮凡情且作麼生即得  
拈拄杖云拄杖子聞得出來對衆決斷去也卓拄杖  
無二無二分無別無斷故大衆正恁麼時因齋慶讚  
一句如何舉似紫旃檀塔六七級紅菡萏花三四枝  
唯庵然禪師上塔頂寶索上堂鈎鎖連環連環鈎鎖  
觀體全彰眼眼相顧其橫也穿却虛空鼻頭其豎也  
鎖住須彌鐵柱親從惡辣鉗上煅煉得來豈比尋常  
麻纏紙裏箇是谷瑤居士壯觀浮圖騰今亘古底作

也雖然如是且道高懸倒挂一句如何舉似四簷平  
定香雲繞萬世光華佛日長

無用寬禪師泗洲大聖塔安相輪突出虛空大法輪  
合尖頭上鎮乾坤煌煌照燭威音外颯颯清風散月  
明大眾見麼倒騎瓠子咬崑崙

楚石琦禪師怡雲居造石爲佛塔成上堂舉教中道  
若人以眞金日施百千兩不如暫入寺誠心一禮塔  
理上偏枯若人靜坐一須臾勝造八萬四千塔寶塔  
終久化爲塵一念至心成正覺事上偏枯直饒理事  
雙亡正偏不立要見多寶釋迦則未可在還委麼麼  
龍袖拂開全體現象王行處絕狐蹤

建壽塔提綱

定塔基

開塔基

立塔石

了庵欲禪師秀峰長老寡緣建塔至上堂舉立沙侍  
雪峰行次峰指面前云者一片地好造箇無縫塔沙  
云高多少峰顧視上下沙云人天福報不無和尚若  
是靈山授記未夢見在峰云你又作麼生沙云七尺  
八尺師云一人平地上掘坑一人虛空裏釘橛後來  
琅琊云家肥生孝子國霸有謀臣師云隨風倒柁漢

今日秀峰長老正要造箇無縫塔遠遠過我不免贈  
箇塔樣良久云會麼高而無上廣莫可極淵而無下  
深不可測浩浩波光重重山色一道清虛亘古今八  
面香風惹衣袂擊拂子下座

天如則禪師道友會貫之爲定水西原塔基示衆我  
與諸佛祖同樂亦同苦同死同時埋同坑無異土雖  
然麼麼就中也有些子不同處老僧今日預先分付  
下土掩壙時諸人著眼看伏死不伏埋從來是者漢  
無用寬禪師太湖開塔基示衆徹底掀翻是何基址  
深深插一神鉤直要徹骨徹髓喝聲云亘古亘今長  
江大水

立普同三塔石示衆塞破虛空無縫罅當頭一點太  
諸訛看他割脚埋根去潭北湘南曾也麼

治父寺豎塔心示衆突出虛空一點無昂霄聳壑出  
紅爐通身不受人埋沒赫赫佳豎播五湖

眞淨文禪師開馬祖塔日上堂放過一著落在第二  
有利無利不離行市家家門外綠楊垂不獨春風折  
桃李馬祖堂開二月初二觸目遇緣法門大啓不如

歸去來良久向什麼處去馬祖堂中燒香罷僧堂裏喫茶

閉馬祖塔上堂祖宗門下總有關板子應機接物有開有閉苟開而不能閉喪家失計閉而不能開誰辨往來或開而能閉也不妨遊戲閉而能開也重重善財或不開不閉時又作麼生大衆僧堂裏隨例軟餅餤頭橫咬豎咬喝一喝下座

請行橋法語

元叟端禪師行新廣度橋神機密用妙應無方示險處津梁作中流砥柱橫身宇宙直教通地通天平步雲霄說甚度驢度馬七凹八凸由此坦平萬別千差從茲融會成一方之勝槩壯千古之雄基慶衍皇圖輝騰佛日正恁麼時脚跟下縱橫十字一句作麼生道驟步云無邊法界華嚴藏共踏毗盧頂上行

愚庵及禪師行重建行春橋師召衆云大橋雄跨石湖濱捨舊圖新喜落成萬國車書通達道三吳城郭展修程溪山出色增佳勝簫鼓行春樂太平不動腳頭登彼岸十方一路要分明好諸仁者還他力量人

辦此奇特事功夫妙密機用縱橫易深險成坦迤架虛空爲平地高高處觀之不足低低處仰之有餘可以津濟四生可以梯航九有直得輝騰佛日慶衍皇圖牧謳樵唱共履康莊馬載驢駝咸臻實際正與麼時且平步丹霄高超物表一句作麼生道遂驟出云塵塵刹刹無留礙直踏毗盧頂上行

千巖長禪師婺州通濟橋成請行橋大衆會麼風清月朗地平天成廉訪司相公泊文武官員已爲諸人說法了也西峰雙林及諸尊宿已爲諸人說法了也只將萬萬歲石橋上祝吾呈萬萬歲恁麼則統十方世界是一座通濟橋不獨通濟婺州一城人通濟天下人去也巍巍功業千古不磨汝諸人常光現前箇箇壁立千仞釋迦不前彌勒不後行不行到不到要且不干別人事老僧到來也只因齊慶讚何故當空架起蒼龍脊不怕雙溪水流急踏上高高高處看東西有路通南北南北既通東西有路作麼生是諸人最初一步喝看脚下行至橋那邊復云婺州橋是趙州橋今日大家行一遭不獨度驢并度馬人人

平步上青霄

長翁淨禪師謝造橋上堂去那邊去來者裏來中間絕壑斷崖且道如何相接以拂子作彎橋勢曰看依稀金磴濶彷彿彩虹彎人從橋上過又作麼生松蘿景裏開天巧翰墨光中入畫圖

開田并謝提綱

白雲端禪師因興道者開田回示衆三載區區弄水泥拈裙擗褲又扶犁滿倉收稻方歸院一任禪和禪肚皮且道禪底是禪是飯乃云因風吹火用力不多山茨際禪師開田云衆云者一片田地從上來分付多少時矣只爲兒孫不肯拋家撒業馳逐外遊致令祖父田園荆棘年生草茆日長山僧今日將原本契書揭示諸人須要諸人各各急著精彩認取者片田地斬無明草除邪見林然後放兩拋三深耕淺種披簑帶月犁耙連雲到此不妨收禾莖爲粟柄變土塊作黃金都盧只在者片田地上顯現大衆正恁麼時且道承誰恩力乃以鐮頭墜地三下云幾度賣來還自買爲憐松竹引清風

愚庵及禪師中秋謝開田者舊上堂僧問百丈示衆云汝爲我開田了我爲汝說大義有僧開田了便問開田了也請和尚說大義丈展兩手且道是說不說師云一舉四十九進云恁麼則天人羣生類皆承此恩力師云汝分上作麼生進云和尚今日開田功昭百世學人請和尚說大義畢竟如何展演師云爛泥裏有刺僧禮拜師乃云百丈開田說大義大舒兩手龍峰開田謝主事豈可空然擊拂子云一片月生海幾家人上樓

楚石琦禪師看田回上堂舉滄山問仰山云何處來仰云田中來滄云田中有多少人仰插鋤叉手而立滄云今日南山大有人刈茅仰拽鋤而去雪竇云諸方咸謂插鋤話奇特大似隨邪逐惡據雪竇見處仰山被滄山一問直得草繩自縛去死十分妙喜云仁者見之謂之仁智者見之謂之智百姓日用而不知故君子之道鮮矣師云幸是無事被妙喜老漢念一道真言直得天左旋地右轉

列祖提綱錄卷第二十九



列祖提綱錄卷第三十

武林十八澗理安禪寺住持婁東行悅集

退院提綱

白雲端禪師遊廬山圓通訥以院事讓師而訥處東堂未幾訥厭閒寂郡守至自陳客情太守惻然目師笑唯唯而已明日陞座曰昔法眼禪師有偈曰難難是遣情難情盡圓明一顆寒方便遣情猶不是更除方便太無端大眾且道情作麼生遣喝一喝下座負包而去一衆大驚挽之不可

保寧勇禪師退院上堂百尺竿頭弄險巖是人平地爲攢眉而今潦倒成無用高躡前蹤付與誰有道得者試道看良久云若無人道不如交與知府謝大眾畢復云江國名藍甲上遊黃綠於此繼焚修幻軀已是多衰病雪髮將看徧滿頭浮世百年猶不足旋風千匝尙難周今朝喜作神仙客遂性逍遙得自由圓悟勤禪師退院辭衆上堂未有長行而不住未有長住而不行爲無爲益無益梯航三有津濟四生是衲僧家本分事雖然時節到來一刀兩段要且鼻孔

不在別人手裏所以道動若行雲止猶谷神既無心於彼此亦無象於去來如是則去來不以象動靜不以形豈不綽綽然有餘裕哉且道臨行一句作麼生道本是林下人却歸林下去下座

道林辭衆上堂十虛同一漚寧分彼此大千同一塵豈有去來若能各人明見本心顯發妙用通天作略動靜一如而地風光彼此無二住也浮雲凝於幽谷去也虛舟泛於長江去住本自圓成解脫更無異路如是則全起全滅全動全靜全去全來全收全放且出門一句作麼生道頭頭物物皆成現正眼當陽廓太虛復云三年承乏幸參陪道業荒虛愧不材赴詔直從天外去何時相與復徘徊

退院上堂七處住持三十載今朝方作地行仙上蒙聖主從卑願亭毒之恩遠似天見可而進知難而退權柄在手舒放非他住既無心動亦非我所以二六時中與他同得同證同出同入豈有心於彼此何有象於去來所以道欲識佛性義當觀時節因緣時節若至其理自彰正當與麼時還委悉麼林間蕭散處

世外一閒人復有頌云禪月昔年曾有語山僧師範作良謀如斯標致雖清拙大丈夫兒合自由

蔣山辭衆云終日相逢長背面終朝背面却相逢途中不是途中事不動巍然達九重者箇消息唯許作家明暗同途主賓互用雖去似去而不去雖來似來而不來卓爾超然動靜曾無兩種所以道動若行雲止若谷神既無心於彼此亦無象於去來如是則去來不以象而確然去來動靜不以心而超然動靜在彼在此殊無間然一道清虛廓周沙界是以月上女出城舍利弗入城而舍利弗問云聖姊向什麼處去月上女云如舍利弗恁麼去舍利弗云我方入城汝已出城云何言如舍利弗恁麼去女云諸佛弟子當住何所舍利弗云諸佛弟子當住如來大解脫女云諸佛弟子既住大解脫所以我云如舍利弗恁麼去既得如來大解脫去而無去去迹入九重城裏毗贊聖化住而無住住蹤在深山白雲中坐斷天下人舌頭既住如來大解脫安有動靜去來之意正當恁麼時作麼生道九重城裏眞消息一句無私徧九垓復

云憶得曹山和尚辭洞山山云向什麼處去曹山云向不變異處去洞山云不變異處豈有去耶曹山云去亦不變異師云大凡衲僧佩肘臂下符具頂門上眼向一切萬境萬緣常頭坐斷豈不是箇無變異何故金剛正體湛寂凝然曹山雖得此意爭奈洞山憐兒不覺醜若是山僧待他道向不變異處去只向他道者漢未出門早變了也

龍門遠禪師退褒禪寺上堂一去一來松上鶴半開半合嶺頭雲捲筇獨立千峰外惟把南山祝聖君雲峰高禪師陞辭南歸示衆我本深藏巖竇隱遯過時不謂日照天臨難逃至化復云衲被蒙頭萬事休此時山僧都不會

大覺璉禪師皇祐中仁廟有詔淨因禪院召對數四後入便殿賜羅扇一把題元寂頌於其上及師問答頌詩書以賜之凡十有七篇至和中乞歸老山中乃退院上堂曰六載皇都唱祖機兩曾金殿奉天威青山隱去欣何得滿篋惟將御頌歸

應庵華禪師退院上堂祖師心印狀似鐵牛之機去

卽印住住卽印破有般漆桶便向不去不住處坐地  
無異蚊蚋以足欲探滄海之深淺其可得乎豈不見  
古人道世人住處我不住世人行處我不行不是與  
人難共住大都縑素要分明祇如死心和尙一日挾  
火示僧云若喚作火燒殺你不喚作火凍殺你是你  
諸人還縑素得出麼苟或未然珍重五湖雲水客笑  
看千嶂起風雷

密庵傑禪師淳熙十年八月初三日乞退靈隱得旨  
上堂四年居此日波波累及禪和不奈何今感聖恩  
林下去一輪秋月照天河

圓照本禪師以年老求歸哲宗帝從其請勅任便雲  
遊所至不得抑令住持因欣然退相國院陞座本是  
無家客那堪任意遊順風加櫓棹船子下揚州

天目禮禪師退院上堂七十三八十四薦直示汝也  
是抑而爲之何如靜處薩婆訶倚杖看雲度綠蘿  
恕中愠禪師退院上堂靈巖作主僅三年說法匡宗  
魏青賢今日盡情都放下話頭不舉自完全大丈夫  
漢終不向淨潔地上坐殺蓋其自有透脫一路所以

道去來不以象動靜不以心塵塵普入剎剎全彰正  
與麼時且臨岐一句作麼生道攜取詩書歸舊隱野  
華啼鳥一般春

石屋珙禪師退院上堂卸却頂上鐵枷颺下手中木  
杓合眼跳過黃河騰身衝開碧落獅子趯倒玉闌杆  
象王擺壞黃金索白雲兮處處相逢青山兮步步踏  
著喝一喝云學頭天外看誰是箇般人

南明元禪師在南明厭迎送退院示衆舉鐵面頰  
云院是大宋國裏院州是大宋國裏州中有院不  
容住何妨一鉢五湖游師云是則去住自由忒煞露  
風骨吾亦有頌休休休夕陽西去水東流惟有仰高  
雲勢遠搏風九萬過南州下座便行

用彰俊禪師退院上堂拈拄杖我拄杖子隨方作主  
遇緣卽宗古德道住則印去去則印住去住自由不  
妨奇特只如不去不住還有動靜之相否以拄杖卓  
一下總使鏡輪頂上旋定慧圓明終不失喝一喝

南石琇禪師退院上堂衲僧行履如火燒水如箭離  
絃如雲出岫如月行天本無來而無去曷有象而有

形圓悟老祖辭天寧有偈云幻軀將逼縱心年懶泊  
塵緣久世間憑仗護身箇符子強扶衰疾且歸山熙  
怡先師辭萬壽歸松林有偈云幻軀將逼縱心年松  
下經行石上眠珍重北山龍象衆普通年話幾時圓  
山僧今日辭徑山亦有一偈雖不能克紹祖父風烈  
却自胸中流出幻軀已及縱心年衰朽仍兼疾病纏  
宗教山門愧無補匡徒合讓後來賢

佛朗性禪師退院上堂海上承恩兩度還七年道聚  
刹那間鐵枷頂上輕拋下雲外天邊自在閒

牧雲門禪師在極樂院退院上堂極樂極樂天涯海  
角舖子將收家私落索雪峰木毬普化鈴鐸搖搖打  
打捫捫摸摸仔細看來是何面目鐘鳴銅山崩劍舉  
蜀頭落還會麼雲門參見睦州會得秦時轆轤參

### 退院載歸提綱

圓悟勤禪師出城中退院回上堂大衆幸自無一星  
兒事剛然平地起骨堆費盡工夫只是步隨流水  
却歸來恁麼也不得不恁麼也不得恁麼不恁麼總  
不得然後沒交涉正是此箇時節雖然如是他家自

有通宵路嵩嵩南嶽與天台復云八臂那吒擎鐵柱  
翻身直入滄溟去逡巡忿怒撲帝鐘過犯彌天無雪  
處無雪處不免依前安舊所且正當恁麼時如何一  
文偷不得虛作沒良人

大慧杲禪師退院載歸上堂去是住時因住是去時  
果去住與果因無可無不可喝一喝云者裏是甚麼  
所在說去說住說因說果說可說不可雖然如是者  
裏却有箇好處且道好在甚麼處良久云再理舊詞  
連韻唱村歌社舞又重新

戲魚靜禪師退院回上堂游徧天下當知寸步不曾  
移歷盡門庭家家竈底少煙不得所以肩笻峭履乘  
興而行掣釣沉絲任性而住不爲故鄉田地好因緣  
熟處便爲家今日信手拈來從前幾會計較不離舊  
時科段一回舉著一回新明眼底瞥地便回未悟者  
識取面目且道如何是本來面目良久曰前臺花發  
後臺見上界鐘聲下界聞以拂子擊禪床下座  
應庵華禪師退請載歸上堂釋迦老子道不著底句  
歸宗今日道著達磨祖師拈不出底機歸宗今日拈

出從上佛祖百孔千瘡一切與諸人塞却便好各各  
安家樂業照管祖父田園自然時清道泰雨順風調  
吹無孔笛唱太平歌不妨快活平生雖然以世諦推  
之則有利有害若以佛法商量則無固無必所以道  
動若行雲止猶谷神既無心於彼此豈有家於去來  
去來不以象動靜不以心如是則法隨法行法幢隨  
處建立不免高挂鉢囊鉤折拄杖且坐斷金輪峰一  
句作麼生道如斯標致雖清拙大丈夫兒合自由復  
舉南禪師出城還山有頌示衆云去時一溪流水送  
回來滿谷白雲迎一身去住非去住二物無情似有  
情師云南禪師好則好祇是愛便宜山僧也有一頌  
舉似大衆去時冒雨連宵去回來帶水又拖泥自怪  
一生無定力尋常多被業風吹

爲住持遷化佛事法語

入龕  
移龕

圓悟勤禪師爲智海法眞和尚入龕釋迦雙樹示寂  
偃臥吉祥法眞智海告終端坐行上四十年道價七  
十一生緣德播寰中聲馳海外人天敬仰朝野傾崇  
此望永作梯航長光佛祖豈期忙中縮手關裏抽身

最後皇都大作佛事今則永埋玉樹先入雲龕公案  
現成須至一決大衆因行不妨掉臂伎倆不知帳樣  
爲瑞爲祥無邊無量請老和尚且出方丈

鎖龕

南石琇禪師爲前慧日祺曇石鎖龕稽留峰前親見  
了幻左眼入兩慧日堂上握黑竹篋右眼半斤打破  
生死關坐斷涅槃路紫皇案前五色麟等閒掣斷黃  
金鎖

筌庵問禪師爲晦夫豫和尚鎖龕二十年來高提祖  
印橫行湖海倒握乾坤總生佛之樞機作人天之鑑  
鑑劇盡野狐窟宅光揚濟上門庭五坐道場利塵應  
現一期佛事報化全眞末後一句收歸洞明從上的  
旨直得雲橫海嶽雪覆千山花落碧巖前猿歸青嶂  
裏猶未是老法兄親面目在且作麼生是夾山面目  
拖龕云急著眼觀

弘覺禪師爲雲門雪老和尚鎖龕拘尸那畔拖金容  
淚灑閻浮血染紅誰信碧霄雲散後長天萬里露秋  
空恭惟當山堂頭大和尚西河獅子長沙大蟲一鐵



破雲門三關全身佩浮山九帶娘生鼻孔打失秦望  
山中空劫眉毛拾得禹門浪裏便爾呵佛罵祖在處  
爲禍爲殃長時擦風擦顯知他是凡是聖舌頭控爐  
轆藥汞禪點著銷鎔口角搥金梭階前草織成錦繡  
本望長縣慧照何期遽斂春光庭柯慘鶴樹之容四  
衆見奢華之色今則雲龕既入玉戶宜肩金色頭陀  
合知端的搖鈴普化謾說神通喝一喝云體露金風  
須著眼身藏北斗許誰看

牧雲門禪師爲龍池和尚鎖龕聲前一句坐斷舌頭  
末後牢關不通凡聖古者道祖師心印狀似鐵牛去  
卽印住住卽印破恭惟我法兄堂頭和尚生平握此  
印拈此機踞此祖席慣打鯨鯢一期化畢西携隻履  
正法眼藏分付及門維摩云譬如一燈然於百千燈  
冥者皆明明終不盡雖然已涉建化門頭若也眞實  
提綱無有佛涅槃無有涅槃佛則所謂不識金剛體  
却喚作生緣十方眞寂滅誰在復誰行正恁麼時龍  
池老人在諸人頂額上轉大法輪還會麼觸處現全  
身頂相終難觀擊香几云封

法堂挂眞

大慧杲禪師爲高菴悟和尚挂眞拈眞幃示衆云蓮  
華峰頂眞實說三塔歸來重泄機兩處路頭俱剔脫  
剎塵無不盡光輝光輝則是人知有且道高菴老人  
本來面目何在還委悉麼生佛未具世界未形直是  
眉目分明十分顯露有人向者裏識得便與此老把  
手共行不向幃子上搏量名貌其或未然雲門不免  
隨例顛倒去也遂展開云還見麼者箇若是則有兩  
箇者箇若非當面蹉過不蹉過沒兩箇祖堂無位次  
安排癡兀軒中且閒坐

無相眞禪師爲明眞和尚挂眞建水生緣四明爲瑞  
耆年觀面呼喚不同正當今日賴有蘆山老叔罩頭  
與諸人相見展開眞云見見之時見非是見一見不  
見常相見永使高風振祖堂皎如日月與月面  
佛眼遠禪師爲四面隣和尚挂眞虛空無相不拒諸  
相發揮寶鏡無形豈碍群形頓現相與形而常僞空  
與鏡而常眞故卽僞卽眞不生不滅大衆或若虛空  
頓消殞寶鏡不臨臺光境俱忘復是何物六十三

卽且置且道卽今四面老子在什麼處遂拈起真云  
生涯何所有今古與人傳

### 舉哀

圓悟勸禪師爲佛眼和尚舉哀三十年行道海上第  
一人颯然恁麼去誰見不酸辛雖然如是須知佛眼  
未曾生未曾死未曾去未曾來正與麼時如何乃指  
龕云我與雪峰同條生不與雪峰同條死要知末後  
句分明普請大衆齊聲舉乃云哀哀

應庵華禪師爲佛智師伯雪堂師叔舉哀上堂舉大  
覺和尚順世謂衆云我有一隻箭子要付與諸人時  
有僧出云請和尚箭大覺云汝喚什麼作箭其僧便  
喝大覺打數棒歸方丈次喚其僧來問汝適來會麼  
僧云不會又打數棒擲下拄杖云已後遇明眼人分  
明舉似師云大覺平生用一隻箭子穿天下衲僧鼻  
孔因甚到者僧面前折却衆中莫有爲大覺雪屈底  
出來與報恩相見有麼如無育王師伯薦福師叔亦  
未免喫報恩手中痛棒何故有功者賞

### 奠茶湯

恕中愍禪師爲徑山南楚和尚茶龐公舉蒙仰山撼  
樹二大老各展旗鎗殺活自在到我堂頭和尚面前  
總用不著何故萬仞龍門鳥飛不度

南石琇禪師爲江心澤中洲茶見了幻而悟無生是  
第二機向江心而啓密室是第三首且作麼生是第  
一機牽縣茶瓶兩箇臂

爲前僧錄司左善世蓮菴和尚茶轉無上法輪于吳  
中如日當午罄無側影提毗盧正印於輦下猶風吹  
水自然成文鎔凡鍛聖只在刹那入死超生如同遊  
戲大衆還知蓮菴和尚平生妙用處麼縱橫手面與  
人別拈出滿湯便是茶

### 大夜對靈

愚庵及禪師爲靈隱平山林和尚對靈小參正法眼  
藏涅槃妙心廓三際以無去無來洞十虛而非中非  
外諸佛知之而獨用衆生日用而不知故我靈隱堂  
上平山和尚赤手提持衲肩擔荷權實照用俱備擒  
縱殺活皆全五處仁山風行草偃王臣爲之斗仰魔  
外爲之永消塵塵刹刹普見威權物物頭頭全彰奇

特高超十地迥出三乘有時拈一莖草供丈六金身  
有時將丈六金身作一莖草於一毫端現寶王刹坐  
微塵裏轉大法輪出沒卷舒縱橫自在以此穿三世  
諸佛鼻孔以此換六代祖師眼睛以此坐天下善知  
識舌頭以此斷叢林衲僧命脉以此造無間業鑊湯  
鑪炭刀山劍樹碓磨磨爲一切人抽釘拔楔解粘  
去縛以此開甘露門示甘露器令諸衆生入甘露室  
食甘露味機機透脫法法融通末後全提甚生光彩  
聲前非聲色後非色蚊子上鐵牛無你插觜處直得  
飛來峰起舞三臺西子湖動搖六震正與麼時是汝  
諸人還知老和尚落處麼卓拄杖云煩惱海中爲雨  
露無明山上作雲雷復舉世尊涅槃會上摩訶告衆  
云汝等當觀吾紫磨金色之身瞻仰取足無令後悔  
若謂吾滅度非吾弟子若謂吾不滅度亦非吾弟子  
師示釋迦老子四十九年三百餘會說法如雲如雨  
大機大用千聖窺覷不及萬靈捫摸無由因甚逗到  
涅槃會上一箇渾身不解作主直至摩訶告衆普請  
觀瞻當時衆中忽有箇皮下有血出來道咄瞿曇瞿

曇沒處去沒處去非惟進且無門退亦無路管取求  
生不得生求死不得死淨慈今夜不是壓良爲賤檢  
點將來爭似我平山和尚五會說法高聳人天撒手  
去來斬釘截鐵拍禪床云踏碎虛空赤脚行十方世  
界阿剌剌

佛朗性禪師爲大塘乘禪師對靈小參最初機末後  
旬空要津爲君舉有格外相看者麼良久云幾度賣  
來還自買爲憐松竹引清風不獨成熟佛祖田園且  
要存亡普濟只者一片無陰陽地四置固是分明諸  
人行住坐臥從劫至年從年至月從月至日從日至  
時從時至刻白淨儼然莫能動著至今虛豁豁明朗  
朗圓陀陀黑黑的染汚不得所以真際函蓋萬化一  
切自由此是乘公及諸人今昔行履底事汝等只緣  
自信不及向外馳求轉求轉遠轉急轉遲以至逗到  
今日總不干別人事敢問大衆卽今爲大塘乘公禪  
師莊嚴一句作麼生道擊拂子云落花三月節殘夢  
五更天復舉僧問大隨和尚劫火洞然者箇壞不壞  
隨云壞僧云恁麼則隨他去隨云隨他去僧持語問

投子投云不壞僧云怎麼則不隨他去投云不隨他去僧云大隨道壞隨他去和尚爲甚道不壞不隨他去投遙禮云大隨古佛其僧復參大隨隨已遷化復參投子投亦遷化師云書峰見處貴要大家知有大隨上大人丘乙已投子佳作仁可知禮雖然頭正尾正爭柰者僧一味不肯許他千了百當明眼人試辨看

### 起龕

無文璨禪師爲南庵主起龕見了天童便躲跟佛來有口不能吞莓苔綠遍門前路坐看春風四十年無禪道可論無佛法可傳拾薪樵子無可尋之跡銜花飛鳥無可見之緣折脚鐺中爛煮乾坤清氣長柄杓內舀乾滄海根源了生死去來之如幻觀涅槃寂滅之現前回首鑑湖青山未老笑攜藜杖白首言旋者箇又是某人可見之蹤跡設若放濶步於藕絲孔中入正定於微塵影裏諸人又向甚處與此老相見閭浮樹在海南邊

箸庵問禪師爲晦夫和尚起龕坐斷天下路頭自是

時流功幹密移一步作者難諳看先夾山和尚爲諸人解開寶網步步登高去也且出門一句作麼生車不橫推理無曲斷且喜老法兄今日得著便

弘覺恣禪師爲雲門雪大師起龕來本自心往非有向步步絕行蹤通身無景象放開一綫道則從伊若不放開說甚南天台北五臺雙徑匡廬與鴈宕便饒打一筋斗過華藏莊嚴世界海那邊更那邊卓拄杖云又何曾離得者裏無陰陽地上所以我堂頭老人不動道場入大寂滅三昧海一坐百二十日爲諸人眞實提唱直得三世諸佛默然靜聽萬象森羅曲躬稽顙梵王帝釋主風神主空神主晝神主夜神身衆神執金剛神散花供養那容天魔外道之徒潛窺而側望然則塵竭令嚴誰敢關通但諸比丘比丘尼優婆塞優婆夷于叫不應山前成就一鋪功德須大師點眼因行不妨掉臂請師且出方丈

爲五磊堂頭權和尚起龕玉殿未爲尊珠樓何足貴突破萬重關不住青霄內以拄杖指云蓋是者漢一生擔板死不同頭者也所以關裏抽身於響順聲和

之日急流勇退於風行草偃之時闔國人追不再來  
千峰萬峰直入孺羊角挂難尋迹南辰北斗披袿打  
或一片皇封捏聚團圓世界立罷夜明簾外因退位  
以朝君照空古鏡臺前爲轉身而就父無影樹頭舞  
鳳不萌枝上糝花卽從伊畢竟公案如何結絕擊龕  
一下云驚起泥牛哂夜月倒懸羅壁上天台

全身入塔

大慧杲禪師遷佛智裕和尚入育王塔以手指穴云  
妙喜與師兄俱是圓悟子妙喜移住徑山師兄遷來  
在此雖與師兄同條生不與師兄同條死入兩與半  
斤青紅對碧紫正當恁麼時且歸根得旨一句作麼  
生道良久云師兄解唱泥牛吼師弟寧忘木馬嘶豁  
開頂上活人眼鄮山山下是真歸

雪嶠信禪師爲天童悟和尚入塔坐空千界月諸佛  
汝同儕鑿破青山面將身就活埋

箸庵問禪師爲晦夫和尚入塔剗開荊棘獨立乾坤  
推不向前約不退後團圓無縫卓絕寧彰眼裏耳裏  
鼻孔裏塵說利說衆生說無非是老法兄自在三昧

本地風光五十五年有恁麼事四處五會無恁麼事  
有恁麼事履踐湯爐炭如登平地無恁麼事上山山  
劍樹如駕慈航秉先師最初之囑繼夾山後起之塵  
疑殺天下衲僧作箇諸方眼目今日功能既畢門戶  
斬新窄堵高巍衝開碧漢且收因結果一句如何舉  
揚三山雄壓江湖勢一塔長懸萬古燈

弘覺恣禪師爲天童林野和尚入塔撲碎虛空閒景  
象一庵卓卓露當陽銜花鳥自難尋跡孰謂將身北  
斗藏所以道善知識者以形骸爲幻泡以生死爲郵  
傳其來也月印江波其去也雲收嶽面唯我法兄林  
和尚夙因深厚願力弘堅出德嶠之戶門渾身是膽  
下川勤之二峽就地生波食到口邊奪回洞山菓子  
不住迷悟超然獨步大方故能橫身十字街頭珠回  
玉轉垂手千峰頂上斗換星移揮七尺山藤那分凡  
聖布漫天羅網打盡魚龍一朝闌爾告終蓋爲化緣  
將畢今則塔從地湧頂合峰尖依常寂以歸真散慈  
雲而分布且道還有奇特事也無千古玲瓏岳下寺  
一龕常照萬年燈



### 奠茶湯

靈隱原禪師爲碧峰和尚闍維奠茶五臺山拾得來  
誠非凡種關西子沒頭腦却是靈根惟茲一味清茶  
蕩滌衆生熱惱只如則川拋下茶籃仰山撼動茶樹  
畢竟明甚麼邊事度蓋云踏翻生死海靠倒涅槃城

### 秉炬

雲庵文禪師爲法眼大師火時雨新霽泥方滑道忽  
隕倒大衆爭掖而起乃舉火把云法眼茶毗歸宗遭  
跌呈似大衆更無可說

黃龍祖心寶覺禪師將入滅命門人黃太史廷堅主  
後事茶毗日隣峰爲秉炬火不續黃顧師之得法上  
首死心新禪師曰此老師有待於吾兄也新以喪拒  
黃強之新執炬召大衆曰不是餘殃累及我彌天罪  
過不容誅而今兩脚揜空去不作牛兮定作驢遂以  
火炬打一圓相曰祇向者裏雪屈擲炬應手而蘇  
無相眞禪師爲誠和尚火空花落影陽焰翻波夢覺  
知非靈明廓徹大衆知麼西堂禪師和尚太白峰前  
夢覺通玄頂上接人兩坐道場功成事辦化緣既畢

放下佛祖鉗鎚呼喚不同失我人天眼目然真空不  
住大智無依何妨脫體提斯不礙重添光彩大衆且  
道作麼生爲他添光彩舉起火把云還見者個麼百  
尺竿頭不知險七十六年如電閃去去青霄混此身  
何曾昧却者一點

雪軒成禪師爲太子少師廣孝姚公火君臣際遇少  
人知風虎雲龍共一時道德實能扶聖運秉忠挾術  
未爲奇恭惟示寂太子少師封榮國恭靖公姚公尊  
靈博儒通釋邁古騰今託迹空門若璉嵩出於宋肅  
忠王室宿申甫生於周故能歷三台之階而乃冠百  
辟之首安享乎太平之世優遊乎耄耋之年杖策來  
朝方謝唱佛讚揚之聖製旋車言邁遂懷卽心清淨  
之眞歸皇上恩眷彌隆禮儀悉舉動伐旣書於史冊  
寵光覃耀於山林於此便見老國公無生而生處世  
皆遊戲三昧非滅而滅息緣得解脫神通到者裏又  
何妨別轉一機與老國公重圓舊話嚮慕舉火炬云  
諸仁者還見麼錦袍玉帶金剛體烈焰光中不覆藏  
便擲

列祖提綱錄卷第三十

列祖提綱錄卷第三十一

武林十八澗理安禪寺住持婁東行悅集

爲住持遷化佛事法語

圓悟勤禪師爲佛眼和尚秉炬如來涅槃日娑羅雙樹間放出三昧火圍維金色身有條攀條無條攀例故褒山佛眼禪師道播四海名聞九洲二十年間三據大利退席褒嶺宴坐鐘山以平生所受用栗棘蓬驅耕夫之牛以楊岐所付囑金剛圈奪饑人之食傳持一大事提振向上機衲子雲從諸方景慕豈謂一彈指頃坐斷報化佛頭談笑之間遽失人天正眼今則乾坤廓落人境蕭條雪映高山風清大野圓頂後相放萬里神光大衆正與麼時還委悉麼看取亘天紅燄裏華發優曇大地春

爲佛真大師秉炬觸目菩提眞解脫頂門正眼耀乾坤透得生死關廓然無起滅佛真大師生平滴水滴凍勇猛截鐵斬釘舉世重其爲人聞見莫不欽歎內侍叢中跳出衲僧隊裏修行淵聖錫徽名皇后賜度牒驚群伏衆絕類離倫將謂萬里前程豈期百年頃

刻今則翻身長往透出金圈栗棘蓬頂後圓光應現無生大火聚佛眞佛眞急著眼保雲程一炬紅光纔舉處毗盧頂上任縱橫

爲範和尚秉炬忠臣不畏死故能立天下之大事勇士不顧生故能成天下之大名衲僧家透脫生死不懼危亡故能立佛祖之紀綱昭覺和尚神機峭拔智辯滔天肘臂下有符頂門上具眼奮喝散白雲底意氣操打破虚空底錯筵一歸錦官兩住雄利關開荆棘路坐斷是非關接物利生光揚佛日臨岐一著擺撥便行絕後光前頭正尾正如今既到者裏可謂世緣畢備末後慙慙坐斷路頭一堆猛火大衆且道畢竟向什麼處去舉火炬云烈焰亘天留不得當空寶月鎮長圓

弘覺恣禪師爲權和尚火干將獄底光衝斗一出豐城萬怪降天寶人間留不住空遺寒影寫澄江子不譚父德師豈譽徒賢恐孤芳之不著將青史其遂湮唯我權公長老智足超宗仁能續緒初臻覺岸高陞太白之堂末到牢關深入山僧之室閒吸西江水涓

滴無餘直接濟北流滔天有浪枝葉廉纖不帶瞬眇  
全彰本色之人偷心毫髮靡容鍼錐痛下時流之疾  
一衲披十周寒暑半逐飛雲三門絕今世塵囂平堆  
古叢所以人天四衆欣戴眞慈雲水方來雅推善導  
何意德生魔色豈期天喪予躬苦海波心遽爾頓停  
慈權琉璃地上無端撥轉夜船雲遮一帶峰巒集迷  
歸鳥雪覆千灣蘆溼岸失行舟正當今日指窮於爲  
薪火傳而不盡一句又作麼生道分形散體周諸國  
爲瑞爲祥遍九垓

### 安骨

育王元禪師爲澹庵和尚安骨浙水東頭是故鄉黃  
金臺畔忽云亡雖當明月清霜重猶見秋花晚節香  
恭惟澹庵和尚道重山林名揚海宇儼先輩之典型  
作後人之規矩風雲際會早嘗出世於浮梁雨露聯  
繁屢覲天顏於帝所分座鐘山榮升玉几承遠召住  
大慈恩踞倪床肆談宗旨選官利人兼利己正宣一  
代而闡揚豈料數朝而已矣雖然不滅不生無彼無  
此青青翠竹盡是眞如岌岌青山無非妙體今日歸

來事若何全始全終切骨切髓千古安然夢庵裏  
弘覺恣禪師爲權和尚安骨鯨吞水盡露珊瑚撐起  
枝枝桂影孤刹海三千澄後夜法身端坐大毗盧白  
雲斷處家山劫壺空中世界日月雙丸廻薄無絲正  
照旁臨虛閒六戶開張不受森圍烈繞廉垂黃閣迥  
帳合紫羅寒最妙最玄先聖獨推此位非偏非正諸  
佛罕處其中安下骨龕云且道者漢以何爲功能儼  
然高踞雪鬢霜眉從火出堂堂終不落今時

### 起骨

天隱修禪師爲達本大師起骨歸入龍池塔海底泥  
牛脚月走崖前石虎抱兒眠吾兄既達元初本何故  
淹留在此間歸去來歸去來故山院裏絕塵埃相逢  
俱是舊相識管使吾兄笑眼開

### 轉骨

天如則禪師爲報恩定長老中路轉骨道吾遷塔就  
石霜知子莫若父報恩移骨歸天目家富小兒驕雖  
然一種恩情爭奈兩家機軸撫骨云若不是定動裨  
僧俠路相逢放伊不過

煅骨

密雲悟禪師爲豁然師弟煅骨以火炬指骨云縱然皮膚脫盡白骨也須火煅惟我師弟豁然却具者般體段以火炬打圓相云大衆會麼擡火炬云看

弘覺恣禪師爲玄玄其公煅骨皮膚脫落露眞常那箇將身北斗藏火後依然還入煅精金要見十分黃惟我同參其公禪師叢林衛霍之臣知識蕭曹之佐始也受生陽羨飲光之中天降跡縣知佛日當興少焉脫白龍池耶舍之鹿苑皈投默計法輪定轉所以二十年事先師朝挈蓋暮提餅恒隨步武五六處裏法社櫛甚風沐甚雨歷盡艱辛然則丹山出而毛骨權奇師窟遊而爪牙鋒利事應乃爾理實當然其柰智困於天刑神疲於物務兼之風雲未邁羽翮先摧後先師僅五週趨寂滅將一紀於戲泰嶽顏而群峰偃象王去而象子隨白日不移輪青山常舉足寒崖一歸臥嗟哉春復春今則其徒萃章輩深恐異草之橫生謀遷涅槃之大宅正當移身換步時如何道得越格超方句放下骨襯云紅爐一點清嵩雪梅放香

林第一枝

靈骨入塔

應庵華禪師爲此庵和尚入塔摩醯三眼洞徹無私末後全提今之是也故我此庵和尚平生擔板不受差排會盡物我一如透過生死窠臼履刀山劍樹如步紅蓮入鑊湯爐炭似登寶所全體是箇大解脫門更無一絲毫許外物化緣既畢借路經過火光三昧自焚軀烈焰亘天誰著眼黃陣靈骨五色璨然不味高蹤斬新光彩今日安藏窣堵坐斷溪山萬木生風千江照月眞燈烈焰少室增輝正恁麼時且移身換步一句作麼生道還知落處麼寶印當空妙重重錦縫開喝一喝

密雲悟禪師爲守元大師入塔以拄杖指塔云盡十方世界是箇無縫塔復敲塔門云且道者一縫作麼合煞以手舉露骨送入云請師兄塞却

弘覺恣禪師爲雲門雪大師入塔以拄杖指塔尸云大衆還知者一段因緣也未若也未知山僧不免借婆伽子拜婆年去也須彌頂上鐵圍龕內有空王月

一函莫謂秋光淨如練佛來相見也垂簾且道當山  
堂頭和尚到此又作麼生珊瑚枝枝撐著月千古萬  
古衆同瞻

撒骨

毒海良禪師自遺撒骨法語云太湖三萬六千頃中  
有浮圖絕正偏今日遺骸歸去也碧天連水水連天

安牌

元叟端禪師爲別谷和尚入祖堂白雲作叢林紀綱  
以達磨居中開山居左百丈居右天下依而行之絲  
毫無有紊亂別谷和尚在茲山爲二十六代捐以此  
日居于此堂晨香夕燈其永無替

愚庵及禪師爲平山林和尚入祖堂召大衆云亭亭  
石塔東峰上此老初來百神仰福源浩浩起當湖千  
歲巖頭飛白浪宗鏡高懸二十年不雷焰光高萬丈  
翻身靠倒靈鷲峰雙樹悲風撼穹壤撲碎破沙盆滅  
却正法眼動靜絕行蹤去來無影象是謂眼空佛祖  
道重王臣年逾八秩五處住山平山老和尚指牌云  
湖光瀲灩山空濛觀體全彰大人相

天童性禪師爲前住當山第六十四代仁叟懷禪師  
生入祖堂大機大用闡單傳震動東南半壁天一句  
不言群象主威音王佛莫齊肩某德重叢林道通淵  
脉深得西印宗旨大弘廣慈世家照用則正眼洞明  
放行則真風卓邁發劈箭機以的破的鼓霹靂舌以  
空遣空所以人天自化外道歸降兩坐名山法輪大  
轉回澆漓之末運續無盡之真燈希年養高自他具  
足且最後一著還居正位畢竟作麼生道當陽提起  
破沙盆佛祖堂中稱獨尊

佛涅槃日師送自牌位入祖堂捧牌位云三界都來  
總大夢十方世界一空洞爲他恐墮斷常見又向虛  
空中鑿空箇漢行脚全無禪道罔措壞滅臨濟正宗  
籍沒大慧家世爲伊正眼瞎却不能普振真風故自  
罪犯彌天今又預居祖席我且貶汝異類橫身西州  
作牛東州作馬銜鐵負鞍拖犁拽耙饒伊要騎便騎  
要下便下搖動尾巴天上天下也只是精靈業識好  
與一頓且道正位端居一句又作麼生喝一喝遂放  
牌位



弘覺忞禪師送密雲先和尚入先覺堂先知覺後知  
先覺覺後覺從上佛祖莫不乘此願力而受生願茲  
化儀而趨寂所以我堂頭先和尚從無住本建最勝  
幢踞寂滅場現人間世風行六處草偃入挺金粟峰  
頭蹴踏千千龍象太白山裏變化億億鵬鷖今則法  
雨既周於此界慈雲將布於他方天台五百羅漢遮  
留不住此會百萬人天牽輓莫回遂獨步於南辰竟  
藏身於北斗既然如是因甚從前鼻頭繩索仍落在  
手裏正恁麼時且道把住卽是放行卽是海神知貴  
不知價留與人間光照夜

尊宿遺書至提綱

雲蓋智禪師黃龍死心和尙遺書至上堂法門不幸  
法幢摧五蘊山中化作灰昨夜泥牛通一線黃龍從  
此入輪迴

龍門遠禪師黃龍山死心和尙遺書至上堂死心心  
已死心死死猶生拗折黃龍角翻身臥地行者老子  
從來翻著欄衫倒携席帽口頭麤糙肚裏柔和檢點  
叢林呵叱學者雖傳晦堂道愛用雲門禪以罵風罵

雨爲訓徒以種菜種蔬爲作務興災降福少喜多嘆  
愚人見卽攢眉智者點頭相許要去便去果然作家  
騰身元是莫徠人睡中失却死心老嗚呼哀哉法門  
不幸

黃龍靈源和尚遺書至上堂昔開正續銘今示真歸  
告一路涅槃門行說皆親到明然臨濟燈妙唱黃龍  
道空海久澄虛雲濤方浩浩橫吞巨海高駕鐵船隱  
顯同源卷舒無際者其惟靈源手禪師居究竟地住  
本覺境雖曰示生實無生而可示雖曰示滅實無滅  
而可示明明密密密明明真化不移何妨出沒所  
以遺言作訓眞告普聞能事始終一期云畢而某曩  
歲遊方之始邂逅龍舒許以半面之交氣投分感雖  
則荆山隱玉已遇良知爾後蚌腹剖珠登舟獲劍歐  
峰再會素願允諧歡洽妙期有同符節自初及此三  
十年間理契同風至音無間夫何遽別特示遽書感  
存念亡此情彌切雖然如是佛佛不思議不許長住  
世大衆審思惟畢竟祇者是然則子期既沒伯牙絕  
絃蓋傷其無知音爾況此至道離見超情莫逆於心

夫何言也昔人問長沙南泉遷化向什麼處去沙云石頭作沙彌時參見六祖云不問石頭作沙彌時參見六祖南泉遷化向什麼處去沙云教伊尋思去師乃呵呵大笑云會麼水長船高泥多佛大共至靈前不勞觀聽

蔣山佛鑑和尚遺書至上堂噫噫師兄師兄出在我前去復我先噫噫師兄師兄出在我前許我並駕而齊肩去復我先使我隻翼而孤鶩豈不念茲苦海群迷未度況乃五湖玄學負笈趨筵遠辭舟楫執濟長川然佛法道理自有因緣此蓋衆生無祐薄福使然永遠叢社法炬無傳我聞如來雙林示滅又聞遠磨隻履西遷佛佛祖其道綿綿況我鍾山佛鑑法兄妙機無間出沒應緣去來生死吾何預焉而某於師門最爲深契在鴈序手足相連義交金石氣薄雲天聽遺音而何忍念朽質以非堅同心共照夫復何言尙記得如來滅度阿難問迦葉曰世尊傳金襴外更傳何法迦葉曰阿難阿難應諾迦葉曰倒却門前刹竿著大衆若無者箇公案生死熾然白雲師翁道金

襴之外復何傳弟應兄呼豈偶然倒却門前刹竿著免教伊舊倚牆邊大衆會得麼倚牆邊倚牆邊寂滅光中禮白蓮

大慧杲禪師天童覺和尚遺書至受書云古人道末後一句始到牢關把斷要津不通凡聖舉起書云者箇是天童和尚末後把斷要津全提底消息還委悉麼如未委悉却請維那分明說破宣了遂陞座云法幢摧法梁折法河乾法眼滅雖然如是正是天童真實說且道說底事作麼生知音知後更誰知

密庵傑禪師木庵和尚遺書至拈香云大衆還識者尊慈麼雖與我同條生不與我同條死稔聞在七閩揚塵兼簸土凌窳宗風不柰何今朝喜見清平路清平路既見異竟如何茶傾三奠香爇一爐伏惟尙享靈隱佛海禪師遺書至上堂呼猿洞口虛空迸裂鴉飛不度如行如說三十三天撲帝鍾打刀須是邠州鐵喝一喝下座

元叟端禪師天童雲外和尚遺書至上堂舉雲居膺和尚遷化次問侍者云今日是何日者云初三居云

三十年後但云只者是遂乃端然告寂師云雲居得曹洞正傳爲宗門百世師表末後全提因甚一場懺懺擊拂子云無縫塔中雲匝匝不萌枝上月團圓愚庵及禪師育王石室和尚遺書至并入祖堂上堂五十二年弄巧成拙踏破虛空赤脚行萬象森羅笑不徹大衆箇是育王石室和尚末後爲人底句子明如果日寬若太虛權實照用俱備擒縱殺活皆全可以津濟四生可以梯航九有蚊子上鐵牛無你插嘴處卓拄杖云者裏見得無一處不睹慈容無一時不聞說法苟或未然少間下座普請諷經莊嚴品位香煙起處一任觀瞻

笑隱訢禪師金山長裕和尚遺書至上堂大法旣微賴恢宏於堪忍界內幻身雖沒當鼓舞於寂滅海中臨濟道不得滅吾正法眼藏大覺道我要付與一隻箭良由弘法心重愍物情深故有落草之譚諸人還見金山垂手處麼鐵船無底踢翻去依舊東山水上行

靈隱獨孤和尚遺書至上堂靈機絕待不涉去來妙

用無方寧存軌則大梅聞鼯鼠聲埋沒自己普化索木直撥誑惑他人爭如我靈隱和尚隨緣施設不墮功勳七十四年光前絕後直得飛來峰起舞冷泉亭踈跳諸人還見此老涅槃後大人相麼落落橫身三界外堂堂獨步劫空前

東林古智和尚遺書至上堂拈兕角杖敲出佛祖骨髓握吹毛劍掃蕩今古葛藤臨行道箇聽末後句烜赫虛空如臨濟滅却正法眼得三聖直下承當盤山告衆索傳眞普化獨解翻觔斗龍翔與麼追悼衆中莫有換手捶胸者麼擊拂子云寥寥天地無知已不聽遺音空絕絃

徑山和尚遺書至上堂昔妙喜祖到蔣山應庵和尚上堂云天下具大眼目尊宿惟法叔一人而已今我徑山法叔再世妙喜也小侄曾聞於朝請爲茲寺開山而未果所願遺書忽臨如觀象駕之至堂堂正體嚴金錫之橫肩琅琅法音聞虛空之振鐸四衆攀戀不勝哀感既是生死無間未免賓主相見去也傳家只箇金剛王留與兒孫作標格

楚石琦禪師因龍翔曇芳和尚遺書至上堂心同虛  
空界示等虛空法證得虛空時無是無非法既無是  
法又無非法則諸佛成正覺轉妙法輪入般涅槃  
如夢相似曇芳老子佛海禪師屢董名監親承眷遇  
方辭徑塢即據龍翔末後光明全身舍利八斛四斗  
未足爲多試拈一粒與諸人看豎拂子云海神知貴  
不知價留與人間光照夜擲拂子

了庵欲禪師宜州天寧遺書至上堂鐵牛吼破雙溪  
月石女含笙悲不徹鵲眼龍睛總不知鑿子親聞啞  
子說山僧二十年前親見草庭老子向萬仞崖頭拾  
得箇斷貫索到處穿他天下宗師鼻孔及手應緣而  
出瑞世天寧水到渠成風行草偃又欲用此索穿他  
天下衲僧鼻孔化緣既畢奄爾歸撒手那邊全無  
朕跡所以道聲前非聲色後非色蚊子上鐵牛無你  
下嘴處山僧今日不免倒行此令去也少間下座詣  
靈前燒一炷香點一盞茶欲與他穿了鼻孔何故喫  
拳須記打拳時

報國希白和尚訃至上堂未達境惟心起種種分別

達境惟心已分別則不生於不生法中獨露本來面  
目直是離相離名絕對絕待破塵破的透色透聲故  
我報國和尚得此三昧兩處住山單傳正印掃除邪  
解扶樹此宗能事既畢撒手邪邊末後全提甚生光  
彩且道與他摩訶告衆梯示雙趺是同是別拍禪床  
云羚羊挂角千峰上更有羚羊在上峰

仙巖仲謀和尚遺書至上堂杜城山頂打鳳羅龍黃  
池水邊張蝦釣鼈逗到衣錦還鄉一味斬釘截鐵如  
今傀儡線索斷五色祥麟步天岸有伴何妨却再來  
了却先師舊公案且先師公案作麼生了卓拄杖喝  
一喝

弘覺恣禪師天童和尚斷七復聞顯聖爾密弁山久  
默二禪師訃音師爲安靈設奠云平地西風起吹倒  
空王殿亦有善法幢以次相傾潑慧命尙縣絲人天  
胡可戀子細思量著無如衲僧便海底泥牛已絕蹤  
草鞋不用行鄉縣休云世界何寥寥須信皇封成一  
片好衲僧薦不薦於此猶未達根源香燒一炷茶三  
奠提臂只得哭蒼天魔王拍手恣權桴

護法遺書至提綱

密庵傑禪師施司諫計音至上堂風行草偃水到渠成信脚與麼來雲收霧捲是處皆春信脚與麼去空澄海湛物我一如所以道去來不以象動靜不以心如是則塵塵刹刹普現威權蓋色騎聲纖塵不立羅籠不肯住呼喚不回頭古聖不安排至今無轍跡且道司諫施公卽今在什麼處良久云黃梁纔夢斷竺國一花敷復說偈云昔年相見談真諦今日陞堂話去來一念廓然無向背春光鐵樹自花開

請西序頭首提綱兩序

恕中愠禪師請西序上堂如來藏中不留一法衲僧門下豈有多端靈樹和尚云我首座生也我首座行脚也一字不著畫會麼不見道客來無茶點蒿湯備禮儀

月江印禪師請頭首上堂善哉三下板知識盡來參旣善知時節我今不再三古人與麼道大似按牛頭喫草雲峰則不然善哉三下板收足上蒲團脊梁生鐵鑄透過祖師關一氣轉一大藏教背手拈却須彌

山七處徵心無心可覓八還辨見無見可還夢入天宮猶未醒金鷄飛上玉欄杆

笑隱訢禪師請頭首上堂騰今耀古摩醯正眼洞明鍛聖鎔凡向上鉗鎚妙密定佛祖綱宗之句須是其人展主賓互換之機要求作者所以道作大厦非一木能成涉巨川豈一棹可濟直得炤用同時星飛電捲人境俱奪玉振金聲正恁麼時諸人鼻孔在山僧手裏且道山僧鼻孔在什麼處擲拂子云一任橫拖倒拽

請兩堂首座

眞淨文禪師請首座維那典座上堂三德六味施佛及僧香積厨中善調在手三世諸佛向砧槌上聲聲相應且道相應箇什麼良久云問取堂中第一座請首座典座及逍遙和尚來上堂不動眞際爲諸法立處昨日監院名今朝首座號緣應百千般立處頭頭妙典座把杓柄一一臨時料衆口若能調逍遙同一道諸法立處今已彰作麼生說箇不動眞際底道理喝一喝下座



請首座上堂一番新一番舊新舊相資要成就諸禪  
德且道成就箇什麼爲成就佛事耶成就這場耶成  
就叢林耶若與麼成就豈有教外別傳乃拈拄杖云  
此爲復是教內教外是新是舊不得喚作拄杖使成  
就取好遂擲下下座

圓悟勤禪師請首座上堂合千差包萬有齊往來印  
古今混有無一生死舉不犯之令行不言之教齊不  
齊平不平於此建立於此辨明於此紀綱於此表帥  
何法不容何事不成何德不圓何心不契且風行草  
偃一句作麼生道爲山登九仞捻土定千鈞

元叟端禪師請首座上堂有際天之雲濤可容吞舟  
之魚有九萬里之風可負垂天之翼建法幢立宗旨  
苟非其人安任其事拍禪床云有意氣時添意氣不  
風流處也風流

恕中愷禪師請首座上堂開鑿人天眼目挽回上古  
風規坐斷情塵意想不落玄妙機關斬新日月特地  
乾坤須是其人堪任其事靈樹虛第一座而待雲門  
蓋爲此也拍禪床莫怪渠儂多意氣他家曾踏上頭

關

愚庵及禪師請昌國吉祥亭子元充首座上堂臨濟  
建立黃檗宗旨普化盡力成禪無端仰山道此人有  
頭無尾有始無終山僧昔年承乏海山子元橫身輔  
佐茲者備員宕寺又荷分座說法却不似仰山道此  
人有頭無尾有始無終也諦觀佛祖各各出興隨方  
化導莫不全賓全主全主全賓大用齊彰大機普應  
流通正法眼藏顯示涅槃妙心直得雲行雨施水到  
渠成還他過量人堪任過量事卓拄杖云龍得水時  
添意氣虎逢山色長威聲

笑隱訢禪師請首座提點兼謝吉祥崇教二長老上  
堂壁開泰華巨靈謾逞其威百步穿楊由基未爲中  
的所以接雲門嗣雪峰指臨濟參黃檗睦州眼裏無  
筋拽耙牽犁種田博飯楊岐腕頭欠力龍翔尋常不  
敢輕意用人不及用時以一當百如漢高不善將兵  
而善將將非惟紀綱叢林要作後來榜樣更有難弟  
難兄來往更酬迭唱不妨打鳳與羅龍龜毛結網三  
千丈

牧雲門禪師請首座上堂日南長至節屆書雲天心復見扶陽抑陰紫羅抹額繡裙腰甚生標致赫赤布裙無來替換家無滯貨不發所以烹金琢玉須資作有鉗鎚荷教扶宗全仗本色兄弟揮拂日於西垂回狂瀾於既倒豈不是君子道長小人道消你大衆還見麼物宜求新樓前海棠花開却一朵兩朵人宜求舊卽日堂中第一座少渠不得且阿那箇是第一座卓拄杖云蘇州有

### 留首座

圓悟勤禪師留首座上堂古道坦然真規不墜紀綱得所表帥得人內肅外寧安家樂業以大千界爲一員境以十方佛同一舍那文殊普賢交光相羅觀音彌勒擎拳合掌臨濟德山互相贊成白牯狸奴了無向背可以演無生曲唱太平謠且超情離見一句作麼生道木人把板雲中拍石女含笙井底吹虎丘隆禪師留首座上堂田地穩密鬼家活計從空放下坐井窺天虎丘門下不說老婆禪只要諸人眼橫鼻直三十年後免得敲顛打瓦何故物宜求新人

宜求舊不起於座現諸威儀且道出格一句作麼生良久云落霞與孤鶩齊飛秋水共長天一色

### 請藏主侍者

南石琇禪師請藏主維那侍者上堂一大藏教是箇切脚直指單傳秦時轆轤國師喚侍者淨地何必拋泥沙與化打克賓瘡病豈假驅馱藥你有拄杖子我與你拄杖子你無拄杖子我奪却你拄杖子

請藏主侍者上堂少林心印觸處昭彰禪子生涯隨時施設側身對客原夢度茶擎叉輓毬卓牌打地一全體全用著著邁古邁今十地菩薩尙顛顛四果聲聞應罔措徑山者裏又且不然含暉亭上聖滄溟凌霄峰頭挹南嶽

愚庵及禪師請侍者諸山客至上堂一葉落天下秋法身須透鬧啾啾定光金地遙招手智者江陵暗點頭喚侍者云三界唯心萬法唯識一句中具三玄一玄中具三要且道與上來說話相去多少良久云若也不曾問取諸山和尚

恕中愍禪師請侍者上堂趙州與文遠鬪劣不鬪勝

老大不識羞相席還打令致使明眼人無由辨邪正邪正既不辨轉轉成毛病瑞巖百不能愛用無星秤稱起太虛空鑑鉢無欠利以此爲瑞爲祥以此爲坑爲穿斷衲僧之咽喉續佛祖之慧命

請東序知事提綱監寺 提點 典座

眞淨文禪師請知事上堂至道無難惟嫌揀擇豈可以親疎好醜擇而然後用之要用使用入到手土作黃金拋來擲去滿日光輝也要衆人見諸德又作麼生不揀擇好醜而用之喝一喝下座

笑隱訢禪師朝廷降給齋糧併請監寺典座上堂我本無心有所希求今此寶藏自然而至楊岐金剛圈十分光彩東山鐵酸餡百味具足若是知恩報恩不妨大家受用且道受用箇什麼幾片白雲橫谷口數聲寒鴈起滄洲令人苦憶寒山子紅葉斷崖何處秋了庵欲禪師請提點上堂楊岐栗棘蓬東山鐵酸餡多處添些子點卽不到少處減些子到卽不點萬機俱赴八面玲瓏一句全提風行草偃擊拂子龍得水時添意氣虎逢山色長威憚

保寧勇禪師上堂十方梵刹事同一家量才補職買帽相頭衲僧家一日二時向長連床上開單展鉢拈匙把筋欠箇什麼餠餅鉢飪糖糕餡乃尋常茶飯雖然如是且道杓柄在什人手裏若也知得一任恣意餐啜若也不知今日請新典座

密庵傑禪師請典座上堂舉夾山在潯山充典座潯山一日問今日堂中喫甚菜座云兩年同一春山云如法修事著座云龍宿鳳巢師云柄霸在手縱奪臨時敲磕將來百味具足其中只欠一味且道是油是醬若檢點得出華藏功不浪施其或未然更聽重下註脚輔弼宗門有老成一番提掇一番新咬薑呷醋知鹹淡便是叢林過量人

元叟端禪師請典座上堂草木衰謝春至自榮衆生顛倒妄盡自覺僧問三平如何是有漏平云芥籬如何是有漏平云木杓亂走衲僧一任圖度

列祖提綱錄卷第三十一

列祖提綱錄卷第三十二

武林十八澗理安禪寺住持婁東行悅集

請列職雜務提綱修造 監收 化主 發化主

五祖演禪師請修造上堂白雲今日權將大宋世界作一面碁盤先將東嶽泰山南嶽衡山西嶽華山北嶽恒山中嶽嵩山定却五万次將五臺峨嵋支提羅浮以爲相助左畔則斜飛鴈陣右邊則虎口雙關遂舉手云且道者一著落在什麼處若知落處便爲敵手若也未然白雲試通箇消息十九條平路爭功勢未休莫教一著錯敗子卒難收

虎丘隆禪師請修造上堂如來三轉於大千趙州半藏亦如然其輪本來常清淨一念承當誰後先雖然也是箇英靈漢始得便乃橫身擔荷紹續宗風立吾家萬世不朽之功顯大丈夫兒特達之志抱荆山玉握靈蛇珠光耀叢林揮戈佛日直得龍吟霧起虎嘯風生象王行處絕狐蹤獅子窟中無異獸雖然如是且道應緣垂手一句作麼生道旃檀葉葉古風清吹落人間香馥郁

五祖演禪師請化主上堂造化之功祖宗門下作天地發生之氣春夏秋冬決含靈顛倒之心甯樂我淨若據衲僧用處又且不然變大地爲黃金攪長河爲酥酪猶未稱白雲在忽有箇漢出來道似恁說話只是箇貪心不足漢自云道著參

龍門遠禪師請化主上堂一竿一笠一蓑衣急水灘頭下釣絲鈎上錦鱗容易得蘆花深處月明歸復舉古人問三尊宿二龍爭珠誰是得者一云得卽失一云老僧祇管看一云誰是不得者師云得卽失著忙作什麼老僧祇管看看濟甚麼事末後一語誰是不得者若人會得祖師言句一大藏教自然不疑去還明得麼誰是不得者非取亦非捨馬載驢馱時便是歸來也下座

劍門分禪師請化主上堂萬代金輪王子孫莫衣綴鉢化朱門箇中消息許誰會多認枝頭落葉黃箇中非愚亦非智天上人間無有此金粟如來笑點頭落落英風振天地君不見劍門老等閒擲下深深餌不釣人間非與是又不見河沙諸佛爲群生橫也豎也

沒纖忌咄一曲太平春復秋十分高價未爲酬天邊  
紅日豈虛出照世精明混衆流下座

保寧勇禪師發化主上堂盡十方世界爲一大陣若  
聖若凡種種異類出此不得釋迦爲主將文殊作先  
鋒普賢爲殿後陣勢既圓且道與什麼人相見良久  
云定光金地遙招手智者江陵暗點頭遂拈拄杖云  
如今盡在保寧拄杖頭上開甘露門示眞實相展縮  
無礙縱橫自由還見麼若也見得眞不掩僞若也不  
見分付諸方化主一任將向南州北縣扶過斷橋水  
伴歸明月村卓一下下座

發化主上堂身披信施衣口喫信施食施者絕纖毫  
受者無蹤跡大施門正開百千及萬億信手拈將來  
切忌從他覓既不從他覓向信手處道將一句來有  
麼若無保寧自道去也一封書信通消息兩貼茶湯  
表信儀

五祖演禪師發諸郡化主上堂荷衆諸禪流才能足  
機劃逢人定有錢見面寧無夢已是我家兒久爲物  
外客溫柔一手擡剛硬雙拳擲牙爪一時全勝南山

白額

圓悟勤禪師住雲居發化主上堂火不待日而熟性  
相類風不待月而涼氣相合獨樹不成林單絲不成  
線建大厦非一木之能濟巨川非一棹之力所以道  
衆毛成毬聚鐵成鎔要須內外相應賓主和融自然  
氣類相同羽毛相似正與麼時如何八萬四千非鳳  
毛三十二人入虎穴復有頌云三十餘員雲水客諸  
方分化力行持山門庶事渾依賴正是金毛奮迅時  
眞淨文禪師因發化主上堂出家沙門當清淨自活  
以乞食爲正命食不過分離憍慢故以乞法爲正念  
增長智慧不滯寂故薰拈拄杖云你有拄杖子與你  
拄杖子你無拄杖子奪却你拄杖子於此薦得增汝  
智慧破汝憍慢火燄裏藏身淤泥中出現千手千眼  
大悲菩薩一任神通變化於此不薦有清泉兮恣汝  
飲有碧巖兮從汝棲切忌寒猿深夜啼

發化主後上堂丐者月餘朝束裝有煩知事首座大  
衆一動一靜寧不有勞然則勞動若是道人分上無  
非佛事所謂往復無際動靜一源苟契神於動靜則



無滯於往還心迹不生順逆何咎此則於心無心於事無事又何妨於動靜往還之勤其或得之者正乎心失之者亂乎性蓋得失之自殊非動靜之有異乃拈拄杖擲下喝一喝下座

上堂發化主舉王大王向雪峰會裏請晏監院住鼓山雪峰謂衆曰有一隻聖箭子入九重城裏建立佛事去也有孚上座去中路截住問云承聞聖箭子入九重城裏去是否晏云是孚云忽遇三軍圍繞時如何晏云他家自有通霄路孚云與麼則離宮失殿去也晏云何處不稱尊孚遂回謂雪峰云聖箭子途中折了也峰云他道什麼孚舉前話峰云奴奴他語也得孚云和尚肱膊終不向外曲師云雪峰雖爲一千五百人善知識受侯王供養福報因緣卽不無若是佛法未在洞山則不然云和尚聖箭途中折了也云他道什麼師云待伊舉了拽拄杖打將出去一使孚上座於後作箇本色衲僧二與聖箭子出其鋒銳三與禪門作箇真正宗匠爲後人眼目諸禪德是也不是有眼者辨取良久云洞山也有三隻聖箭子各往

一方作大佛事莫有作家戰將向途中截住將聖箭子總與摺折却來洞山手裏請棒喫有麼有麼若無明日普請向新豐亭上隨例喫茶相送

洞山聰禪師發供養主示衆住持之道勞他十方高人且實際理地不受一塵佛事門中不捨一法蓋爲清衆之故所以忘勞然盡大地作一箇餠餅天下人盡得喫唯有深沙神不得喫怒發將疾梨杖一棒瓦解冰消

劍門分禪師發化主上堂無拘繫笑嘻嘻惟佛與佛乃能知時光不管急如箭一鉢甘爲賤乞兒賤乞兒何處去影分泉落無窮數水裏難尋月在天回百萬聖賢猶蹉過

應庵華禪師請監收上堂古來爲法老尊宿荷衆曾無有倦時況是年來衰落甚動爲多與行相違應須痛念平生事著意披襟善護持顆粒果能無滲漏少林初不隔毫釐

元叟端禪師請監收上堂山鄉每憂旱水鄉常畏潦付託既得人安用挂懷抱古人云千粒萬粒一粒生

只者一粒甚處生歸堂喫茶

愚庵及禪師請監收并謝雨上堂今朝八月初一天外雲收日出夜來灌門龍王見大神變降注大雨盡大地草木叢林稻禾菽粟皆得霑濟隆教寺裏普請監收箇箇得人一年三百六十日管取粥足飯足江南兩浙春寒秋熱下座

恕中愠禪師請監收上堂兼謝天童藏主以字不成八字不是玲瓏殿頂白浪滔天萬工塘中蓬塵漲起分毫上定當升合裏論量收得來放得去隨緣剔脫觸處放光可以起臨濟正宗可以滅正法眼藏雖然若是箇中人間與麼道直須洗耳有分且誰是箇中人面如滿月目如蓮天上人間咸恭敬

舉名德兼法嗣立僧

眞淨文禪師上堂丹霞燒木佛院主眉鬚落又教中云未見自作他受他作自受若爾則禪門與教乘敵體相違故丹霞自燒木佛旁僧受殃未審此理如何莫有人明得麼良久云若無人唯澄公首座深明此理希諸高德旦暮親而扣之就而明之下座

圓悟勤禪師舉杲首座立僧上堂鶻兒未出窠已有摩霄志虎子未絕乳已有食牛氣況復羽翼成況復爪牙備奮迅卽驚群八面清風起一條脊梁硬似鐵一條白棒掀天地相與建法幢展衲僧巴鼻

舉丹霞裕長老爲人入室上堂大衆摩醯首羅揭示頂門正眼摩竭陁國全提向上鉗鎚壁立萬仞絕承當孤光燦破四天下所以道殺人刀活人劍將錯就錯上古之風規亦是今時之樞要和泥合水若論殺人刀不存毫末活人劍橫屍萬里須知殺中有活擒縱人天活中有殺權衡佛祖直饒說得殺活個儻分明山僧更問你覓劍在正恁麼時見麼萬仞懸崖垂隻手高峰共唱太平歌復云趙州道趙州南石橋北觀音院裏有彌勒祖師留下一隻履直至如今覓不得諸人要知落處麼問取丹霞和尚

舉泰首座立僧上堂大人具大見大智得大用一飛六月息一諾千金重滔天必江海崔嵬必山嶽先知覺未知先覺覺後覺打開無盡藏運出無價珍不依倚一物顯示本來人

舉悟和尚立僧上堂只者是大似撒沙向眼中只者不是還如注水向耳裏直下無事平地陷人別有機關墮坑落塹且畢竟作麼生祇園屈曲流泉急鷺嶺巍峩雲出遲復云雲居開大洪爐不止烹佛烹祖但有一切持來烈燄堆中辨取是則當處平和不是切宜退步煅出金剛眼睛直得乾坤獨露雖然到者田地須知向上一路還委悉麼放將三聖瞎驢踢殺大雄猛虎

大慧杲禪師舉本願二首座立僧上堂驅耕夫之牛奪饑人之食趨翻大海水拳倒須彌盧生擒兇虎活捉孽龍猶未是衲僧本分事作麼生是衲僧本分事問取堂中二首座

應庵華禪師舉西堂正法和尚立僧云西天四七唐土二三天下老和尚無不以此頂額上一著流通正法眼藏顯示涅槃妙心是故雲夢之竹天下之勁也然而不矯揉不羽筭則不能以入堅堂溪之金天下之利也然而不鎔範不砥礪則不能以擊強矯揉羽筭鎔範砥礪既妙至人之用其赤手提持解黏去縛

抽釘拔楔烹佛煅祖轉凡成聖亦不出此箇端由所謂善知識者是大因緣其斯之謂歟正當恁麼時如何竚看汗血八駿駒何啻日馳三萬里

舉傑首座立僧上堂一棒一條痕一摑一手血臨濟老瞎驢至今猶未瞥須彌頂上浪拍天大洋海水無一滴偉哉本色人頂門亞三隻辨龍蛇百草頭擒虎兇一毫力穿大地人鼻孔坐斷衲僧指舌雖然猶未撥動向上一竅在且作麼生是向上一竅問取堂中首座傑

密庵傑禪師請前堂首座鶴林印和尚立僧上堂佛法無人說雖慧不能了去却上頭關面南看北斗虚空挂劍殺活臨時鞭起臨濟瞎驢放出五祖酸齏盡大地人亡鋒結舌扶豎佛祖正宗還他過量人能持過量事過量人已見過量事已聞且不涉言詮一句如何通信下座煩知事頭首大眾詣首座寮扣問天目禮禪師舉國清枯椿臺和尚立僧上堂謝三郎螺江釣魚郁山主眯水騎驢老盧負石蹋碓長慶坐破團蒲各人自守封疆好與三十拄杖只如圓州人

說台州話又作麼生問取國清和尚

筓庵問禪師舉昱首座立僧上堂眼裏不著沙耳裏不著水雖然俊俏衲僧寧免守株待兔眼裏著得須彌山耳裏著得四大海水橫來也著豎來也著一任象馬龍蛇拳踢蹴踏且道憑箇甚麼得到與麼地顧左右云問取堂中第一座

弘覺恣禪師舉山幢懷大師立僧上堂萬里鼇鉤蓋爲獐龍而下釣千鈞之弩豈因鼯鼠而發機然道在人弘事無一向所以出群獅子天外吼音敵勝丈夫隨方導物磨礱臨濟吹毛劍偏儻楊岐栗棘蓬富可卷而懷之遇奇人則拈出眼光明燦四天下噫氣卷舒六合雲設若操令而行直得無位真人與他鏤明脊骨況乃入鄺垂手任是大悲菩薩更爲額上栽眉正恁麼時滅却正法眼卽且置爲我扶起破沙盆一句作麼生道卽將潞西江水注作玲瓏妙密鍾復舉葉縣省禪師云宗師血脉或凡或聖龍樹馬鳴天堂地獄鏤湯爐炭牛頭嶽卒森羅萬象日月星辰他方此土有情無情以手畫一畫云俱入此宗此宗門

中亦能殺人亦能活人殺人須是殺人刀活人須是活人句大衆要識殺人刀活人句麼問取前堂座元山幢懷大師下座

#### 立僧後乘命普說

雪巖欽禪師道場立僧普說禪客出問云天氣秋高玉露垂庭前黃菊綻東籬臨濟德山施棒喝不問知音更問誰答云知音知後更誰知進云與麼則水向石邊流出冷風從花裏過來香答云閒言語進云如何是德山棒答云穿過你髑髏進云如何是臨濟喝答云還聞麼進云記得昔日臨濟和尚示衆道我有一喝作探竿影草有時一喝不作一喝如踞地獅子有時一喝如金剛王寶劍有時一喝如探竿影草有時一喝不作一喝用此意如何答云從頭問將來進云如何是一喝如金剛王寶劍答云切忌傷鋒犯手進云如何是一喝如踞地獅子答云真箇可憐生進云如何是一喝作探竿影草答云不得而前背後進云如何是一喝不作一喝用答云却須參始得進云探竿影草驗來人一喝須教海嶽昏不是王親的子等閒誰敢踏渠門云且緩緩

進云只如釋迦世尊四十九年橫說豎說說不盡底事今夜座元禪師如何布施答云猶嫌少在進云選佛若無如是眼宗風那得到如今師拈起拄杖云只者是德山棒卓一下只是臨濟喝伶俐漢向未舉已前一提提得水向石邊流出冷風從花裏過來香其或未然更煩拄杖子借德山鼻孔與臨濟出氣去也卓一下金剛寶劍卓一下踞地獅子卓一下探竿影草只如一喝不作一喝用與前三喝是同是別若謂是同臨濟大師未肯點頭在若謂是別爭奈被德山老漢一串穿却鼻孔畢竟德山臨濟二大老鼻孔與四十九年說不盡底相去多少乃靠拄杖復云既隆釋種須紹門風諦審先宗是何標格豈不見臨濟三度扣黃檗被六十拄杖如嵩枝拂相似又不見德山於龍潭吹滅紙燭處脫然悟去道窮諸玄辯若一毫置於太虛竭世樞機似一滴投於巨壑二大老可謂窮千聖之骨髓徹萬法之根源流芳後世垂範於叢林者矣今時參學道流又須帶些子眼筋覷破他古人敗闕處始得若也覷得破便見黃檗龍潭雖似

金翅擘海直吞龍吞要且未免作死馬醫臨濟德山是則不離當處獨跨大方其奈捨長就短埋沒已靈要稱百世宗師未得在道場門下不說覷破覷不破盡是在他頂額上放扇底漢如今既在名裏聚首片時欽上座未免借堂上老人威光掀翻海嶽撞碎太虛也要大家證據雖然王令正靈豈可攙行奪市今朝九月一打板坐禪首座謂之表率或恐一人半人新發意菩薩欲覷捕此道者未有入頭處未有下手腳處或工夫有間而不得成片段或少有歡喜不復加鞭以求正悟或已有悟門爲悟所迷光影不脫礙正知見或爲勝妙快樂所罩墮在解脫深坑轉身不得或於古今差別機緣有意味可以啗啄者一一計較得行無意味難於咬嚼者又却分疎不下或爲一切奇言妙句奧理玄文障在八識田中拋捨不下謂之錘毒入心如油入麵永取不出如今要得通上徹下一翻翻轉須是將一則古人沒意智底話頭如生冤家與之作對直是撲一交倒地始得若是未有者箇消息直饒行脚走盡天涯海角口裏記盡落索春



秋打開鋪席一似賣狼虎藥只益戲論誑惑後昆自  
已衣單下半文不直底一著畢竟不曾摸著若是眞  
箇卒地斷曝地折底漢眼目動靜言語提持著去離  
泥水脫略窠臼一切處一切時只麼平帖帖地那裏  
恁麼生生癢癢吒吒沙沙道我無敵於天下者也者  
箇喚作西天九十六種之數誇張知解該抹聖賢望  
吾佛祖之道遠之遠矣若是具正因有志之士莫被  
者一種塏圾性地泛濫心源須信有正宗之下單傳  
直截之妙始得如趙州一箇無字眞箇是一口吹毛  
利劍可以破疑團斷生死空萬法融古今只貴利根  
上智撥著便轉據著便行然後不妨與趙州老漢同  
一眼目同一受用以至總萬別千差之要開千差萬  
別之門全資全主全體全用全放全收全生全殺而  
總不外此矣若是性根遲鈍操舍不行却須豎起生  
鐵脊梁向長連床上厚著蒲團挺身而坐盡三百六  
十骨節與八萬四千毛竅併作一箇無字握兩拳頭  
撐兩眼睛一提提起便欲斬爲兩段能如是著鞭如  
是用力何患乎不成片段何患乎不到頭似覺提不

起時轉覺熱悶悶時與昏昏擾擾時却須全體一放  
放下翻轉身來就地略行數步於行處亦如是著鞭  
如是用力只當下別是一般精神又復翻身上蒲團  
挺身而坐則胸次中灼然如銀山鐵壁虛勞勞地靜  
悄悄地何處有一絲毫動相有一絲毫異相到者箇  
時節却不得守在者裏又須翻身下地如坐而行然  
後又復如行而坐晝若不足繼之以夜夜若不足繼  
之以旦翻來覆去提去提來不知不覺忽然拶透如  
貧得寶似闇得燈如雲開見日如水底火發盡十方  
利海是箇大圓鏡盡十方利海是箇自己謂之心空  
及第見徹父母未生前面目若說明大法透古今以  
盡佛祖之奧喻如入海方始插得脚前面洪濤際天  
巨浪沃日那裏更在那裏切不得聽人道悟是表顯  
之說箇事本來成現只消一笑知歸是則固是其柰  
隔壁搏謎青黃赤白長短方圓畢竟不曾親見被人  
掇在面前分明是差珍異寶却喚作瓦礫磚頭分明  
是瓦礫磚頭却喚作差珍異寶又不得聽人道參禪  
本是安樂法門那裏有許多生生受受勞勞攘攘只

消默默提撕久久自契着箇喚作死水浸石頭永無醒動底分子又不得聽人道只者無字是箇繫驢橛子只消提來頓在面前牢牢把定繫住者一念子念頭純熟自然到家殊不知者一念子如燈焰焰如水涓涓眨得眼來千里萬里自非潑撒一回那裏被你把得定繫得住又不得聽人道只消於聞聲見色處領覽折旋俯仰處承當開口道著動步踏著六根門頭一道神光晝夜未曾間歇者箇喚作生死根本業識癡團急須斬作三段又不得聽人道從無住本立一切法本來無有山河大地明暗色空無佛無祖無衆生無凡無聖無善無惡無去無來無生無死者箇喚作豁達空機因果莽蕩蕩招殃禍又不得聽人道坐斷主人翁不落第二見著衣喫飯不借他力山是山水是水僧是僧俗是俗是法住法位世間相常住似則也似是則未是如上所說竝是自作障礙自生退屈自暴自棄自殘自虐醫不得底偏僻之病除是下一服換骨靈丹出得一身白汗然後即知傷寒傷熱傷饑傷飽盡是大休歇大安樂田地與夫轉八

萬四千毛病爲八萬四千陀羅尼門是身是病是草是藥亦能殺一切人亦能活一切人臨時加減對症修方一切在我若是根本不牢元氣不足莫教被人下一粒巴豆便見現身發作面黑眼花一時性命都討不見若是識安危知休咎底漢但是醍醐毒藥與你對面一翻翻却於一毫頭別有通霄活路如今都是口耳傳習訛謬方書並不見一人有神聖功巧之妙悞人多矣往往指見聞覺知揚眉瞬目爲自己復引卽心卽佛與目前說法聽法一段歷歷孤明之語爲證然後舉是風動幡動不是風動不是幡動却喚者箇作初機公案教你向者裏淘澄見地剔抉根源然後又舉栢樹子麻三斤乾屎橛之類喚作單頭淺近公案教你開口處識取話頭然後又舉玄沙未徹趙州勘婆之類喚作試金石子又喚作換眼睛烏豆然後又舉百丈野狐女子出定之類喚作宗門關鍵羅龍打鳳底鉗鎚然後又舉馬祖一喝巖頭末後句之類喚作向上爪牙衲僧巴鼻以至從上老凍儂一時垂慈利物之要莫不盡有印板上脫來底樣子教

你從頭穿鑿從頭註解合著者箇樣子便喚作明大法透古今殊不知幸然自是一箇淨潔琉璃瓶子無端傾許多狼狼籍籍在裏了也抑不知從上若佛若祖與夫盡天下老和尚只是共一箇舌頭有時用一機千機萬機齊副有時道一句千句萬句合轍有時指千句萬句只是一機有時提千機萬機只是一句直得搖乾蕩坤蓋天遮地如擊石火似閃電光構得構不得未免喪身失命那裏有你取意觀瞻將心湊泊底分又那裏似世間村秀才教小學自上大人讀到論語孟子毛詩周易一般若如是又何用九年面壁立雪齊腰只麼傳將去學將去便休將知箇事是出世間法須具出世間眼器量一肩擔取始得若只逐旋扭捏逐旋博量逐旋分別謂之以情意識測度如來不思議大圓覺海如取螢火燒須彌山終不能著縱饒築得一肚皮殘羹餽飯還有一點用得也無還瞞得一切人也無縱饒瞞得他人還瞞得自己也無縱饒瞞得自已還瞞得燈籠露柱也無既瞞不得未免被森羅萬象在冷地笑你在只如欽上座今夜

恁麼口勞舌沸說七道八且道還出得者一笑也無若謂出不得未免亦是西天九十六種之數若謂出得其柰有旁觀眼在且道旁觀眼在甚麼處夜深久立伏惟珍重

#### 秉命入室後普說

雪巖欽禪師入室後普說兄弟且在者裏聚首片時待爲你扭捏鼻孔劈析太虛一上雖是好肉剜瘡畢竟刀子是鐵你還知一句中具三立一立中具三要麼又還知賓中有主主中有賓有時全賓是主有時全主是賓麼又還知殺中有活活中有殺有時全殺是活有時全活是殺麼又還知開口不在舌上麼又還知一手擡一手搦麼若也於此明辯不下緇素不行未免見人道是便道是道非便道非正謂矮子看戲隨人上下安知青布幕內元來有人者箇說話莫道你未有田地底人摸索不著只是參道者禪著青布衫漢十箇五雙渾侖吞棗莫說用意識搏量口耳沿習之輩隨語生解逐句穿鑿定矣須知道此逸格絕塵之妙不得思量擬議不涉見聞覺知又須知道

人人具足箇箇圓成只爲無量劫來爲生死飄蕩無明業識蒙蔽不得現前不得受用如今要得向威音王以前一翻翻轉須是信道者一著子真箇是我本有之物決定不從人得然後盡父母所生之體天地所稟之氣併作一口吹毛利劍將自己一條窮性命斬作兩段颺在萬仞懸崖之下直得森羅萬象徹底平沉方謂之心空及第海印發光苟或外此直饒參得一肚皮築得一布袋臘月三十日未免手忙脚亂如落湯螃蟹某在無準癡絕會下時有箇朋友每每有一言半句膾炙人口於古人旁敲暗打處亦自盡知落著只是不曾做蒲團上自己工夫後來曾在諸方做藏主氣高行輩一日因打數頭閒官司構架不徹爲他人所勝因此鬱氣嘔血致一疾弗救於臨終時直得千生萬受求死不得死每見朋友來問疾便道我參禪平生不曾做蒲團上工夫不信有悟門只在冊子著倒將謂佛祖之道止於此矣今日到者裏一點也用不著勸你輩參禪莫如我一般須是做靠實工夫始得說了又眼淚下者箇便是不信有悟門

底樣子死不知去處生不知來處所謂生死事大無常迅速轉眼便是來生忽然一息不來前路茫茫不知何往撞入驢胎馬腹中總不見得你輩初機晚進何不趑身強力健打教徹去者裏孤峰絕頂爐韆之所叢林溫煖百事現成香積供養殊勝若不向者裏打教徹去可謂孤負佛祖孤負檀信孤負師友孤負自己一朝不恰好打箇手蹉跎跌自己若不明白粒米莖蕒悉用牽犁拽耙償他始得豈不見夏間許多亡僧各各燒作一堆灰送在三塔裏了如今在甚處安身立命還知麼若也不知豈不是死不知去處謂之死大卽今眼眨眨地在者裏問箇父母未生前面目開口不得豈不是生不知來處謂之生大灼然生死事大須是把當一件無大至大底大事豎起生鐵脊梁討教明白始得十二時中莫雜用心莫只悠悠漾漾虛度時光須是打教成一片始得須是者一念子無絲毫間斷始得古者尙道看經看教是雜用心何況你白日起來只了逐東逐西七上八下爲人事役役者哉古者又道參禪學道是雜用心參禪學道

既是雜用心却教你向那裏用心喝一喝含元殿裏何須更問長安自是你一念馳求不歇棄了現成活計却欲登天入地別討生涯別求佛法所以做盡伎倆受盡辛勤轉加顛倒若能直下頓歇馳求一念則萬法當體寂滅萬法依舊熾然行也得坐也得著衣喫飯不是別人山青水綠夜暗晝明昏沉散亂生死涅槃總是自家縱橫遊戲得大自在法門無一法可棄無一法可取佛與衆生俱是假名殊無實義雖然你又須是已眼自開冷地一笑知道元在自己屋舍中當軒大坐始得若只逐旋扶籬摸壁傍人門戶又是認驢鞍橋作阿爺下領則沒交涉矣如適來爲兄弟舉話有一人半人開口不識語路踏步不知高低要登主人堂入主人室也恐未得在如今大事爲你不得小事各自知當彼此不須敗闕牌且納還上萬

### 兩序進退提綱

楚石琦禪師進退兩序上堂東邊底東邊去西邊底西邊去去實不去生鐵稱錘被蟲蛀來來實不來燈籠沿壁上天台且道不動尊居何國土一鏃破三

### 關分明箭後路

進退兩序上堂千尺絲綸意在錦鱗紅尾一聲霹靂要看攫霧擎雲隨時有卷有舒觀體無新無舊光揚法社輔弼宗門高蹈世表下視塵窟總是當人受用處還委悉麼龍袖拂開全體現象王行處絕狐蹤進退兩班上堂虎豹文章全歸爪牙之力鯢鰲變化必籍羽翼之功法社要在得人叢林自然增氣睦州佐黃檗楊岐輔慈明相與建法幢展衲僧巴鼻了庵欲禪師進退頭首上堂宗門中有四種賓主臨濟大師已嘗點出若也脚未跨門一一辨得非唯不久當作唱導之師抑且不謬爲吾家種草其或奴郎不辨玉石不分要稱衲僧未得在豈不見忠國師睡次丹霞適至乃問侍者耽源云國師在麼源云在即在只是不見客霞云太深遠生源云莫道上座佛眼也戲不見霞云龍生龍子鳳生鳳兒遂去國師睡起源舉似前話國師打二十拄杖趨出丹霞聞云不謬爲南陽國師喝一喝云不解作客勞煩主人雖然不因夜來鴈爭見海門秋



必論疑輪

進退頭首并謝大雲長老上堂一椎便就揭開華藏十三重不假一槌抹過無邊香水海兩堂下喝賓主歷然照用同時與奪自在便見大雲彌覆六合清風甘澤順時百果成熟且結角羅文一句作麼生道越時蓋却屋乘時刈却禾輪納王租了鼓腹恣謳歌

笑隱訢禪師進退兩序上堂心空及第選佛何必選官荷負叢林爲衆一似爲己報國爲法擇人量才授職如樂奏九成左右進退無不合度只如一喝分賓主照用一時行諸人作麼生甄別喝一喝九萬里鵬鷃奮迅三千年鶴便翱翔

挂鉢時請知事

真淨文禪師因請知事上堂祖師門下燈燈相續心心相印一燈滅而一燈然一心隱而一心照故萬般之事須籍心明心若不明是事失準諸禪德要不失準麼僧堂裏大家著力

虎丘隆禪師請知事上堂掩室摩竭杜口毗耶面壁九年黃梅夜渡簡點將來翻成計較殊不知日不待火而熱月不待風而涼雲從龍風從虎作無作爲無

爲恁麼會得便能恢張法席毗贊叢林共建法幢流通正脉敢問大衆據令一句作麼生道祇園今古饒春色朶朶渾開薺蔔花

請兩序

圓悟勤禪師請兩序上堂獨掌不浪鳴獨樹不成林建法幢立宗旨須是互爲賓主安貼家邦所以道我若坐時你須立我若立時你須坐我若孤峰獨宿你須偃息干戈我若天上人間你須三頭六臂然後可以光揚佛日且道浩浩之中如何辨主是處是慈氏無門無善財下座

元叟端禪師請兩序上堂一心不生萬法無咎欲左卽左欲右卽右如頭之耳目如身之臂肘其進用也罔涉離微其退藏也豈存窠臼日午打三更面南看北斗

愚庵及禪師請兩序上堂獨樹不成林兩手鳴擗擗老大小叢林各要知時節主事輔弼山門頭首贊揚佛法十方高人聚會兜取富頭一著長老坐致太平手裏把箇木杓薦拈拄杖云諸人從朝至暮嗽嗽唧

唧說黃道黑總在杓頭裏七出八沒且道杓柄長多少卓拄杖喝一喝

全室泐禪師請兩序上堂夢往天宮說法是首座分上事演出一大藏教是藏主分上事客來須看賊來須打是知客分上事終日擇火拈香是殿主分上事三呼三應是侍者分上事作麼生是諸人分上事遂卓拄杖云但將飯向無心盤自有人扶折腳鐺

列祖提綱錄卷第三十二

列祖提綱錄卷第三十三

武林十八澗理安禪寺住持要東行悅集

謝西序頭首提綱

首座 知藏

書記 侍者

藏主

眞淨文禪師謝主首上堂實際理地不受一塵佛事門中不捨一法乃拈拄杖云不是一法又捨箇什麼佛事也三德六味施佛及僧法界人天普同供養受供養則不無還知滋味也無若不知分付與首座復敲香臺云五千餘軸言言異一一龍宮海藏來遂擲

下云實際理地不用安排分付與藏主

佛朗性禪師叙謝頭首上堂布毛纔吹化現無邊華藏世界金槌在握縱擒一切諸佛如來撲碎茶甌金聲玉振挈漏燈盞耀古騰今兎角丈橫挑大千日月龜毛拂運轉慶利法輪物物圓通頭頭具足還見佛國山踰跳撞破汝諸人鼻孔擢瞎汝諸人眼睛麼喝一喝春風夏雨應時來李白桃紅次第開

叙謝頭首上堂是善是惡一切俱忘凡聖情盡卽大道場冬樹花發炎月冰霜拈法界用易短爲長以太虛口吞吐十方大衆委悉麼良久云圓超空色摩尼寶開鑿人天沒限量卓拄杖嘯一嘯下座

笑隱訴禪師謝頭首上堂看看臘月二十五雲門一曲憑誰委打鼓當陽普請看萬象森羅齊起舞西序叢林喜得人冲霄鸞鳳看高舉進退威儀揖讓時就中一喝分賓主且道那箇是賓那箇是主喝一喝甜瓜徹蒂甜苦瓜連根苦

南石琇禪師謝頭首兼祈雨上堂靈利衲僧轉轆轤地對賓客側身而立結衆緣化炭化糧聽欄雞鼓翅

而鳴看茶瓢從地踣跳卓拄杖云夜來江上雨分作  
萬家流

五祖演禪師謝首座上堂椎破蟠桃核得見其仁捋  
斷驪龍鬚得遇其寶雖然如是也未是好手黃帝失  
玄珠於赤水使智索之而不得使離朱索之而不得  
使契詬索之而不得乃使罔象直饒罔象得之亦未  
是好手爭似今日與大眾同使一箇通事舍人雖然  
如是也只得一半

謝首座上堂彌勒看不見釋迦說不得怎麼尊貴生  
日用無差忒得不得識不識三德六味味逾多千古  
萬古爲規則

雲外岫禪師謝首座知客藏主上堂以拂子打圓相  
云摩訶徧法離四句絕百非又打一圓相云禮之用  
和爲貴先王之道斯爲美又打一圓云摩尼珠人不  
識如來藏裏親收得大眾見麼所見不同互有得失  
天童者裏毋固毋必

覺源曇禪師謝前堂首座上堂恢楊岐宗風坐南泉  
鉢位佛祖命根衲僧巴鼻卓拄杖云東頭買賤西頭

賣貴

雪巖欽禪師謝首座維那上堂人天眼目佛祖綱維  
千差萬別一以貫之如何見得克賓法戰不勝南泉  
斬却猫兒

千巖長禪師謝首座上堂舉五祖和尚云槌破蟠桃  
核得見其仁捋斷驪龍鬚得遇其寶雖然如是未是  
好手爭如我伏龍山中天章首座也不槌碎蟠桃核  
頭頭應用皆仁也不捋斷驪龍鬚處處全彰其寶呼  
釋迦彌勒爲竈下之奴拈丈六金身作一莖之草吹  
毛一拂血濺梵天珊瑚樹林紅日杲杲雖然如是也  
只得一半下座

元叟端禪師謝首座維那上堂金槌未動以前大地  
山河百雜碎玉塵未揮之際森羅萬象盡交參般人  
以栢周人以栗家住海門東黃昏候日出

謝首座藏主侍者上堂開口道著鷄子過新羅舉步  
踏著糊獮入布袋趙州會下二僧相推不肯作第一  
座義出豐年南泉道王老師與汝往來者是藏儉生  
不孝忠國師云將謂我孤負汝元來汝孤負我爛泥

裏有刺中天竺快便難逢一時掀翻了也會則天高  
東南不會則地傾西北

上堂謝首座東弗于逮打鼓西瞿耶尼說禪南瞻部  
洲喫飯北鬱單越睡鐘樓上念讚床脚下種菜勝  
首座道猛虎當路坐摘楊花摘楊花

用彰俊禪師謝首座知客侍者直歲上堂索犀牛扇  
子無風起浪問眉間挂劍平地干戈二俱莫涉別有  
條章撲碎玻璃盞子拈起無柄饅頭淺鋤明月深種  
白雲時時歌堯舜之風日日樂羲皇之化且知恩報  
恩一句作麼生道九萬里鵬纔展翼十千年鶴便翔  
翔

笑隱訢禪師謝書記藏主侍者上堂臨濟三玄三要  
指鹿爲馬黃龍佛手驢脚喚金作鎗一大藏教是切  
脚三千利海一浮漚吾孤負汝汝孤負我劍去已遠  
刻舟奚求休休青山歸未得又過一年秋

雪巖欽禪師上堂謝困道講師復巖藏主一心三觀  
一句三玄曾無彼此休分教禪迴途復妙也枯木巖  
前差路窮困極流兮海底紅塵亘天只如一大藏教

是箇切脚畢竟切什麼字卓拄杖云十卜千千  
唯庵然禪師謝藏主維那上堂天無門地無戶俊快  
衲僧一任來去藏裏摩尼照徹十方洞裏桃花千葩  
競吐假劫外之春風應今時之律呂海神夜半看鰈  
珠眼光挂在扶桑樹喝一喝

石屋珙禪師謝藏主上堂今朝八月一十五樹凋葉  
落金風露野狐窠宅梵王宮狗子尾巴書卮字大藏  
小藏從何來拈拄杖云盡從者裏流將去等閒道箇  
鉢囉娘截斷古今閒露布

了庵欲禪師上堂一大藏教是箇切脚畢竟正文無  
人道著你要識正文麼上大人丘乙己化三千七十  
士爾小生八九子佳作仁可知禮也衆中忽有箇衲  
僧出來道恁麼提唱實謂聞所未聞山僧不免分付  
維那明窓下安排忽若更道恁麼提唱料掉沒交涉  
山僧亦未免分付明窓下安排何故直鈞鈞鯨鼈曲  
鈞鈞龜鼈金鷄啼上玉闌干別有佳聲繼前哲喝一  
喝

上堂一大藏教束之高閣長期短期無繩自縛莫更

紛紛紜紜直須灑灑落落楊岐一頭驢只有三隻脚  
潘閬倒騎歸跌殺黃番綽五味拈來鑽秤錘別有香  
風滿寥廓喝復舉道吾和尚云高不在絕頂富不在  
福嚴樂不在天堂苦不在地獄相識滿天下知心能  
幾人大慧和尚云高在絕頂富在福嚴樂在天堂苦  
在地獄誰知席帽下元是昔愁人師云二大老一人  
高高處觀之不足一人低低處平之有餘唱教門中  
足可觀光若約衲僧門下猶欠悟在本覺又作麼生  
但將飯向無心盃自有人提折脚鎗

石屋珙禪師謝殿主淨頭上堂一身清淨則多身清  
淨一世界清淨則多世界清淨東司頭是氣佛殿裏  
蓬塵從什麼處得來以手掩鼻云又有一點也

鐵關樞禪師謝殿主上堂如何是佛殿裏底悉哩蘇  
盧蘇盧悉哩江國春風吹不起鷓鴣啼在深花裏擊  
拂子

覺源曇禪師謝侍者上堂文遠當年侍趙州東司說  
法未輕酬回光一念分明處午夜霜清月滿樓

謝東序知事提綱知事 維那 監院 都監寺

五祖演禪師謝主事上堂文殊張帆普賢把柁勢至  
觀音共相唱和贏得雙泉閭中打坐打坐卽不無且  
道下水船一曲作麼生唱囉囉哩囉囉哩俗氣不除  
虎丘隆禪師謝知事上堂萬里浮雲捲碧天年年此  
夜十分圓令人轉憶寒山子說似吾心恰宛然所以  
道欲明怎麼事還他怎麼人若是怎麼人須明怎麼  
事便能以此心相照以此心相知扶持野老無盡家  
風成就叢林萬世基業其把定也離念絕塵更無滲  
漏其放行也光生瓦礫和氣霽然高低普應前後無  
差且道此人成得箇什麼邊事還委麼將此身心  
奉塵刹是則名爲報佛恩

謝知事頭首上堂鋒芒未露如天普蓋古帆未挂似  
地普擎所以道天不言四時行焉地不言萬物生焉  
萬物生則遷謝不停四時行則寒暑流轉各居其位  
去寒時大家寒熱時大家熱是法住法位世間相常  
住無一法不爲妙用無一物不爲真如處處真無回  
互塵塵爾絕承當須是其中人方能怎麼去便能橫  
身擔荷翫贊叢林自利利他得大解脫其或未然好



事不須頻話會留將和氣暖丹田

育王謹禪師謝知事上堂尺頭有寸鑑者猶稀秤尾無星且莫錯認若欲定古今輕重較佛祖短長但請於中著一隻眼果能一尺還他十寸八兩元是半觔自然內外和平家國無事山僧今日已是兩手分付汝等諸人還肯信受奉行也無尺量刀剪遍世間誌公不是閒和尚

應庵華禪師謝知事上堂一喝分賓主照用一時行要會箇中意日午打三更祇如一喝未施已前還有賓主也無既分之後那箇是賓那箇是主者裏縹緲得出賓則始終賓主則始終主祇如賓不是賓主不是主且一喝落在什麼處橫按鎮鐺全正令太平寶宇斬癡頑

天目禮禪師謝知事上堂擔荷山門非止一事官府莊司山園田地呷醋咬薑量茶數米金不博金水不洗水因甚如此楊岐驢玄沙虎

眞淨文禪師謝監院上堂身是光明幢心是神通藏大衆各自照顧抖擻精神而今現定僧也如是俗也

如是釋迦也如是彌勒也如是還有人信得及麼若信得及不爲分外若信不及亦不虧欠信與不信光明幢神通藏各自參堂去下座

圓悟勤禪師謝監寺上堂滴水冰生百了千當鐵作脊梁骨金鑄堅實心荷負叢林贊貽知識典刑可法直下撲實頭底且道是什麼人相逢相見呵呵笑更有春風春又春

謝監院上堂舉藥山一日語雲巖云與我喚沙彌來巖云和尚喚他作什麼山云我有箇折脚鐺子要伊提上舉下巖云恁麼則與和尚共出一隻手也師云道頭知尾舉一明三山僧有箇小頌一步濶一步一著高一著提折脚鐺兒施阿伽陁藥須彌土一撮滄溟水半杓快意唱巴歌過屠門大嚼

石屋珙禪師謝都寺冬齋并維那上堂一徧一切一切徧一香積世界以香飯爲佛事南閻浮提以音聲爲佛事東勝神州打槌西瞿耶尼普請懷州牛喫禾益州馬腹脹麤餐易飽細嚼難饑只恐不是玉是玉也大奇

圓悟勤禪師謝維那直歲上堂烹金琢玉須資作者  
鉗鎚荷教扶宗必仗本分兄弟交爲肘臂互作主賓  
便可以顯大機發大用布慈雲灑甘露駕慈航觀斷  
岸超生死越涅槃令他天下衲僧頂門上放光脚跟  
下墜落箇箇如龍如虎人人玉轉珠回非唯扶豎叢  
林亦乃流通正眼豈不是奇特事敢問大衆奇特一  
句作麼生道妙舞更須誇徧拍三臺須是大家催

應庵華禪師謝維那上堂舉興化問克賓維那汝不  
久爲唱道之師賓云不入者保社化云會了不入不  
會不入賓云總不與麼化便打乃云克賓維那法戰  
不勝罰錢五貫設饋飯一堂至來日齋時化自白椎  
云克賓維那法戰不勝不得喫飯即便趕出雪竇云  
克賓要承嗣興化罰錢出院且置却須索取者一棒  
始得棒既喫了作麼生索得雪竇要斷不平之事今  
夜與克賓維那雪屈以拄杖一時打散師云大小雪  
竇與克賓雪屈要且無合殺下座

恕中愍禪師謝維那侍者上堂金椎一擊電掣鼙  
紙襖潛書珠回玉轉東頭買貴西頭賣賤拈得鼻孔

打失眼睛拈拄杖出頭天外看誰是我般人

五祖演禪師謝典座上堂白雲映枯老漢要喫無皮  
酸餡典座取巧安排一任衆人哂噉良久云羊羹雖  
美衆口難調

謝典座上堂變生爲熟雖然易衆口調和轉見難鹹  
澹若知眞箇味自然饑飽不相干

謝典座上堂小繩錢貫大繩井索日急要用笊籬木  
杓雖然破家具應用有處著著錯南北東西水灑不  
著

謝列職雜務提綱化主 莊主 監收

黃龍南禪師因化主歸上堂世間有五種不易一化  
者不易二施者不易三變生爲熟者不易四端坐喫  
者不易更有一種不易是甚麼人良久云嚕便下座  
眞淨文禪師化士歸上堂諸州丐士經年去次第歸  
來復納疏打鼓普請共證明今朝九月二十五大衆  
證明則不無須知鉢盂飯粒粒皆辛苦鉢裏飯滋味  
大衆總知歸宗道今朝九月二十五又且如何良久  
乃呼侍者參退請諸郡化主喫茶喝一喝

長安化主歸上堂大眾一兩絲一匹絹一一盡從蠶口現口中吐出濟人間衲僧如何總不薦若也薦家門裏含元殿喝一喝下座

謝月化主上堂靈山話月曹溪指月聖壽今朝謝月且道與古人誰親誰疎莫有人辨得麼若也辨得將此身心奉塵刹是則名爲報佛恩若辨不得無角鐵牛眠少室生兒石女老黃梅笑殺栽松道者參

五祖演禪師謝街坊上堂街坊昨日將一把沙到方丈前一見老僧劈面便撒賴遇老僧先見衫袖一遮並不方事今朝舉似大眾不敢隱藏何故實伊膽大下得者箇手脚忽有人問白雲爲什麼只恁休去不見道老不以筋力爲能然雖如是實主歷然

月庵果禪師謝供頭上堂解猛虎領下金鈴驚群動衆取蒼龍穴裏明珠光天照地山僧今日到此讚歎不及汝等諸人合作麼生豎起拂子云眨上眉毛速須薦取擲拂子下座

龍門遠禪師賢席頭納疏上堂一葉飄飄水上歸姑蘇春色照巖扉坐禪片石重來看却笑山雲拂薜衣

所以沉空滯寂之士名爲貪著小乘混世同塵之人謂之圓通之侶不捨道法而現凡夫事豈是植種於空現前日用是大總持門一一親得其力如斯之旨事可量哉昔日黃梅散席道在老盧坐折連床湖南最盛古今榜樣作者同知進止合儀動靜可法況龍門新興保社意在求人衆手陶金誰是得者有麼有麼令人思百丈解踏馬駒行參

夢庵信禪師化士歸上堂冒暑經寒已逾半載艱辛受盡且喜歸來而今粥飯現成一衆皆承渠力方見禪人歲寒道義心口相應若非自肯承當安得如斯用意用意則不無且道承當箇什麼良久云若不得流水還應過別山參

應庵華禪師化主請上堂法身無相而諸相顯然法眼無瑕而群機洞照所以一塵入正受諸塵三昧起德山入門便棒臨濟入門便喝至於歷代祖師掠鉤搭索露布葛藤無不精徹淵奧通證十虛塵塵爾刹利爾念念爾時有西蜀比丘希慧從那伽大定安詳而起不離是定入諸塵勞門成就一切衆生行願海

此心既辨克就今辰營備齋羞供養釋迦如來五百十六應真大阿羅漢且道釋迦老子還來也無若道來即今在什麼處若道不來又供養箇什麼諸人向者裏覷得透便與釋迦老子同一心知同一眼見同一受用其或未然歸宗更下箇註脚但願東風齊著力年年吹入我門來

密庵傑禪師街坊納疏上堂去年第一會水陸街坊今年羅漢第一會裏納疏識得去年人便是今年事今年與去年非新亦非故搥鼓共證明眉毛俱卓豎北鬱打三更西瞿日未暮其施汝者不名福田供養汝者墮三惡道還會麼行到水窮處坐看雲起時復舉僧問趙州如何是不錯底路州云明心見性是不錯底路師云趙州眼觀東南意在西北大似狐狸戀窟有甚快活處忽有問徑山如何是不錯底路只向他道家家門裏透長安

呆庵莊禪師化主同上堂禪子臨川化導歸入門一笑展雙眉破微塵出大經卷打鼓鼙鐘報衆知正與麼時且道功歸何所昨夜春回空劫外覺華香綻不

萌枝

笈庵問禪師謝化主上堂本是無緣薄福僧自慚綿力住峻嶮巖壁立雲千尺不羨人間裨販名大衆且道有緣好無緣好自有一雙窮相手不輕祇揖等閒人

五祖演禪師謝莊主上堂一不做二不休不風流處也風流若要公私濟辦好看露地白牛

眞淨文禪師謝莊主監收上堂參玄上士味道高人於動靜日用間百事現成受用具足一一要知來處所以古人云譬如大地何物不從地之所生諸佛唯指一心何法不從心之所立洞山分野地之所生或麥或麻或豆或稻然非其人則不能成辨安立既有安立得不勞乎神用然神用雖勞粒粒不落別處且道落在什麼處遂拈拄杖擲下召大衆云見麼阿誰無分知來處麼若知可謂不風流處也風流

五祖演禪師謝監收上堂人之性命事第一須是○欲得成此○先須防於○若是眞○人○○

天目禮禪師謝麥監收上堂山前麥熟翁媼歡呼收

拾歸來其中有麵饅頭餛子前年別今日思量笑殺人

恕中愠禪師謝來蘇莊監收上堂山僧昨遣數員宿將征諸未服既俟我來蘇一鼓而下直得風以時雨以時嘉穀登庶民樂今當還師振旅奏凱論功坐享太平之時玄彌真君忍俊不禁不覺手之舞之足之蹈之於一毫端上揚聲而歌曰台州仙高一伯紅蓮青江口白鰕殼來歸兮連子格且道是什麼曲調乃云飯飽弄箸

應庵華禪師謝知事頭自上堂大丈夫漢脊梁硬如鐵在乎進退之間初無喜難之色其退也古寺閒房焚香清坐究竟乃新報佛恩德其進也公於心明賞罰使紀綱不墜表帥得人各應其宜然後據虎頭收虎尾第一句下明宗旨蔣山雖然痛下毒手全身擔荷要在當人正恁麼時且道不失其序一句作麼生道玲瓏八面活鱗鱗千古萬古振家聲

密庵傑禪師謝知事頭自上堂一新一舊跳出窠臼一出入胡餅裏呷汁一擒一縱開眼作夢一照一

用鱔魚走入麻油甕所以道若論此事直須揮劍若不揮劍漁父棲巢古人與麼大似將錢買李子只從赤邊咬且道結角在什麼處薦拈拄杖卓一卓下座謝知事頭自上堂叙謝之餘復有何事其進也風行草偃水到渠成其退也玉蘊荆山其價愈重且道不落進退一句作麼生道油煎石礫盤風吹毛毬走鹿空背上白毛生拈得鼻孔失却口喝一喝下座

元叟端禪師謝兩序上堂靈機廓徹智鑑虛圓固無動寂之殊豈有久新之異拈起也十日麗天放下也百川赴海後先齊致左右逢原正恁麼時如何三界炎燄燦金石蒲團永日自寥寥

長翁淨禪師謝新舊兩班上堂開無間地獄現閻羅大王聚夜叉一部列牛頭兩行與其進者劍樹上猛火進用與其退者刀山裏寒冰退藏且道理會甚事耐耐飯飽弄箸判斷尿急尿床其或未然花柳春風入戲場

呆庵莊禪師敘謝兩序上堂打開寶藏運出家珍普濟群生悉令充足金剛圈栗棘蓬總是閒家潑具只



如遇賤則貴逢低則高不傷物義一句合作麼生讚  
飯從教香馥郁紙衣莫使墨淋漓

佛朗性禪師謝兩序上堂漏燈盞提上竿下鑑地輝  
天白日夢昇兜率宮熾然說法徧十方世界是摩尼  
寶藏盡情收拾將來一槌號令從頭穿却人天遵依  
永爲標榜普報四恩齊資三有一燈既然燈燈無盡  
衆生界盡眞燈不泯遍現未來作諸佛事大眾委悉  
麼卓拄杖喝一喝云龍得水時添意氣虎逢山色長  
威殫

筓庵問禪師謝兩序上堂著草鞋住院負榜姥爲人  
動若行雲止猶谷神初無心於彼此豈有意於去來  
所以綱宗在握賞罰惟公正令當行進退有序其進  
也高山可仰其退也逝水長閒若有一絲毫情存繫  
戀便屬泥犁渣滓金剛圈栗棘蓬吞得跳得須是其  
人且開先啓後果滿功圓一句作麼生道橫擔柳栗  
千峰上已有人提折脚鎗

謝兩序上堂進一步風颺颺雨颺颺脚下泥深三尺  
退一步孤迢迢峭嶮巍巍法堂前草深一丈荊棘林中

下脚易月明簾外轉身難知進知退知安知危有始  
有終有結有解權衡濟上宗風鑑別今時露布通身  
肩荷傑立化門肝膽橫披胸襟獨邁是則明如果日  
要須各建玄猷樹大厦非一木之支濟巨川豈一人  
之力今日絲綸收處風月猶新敬謝諸仁共相展布  
牧雲門禪師冬至謝兩序上堂欲識佛性義當觀時  
節因緣寒來暑往秋收冬藏雲騰致雨露結爲霜六  
陰極處一陽乃生一陽既生謂之長至山中自春初  
到冬尾樵山耕田栽園種地執運努力有煩衆兄弟  
道用今日肆筵設席炊杜田飯淪本山茶普同供養  
貴圖聚頭崖壑戮力叢林臘月火燒山明取衲衣下  
事種田博飯喫免得浩浩說禪若能恁麼眞是金生  
麗水玉出崑崗山僧口喃喃地道箇謂語助者焉哉  
乎也總不虛設雖然如是且道團圓頭一句作麼生  
道路遙知馬力歲久見人心

沙彌得度垂示執刀 付衣係大衆章

恕中惺禪師與沙彌落髮世尊在雪山以金刀自剪  
丕顯如來頂相汝既不能吾爲汝剃落前聖後聖其

揆一也

鐵關樞禪師光淵源三人落髮拈來三寸鐵除去末後結腦後放圓光淵源同皎潔

落髮一斬一切斬有甚無明草剃髮云珊瑚樹頭日杲杲

落髮父母非我親諸佛非我道一法不留存方堪爲種草

二人剪髮十八非遲十七非早坐斷兩頭萬機俱掃剪髮云頭陀石被莓苔裏

弘覺恣禪師沙彌髻落恒沙劫種出家因優盍今開火內莖髮斷青絲除愛結虛空背上白毛生驅象駕請長纓一舉九天雲外步等閒踢倒法王城

沙彌髻落金刀剪斷無明髮露出娘生舊頂門莫謂毀形虛事視人天何處不稱尊

沙彌髻落何似生遼天鵬萬里雲只一突是渠因甚得與麼活卓卓地直下一刀俱斬斷更無毫髮可容留

沙彌髻落僧寶誰云滄海珠盡虛空界濟無餘德餅

甘露應常滿名稱方宜勝丈夫

尼本然髻落後倪纔出幅威猛蕩寰區獨跨大方步豈爲格量拘然而舍金輪之寶位子夜踰城脫珍御之龍衣青山斷髮何以佛佛道同乎還會麼要作人天真榜樣信然脫俗是良謨

恕中愍禪師付衣提起云此衣豎窮三際橫亘十方從上老宿莫不披之提持正印宜善護持令法久住弘覺恣禪師付衣大士胎衣變九條多生法御應常調今朝三事全披得好作人天正法橋

付衣千生未易聞名字一旦通身服九條青幘外何逍遙三尺龍泉光照膽萬人叢裏奪高標

付衣柔和忍辱不虛禪消瘦青蓮衆患離名字六師曾未曉佛同稟受祖同持勤加護攝威儀虛空疊作紅蓮座火聚開爲白藕池

付衣袈裟著體豈尋常誓證全披好自將寶杖一揮三界靜馨珠親解法中王

付衣入斯室著斯衣量才補職如是因如是果法爾當然祇如信受奉行時合作麼生橫身三界外獨脫

萬機前

付衣錦衣公子休誇富天上六銖未足多一縷龍兔金翅難好教慈覆徧娑婆

付衣歸卷金欄去深藏定水涯爲標千聖格所以待龍華況復割煩惱而得消瘦之名離染著而被青蓮之號服之者忍辱增進持之者功德無邊可不頂戴遵奉也邪提起衣云還見麼慈縷縷乾生死海何人出得者袈裟

列祖提綱錄卷第三十三

列祖提綱錄卷第三十四

武林十八澗理安禪寺住持婁東行悅集

度僧提綱大衆

圓悟勤禪師受季善友爲僧上堂三界無安四生拘促欲脫愛網超步大方正應披忍辱鎧操智慧刀運上品心發殊勝志與蘊魔煩惱魔死魔共戰滅三毒破魔網始是大丈夫漢豈不見教中道三界無安猶

如火宅衆苦充滿甚可怖畏又道是舍惟有一門而復狹小雖然狹小過去諸佛現在諸佛未來諸佛盡從箇裏出去且道畢竟如何良久云何似生遼天鶴萬里雲只一突

衆道友爲李道山披剃上堂頂門闡金剛正眼始辨大機殺人不眨眼底漢立地成佛方明大用直得如此猶只是吾門建法幢立宗旨趣向在且向上還有事也無若知有向上事去設使盡乾坤大地草木叢林一一現千百億釋迦身不消一捏至於傾懸河辯用嶮崖機盡四聖六凡一時軒豁提得將來不消一捏且道據箇什麼便恁麼所謂大人具大見大智得大用向無明窟子裏便放無量寶光向衆生境界中便作不思議事如丹霞相似才方舉起便知落處更不涉唇吻更不落言詮始似過他一箇聲頭便乃十分領略只如未剃草時在什麼處既要剃草與說戒兩手掩耳又落在什麼處過量人有過量事只如當機一句作麼生道數聲清磬是非外一箇閒人天地間復頌云丹霞剃草燒木佛宮使捨緣吹布毛驚群

敵勝真獅子一釣須連十二鼈

佛眼遠禪師行者落髮上堂露柱多年出家燈籠久已落髮佛殿堅持禁戒三門近得休歇大事本來平等無著清涼滿月度盡草木叢林一似陽和齊發下座

大慧杲禪師爲太學上舍生楊麟剝染上堂已著槽廠將錯就錯騎却聖僧不妨快樂龍象蹴踏非驢駝作堪笑諸方妄生穿鑿休穿鑿祥麟只有一隻角

楚石琦禪師度僧上堂未出家時父母兄弟障你光明不得既出家了師僧道伴障你光明不得觀山翫水處拈香撥火處著衣喫飯處屙屎送尿處總是你光明發現處且如父母未生已前者一段光明在什麼處寶月當空圓聖智何山松檜不青青

筈庵問禪師岸道者染陞座云教中道清淨行者不上天堂破戒比丘不入地獄拈拄杖云曼殊大士來也復靠云斷岸孤舟

壁道者染陞座師云山花似錦水如藍見色聞聲莫被謾世出世間殊勝相分明覲面一毫端卓拄杖

付戒提綱

嵩嶽元珪禪師一日有異人者峩冠袴褶而至從者極多輕步舒徐稱謁大師師觀其形貌奇偉非常乃諭之曰善來仁者胡爲而至彼曰師寧識我耶師曰吾觀佛與衆生等吾一目之豈分別耶彼曰我此獄神也能生死於人師安得一目我哉師曰吾本不生汝焉能死吾視身與空等視吾與汝等汝能壞空與汝手苟能壞空及汝吾則不生不滅也汝尙不能如是又焉能生死吾耶神稽首曰我亦聰明正直於餘神詎知師有廣大之智辯乎願授以正戒令我度世師曰汝既乞戒即既戒也所以者何戒外無戒又何戒哉神曰此理也我聞茫昧止求師戒我身爲門弟子師即爲張座秉鑪正几曰付汝五戒若能奉持即應曰能不能即曰否神曰謹受教師曰汝能不淫乎曰亦娶也師曰非謂此也謂無羅欲也曰能師曰汝能不盜乎曰何乏我也焉有盜取哉師曰非謂此也謂囊而福淫不供而禍善也曰能師曰汝能不殺乎曰實司其柄焉曰不殺師曰非謂此也謂有盜誤疑

混也曰能師曰汝能不安乎曰我正直焉能有妄乎  
師曰非謂此也謂先後不合天心也曰能師曰汝不  
遭酒敗乎曰能師曰如是是爲佛戒也又言以有心  
奉持而無心拘執以有心爲物而無心想身能如是  
則先天地生不爲精後天地死不爲老終日變化而  
不爲動畢盡寂默而不爲休信此則雖娶非妻也雖  
饗非取也雖柄非權也雖作非故也雖醉非惛也若  
能無心於萬物則羅欲不爲淫福淫福善不爲盜盜  
誤疑混不爲殺先後違天不爲妄惛荒顛倒不爲醉  
是謂無心也無心則無戒無戒則無心無佛無衆生  
無汝及無我孰爲戒哉神曰我神通亞佛師曰汝神  
通十句五能五不能佛則十句七能三不能神悚然  
避席跪曰可得聞乎師曰汝能戾上帝東天行而  
西七曜乎曰不能師曰汝能奪地祇融五嶽而結四  
海乎曰不能師曰是謂五不能也佛能空一切相成  
萬法智而不能卽滅定業佛能知群有性窮億劫事  
而不能化導無緣佛能度無量有情而不能盡衆生  
界是謂三不能也定業亦不牢久無緣亦是一期衆

生界本無增減亘無一人能主其法有法無主是謂  
無法無法無主是謂無心如我解佛亦無神通也但  
能以無心通達一切法爾神曰我誠淺昧未聞空義  
師所授戒我當奉行今願報慈德効我所能師曰吾  
觀身無物觀法無常塊然更有何欲神曰師必命我  
爲世間事展我小神功使已發心初發心未發心不  
信心必信心五等人目我神蹤知有佛有神有能有  
不能有自然有非自然者師曰無爲是無爲是神曰  
佛亦使神護法師寧樂叛佛耶願隨意垂誨師不得  
已而言曰東巖寺之障莽然無樹北岫有之而背非  
屏擁汝能移北樹於東嶺乎神曰已聞命矣然昏夜  
間必有誼動願師無駭卽作禮辭去師門送而且觀  
之見儀衛逶迤如王者之狀嵐靄煙霞紛紛間錯幢  
旒環珮凌空隱沒焉其夕果有暴風吼雷奔雲掣電  
棟宇搖蕩宿鳥聲誼師謂衆曰無怖無怖神與我契  
矣詰旦和霽則北巖松栢盡移東嶺森然行植師謂  
其徒曰吾沒後無令外知若爲口實人將妖我  
晦堂心禪師開戒上堂我有大妄語對衆頻頻舉佛



法陷平人不許去與取遂豎起拂子云者箇是佛耶  
是法耶你諸人作麼生去者箇非佛耶非法耶你諸  
人作麼生取若去不得又取不得你現前若僧若俗  
若男若女若長若幼豈不全身總在裏許還有跳得  
出者麼若也跳得出過在山僧諸人無分若也跳不  
出過在諸人山僧無分且道總不恁麼底人又作麼  
生少間於戒壇之上更與諸人道破下座

瑞白雪禪師秉命授戒升座鳴尺云會麼此是千華  
座上盧舍那佛放大寶光光告千華上佛傳此心地  
戒品直至如今流在金粟峰頭上密下雲和尚處承  
和尚慈旨命雪上座爲汝諸人聊通一線復鳴尺云  
會麼若也會得金風一夜雨箇箇觸體新其或未會  
且將三皈十戒爲汝等敷宣

弘覺恣禪師爲新戒付衣上堂昨晚南嶽與匡廬兩  
山爭論佛法一山道南嶽讓和尚乃曹溪嫡子一山  
道青原思大師實寶林正宗一山道廬陵米價傳千  
古一山道磚鏡磨穿古佛心互相競爭不已羅浮山  
聞得出來約住云莫爭莫爭饒你青原思大師南嶽

讓和尚少不得從我嶺南者裏去山僧竊頭與羅浮  
山一棒天台合掌道善哉和尚打者一棒不妨透頂  
透底暢快殺人山僧遂與震威一喝咄縮頭去於是  
四山各各懷懼而退拈起袈裟角云還見麼自從廬  
老收歸後須信人人總有之

筌庵問禪師上堂本來面目全呈露一點無欺是戒  
源今日分明重舉似當陽直指不相瞞男是男女是  
女僧是僧俗是俗各各不相知各各不相借三世諸  
佛侵你一些子不得歷代祖師奪你一些子不得天  
下善知識添你一些子不得直下凜如冰雪通身皎  
若嚴霜人人獨自稱尊箇箇點胸點肋騎聲蓋色邁  
俗超方便應如是信如是解如是行如是證於如是  
中建立於如是中利濟爲人天佛祖之師作天下古  
今標榜須是恁麼人方成恁麼事到者裏風行草偃  
水到渠成歷歷孤明洞然瑩徹誰是能授者誰是得  
授者良久云一華五葉芬芳遍大地弘開火宅蓮  
牧雲門禪師新戒請上堂一法若有毗盧墮在凡夫  
萬法若無普賢失其境界出有無有條通天大路須

菩提解之爲空優波難持之爲戒阿闍世王獲之證  
無根信勇施菩薩悟之入無生忍涅槃會上廣額屠  
兒放下屠刀道是千佛一數善來菩薩子依樣畫葫  
蘆卽不無畫成後如何行履牽犁拽耙氣衝天露爪  
張牙得人怕阿呵呵是甚麼語話便下座

上堂臘月初一逢二九紅日東昇光忽透空崖半夜  
起大風主山案山草木俱作獅子吼當恁麼時誰是  
久參誰是新戒馬大師卽心卽佛八字打開非心非  
佛全機獨露敢問諸人洗面時爲甚麼摸著鼻孔過  
堂時把定匙筯還會麼早知燈是火飯熟幾多時

道具提綱鉢孟 拄杖 拂子

千巖長禪師因蔣居士施鉢孟上堂問話且止況此  
事不在語言文字上何謂也盡十方世界是箇鉢孟  
三世諸佛在裏許轉大法輪歷代祖師天下老和尚  
乃至一切有情無情總在裏許頭出頭沒汝等禪和  
家還跳得出麼若跳得出須彌南畔把手同行若跳  
不出長連床上喫粥喫飯茲承常州直心居士同令  
弟月堂居士委宏都寺送鉢孟五百副齋米五十石

及觀資種種供養登山俵散大眾請升於此座舉唱  
若舉麻三觔乾屎橛解秤槌之類雖是本分家風  
於諸人分上了無交涉未免舉一兩則古話也要諸  
人咬嚼僧問楊岐天得一清地得一寧衲僧得一堪  
作甚麼岐云鉢孟口向天有問無明只向道披毛戴  
角又僧問洞山時時勤拂拭勿使惹塵埃爲甚不得  
衣鉢山云直饒道本來無一物也不合得他衣鉢雪  
竇云他既不受是眼將來底必應是瞎還見祖師衣  
鉢麼若於此入門便乃兩手分付非惟大庾嶺頭一  
人提不起設使合國人來且緩緩將去師云洞山太  
尊貴生雪竇太慳惓生無明者裏則不然將來底是  
眼不受底是瞎禪和家箇箇腕頭有力不怕提不起  
不怕將不去何處更覓祖師卽今兩手分付大眾無  
明與麼批判且道與古人相去多少還有證明者麼  
若證明得居士功不浪施若證明不得無明不惜眉  
毛復成一頭以拂子打圓相云大眾見麼大地渾圖  
黑漆鉢吞吐虚空口門潤白飯山堆疊疊來死人喫  
了都教活畢竟此功歸阿誰常州在家蔣菩薩老僧

也只得一分大家有眼何曾瞎分付囊藏又展開千古萬古阿剌剌

雪竇顯禪師因僧送拄杖上堂師拈拄杖云清峻孤根別有靈勢含山水自分明提來勝得豐城劍報盡人間兩不平復云大凡以平報不平是義烈常準以不平報不平爲格外清規亦猶以智遣惑頗逢下士以智遣智罕遇作家要會兩不平麼諸人也沒量罪過雪竇也沒量罪過雪竇過自能檢責你者漆桶不打更待幾時以拄杖一時趁下

恕中愠禪師謝明慶瑩中和尙惠竹拂上堂拈起示衆云凌雲勁節傲雪孤標結根於曠劫之先孕質於三乘之外一刀兩段不假思惟信手拈來神號鬼泣非麈尾之能齊豈龜毛之可比擊處而雷轟蟄戶豎時而劍倚長空馬師束手歸降百丈望風斂衽有如是之妙用有如是之神通汝諸人還知來處麼若也未知問取明慶和尙擊禪床下座

大挂搭歸堂提綱名勝

首山念禪師大挂搭歸堂上堂三春景謝朱夏將臨

是禪子罷游之際幽窻挂錫之辰林下相逢合談何事良久云擬指千差路回光百萬程

瑯琊覺禪師大挂搭歸堂上堂與麼來者上問安排不與麼來者下問挂搭向上人來獨自悽悽暗度江更有一人向什麼處著良久云釣竿斫盡重栽竹不計工程得便休珍重

雪巖欽禪師上堂衆無多寡道絕方隅小中現大塵包太虛丁此末法荒涼之運南明只得扶起森羅萬象熾然常說抑下從上佛祖盡作參徒參則固是且道以誰爲師且請歸堂挂搭

上堂修造工夫已辦龍神土地亦安因甚水雲來往尙如月曉星殘山僧已是不禁冷淡未免總萬象於一堂同時挂搭與諸人朝暮同參卓拄杖云更添一單

劍門分禪師新恩長老挂搭上堂長老爲僧四十年者回退院來參禪藤條劈面鞭將去醉蝶難尋火裏蓮下座

普請提綱

應庵華禪師普請栽松上堂舉臨濟在黃檗栽松公案爲山問仰山黃檗當時祇囑臨濟一人別更有在仰云有祇是年代深遠不欲舉似和尚爲云雖然如是吾也要知但舉看仰云有一人指南吳越令行遇大風卽止師云黃檗道雖然如是子曰喫吾三十棒了也養子之緣固當如是臨濟正令雖行可惜向饒頭邊甘自活埋仰山見解未出常流豈止遇大風卽止當時何不道直待虛空界盡此話方始大行豈不是頭正尾正蔣山今日捋下面皮要與諸人相見去也兼拈拄杖卓一卓云驚群須是英靈漢勝敵還他獅子兒

普庵肅禪師普請上堂當時驢覷井如今井覷驢酒醒溪邊思往昔至今方覺彼區區空花解弄迷兒路蝶引癡蜂入網蛛誰是那頭能警叱回光返照越賢愚雲蓋瓦鋪須子細筆端有口顯文殊噴珍重高峰妙禪師普請上堂禪不在參道不須悟動轉施爲山嶽鼓舞孟八郎漢便恁麼去爭似西峰搬石運土

愚庵及禪師普請栽松上堂舉臨濟在黃檗栽松公案畢乃云諸人要做臨濟兒孫則且置只如黃檗道雖然如是子曰喫吾三十棒了也且道臨濟當時過在什麼處應庵云養子之緣固當如是扶強不扶弱濟以饒頭打地三下復作嘯嘯聲爲是啐啄同時爲復別有道理普慈向者裏擬著箇眼也要諸人瞥地卓拄杖云雪後始知松栢操事難方見丈夫心

普庵問禪師普請示衆擔磚肩負重摘茶手攪香重底若辛苦馨香不久長難行難忍處滿路要生光共此雲堂裏休疑手脚忙有人識得偈意與他鉏斧住山

玉林秀禪師普請上堂盤山道向上一路千聖不傳慈明道向上一路千聖不然大慧道向上一路熱盃鳴聲諸大老恁麼提持脚未點地在報恩則不然向上一路千聖同途今日山中乏糧禪侶托鉢明道蔡封翁同闔門諸上善人送資到山普請大衆好生出坡下座

朝宗忍禪師上堂今朝十月初一日田家收割將畢

未畢衲僧門下事如何靈祐初住荒村破院普請大家竭力揮拂子下座

弘覺恣禪師普請栽松上堂若論此事如種樹相似揀擇欲精下手須確根宜其條直坎貴其寬容然後時之以雨暘資之以風露則自然由拱把以至合抱由合抱以至蔭覆人天雖然者邊底從你種祇如那邊底又作麼生栽薦召大衆衆舉首師云根生也復說偈曰怪來禪社日凋傷四望喬林卒就荒榦折薪樵知法弱根摧匠石占魔強幽棲鳥出無高託天外鶴歸失故翔欲起山門千載色請栽大樹作陰涼

亡僧遷化請佛事鎖龕 起龕 奠茶湯

天如則禪師爲宗上座鎖龕燈籠松壁上天台且道明甚麼宗旨宗上座死却活句活却死句佛祖牢關鎖你不住

恕中愠禪師爲運監寺鎖龕靈機密運智鑑發輝直得三脚驢蹣跳踏破虛空只者鎖子有甚用處

南石琇禪師爲淨上座鎖龕一念心清淨則生死永絕隨波逐浪句截斷衆流句函蓋乾坤句總不勞拈

出

弘覺恣禪師爲圓通老宿封龕逝多國上賴相成又向何方展化輪只在阿閼兼妙喜人天無路問玄津恭惟圓通老禪宿法海聖賢隨宜應跡普門大士方便垂綸住世七十九年將及迦文之壽筭念周千億所欲分布袋之多身釣絲一夜收竿拋盡雲山海月歸鳥幾多迷谷難尋苔徑華茵俊哉獅子之行迥而絕侶卓爾象王之步誰則爲鄰掩龕云物外乾坤忘主管壺中日月自朝昏

爲印明都寺封龕法界不容身至真無相貌誰窆太虛空突開者一竅蓋因妄有生因生有滅生滅滅已寂滅現前唯我印公都寺以廣大心運無私智力還普天寶所冀轉無上法輪坐此界分我人未免自生拘執然巨澤有乍興之波浪長空無積久之風雲瞥然一念同光自應千差坐斷沉復換步趨無爲之岸移身歸寂寞之鄉可謂爭之不足讓之有餘者矣正當恁麼時又且如何塵囂無復來芳徑曠有白雲隔鴈封



天如則禪師爲文監寺起龜不立文字不涉程途正  
與麼時如何是文監寺出門句子一不得有二不得  
無倒跨楊岐三脚驢

恕中愠和尚爲聰西堂起龜某是黠聰明泯知見不  
懼生死底漢颺下住山鋤斧正好東行西行

印藏主起龜毗盧正印文彩燦如不善用者動成窒  
礙平地上死人無數透過荆棘林是好手

昇都寺起龜拗折聖箭子好箇昇平世界生老病死  
甚處得來放便倒扶便起星流電激三千里

常都寺起龜愛惜常住如護眼睛底一念盡情放下  
了也涅槃臺上不用遲留勝熱門頭更須進步

漢監寺起龜今朝一隊死漢送箇活漢透過金剛圈  
吞却栗棘蓬十方世界杳無消息雖然也是喪車後

掉藥囊

無用寬禪師爲大善寺長老起龜曠大劫來只是一

宗若聖若凡誰敢當鋒住山斧子輕拋下出門步步

起清風

正覺宗院主起龜拈杖云正覺一宗燦破虛空無用

與渠親舉起出門且喜日輪紅

天隱修禪師爲戒侍者起龜拈拄杖擊龜云吾徒通  
成可謂信心脫俗九載事師殷勤只者著子尙未惺  
惺涅槃臺上請汝先行且道正恁麼時是生耶是死  
耶生既未生生卽無生死既離死死亦無死無死無  
生靈然獨存喚門外春風灑灑去一回消息一回新  
聰侍者起龜行聰行聰十九如風偶然失脚滿盤盡  
空一空空到無空處返本還元總是同你若會得生  
來便去也不爲夭你若會不得縱然百歲不爲老卽  
今會得便恁麼去以拄杖指龜云出去

弘覺志禪師爲瑩維那起龜一踢黃河水斷流山川  
行到路窮頭驂駿驥服驂騑揮鞭直出青霄外俯視  
塵沙界一瀉人間天上何處得淹留

霞屋應都寺起龜祇解恁麼去不解恁麼來者五步  
雖存七步不活既解恁麼來又解恁麼去還他朝遊  
西天暮歸唐土漢始得何故脚跟無綫如蓬轉信有  
渠儂得自由

爲鄂州惟凡禪人起龜平地上死人無數過得荆棘

林方是好手大衆祇如荊棘林已過底又作麼生古  
佛放光留不住鐵牛無脚也須行

爲印明都寺起龕禪僧得力句不在南嶽定在天台  
印都寺你是海州人親從天台來就中得力句還曾  
拾著也未若也未曾山僧有箇妙法與你東西薰過  
三千南北倒回十萬乃喝一喝云到頭霜夜月任運  
落前谿

爲恒徹禪人起龕未得徹頭須索討箇入路不得入  
路過在全活尙未死既得徹頭須索討箇出路不得  
出路到底死了未曾活所以道門裏出身易身裏出  
門難若是脚下無私漢紅綫斷十景神駒過海南五  
色祥雲步天岸

爲止休淨上座起龕多年賦就還鄉曲欲唱人前恐  
脫空帶血連宵啼蜀魄歸思不禁上眉峰春去也綠  
滿叢夾路桃華風雨後馬蹄何處避殘紅  
爲寶慶南源融禪師起龕春光無脚走閭浮鳥語華  
香遍界週芳草那堪迷古岸黃金索斷鐵牛頭忘管  
帶絕拘留信步天南仍地北更嫌何處不風流

爲霽章蘊禪師起龕水上東山行不住火中木馬驟  
清風爲緣鼻斷黃金索八角磨盤任走空

天如則禪師爲聰上座湯去聰黜明苦口良藥禪僧  
有病在膏肓鎖斷咽喉吞不落聰上座汝今藥病兩  
忘一任吞却吐却

恕中愠禪師爲滿書記起骨茶滿肚文章通身擔板  
及乎挨拶將來直是皮穿骨露南匾頭自非慈明痛  
下毒手未免向泐潭死水裏浸殺人在畫樓沽酒處  
相要來喫趙州茶

拄持爲亡僧秉炬 清規云鎖籠起籠等佛事  
維那稟首座商量可以依  
資輪請頭首爲之惟秉炬必請拄持舉  
佛事今時諸方亦命頭首然非古道

無相眞禪師爲靜維那火大衆還知靜維那麼嚴陵  
灘上父母生緣白葦峰頭易服而主蹉過如來頂寶  
滿肚風雷欲紹長者家財翅摩霄漢兩頭俱脫一事  
無成抱病來歸懸知不救老蘆山今日爲伊出手令  
伊直下知歸火焰藏身彈指透過荊棘林瞥爾回頭  
倒騎鐘樓入佛殿試問大衆正與麼時還有照用雙  
行者麼涅槃一路非生滅火裏冰花著眼看

圓悟勤禪師爲亡僧火五蘊山頭涅槃路四方八面  
沒遮欄通身盡是金剛眼一粒靈丹火裏燃

大慧杲禪師爲彥維那火者箇上座了五蘊性空悟  
諸法無我纔覺四大乖違知是收因結果預于三兩  
日前洗浴剃頭親寫遺言問我乞一把火不顧頂後  
萬里神光豈戀目前玄關金鎖無明業識癡團一一  
從頭點過如此了事衲僧世間能有幾箇彥維那既  
怎麼更有一事須說破若到天台鴈蕩遊傳語嵩山  
破竈墮

爲法燈盞寺火以火炬指竈云者箇是已滅底法燈  
復舉起火炬云者箇是無漏底智火無漏智火然法  
燈然也滅也無不可燈盞寺還知麼灰飛煙滅後優  
曇花一朶

爲充禪人火人人皆有四大充禪獨有五大地水火  
風之餘更有一枚笠大此笠內空外空內外空包含  
欲界色界無色界說甚須彌鐵圍江河大海萬象森  
羅總在裏許無迫無隘而今四大已乖張唯有笠大  
鎮長在者笠大甚奇怪一唱兩唱三唱貴亦不賣賤

亦不賣畢竟如何打與充禪同入火光三昧  
爲超禪人下火山下麥黃蠶已斷一隊死人送活漢  
活人身似鐵金剛卽今再入紅爐煅

應庵華禪師爲南書記火東湖莞嶺及歸宗燁燁騰  
輝爐韜中鐵眼銅睛烹不破衲僧巴鼻好流通  
天目禮禪師爲南禪值雨門首秉炬指南一路南北  
西東孟八郎漢使與麼去去則不無只如前面是夜  
叉羅刹後面是惡浪懸崖中間是陷人火坑到者裏  
又作麼生出門一陣雨滂澎

元叟端禪師爲定維那火一槌之下正眼豁開亘塵  
沙劫是箇大寂定門顧視左右云夜來何處火燒出  
古人墳

爲此上座火此虛妄身若無六塵則不能有火裏唧  
唧吞却山河大地了也今者妄身當在何處  
爲道上座火道不在內亦不在外大海不宿死屍烈  
燄不存蚊蚋擲下火

爲定上座火那伽大定動寂常真生死去來如同遊  
戲劍刃上翻身火燄中走馬

爲玄首座火摧殘峭峻銷鑠玄微兜率宮中了無夢想勞生路上永絕驅馳火裏烏龜頭戴角翻身觸倒五須彌

爲泳掌財火秤盤上分斤定兩是汝筭筒邊橫千豎百是汝且道生死海中涵泳游戲是汝不是汝擲下火云烈焰堆中分明薦取

高峰妙禪師爲苦瓊上座火舉炬云向者裏薦得拈一莖草卽是瓊樓玉殿不然瓊樓玉殿卽是一莖草擲下火云剔起眉毛火裏看

明山都管火以火打圓相云者裏見得便見山卽山水卽水大洋海底火星飛天目峰頭波浪起不然擲下火云家家門前火把子

法曇上座火汝名瞿曇佛名法曇分明舉似疑則別參擲火云大洋海裏火燒龜

中峰本禪師爲茂直歲火諸方直歲度火把與住持今日住持度火把與直歲且道是明甚麼邊事明日優曇花茂發淨飯王宮生悉達只從者裏便承當千古萬古阿剌剌

宗監院火歸宗一昧禪楊岐三脚驢兩重公案一句破除且道是那一句擲火把云臘雪堆中火一爐

圓浴主火以火把打圓相云圓浴主見麼喚作圓相則背不喚作圓相則觸透過兩重關還他親眷題蓮峰突出確鶯花杓柄兜翻獅子足香水沉沉徹底乾普請大衆齊刮目且道看甚麼擲火把云脫殼神龜飛上天無位真人火中浴

祥柴頭火舉起火把云祥柴頭見麼萬朶祥雲匝地飄叢林枝葉半肩挑今朝匾擔兩頭折千日斫一日燒

無用寬禪師爲宗院主火四大本空都無罣礙火裏翻身一彩兩賽

記寺主火記得的用不著無手人打殺虛空驚得須彌顛倒卓擲火云便向烈燄堆中放下龜毛兔角喝著

古梅友禪師爲德維那火興化當年打克賓仰山把火沒疎親遍參知識工夫切撒手便行眼有筋卽此身離此身涅槃臺上火箭飛除教落葉又歸根





列祖提綱錄卷第三十五

武林十八澗理安禪寺住持婁東行悅集

住持爲亡僧秉炬起骨 煨骨 入塔 撒骨

恁中愍禪師爲耐監寺火逼慈明晚參是死伎豎起火云火炎崑崗玉石俱焚耐烹煉者惟真金爾爲受都寺火受得惡辣拳踢便解超生越死漏燈盞動地放光金剛圈分文不直烈焰堆中埋釣車釣得鯉魚長一尺

爲福維那火福城東際不異于今汝因甚向桶箍爆處方始死却伎倆滅却現行墨火云點火照看面皮厚多少

爲牛都寺火楊岐對白雲發笑大似逼生蛇化龍總是死門俱非活路擲下火云我喚作火汝不得喚作火

有提點火拈却漏燈盞放出本有靈光照破歷劫生死昏衢之夜月不待風而涼日不待火而熱

爲義都寺火汝雖出塵不明勝義是情執未斷汝雖年耄不達性空是大事未了卽今四大已離未斷斷

取未了了取楊岐擔子扣作柴燒烈焰堆中橫飛雪電

無文璨禪師爲珠浴主下火家家門前火把子臨機應用無不可香水海裏動地放光生死路頭一時照破某人還見麼以火把打圓相云切忌喚作明珠一顆

薑頭下火盡力事掙鉏無意除鬚髮老去志益堅生薑不改辣大地忽鉏翻一死不再活看看開先今日活汝去也擲下火把云火蛇劈面來虛空連底脫呆庵莊禪師爲珍藏主火從門入者不是家珍三乘教典都無實義喚作火則燒殺你不喚作火凍殺你義藏主火與汝往來者是藏不與汝往來者亦是藏要明第一義諦切忌死他語下以火把打圓相云月不待風而涼日不待火而熱擲下火

藥監寺火應病與藥據欸結案金剛圈栗棘蓬透不過吞不下總是死漢山前猛虎趨於菟火裏唧唧吞鼈鼻

玳藏主火辯傾河漢文綴珠玑生死岸頭總用不著

一大藏教是箇之字祖師西來是箇右字提起火云  
勝熱門頭參得透丙丁童子念摩訶

鐵關樞禪師爲超監寺火擊碎金圈超越生死白日  
青天火把子

南石琇禪師爲月維那新上座火網維已經歲月不  
是新入叢林死生大事苟或未明且聽火燄爲汝說法  
爲茂知客火未悟客塵煩惱熾茂既了一真廓清宇  
宙直得死柴頭火燄揚真吼

爲淨上座火淨智妙圓體自空寂出生入死如火燒  
冰

爲達性空首座火鐘樓上念讚床脚下種菜直下了  
達生死無疑性空真火性火真空蠅螟吞却須彌峰  
爲澄藏主火燄下柴鑽利海波澄了知無佛無祖誰  
云有死有生泥捏金剛裏走下描菩薩火中行

爲堂司庫行者淨守火碓房舂米是生死岸頭事廊  
下報衆是生死岸頭事作麼生出得生死二由一有  
一亦莫守火裏鴈鷗開笑口

佛朗性禪師爲天童妙監寺火者一交裏了生死無

可道作得主中主論甚妙不妙抹過金剛圈常光淨  
悄悄以火把打圓云會麼烈燄堆中急轉身向上  
別有通天竅

爲汝瓊都寺火一毫頭上瓊樓玉殿者邊那邊日面  
月面抹過楊岐三脚驢管甚生死急如箭大火堆中  
鍊一番堂堂正體金剛焰喝一喝

爲靈春都寺火一氣令初回春光遍大地放下漏燈  
蓋生死若遊戲來來實不來去去本無去真空性火  
無生忍便是龍華最上記

爲恩極都寺火極濟慈定力豈有生死疾夜行莫踏  
白非水便是石公私總莫論擊碎無明窟以火打圓  
相云智火金剛身大千如日出

石雨方禪師海火頭火一向你燒火今日火燒你但  
得火性空你性亦復爾海火頭會也未一陣無風波  
浪生智海雖深終見底

弘覺恣禪師爲達本火頭火冷竈著把火熱竈著把  
火如爾所作因還爾所得果知因達本體無生笑殺  
嵩山破竈墮

爲止休淨上座火一念同光父母未生誰是我四楞  
塌地眞常獨露本來人況復知止能止知休卽休古  
廟香爐去一條白練去雖受他家盂孟不更强安柄  
把白醲華平堆口角黃獨飯爛嚼鐘中唯其掩息如  
灰故能死生若脫但只恁麼去恐守寒岳異草青坐  
著白雲宗不妙山僧到此不免爲你別轉一機欲待  
橫身三界內請參勝熱婆羅門擲下火芭便燒

爲印明都寺火難侵最是祖爺田九鼠三蛇任穴穿  
幾度洞然明劫火松風時到竹坡前所以古者道體  
竭形消而不滅金流撲散而常存此之是也恁麼更  
說甚麼三十年前河流東三十年後河流西要且世  
界成與者箇沒交涉世界住與者箇沒交涉世界壞  
空亦與者箇沒交涉且道者箇是甚麼擲下火芭云  
劈面來時親薦得當空寶印搭青天

爲瑞駝僧火誰云曲不藏直須信活中有死如今死  
了却活頂後神光萬里提起火芭云看看我見燈明  
佛本光瑞如此

爲惟凡禪人舉火不著凡情便望情吳山楚水競崢

嶸而今黃鶴樓拳倒鸚鵡洲前月正明急著眼好惺  
惺消息盡時全體見鐵蛇火裏嚼寒氷  
爲恒徹禪人火般若如大火聚四面不可入般若如  
清涼池四面皆可入可入也沒處去不可入也沒處  
去祇如全身在裏許底又作麼生擲手那邊千聖外  
回途堪作火中牛

爲本具柴頭火羨爾出家晚行業多純恪雨落打草  
糝晴乾圖得著職供爨下薪日向青山斫右提拙斧  
芟左撻芒繩縛鳥道負將歸高低盡踢著三昧堂堂  
受用身由來本具妙明焯無端擔子折今朝慶快平  
生眞瀝落何似嵩山破竈墮豈爭普化搖鈴鐸阿呵  
阿樂不樂火裏唧唧吞大蟲萬里天邊飛一鷲

箸庵問禪師爲聞副寺火從聞思修入三摩地掣斷  
黃金鎖通身百雜碎石火光中薦得親一聲長嘯清  
風起

爲澄侍者火竹林寺裏親見親聞底便是今日底石  
磬山中親證親據底便是今日底你不曾背我我不  
曾虧你從朝至莫執巾瓶一段聲光蓋天地八風吹

不動髮譽莫能加抹過五須彌掀翻四大海驪龍領  
下奪得髻珠猛虎鬚邊揮開毒手是則眼親手辨炬  
赫一時到頭脫鎖難鉤真能坐斷不謬爲獅子窟中  
獅子誠所謂旃檀林裏旃檀汝事既圓予心何憾到  
者裏透過末後重關百尺竿頭且道還有進步也無  
自從爍破昏衢暗徧界明明不覆藏遂投炬

祖關依禪人火慧燈堂光輝徧界洗鉢池烈燄亘天  
依報正報具足莊嚴抹過諸方瞎禪不妨絕後光  
前

自休禪人火教休不肯休荷衆會竭力剔起兩莖眉  
不信有今日若也信得及死生何間隔豎起光明幢  
爲君重著楔

滿堂禪人火滿上座你從何處來却從何處去你底  
來處便是去處誠得去處不負來處祇如無所從來  
亦無所去又作麼生看火發也

無文燦禪師爲議上座起骨向上一機滿眼滿耳如  
過風疾燄不容湊泊如倚天長劍不容擬議何故轉  
腦回頭橫屍萬里

慧上人起骨慧日高懸普天匝地爍破佛祖眼睛揭  
示衲僧巴鼻雖然觀體全真認著依前不是何故差  
之毫釐失之千里

高峰妙禪師爲二正上座煅骨正上座兩不成雙一  
不成隻牙齒分明是具骨萬煅爐中色正輝泥牛觸  
碎蒼龍窟

廣捨上座煅骨取不得捨不得正恁麼時如何委悉  
咄別起眉毛火裏看分明一具黃金骨

大慧杲禪師爲益照二禪人入塔呈起左手骨云者  
箇是眉州益呈起右手骨云者箇是饒州照一人會  
禪一人會教雖然各自行畢竟同時到且道同時到  
底事作麼生誰家別館池塘裏一對鴛鴦畫不成  
爲月禪人入塔捧起骨云靈山話月曹溪指月妙喜  
今朝捧月仔細窮究將來一時未得勦絕何以故却  
被者箇阿師盡把機關漏泄既漏泄看看又是中秋  
節無物堪比倫敦渠自家說

古梅友禪師爲傳侍者入塔樹倒藤枯紅爐焰滅弄  
盡骨董更無漏泄打歸塔院冰清玉潔傳侍者掣開

大地到牢關如淨琉璃含寶月

想中愍禪師爲明都管入塔明知是者箇開口道不得明知不是者箇開口却道得坐斷兩重關天然露風骨百發百中聖箭離絃七穿八穴湘南潭北爲君幾下蒼龍窟

呆庵莊禪師爲履首座入塔真實履踐的人出生入死如同遊戲且眉間挂劍時如何擬議不來觸體著地

南石琇禪師爲因監寺入塔因妄有生因生有滅寂滅現前觸體眼活箇舊花開栗棘蓬無縫塔中雲句匪

鐵關樞禪師爲慈都寺入塔報慈隔枯骨汁金剛圈爛泥團颺下骨云澄潭不許蒼龍蟠

高峰妙禪師爲得意化主入塔得意忘言逆行順化常在途中不離家舍彈指一下云塔戶開了也遍界觸體無處藏者裏全身俱放下

中峰本禪師爲諫西堂入塔號無憂住千頃寺徹骨窮來三十年每於佛祖結生冤巨靈捏碎虛空骨大用塵塵

總現前恭惟某人獅子巖前參得一句蓮華峰頂似空合空蓮華峰頂悟得一機獅子巖前如鏡照鏡者邊那邊應用不缺千頃萬頃遇緣卽宗拈却水火珠放下打草扇到者裏盡十方世界是金剛正體盡十方世界是無縫塔門出亦無碍入亦無碍且道不入一句作麼生舉揚鐵馬衝開青石門玉鸞啄破黃金藏

鑑首座入塔末後一句子備未踰滇一萬八千里路時已常說了也今日古鑑發光露出晴空閃電團團無縫塔門開收取眉間三尺劍雲南人

弘知客入塔維那不在當汝打槌劈頭一下振起宏規掣開無縫塔擊破玉玻璃正是全身放下時

天如則禪師爲大上座入塔盡大地是箇大上座盡大地是箇死觸體盡大地是箇無縫塔且道門從那裏入喝一喝

幻有傳禪師爲衆靈骨入普同塔盡十方世界是箇無縫塔又向何所在覓入處出處因人妄計有出入耳今日不管是張三底骨髓也不管是李四底骨



襯也不管是徐五底謝八底舉拄杖指塔戶云總爲我拈來都放在者裏安置忽憶釋迦老子云我觀三千大千世界乃至中間無有如芥子許地不是我捨身命處咦將此身心奉塵刹是則名爲報佛恩

箬庵問禪師爲徹首座入塔尊貴一路天然自別徹尾徹頭何生何滅生鐵鑄就心肝渾鋼鍊成脊骨是汝尋常特立孤標人天表率撒開窮相手奮起遼天鼻雖然未展全威早已開花鐵槩笑香巖上樹特地周遮嗤驚嶺拈花空資餘力果然赤手承當不謬禪僧氣息山僧今日到者裏有口難揚有心莫測以拄杖打圓相云扶起叢林大法幢留與後人爲準則

弘侍者入塔狹路相逢薰遭熱喝燒却茅庵同出同沒撞倒須彌山渾身無處著未肯甘心便活埋幾度江南又江北且道山僧負你你負山僧投骨云大慟忽傾三日雨不風流處也風流

永書記入塔人道我是生道上座是死山僧道我是死上座却活以何驗得指塔云入時值師五  
十歲辰玉禪人入普同劍峽險未是險瞿塘深未是深出一

保社入一叢林摸他盤底高突兀瞰他戶牖難探捫今日忽然靠倒送歸萬丈淵坑以拄杖指塔云到處去來無朕迹不如者裏好安身

弘覺恣禪師爲惟凡禪人入塔少林卽說得皮髓南嶽亦分眼舌心驚過湘南潭又北盡云一國充黃金提起骨襯云天童者裏要且不然凡聖目前齊包裹從教枯骨作龍吟

石雨方禪師棲煙盤銘山鳴同入塔常寂光土凡聖同居土一手遮攔一手揭露棲煙盤銘山鳴三位覺靈旣已共命同船從此不須回互要回互同氣相求同聲相和撼骨曰侈

移寶壽舊普同霧骨入新普同塔如來禪祖師禪盡仗春風二月天東雲水西雲水鷗鷺啼落花飛去衆覺靈且莫動雖然不食空王俸也要大家知奉重撼骨曰送

無相眞禪師爲京監院撒骨六十二年夢幻身箇中消息許誰親鐵牛耕罷翻身處觸破澄潭夜月新京監院早歲行脚徧歷諸方投老歸來隨緣任運非常

灑落到底惺惺雖然去住自由爭奈香齋猶在是恁  
麼時諸人還知落處麼阿耨池心一派來電光照徹  
三千界

比丘尼遷化請佛事起龜 秉炬 入塔

元叟端禪師爲妙淨潔長尼起龜見身無實是佛身  
山河大地迥絕異緣了心如幻是佛幻草木叢林更  
無別法故我某人現比丘尼身成大丈夫事拋玉樓  
金殿直趣此宗挺鐵壁銀山單明自己廓性天之雲  
翳蕩心地之塵辱透聲透色八面玲瓏亘古亘今十  
方通暢毋固毋必能柔能剛道契南北兩朝名滿東  
西二潮靈機活脫劉鐵磨未足觀光智鑑虛圓凌行  
婆亦須退步全體是個解脫大海全體是箇涅槃妙  
心無起滅可求無生死可出百骸潰散卓爾獨存四  
大分離湛然常寂正與麼時身裏出門卽不問門裏  
出身作麼生毗盧頂上從來往安樂邦中任去留  
弘覺恣禪師爲希庵尼起龜一番提起一番新固守  
玄關坐殺人沒北斗出南辰欲看飛龍千界外密移  
一步是通津大衆祇知推不向前約不退後底又且

如何以拄杖擊龜一下云伸出鐵驢三隻脚倒騎玉  
象趁麒麟

元叟端禪師爲尼能上座火生緣既了能事既畢四  
大五蘊則且置性比丘尼轉一念成阿羅漢畢竟有  
何憑據擲下火云炎炎火一團觸著燒殺你

弘覺恣禪師爲本祐尼火四大分張後諸緣盡捨離  
涅槃山側望煙草正萋迷摧殘峻峭銷燦玄微觸骸乾  
盡娘生眼萬里神光頂後輝

無用寬禪師爲慈受道姑入塔示現閻浮童女身不  
曾錯認定盤星火中煅過猶光彩窄塔波中四季春  
筍庵問禪師爲尼戒生入普同白玉琢成黃金鑄就  
百千諸佛共參隨普光殿上同攜手不是涅槃亦非  
後有放身命處絕蹤由依舊面南看北斗

優婆塞遷化請佛事起棺 秉炬 起骨  
入城撒土 點主

石門剛禪師爲杜均玉起棺五十餘年一夢歸好人  
去速實堪悲寒梅帶露蘭江上也似愁人泣淚垂恭  
惟某人一州遠士四海佳聲幼年紹叔父之箕裘壯  
歲勝祖宗之家業二男二女喜有室而有家一夫一

婦宜曰壽而曰富豈期染膏肓之疾何遽罹肺腑之憂忽移夜壑之舟永別天年之數正謂花開雨驟月皎雲遮眷戚哀號妻兒痛苦堂上之孀親失所連枝之手足傷情便好以智慧刀割斷恩愛網踏開生死路跳出是非關返照回光悟本性無非佛性歸真捨妄了凡心卽是聖心出火宅高駕大車向塵退轉一步卜陰宅當歸裏便請安然對溪山不異淨邦有何隔礙當著猛省更莫遲疑雖然如是且道出門一句得作麼生咦信脚出門皆大道此方他界任優游天目禮禪師爲陳統制秉炬一作邊頭戰馬催幾番得勝凱歌回如今老大身無用臥聽城頭奏落梅忠腸易斷憤氣難摧末後一重牢寨南山爲汝衝開陳統制快須醫鑢機前看火箭空中劈面來

中峰本禪師爲馮將仕秉炬現成公案絕安排無位真人笑滿腮吸盡太湖涓滴水寒梅樹樹待春開舉火把云某人八十年來只憑者箇起家立業勤儉儉廩積有餘仁居義路行無竭八十年來只憑者箇崇德慕善舉心曾不昧天真觸著通身是方便八十年

來只憑者箇教子育孫挺挺群賢繼芳躅珊瑚環珮振高門八十年來只憑者箇收因結果苞湯水面青溶溶善慶堂前花朵朵到者裏本來面目觸物純真自己家山不離跬步八萬四千毛竅與性空眞火竅竅相通三百六十骨節與性火眞空節節相拄垂光散爲福德林流輝攝入光明戶且道者箇是何物嚮以火把打圓相云團團轉作大圓鏡條條照出珊瑚枝盡大地入都不見只許馮公獨自知

古梅友禪師無爲居士火萬葉墜黃金千峰凜寒嶽翻身直上涅槃山畢竟以何爲倚託從來鼻孔大頭垂出入行藏須摸索休摸索山頭石虎吼聲乾海底泥牛觸折角百千諸佛眼中沙一念不生成正覺是卽是已畢竟如何是末後句覺通居士喏倒騎鐵馬上崑崙一任紅爐煉空殼

高峰妙禪師爲智光居士火以火打圓相云姑蘇水天目山總是維摩不二關烈燄光中回首處依稀彷彿似人間

弘覺恣禪師人力林子佩火生涯白臍度朝曛荷來

常肩百二斤扁擔今朝親折却逍遙一似海天雲林  
子佩知也未由汝往因福不修生來日與苦相磕流  
離波迸幾多般怙恃無人誰覆蓋託叢林爲倚賴朝  
斫青山莫負途通身白汗流滂沛命何慳孤且眇未  
登三十早夭亡豈是皇天真不惠聽我言休怨懟以  
火荳打圓相云唯此一事浩然均富不有餘貧不匱  
在汝躬無缺壞大威光歆火摩尼雨寶之時珍徧界  
劫可燒渠無礙不增不減自金剛身去身來常三昧  
肩上鐵手中末喝一喝云考回盡付丙丁翁一筆勾  
消窮鬼債攬下便燒

天如則禪師雲壑石萬戶起骨生則封侯策戰功死  
當廟食顯神聰撫骨云更從者裏翻身去佛國塵塵  
有路通某人英勇無敵沉靜有謀武略文韜自任綠  
林之馮異忠肝義膽每懷赤壁之周瑜朋友推其賢  
士卒感其惠奉王命剪除搖擣奮不顧身握兵權威  
震蠻荒聞者喪氣奏凱始傳於天上歸途忽厭於人  
間清湘院前打翻筋斗去吳松江上迎得骨函歸天  
地爲之改容山川爲之墮淚功既成矣死何憾焉合

國稱爲大丈夫二十四年從教似夢傳家賴有奇男  
子百千萬世可以流芳到者裏猛著精神別通消息  
裂開煩惱網擊破死生關幻形幻影有去有來似浮  
雲之出壑眞性眞明不遷不變如皎月之當空卽此  
是自己根源卽此是故鄉田地卽此是安身立命處  
卽此是成佛作祖時是則固是且道卽今起骨還有  
祥瑞也無昨夜天風攪雪花爲公灑掃西歸路

無相眞禪師爲嚴百三三秘省入壙大衆故嚴百三  
三秘省文星孕彩廓徹四明將攀月裏高枝欲作人  
間霖雨時不我與遽逐逝波是憑脫體提撕要見本  
來面目蘆山今日豁開方便直指要津百三三秘省  
便恁麼徹底去一入一切一切入一獨步大方遊戲  
三昧然雖如是更須轉却一切處始得若一切處轉  
不得同死不同生若一切處轉得同生不同死正當  
恁麼時要會超生脫死句麼凜凜英風用無盡行看  
蘭玉靄家聲

應庵華禪師爲留守樞密大資掩土天高地厚海濶  
山遙發最上機示眞實相故我留守樞密相公廓頂

門正眼顯肘後靈符以此爲國爲民以此至忠至孝可謂大功不宰果見作家末後全提十虛坐斷無生田地有種有收般若舟航有津有濟直得高超物表獨蹈大方正恁麼時全身奉重一句作麼生道好須雲外看一劍倚天寒

元叟端禪師爲渤海月軒朱處士掩土盡十方世界是箇大光明藏從古至今無一法可增盡十方虛空是箇大解脫門從古至今無一法可減故我勸海月軒處士爲一鄉之善士作三界之韻人其在儒也則儒苑之著龜其在佛也則佛門之牆壘雖示作有爲事而不滅壞無爲之相雖示學無爲法而不分別有爲之名雖示有功名富貴而不爲功名富貴所拘牽雖示有塵勞業感而不爲塵勞業感所汨沒拓本來田地顯自己家風以詩書振祖宗以禮義悅親友處夫婦如琴瑟生子孫如鳳麟行種種方便成種種因緣昔年全體與麼來蛇現酒中之影今朝全體與麼去鴻遺沙上之痕酒中蛇影既無實跡可留沙上鴻痕豈有真蹤堪戀七通八達了沒遮攔萬別千

差都無望王恁麼時歸根得旨末後光揚一句如何擎展一坏黄土蓋平生千古清風動巖穴

千巖長禪師爲樓翁入壙天公豈可没人情雨雪堆中揀得晴修福自然招福報生前死後顯光明大眾還見面前一片田地麼者是我清翁老人親手做得來底生也受用不盡死也受用不盡傳之子子孫孫亦復受用不盡現前諸人若能見樣學樣各請歸家做取者一片田地好不然山僧更爲鋪花錦上世有英傑積善種德一句合頭千車共轍即日恭惟我故檀越清翁老朝奉智者國師種族義烏縣裏老成八十四年生生本不生行而能說說而行八十四年死死亦不死子又生孫孫又子三年之喪孝也今日之葬禮也天之清翁之清矣隣上清釋梵之宮地之厚德之厚焉廓心地眞常之境泥埵頭突出鼻孔髑髏中豁開眼睛觀色卽空成大智不住生死觀空卽色成大悲不住涅槃既不住涅槃又不住生死卽今清翁老人全身奉重一句作麼生道以土撒云靈棺可掩名難掩路上行人人口似碑只此告違伏惟珍重



爲樓文翁入壙生死世之常消長天之道人爲萬物  
靈一老一不老恭惟故禮越文翁提舉棲公尊靈富  
壽雙全名行兼至八十五年前未有父母所生皮袋  
子八十五年後父母所生皮袋子終歸土裏八十五  
年中有見聞知覺有喜怒哀樂別尊卑分善惡事上  
種種有條理上頭頭無錯爲井邑之老成成兒孫之  
家活聖世現長者之身人中奮大夫之作皆從皮袋  
子主人公做將出來如今主人公拋了皮袋子盛在  
棺材裏且道與父母未生前面目同耶不同耶一卽  
三三卽一千變萬化從中出金烏夜夜徹天飛朝朝  
湧起團團日世尊云身相屬四大心性歸六塵四大  
體各離誰爲和合者老檀越者箇猶是生死岸頭事  
超生脫死一句又且如何拈土云大地都盧土一撮  
一撮土中天地濶天地只是一靈棺一對眼睛活潑  
潑回頭撞著自家底明月清風安可比耀古騰今只  
者是老人年尊伏惟安置

天如則禪師爲居竹曹公掩壙脫得生死要知落處  
落處既分明從空放下放下去後如何天開地闢現

全身玉鳳夜棲無影樹某人梅渚參軍之子守齋教  
授之孫遠則武惠王以來歷代傳青史近則文恭公  
而下滿門無白丁人皆羨其盛哉公不以爲榮也小  
試教庠之任厭吳江楓冷而拂袖便歸繼承省微之  
招愛蒸溪竹居而掉頭弗起素行富貴富貴不淫無  
意功名功名自至左干戈右俎豆固未忘曹氏家聲  
朝詩酒暮琴書且願效晉人風度亦嘗刳股和羹以  
療大父之病亦嘗解衣推食以供寒士之需其待朋  
友也切切惻惻其待宗黨也磊磊落落儒學子弟仰  
之爲文章鉅公集賢縉紳號之以清逸處士平生萬  
事已足末後一機更高頂門露金剛眼睛著著見古  
人關樞筆底現法華寶藏頭頭顯自己家珍文字語  
言一無所礙涅槃生死兩不相妨從前只道出來出  
來速出來苦哉三界火宅到此方知歸去歸去好歸  
去儼然一會靈山旣曰知歸爭奈有箇將不去底旣  
將不去合與覆藏旣曰覆藏有何證據撒土云化城  
寶所無分別寸土元來是寸金

弘覺志禪師爲九鐘黃居士掩土卓拄杖云者一片

地從本已來體無向背境絕方隅開闢自生佛已前莊嚴在威音那畔非三災之可到豈四運之能遷良由田地穩密故名金剛王寶刹亦名無畏獅子幢其隱也三世諸佛侵欺不得其密也歷代宗師天下老和尚跨越無門今則山僧收將元本契書兩手付與九鍾黃居士便請四稜著地全身放倒歸涅槃之大宅統法海以爲家更無此界他方誰分客鄉流寓竹松引畔常露本地風光百草頭邊全彰脚跟大事直得如月臨秋水在處光輝似鴈過長空景沉無迹所以道處處真處處真塵塵盡是本來人真實說時聲不見正體堂堂沒却身敢問既沒却身又且如何是堂堂正體漢地不收秦不管倒騎驢子上揚州石雨方禪師爲太常葛屹瞻居士點主山高爲筆水長爲墨先生之風描寫不及其天道也天何言哉其文章也文不加點雖然湖南夫子成千古風月依稀任主張

優婆夷遷化請佛事

起棺

茶炬

點骨

無用寬禪師爲孔氏夫人起棺無用之語都無定止

觀面相逢喝聲道起

爲周安人起棺本無男女相四大假合就現身塵世中苦樂逆順受喝跳出生死關清風喧宇宙

天隱修禪師爲嚴道人起棺拈拄杖擊棺云迷從曠劫直至而今捨身受身輪迴虛幻你若裏薦得業障如山一擊分明百雜碎真性如海片時返照萬緣空其或未然再聽古佛偈云假借四大以爲身心本無生因境有前境若無心亦無罪福如幻起亦滅既然如是出門一句作麼生道以拄杖指云薰風自南來且歸林下去

元叟端禪師爲聚淨人下火不是風動不是旛動此是盧行者坐斷人舌頭底句直下如大父聚近之則燎却面門

高峰妙禪師爲志足淨人火生不足死有餘灰飛煙滅露全軀便恁麼有何拘六月炎炎火一爐

爲志明道人火只遮一著子今古無傳授惟有明道人始終能保守鐵牛火裏翻筋斗

無用寬禪師爲慈山道人火擊破死關通身暢快啼

吼一聲威音劫外擲火云山頭火發一彩兩賽

爲慈發淨人火水底火發燒虛空大地山河一夢中  
便向機先身得脫南山石虎咬清風

爲王氏慈道人火東村王大嫂和州買榜柁火急走  
家來一覺不知曉擲火云燒了

箸庵問禪師爲行珠優婆夷火摩尼久埋沒今朝光  
始燦燦破太虛空冰河發火燄薦不薦試入紅爐重  
煅煉

高峰妙禪師爲智藏淨人煅骨一大藏教全體是火  
若有嶺南靈骨便好赤身擔荷雖然更入紅爐重煅  
過

古梅友禪師爲榮道者入塔灰飛大野骨節還山爆  
地一聲始到牢關榮道者一點靈光非內外浮屠空  
鎖白雲閒

石雨方禪師爲法雷送母淨緣入塔白雲無跡綠水  
有源二俱不住誰是淨緣會得者男相女相悉歸安  
養不會者無縫塔裏暫爾偷安且道無縫塔又如何  
偷安昨夜花枝零落盡曉來依舊北風寒

無用寬禪師爲慈清道人撒骨一生一死孰能分骨  
節騰光耀頂門撒向洪波深水裏好似從前都不曾  
箸庵問禪師吳白涵居士請爲太夫人點主師拈筆  
云大衆會麼此是從上若佛若祖不斷底血脉天人  
群生類皆承此恩力今日奉爲吳母蔣太孺人當陽  
點出普令令子賢孫各知所自現前一衆共徹未見  
未聞一斷奇特大事乃點主云一葉花敷金色界萬  
山雲拱玉樓臺

建楞嚴會提綱安居前

淨因成禪師楞嚴會上堂拈拄杖曰清淨本然云何  
忽生山河大地看看富樓那穿過釋迦老子鼻孔釋  
迦老子鑽破虛空肚皮且道山河大地在甚麼處擲  
下拄杖召大衆曰虛空翻筋斗向新羅國裏去也是  
你諸人切忌認棄止啼刻舟尋劍

龍翔珪禪師建會上堂見見之時見非是見見猶離  
見見不能及落花有意隨流水流水無情戀落花諸  
可還者自然非汝不汝還者非汝而誰長恨春歸無  
覓處不知轉入此中來喝一喝曰三十年後莫道能

仁教壞人家男女

淨慈象禪師建會上堂古者道一翳在眼空花亂墜  
拈拄杖曰淨慈拈起拄杖豈不是一翳在眼百千諸  
佛總在拄杖頭現丈六紫磨金色之身乘其國土遊  
歷十方說一切法度一切衆豈不是空花亂墜卽今  
莫有向拄杖未拈已前坐斷得麼出來與淨慈相見  
如無切忌向空本無花眼本無翳處著到驚擲拄杖  
下座

列祖提綱錄卷第三十五

列祖提綱錄卷第三十六

武林十八澗理安禪寺住持婁東行悅集

結制提綱節臘

瑯琊覺禪師結夏上堂汝等諸人在者裏過夏與你  
點出五般病一不得向萬里無寸草處去二不得孤  
峰獨宿三不得張弓架箭四不得物外安身五不得  
滯於生殺何故一處有滯自救難爲五處若通方名

導師汝等諸人若到諸方遇明眼作者與我通箇消  
息貴得祖風不墜若是常徒即便寢息何故裸形國  
裏誇服飾想君太煞不知時

雲居祐禪師結夏示衆無相光中有一無位真人出  
沒三界流轉五道不捨十惡業不墮五陰身不除煩  
惱障不證涅槃不憎毀禁不敬持戒不經冬不過夏  
汝等諸人還知去處麼良久云九旬陽焰裏五分法  
身圓

白雲端禪師結夏云安居之首禁足爲名禁足之意  
意在進道而護生衲僧家有何生而可護何道而可  
進睡一睡睡破釋迦老子面門行一步踏斷釋迦老  
子脊骨猶是隨行逐隊漢未是本分衲僧如何是本  
分衲僧無限風流擔賣弄免教人指好郎君

眞淨文禪師洞山結夏上堂十方聚會三月一結息  
狂妄心除苦惱熱獲勝清涼證大寂滅到波羅岸出  
生死轍以此聖制故不虛設聲聞緣覺不見不聞三  
世諸佛祇可自知衲僧跳不出打在纏續裏動卽開  
眼尿床夢中說夢且向洞山門下九十日討箇活路

上堂玆日夏首衆僧結制之晨泐潭山北丘克文與清淨大衆踞菩薩乘修寂滅行以大圓覺爲我伽藍身心安居平等本際涅槃自性無繫屬故今我敬請不依聲聞當與十方如來及大菩薩三月安居爲修菩薩無上妙覺大因緣故離諸垢染清淨梵行若能如是所謂如蓮華不著水心清淨超於彼

五祖演禪師四面結夏上堂云結夏無可供養大衆作一家讌管顧諸人遂擡手云囉邏招囉邏搖囉邏送莫怪空疎伏惟珍重

海會結夏上堂此夏居白雲禪人偶聚會三月九旬中尊卑相倚賴粥飯與茶湯精麤隨分耐逐意習經書任運行三昧彼此出家兒放教肚皮大

結夏上堂孟夏漸熱伏惟首座大衆尊候萬福却似夾竹桃花錦上鋪花偏地花莫眼花每年事例不用張查下座人事巡察喫茶

圓悟勤禪師結夏上堂高超十地不歷僧祇物我一如身心平等不與萬法爲侶不與千聖同途歷歷常光現前處處壁立萬仞直饒透出威音已前猶是者

邊事在及乎理隨事變應物應機或現十種他受用身或現三尺一丈六有時孤峰頂上目視雲霄有時淺草平田橫三豎四亦只是者邊事只如不動步而廓周沙界不起念而周徧十虛底人且道九旬三月還結夏也無雲在嶺頭閒不徹水流澗下太忙生

結夏上堂一塵含法界無邊子細檢點猶有空缺處在百億毛頭獅子百億毛頭一時現著實論量未是極則之談若論本分事大人具大見大智得大用說使盡無邊香水海越不可說不可說世界都盧是自已安居處舉一念超越無邊刹海猶未是衲僧行履處不犯鋒鋦不拘得失不落二見不在中間正當恁麼時如何山中九十日雲外幾千年

結夏請上堂豁開戶牖當軒者誰無面目可見徧界不藏無形相可觀全機獨用以無面目而諸相歷然以無形相而十身具足解脫門廣啓選佛場宏開作不可思議功勳成無量殊勝奇特直得一爲無量無量爲一小中現大大中現小坐微塵裏轉大法輪猶未是衲僧本分事於中若得桶底子脫五色線斷目



前無法心外無機則圓融一切無有所爲成就諸法全體顯現且正當恁麼時不落功勛一句作麼生道三尺龍泉光照膽萬人叢裏奪高標

雲居結夏上堂眼聲耳色不思議百草頭受用時表裏洞然無一事端能保護蠅人兒好日多同遇緣卽宗法隨法行法幢隨處建立有世界以光明爲佛事有世界以音聲爲佛事有世界以香飯爲佛事有世界以莊嚴爲佛事有世界以寂默爲佛事且道雲居以何爲佛事不惜眉毛爲諸人拈出行住坐臥動轉施爲萬象森羅包含內外無一法不周無一事不圓到者裏著著盡是佛事則且置佛在什麼處委悉麼高高峰頂無消息深深海底沒蹤由復云九十光陰一撮子半千人在毫端中各各包含大千界全承渠力得雍容沒築礪絕行蹤萬里雖然無寸草德雲不下妙高峰

結制上堂二千年前佛制諸方遵行爲例九旬之內安閒共作鬼家活計且是如何鬼家活計獼猴入布袋復云九旬結袋口安居解脫道水乳自和同萬緣

無所撓栗棘蓬快吞金剛圈猛跳共透衲僧家頂額上一竅

龍門遠禪師結夏上堂揮戈佛日不西流照徹人間洞九幽從此安居無一事休將玄妙挂心頭

結夏上堂龍門結夏勝諸方大地山河爲舉揚若向九旬參得透更無佛法可商量

結夏上堂龍門門下無凡客不假風雷自有奇三月進修從此始經行宴坐可思議三月安居九旬禁足稟如來之教旨乃釋子之清規橋約津梁人間天上或垂手入鄮者未嘗離於此座觀心入定者亦常遊乎十方此豈可以有心想豈可以無心會苟能如是何生而不護何足而不禁覆被萬靈廣益群品或不由斯道者吾末如之何也下座

虎丘隆禪師結制朱明啓候九夏初臨四海高人罷搖金錫心猿頓歇意馬休征戒潔滄海之珠性朗碧天之月纖塵不染帝網交光離相絕名眞機獨露正當恁麼時安居一句作麼生道誰知鷲嶺當年事一念迴光尙宛然

大慧杲禪師徑山結夏上堂此日諸方叢林莫不踞菩薩乘修寂滅行以大圓覺爲我伽藍身心安居平等性智徑山又且不然從今日去九十日內與諸衲子共喫無米飯咬優曇根飲不濕水說睡夢語且道怎麼修行與諸方結制相去多少良久云將此深心奉塵刹是則名爲報佛恩下座

結夏上堂一年一度解一年一度結只是者箇事何須更多說不多說踏著秤錘硬似鐵

雲門庵結夏示衆有句無句如藤倚樹孟八郎漢便怎麼去機不到語不副眼裏著得百千萬億須彌山耳裏著得無量無邊香水海機副語語投機眼裏著沙不得耳裏著水不得有般漢問怎麼道便道見月休觀指歸家罷問程不知垂萬里鈎駐千里鳥離布漫天網打衝浪鯢鯨若是蝦蟆蚯蚓跛鼈盲龜徒勞上釣徒勞入網須是怎麼人方知怎麼事所以道殺人自有殺人刀活人自有活人劍有殺人刀無活人劍一切死人活不得有活人劍無殺人刀一切活人死不得死得活人活得死人便能刮龜毛於鐵牛背

上截兕角於石女腰邊不作奇特商量不作玄妙解會何須九旬禁足三月護生謹守蠟人無繩自縛須知盡十方徧法界無有如針鋒許不是各各當人安居之處便怎麼去更有事在敢問諸人只如不死不活底人出來且作麼生殺作麼生活若殺不得活不得佛法無靈驗直饒殺得活得也未是作家於衲僧分上了無交涉且道衲僧有什麼長處良久云雖有一雙窮相手未曾低揖等閒人喝一喝

結夏示衆今日是衆僧結制之辰雲門庵比丘宗杲與赤肉團上無位真人現前清淨大衆以法界爲伽藍同諸菩薩九十日內安居其中跳金剛圈吞栗棘蓬作夢中佛事降鏡裏魔軍三業清淨六根明潔身四威儀無諸過患懸契如來一百四十大願紹三寶種永不斷絕苟能如是修證如是安居是大丈夫漢是真出家兒不須謹守蠟人如鵝護雪其或未然趙州東壁挂葫蘆莫道不疑好拍禪床下座  
應庵華禪師結夏上堂橫按拄杖云住山僧某甲據菩薩乘修寂滅行同入清淨實相住持以大圓覺爲

我伽藍身心安居平等性智老僧二千年前與十二大士同在光明藏中親聞如來金口叮嚀付囑向二千年後爲末世衆生廣演斯要今正是時報恩不敢囊藏被蓋更爲諸人八字打開去也以拄杖卓一下云先請文殊大士向山僧拄杖頭上爲諸人說安居偈護生須是殺殺盡始安居要會箇中意鐵船水上浮次當山僧重說偈言去也文殊據虎頭山僧收虎尾中間諸菩薩隨例生歡喜復以拄杖卓一卓下座或庵體禪師結夏上堂十方聚會九夏同居柔和作衣法空爲座隨處建立觸事而眞容衆尊賢共成保社不逞摧邪顯正誰分舊住新歸麝麝松風寶蓮閣超今邁古寥寥江月朝宗亭激濁揚清明明古佛生涯一一道人活計祇如不虧實相賓主歷然一句作麼生道妙舞不須誇徧拍三臺須是大家催密庵傑禪師結夏上堂十四十五立規立矩十六十七無固無必以大圓覺爲我伽藍身心安居平等性智黃面老子二千年前留一則公案直至於今毫髮不差靈隱移向十四日施展諸人還見麼還聞麼薰

拈拄杖卓一卓云只此見聞非見聞無餘聲色可呈君箇中若了元無事體用何妨分不分喝一喝下座結夏上堂二千年前舊公案今日拈來重剖判任是鐵眼與銅睛也須更入紅爐煅衆中忽有箇不受人瞞底出來道盡大地是箇紅爐也煅某甲不破只問他道也知你向鬼窟裏作活計

元叟端禪師結夏上堂二千二百五十年前光明藏中金口親曾付囑二千二百五十年後比丘行端其當顯示護生須是殺殺盡始安居會得箇中意鐵船水上浮

結夏上堂中峰門下千歲巖前囊無繫蟻之絲厨乏聚蠅之糝茲者時當首夏憑何揭示玄徒說性說心行棒行喝是弄獃獃家具向上向下亦有亦無是諸方煎過藥滓三世諸佛與你豈殊六代祖師與你何別百千劫內謾自馳求十二時中何曾欠少變現普周法界收攝在一微塵寒暑固難變遷生死豈能拘綴但辦肯心必不相賺結夏示衆世道不占人根益微背本趨末甚多邇流

窮源極少但言卽心卽佛不知心佛旨歸惟云藉教明宗不省教中玄要爭鋒唇吻懷寶負襟拾瓦礫以當黃金指螢火而爲陽燧甘馳求而靡忘竟劬瘁以何成輪迴六道之中盤繞四生之內深所畏者良可憫焉三月安居由茲開規十方聚會從此進修若也外息諸緣自然內心無喘塵塵虛明湛寂處處廓徹靈通煩惱卽是菩提障礙皆名解脫

結夏上堂諸方禁足我者裏是事不足諸方護生我者裏逐旋營生諸方也怪中竺不得中竺也怪諸方不得

結夏上堂十五日以前水長船高十五日已後泥多佛大正當十五日狸奴白牯情與無情身心安居平等性智復說偈云臘人還只爾鐵彈復何如夜短睡不足日長饑有餘

楚石琦禪師結夏上堂今日結也憍陳如尊者領衆歸堂鉢孟口向天露柱腳踏地一要掃刮床帳防備蚊蟲二要曬眼蒲團免教搭濕三要熱時揮扇困時打眠切不得將禪道佛法貼在額尖上靈龜負圖自

取喪身之兆九十日內作麼生薰風自南來殿閣生微涼復舉雲蓋安和尚同石霜萬戶俱閉卽不問萬戶俱開時如何霜云堂中事作麼生安云無人接得渠霜云道也太煞道只道得八成安云却請和尚道霜云無人識得渠師云或有人問永祚萬戶俱開時如何向他道且喜到來你道與古人是同是別

結夏上堂汝諸人見壽山搖唇鼓舌便擬聚頭鷗啄向意根下搏量及乎放出金剛圈颺下栗棘蓬十箇五雙吞跳不得此無他從前在髑髏裏妄想慣了又闔闔暖軟物未除卒遇惡辣鉗鎚便生退屈明明向你道此事不在言語上千經萬論可是無言語還使得偷心也無端的要死偷心不用九十日內多取結夏上堂衣食養壽命一日不可無糞掃敵寒暑羶糝瘡形枯昨日三春今朝九夏何不趁色身強健時撥教生死路頭明白要去便去要住便住誰障得你誰礙得你豈不俊哉豈不快哉且道生死路頭作麼生撥空手把鉏頭步行騎水牛人從橋上過橋流水不流若不會與你下箇註脚空手把鉏頭驟馬上高

樓步行騎水牛闊處冷湫湫人從橋上過飯籬頭受  
饑橋流水不流撥火覓浮漚時不待人復舉圓覺經  
云居一切時不起妄念於諸妄心亦不息滅住妄想  
境不加了知於無了知不辨真實師云若然者道有  
也得道無也得向上也得向下也得得也得不得也  
得數片白雲籠古寺一條綠水繞青山

呆庵莊禪師結夏上堂九旬禁足今朝始特地升堂  
爲指南一念不生三際斷百千諸佛是同參同參事  
則不問且道百千諸佛只今向什麼處安身立命擊拂  
子手執夜明符幾箇知天曉

愚庵及禪師上堂舉僧問虎丘隆禪師九旬禁足意  
旨如何隆云理長則就師云九夏安居就理長徑山  
無法可論量桑疇雨過羅紈膩麥隴風來餅餌香  
無用寬禪師結夏上堂諸方結制有什巴鼻太湖梁  
山冷水冰地二百箇鐵額銅頭無用分作兩處提起  
放下吞聲飲氣擬議之間頂門著地卓拄杖一下云  
法王法制

結夏上堂以拂子召衆云不是心不是佛不是物也

不散誕也不拘束一般茆草冷滑滑又漉漉太湖西  
梁山粥足與飯足諸兄弟正好向者裏扞折拄杖傾  
心露腹免致巡門逐戶風餐水宿忽然因地一聲亦  
不必笑亦不必哭八臂那吒納命不足喝一喝下座  
天目禮禪師結夏上堂衆生諸佛大地山河往古來  
今他方此土拈拄杖云盡在拄杖頭上禁足護生獨  
有一大闍提人不入者保社何故黃河三千年一度  
清

結夏上堂七尺單前一蒲團地橫亘十方豎窮三際  
一切諸佛衆生多才少智虎膽狼心鼠肝蟲臂盡在  
裏許安居結制謂之平等性智大衆還知老僧不在  
裏許麼參

雪巖欽禪師結夏以拂子打一圓相云以大圓覺爲  
我伽藍安居有學無學萬象森羅發明所得非得平  
等性智於九十日中禁盡一切衆生之足而無住相  
斷盡一切衆生之命而無殺相乃至藏天地於一塵  
融古今於一念然後一塵塵各有一天地一念念各  
有一古今非延非促無自無他擊拂子云清茶淡飯



衲僧家復舉臨濟問洛浦從上一人行棒一人行喝  
阿那箇親浦云總不親濟云親處作麼生浦便喝濟  
便打師拈云二大老雖是啐啄同時要且未曾轉身  
句在忽有人問如何是轉身句顧侍者云牢記取  
結夏上堂護生須是殺自傷已命殺盡始安居難逃  
業鏡會得箇中意鐵船水上浮莫也是虛空釘櫟鉢  
盂安柄仰山今日不遵古規且要別行條令作麼生  
一切尋常只據現定

結夏上堂圓覺伽藍天是天地是地平等性智山是  
山水是水畢竟九十日內十二時中如何踐履青絹  
扇子足風涼

高峰妙禪師結制上堂大限九旬小限七日齋中有  
細細中有密密密無間纖塵不立正恁麼時銀山鐵  
壁進則無門退之則失如墮萬丈深坑四面懸崖荆  
棘切須猛烈英雄直要翻身跳出若還一念遲疑佛  
亦救你不得此是最上玄門普請大眾著力山僧雖  
則不管閒非越例與諸人通箇消息①②③④  
結制上堂西峰今年結夏有一奇特事不得不告報

諸人且道是什奇特事龍蛇混雜凡聖同居  
結制上堂西峰今年結夏全然不成保社一日兩頓  
薄粥大家忍饑無暇雖有真如佛性菩提涅槃和聲  
擲拄杖云權且颺在獅子巖下

結制上堂封却拄杖頭結却布袋頭大家團圓頭赤  
眼火柴頭嗔正是冤家共聚頭不妨頭上更安頭以  
拄杖打散

結制上堂今年龍象頗多權作三堂結夏雖然名字  
不同是法本無高下中間有箇肉身菩薩現與諸人  
同結同修同眠同坐若也檢點得出說甚黃面瞿曇  
西來達磨不然且待七月十五却與諸人說破  
千巖長禪師結夏上堂諸方今日結夏千巖今日結  
舌良久云是同是別以手擲口云又成多說下座  
天如則禪師結夏示衆今晨四月十五諸方浩浩譚  
禪不是結却布袋便是同泛鐵船者裏隨緣度日誰  
能掘地覓天饑來喫飯困來打眠只有一事不得向  
諸人道閻羅老子要算飯錢

結夏示衆護生須是殺罪犯彌天殺盡始安居狼藉

不少惟有生苕帚功不浪施掃斷葛藤露布任諸人  
坐臥縱橫十二箇時辰使教顛倒走與麼則尅期取  
證有何消息薰風自南來殿閣生微涼

唯庵然禪師結夏上堂九十日包三大劫諸人直要  
徹根源會須撥轉當頭柁覺海乘風駕鐵船薦拈拄  
杖云柁根在者裏船在什麼處喝一喝

結制上堂一二三四五六七金剛捏出秤錘汁七六  
五四三二一扶桑枝上懸紅日鷺鷥牽動鐵崑崙挨  
得虛空半邊側碧眼黃頭膽喪魂驚走入大圓覺海  
藏蹤遁跡浸爛鼻孔要且葑氣不得箇事且止只如  
諸人日用二六時中畢竟作麼生履踐良久云不因  
憐子逕爭到葛洪家

結制上堂蠟人爲驗始於今日九十日終推功辨的  
黃面瞿曇結住布袋頭百萬人天咸皆受屈松隱結  
制總不恁麼以手作搖櫓勢云山僧卽今駕無底鐵  
船普請大眾同入大圓覺海遊戲去也喝一喝云看  
取定南針

無文璨禪師結夏上堂百不知百不會飽喫飯熟打

睡要得尅期取證須證如是三昧

北磬簡禪師結夏上堂以大圓覺爲我伽藍身心安  
居平等性智契官酒臥官街當處死當處埋本來無  
位又何用强安排

虛舟度禪師結夏上堂舉雲門和尚示衆云汝等諸  
人在此過夏山僧深不欲向你道惜取眉毛好師云  
雲門靈龜曳尾拂跡跡生靈隱卽不然汝等諸人在  
此過夏山僧直截向你說口是禪門

月江印禪師結制上堂雪峰領衆到浮江自失一隻  
眼西院留天平商量兩錯不惜幾莖眉雲峰有年無  
德也不留人過夏商量兩錯生風起草也不領徒諸  
方寄夏帶水拖泥也不探龍宮踏翻巨海也不入虎  
穴踢倒須彌只是飲水定渴喫飯療饑禪客相逢只  
彈指此心能有幾人知

結制上堂麻三斤乾屎橛蠟人冰鷄護雪猫有歆血  
之功虎有起屍之德趙州親見老南泉臨濟未是白  
拈賊

結夏瑯琊點出五病西院商量兩錯井蛙不足以語

東海夏蟲不可以語冰霜若是揜空俊鶻便合乘時止  
深困魚徒勞激浪是故從上若佛若祖天下老和尚莫不向刀山劍樹上鑊湯爐炭中成等正覺拔濟有情若約山僧看來也是秤鎚蘸醋喝一喝

劍門分禪師懶庵和尚出隊領衆至結夏師陞座壺山劍門今夏有煩釋迦彌勒爲侍者文殊普賢爲監廚觀音勢至作勸首衆阿羅漢爲審夫分司列局有規矩發機須是千鈞弩一要須親透過斯晨結夏仲冬嚴寒胡言漢語若透不過舉足下步步生死死枉受輪迴有不可說不可說之苦是則是也山僧有救苦安樂法門接待汝妙用縱橫絕無纖慮要知麼今朝四月十五日陞座罷侍者請勸首引諸施主就西禪老師座前燒香大家喫茶去

晦機熙禪師結制上堂以手作結布袋勢云南山今日結布袋口了也汝等諸人各各於中身心安居平等性智忽有箇衝開碧落撞倒須彌底莫道結子不堅密良久云漫天網子百千重

癡絕冲禪師結夏上堂圓覺伽藍塵塵有路坐斷去

來頓空今古那裏十三者邊十五後先不差毫髮許可笑黃面瞿曇至今不知落處

虛堂愚禪師結夏上堂有一人日銷萬兩黃金同此聖制只是無人認得若有人認得許伊日銷萬兩黃金

伊庵權禪師上堂今朝結却布袋口明眼衲僧莫亂走心行滅處解翻身噴嚏也成獅子吼旃檀林任馳驟別起眉毛頂上生剜肉成瘡露家醜

默堂悟禪師結夏上堂最初一步十方世界現全身末後一言一微塵中深鎖斷有時提起如倚天長劍光耀乾坤有時放下似紅爐點雪虛含萬象得到恁麼田地天魔外道拱手歸降三世諸佛一時稽首便可以大圓覺爲我伽藍於一毛端現寶王刹如是則朝往西天暮歸東土亦是禁足百花叢裏坐淫坊酒肆行亦是禁足雖然如是不曾動著者裏一步恁麼則九旬無虛棄之功百劫有今時之用堪報不報之恩以助無爲之化此卽是涅槃妙心金剛王寶劍敢問大衆作麼生得到者田地去如人上山各自努力

石屋瑠禪師結制上堂今朝四月十五日行脚師僧  
念頭息草鞋乾曬待秋風金錫罷遊留靠壁鷓鴣偏  
愛守空池鳳凰豈肯棲荆棘平生肝膽向人傾相識  
猶如不相識

結制上堂福源今日結制不得不爲諸人議定第一  
從朝至暮舉足下足不得踏著常住地若踏著常住  
地定犯著波羅夷罪第二十二時中不得向鼻孔裏  
出氣若向鼻孔裏出氣定犯著波羅夷罪第三件事  
且莫說且莫說留在七月十五也未遲甕裏何曾走  
却籠

結制上堂四月十五日已前夜短睡不足四月十五  
日已後日長饑有餘正當四月十五日福源寺裏禪  
和子粥亦足飯亦足睡亦足遊戲圓覺伽藍安居平  
等性智敢問諸人因甚得到者般田地薰風入戶自  
生涼湖水到門非有意

恕中愠禪師結夏上堂雲門云今月十五入夏也寒  
山子作麼生靈巖道今月十五入夏也黑漆桶作麼  
生旃檀叢林旃檀圍繞獅子叢林獅子圍繞衲僧鼻

孔大頭垂金剛腦後三斤鐵

了庵欲禪師結夏上堂本覺今朝結夏爲汝約法三  
章一者日裏一餐二者夜間一寢三者山門頭佛殿  
裏東行西行不得踏破常住磚卓拄杖下座

結制上堂一大藏教束之高閣長期短期無繩自縛  
莫更紛紛紜紜直須灑灑落落楊岐一頭驢只有三  
隻脚潘圓倒騎歸跌殺黃番緯五味拈來鑽秤錘別  
有香風滿寥廓喝復舉道吾和尚云高不在絕頂富  
不在福嚴樂不在天堂苦不在地獄相識滿天下知  
心能幾人大慧和尚云高在絕頂富在福嚴樂在天  
堂苦在地獄誰知席帽下元是昔愁人師云二大老  
一人高高處處觀之不足一人低低處處平之有餘唱教  
門中足可觀光若約衲僧門下猶欠悟在本覺又作  
麼生但將飯向無心盪自有人提折脚鎚  
結夏上堂今朝四月十五隨分椎鐘擊鼓燈籠動地  
放光露柱掀天起舞揭開臨濟三玄抽却雲門一顧  
擊拂子發機須是千鈞弩  
傑峰愚禪師結制示衆六根不動千眼頓開一念纔

生萬機寢削擊碎祖師關捩掀翻大藏靈文不墮聲  
色二途不立有無知見當頭俱坐斷一性自閒閒何  
須更用三月安居九旬禁足晝參夜參茶裏飯裏使  
盡平生氣力用盡平生伎倆撐眉努目咬齒捏拳討  
得許多生受喫做甚麼其或未然太平元是將軍定  
不許將軍見太平

結制示衆黃面老子二千年前立箇限局三月安居  
九旬禁足尅期取證戒殺護生致使諸方叢林於四  
月十五日結制謂之結却袋頭外不放入內不放出  
與麼修行驢年也未有箇出日石溪則不然四月十  
五結却布袋頭略通一線路從他入底自入出底自  
出去底自去來底自來何故畢竟水須朝海去到頭  
雲定覓山歸

南石琇禪師結制上堂世尊掩室因沙竊則計拙東  
山設一家譙義出豐年北山者裏室不掩譙不設行  
則與諸人同行坐則與諸人同坐饑則飯困則寢自  
然踏著向上玄關顯示衲僧巴鼻洞山五位不用分  
張臨濟三玄何勞花擘正恁麼時如何是衲僧行履

處拄杖且將閒靠壁草鞋乾曬待秋風

結制上堂以大圓覺爲我伽藍身心安居平等性智  
開眼寐語護生須是殺殺盡始安居會得箇中意鐵  
船水上浮誑謔閭閻直饒總不與麼亦未是衲僧行  
履處且作麼生是衲僧行履處長短三期俱莫立饑  
來喫飯困來眠雖然切忌隨徑山舌頭轉

笑隱訢禪師結夏上堂據菩薩乘修寂滅行同入清  
淨實相住持釋迦老子於明鏡中更加繪畫報國則  
不然有時三頭六臂變現大力魔王有時日月面  
示應大悲千手眼三條椽下倒臥橫眠十字街頭縱  
橫遊戲卓拄杖云若無舉鼎拔山力千里鳥難不易  
騎

結夏上堂舉天平依和尚行脚時參西院常云莫道  
會佛法覓箇舉話人也無一日西院遙見召云從依  
平舉頭西院云錯平行三兩步西院又云錯平行前  
西院云適來者兩錯是西院錯上座錯平云從依錯  
西院云錯平行去西院云且在者裏過夏待共上座  
商量者兩錯平當時便行住後謂衆云我當初行脚



時被風吹到思明長老處連下兩錯更留我過夏待  
共我商量我不道恁麼時錯發足南方去時早知道  
錯了也雪竇頌云禪家流愛輕薄滿肚參來用不著  
堪悲堪笑天平老却謂當初悔行脚錯錯西院清風  
頓銷鑠復云忽有箇衲僧出云錯雪竇錯何似天平  
錯師云者一則公案叢林中商量者多決斷者少中  
峰今日爲諸人斷看一人監主自盜一人賣賊放賊  
一人知而不肯各與三十拄杖何也速則易改久則  
難追

雪嶠信禪師結制上堂四十年來恁麼行斬開碧落  
血腥腥其中果有希奇事獅子遊行不同程稽首燈  
王如來普願微塵國土衆生同入般若波羅密門且  
道般若波羅密門作麼生入舉拂子云鑑

筈庵問禪師結夏示衆人皆苦炎熱我愛夏日長薰  
風自南來殿閣生微涼良久云大家在者裏驚拍禪  
床須信茫茫煙浪裏自然別有好商量

結夏陞座現成公案迥絕諸訛掉下腰包大事已辦  
佛祖說不到今日說到佛祖行不到今日行到直得

德山臨濟喝似雷轟棒如雨點到者裏也只得退身  
三步十聖三賢罔措野狐潛戲無門你若錯腳踏著  
常住一片磚便見分身兩段何況較古較今說長道  
短鼓是爛非惑亂人家男女長期短限者邊那邊虛  
費草鞋消磨歲月閻老子面前他時打鬼骨臂且道  
是甚麼人承受山僧二十年前向水邊林下撞著箇  
無面目老漢水也不曾沾他一滴今日敢向人天衆  
前爲者老漢出氣冤家路狹被諸上座逼定要山僧  
爲衆結夏結夏且置你將山僧拄杖安置在什麼處  
莫動著動著則頭破腦裂卓拄杖云謹白

結制上堂師云逼胡孫上樹畫虎成狸剝名品荔枝  
弄巧成拙今日三胡日四枝上生枝較破話頭裂碎  
鼻孔平地上坑陷人家男女直饒向未舉以前薦得  
猶爲立地死漢諸兄弟幸不作者般蟲豸當陽直截  
一句作麼生道秋風秋雨寒侵骨爛葉堆雲且閉門  
結制上堂曲說直說塵說剎說三世一時說舌頭不  
出口明眼衲僧向者裏共出隻手貴圖宗風不墜師  
法有據若只循途守轍何祇埋沒生平九旬伊始聖

制初成打頭不遇作家到底翻成骨董要不入者圈  
續麼一句迥超千百億六月黃河徹底水

結制上堂一法不是有萬法不是無不說如來禪不  
明祖師意賓是賓主是主禮是禮樂是樂滿面春風  
潑畫欄梵王宮殿開深鑰坐享太平底也少伊不得  
提上挈下底也少伊不得其間設或半肯半不肯山  
僧只恁麼放過雲無心而出岫水盈科而或流遇高  
山而必止到大海而方休驀卓拄杖云長期短限渾  
閒事要使人人盡徹頭

結制上堂靈雲見桃花墮坑落塹香嚴聞擊竹接響  
乘虛現成田地一任縱橫十字荒田不揀草信手拈  
來是且道是箇甚麼天晴日出雨落地濕春山疊亂  
青春水翻空碧自是不歸歸便得見不成聞不及擬  
議不來還劈脊此時不直究根源更待當來問彌勒  
林臯豫禪師結制上堂今年結夏不尋常柴滿堆兮  
麥滿倉珍重五湖雲水客輕搖蒲扇足風涼喝一喝  
牧雲門禪師結夏上堂天童結夏草鞋高挂無內無  
外無高無下以大圓覺爲我伽藍身心安居平等性

智大衆以大圓覺爲我伽藍則百億須彌百億日月  
百億四天下乃至華藏世界盡無邊香水海總出不  
得天童門限身心安居平等性智但只饑來喫飯困  
來打眠行但行坐但坐菩提煩惱生死涅槃智慧愚  
癡真如佛性當人脚跟下總不必動著正恁麼時如  
何黃鶯啼綠樹好聽箇中玄下座

弘覺恣禪師結制上堂乃舉起拄杖云看看山僧拄  
杖頭上橫開寶刹畢集群宗就中請得毗盧遮那如  
來爲堂頭和尚盧舍那如來爲都監寺釋迦如來爲  
化主文殊師利菩薩爲首座彌勒菩薩爲維那觀音  
菩薩爲書記得大勢菩薩爲副寺普賢菩薩爲典座  
藥王菩薩爲知藏藥上菩薩爲典客無邊身菩薩爲  
直歲寂根菩薩爲知殿勇施菩薩爲知浴慧上菩薩  
爲侍者薩陀波崙菩薩爲寮元地藏菩薩爲堂主善  
財菩薩爲參頭總十方三世盡空法界若凡若聖咸  
皆普入圓覺伽藍之內各各安居平等性智之中於  
是毗盧遮那如來爲衆演法曰護生須是殺殺盡始  
安居會得箇中意鐵船水上浮文殊師利菩薩爲秉

拂小參曰十方同聚會箇箇學無爲此是選佛場心  
空及第歸乃召云大衆如斯諦信得及去卽今便與  
諸聖同參將來次補毗盧遮那如來爲大和尚其或  
尙留觀聽稍涉遲疑則諸人自諸人拄杖子自拄杖  
子依舊去聖時遙正法將滅九十日內切須自著精  
彩好久立珍重

天童奇禪師結夏上堂山僧二十年前偶一日冷地  
裏將三千大千世界所有衆生性命鏤在一微塵裏  
竝無一人得知所謂藏山於海藏舟於壑夜半有力  
者負去寐者不覺耳今日山僧普告大衆還信得及  
麼如信得及見得徹便好休去歇去如信不及見不  
徹不妨朝參暮參一朝參到無參處遂顧視左右云  
始知無處不家山

列祖提綱錄卷第三十六

列祖提綱錄卷第三十七

武林十八澗理安禪寺住持婁東行悅集

中夏提綱

或菴體禪師中夏上堂赫曰炎炎六月天虛空孟浪  
說新禪臨風有耳應難聽不落諸緣取次傳莫問東  
西坐斷妙高峰頂休分彼此平吞報化佛頭寒不愁  
寒色空無二熱不愁熱心境一如大禪佛旁若無人  
野盤僧身爲逆旅灰心老衲未免攢眉杜口維摩也  
應冷笑且道笑箇甚麼有心用處皆爲錯無意看時  
却宛然

雪巖欽禪師中夏上堂前四十五日過去已過去後  
四十五日未來猶未來卓拄杖云正當今日且道還  
有過去未來之相也無更有一絲毫不去不來之相  
也無若向著裏定當得下五更洗面黃昏打睡齋時  
有報晨朝有粥朝朝相似暮暮一般其或未然報恩  
昨日預做中夏今朝擊鼓陞堂使府迎奉觀音菩薩  
在設廳供養啓建祈晴道場

中夏上堂前四十五日知進不知退後四十五日知

退不知進正當今日進退兩忘季夏極熱薰風自涼  
卓拄杖云時間一陣藕花香

高峰妙禪師中夏上堂前四十五日何處去焦尾大  
蟲入鬧市後四十五日何處來三脚驢子上高臺俊  
鷹快鷄便合乘時跋鼈眉龜徒勞踴跳

中夏上堂豎拂子召大眾云到者裏進前一步也不  
得退後一步也不得總不恁麼也不得畢竟如何不  
得不得

中峰本禪師中夏示衆大眾四十五日前朝昏沉暮  
散亂四十五日後朝散亂暮昏沉正當今日在四十  
五日之中試把昏沉散亂來與老僧看既無你拈出  
處則真如菩提涅槃解脫亦無你拈出處莫說你拈  
不出便是於大寂定中喚起二千年外釋迦老漢來  
敢保其亦無拈出之理既拈不出你喚甚麼作昏散  
又喚甚麼作寂照直下聖凡情盡能所障空觀體無  
依當機絕待不見四十五日在前不見四十五日在  
後三際平等一道虛閒即今覓箇中夏亦不可得雖  
然此猶是途中事若曰到家消息猶較西天十萬

程諸禪德你最初立志要爲生死大事不是說了便  
休須發起一片不顧生不顧死底決定志氣也不管  
你前四十五後四十五正當四十五不四十五爆炸  
地提箇所參話任你說是說非論長論短拍盲舉起  
拍盲打捱誰管今生打得徹打不徹直饒以熱鐵輪  
驅入刀山劍樹上一日走百千萬億而要教把所參  
話須臾放下終不可得有此等志氣欲超過佛祖爲  
不難矣從前做不到古人地位只是志願不真切立  
脚不穩當所以古人道過河須用筏學道須用志釋  
迦彌勒初無所長只是箇能立志願底凡夫耳昔僧  
問古德一念不起還有過也無德云須彌山且道與  
趙州青州布衫袂去幾何如其未委此去四十五日  
後却來露箇消息

萬峰蔚禪師中夏示衆達磨的的西來直指人心見  
性成佛且道性作麼生一喝於此直下疑團百雜碎  
便見青青翠竹顯真如柳綠花紅明皎潔風生虎嘯  
石龍吟燕語鶯啼爲汝決禪僧家活潑潑滿懷撒出  
夜明珠獻寶波斯難辨別放倒和衣打覺眠一任天

崩與地裂其或未然參

楚石琦禪師中夏上堂前四十五日已過去後四十五日尙未來正當四十五日之中覓現在相不可得所以道過去心不可得現在心不可得未來心不可得此不可得亦不可得平生肝膽向人傾相識猶如不相識

古梅友禪師中夏上堂九旬禁足又過一半心地未明如牽火鑽光陰莫虛度了却閒公案平地無端捉得賊老僧出來爲汝斷

用彰俊禪師中夏上堂舉黃檗因臨濟半夏上山問訊見黃檗看經濟云我將謂是箇人元來是箇庵黑豆老和尚住數日乃辭去檗云汝破夏來何不終夏去濟去暫來禮拜檗便打令其去濟行數里疑其事再回終夏拈云招之不來揮之不去是什麼人瑞巖若做黃檗待他再回棒折也未放在何故棒上不成龍

無文璨禪師中夏上堂前半夏所作法門所修行願山僧已在西山爲諸人演說後半夏所作法門所修

行願山僧今在東湖爲諸人演說東湖所作與西山不同西山所說與東湖不別指槐罵柳證龜成鼈驚梵鉢提側耳聽舜若多神驚吐舌

了庵欲禪師中夏上堂前半夏已去後半夏未來正當今日謂之中夏大衆過去已往未來未至卽今事作麼生莫是二邊俱莫立中道不須安麼者般說話是你諸人嚼過底殘羹剩飯因甚麼拶著十箇五雙鼻孔索頭在別人手裏且道利害在什麼處一翳在眼空花亂墜

### 建孟蘭盆會提綱

石雨方禪師孟蘭盆會上堂今日是目連救母地官赦罪之辰雲集懺悔亡者可以超生存者可以獲福此是世間父母也然出世間亦各有各有箇父母他能長你法身養你慧命大衆還知麼者箇父母非形像可求非遠近可見非呼喚可應然衆中亦有父母俱喪者亦有父母俱存者且道又如何懺悔使他超生又如何保佑使他獲福還有定當得者麼拍禪床一下下座



解制提綱

洞山价禪師示衆兄弟初秋夏末東去西去直須向萬里無寸草處去始得又云只如萬里無寸草處作麼生去

石霜圓禪師解夏上堂昨日作嬰孩今朝年已老未明三八九難蹈古皇道手鐮黃河乾脚踢須彌倒浮生夢幻身人命夕難保天堂并地獄皆由心所造南山北嶺松北嶺南山草一雨潤無邊根苗壯枯槁五湖參學人但問虛空討死脫夏天衫生披多月襖分明無事人特地生煩惱喝一喝下座

雲峰悅禪師解夏上堂日月易流光陰候忽始見安居又當自恣此夏喜得大衆各各道體康安然出家之流曠達無礙初秋夏末或東去或西去出一叢林入一叢林忽有人問上座翠巖和尚今夏如何爲人被他一問如何祇對莫道九九八十一莫道但得雪消去自然春到來莫道日出東方夜落西莫道合取狗口莫道下一喝撫一掌坐具熏口撼拂袖便行諸禪德如斯布露深屈翠巖旣不然者別作麼生披露

試對衆道看還有道得底麼衆無語師云若到諸方莫道我從翠巖來便下座

大覺璉禪師解夏上堂秋風起庭梧墜梧子紆紆看祥瑞張三李四賣囂塵拾得寒山爭賤貴覲面相逢更無難易四衢道中棚欄瓦市逼塞虛空普天匝地是臨濟赤肉團上雪峰南山鼉鼻立沙見虎俱胝豎指一時拈來當面布施更若擬議千山萬水復曰過白雲端禪師解夏舉洞山悟本禪師云初秋夏末直須向萬里無寸草處去有僧舉似瀏陽庵主主云出門便是草師云若見得庵主便見得洞山若見得洞山便見得庵主見洞山却易見庵主却難見爲他不爲住持之絆不見道雲在嶺頭閒不徹水流澗下太忙生

保寧勇禪師解夏上堂秋風纔動布袋頭開來者自來去者自去江淮兩浙是有冢風衡嶽廬峰更多幽致驅驅轆轤劫劫波波須知道不動如來未嘗舉步且道不動步一句作麼生道良久云適來堂裏來却歸堂裏去

長慶安禪師解夏上堂汝諸人總來就安求覓甚麼  
若欲作佛汝自是佛擔佛傍家走如渴鹿趁陽燄相  
似何時得相應去汝欲作佛但無許多顛倒攀緣妄  
想惡覺垢淨衆生之心便是初心正覺佛更向何處  
別討所以安在瀉山三十年來喫瀉山飯屙瀉山屎  
不學瀉山禪祇看一頭水牯牛若落落入草便把鼻  
孔拽轉來纔犯人苗稼卽鞭撻調伏既久可憐生受  
人言語如今變作箇露地白牛常在面前終日露迤  
迤地越亦不去汝諸人各自有無價大寶從眼門放  
光照見山河大地耳門放光領采一切善惡音響如  
是六門晝夜常放光明亦名放光三昧汝自不識取  
影在四大身中內外扶持不教傾側如人負重擔從  
獨木橋上過亦不教失脚且道是甚麼物任持使得  
如是且無絲髮可見豈不見誌公和尚云內外追尋  
覓總無境上施爲渾大有珍重

眞淨文禪師解夏上堂此箇事學不得教不得傳不  
得須是當人悟始得悟得也可可地閒閒地了了明  
明地歷歷落落地一切神通變化悉自具足不用外

求乃拈拄杖橫按云橫按鎖鑰全正令太平寰宇斬  
癡頭遂擲下良久喝一喝下座

大瀉詰禪師解夏上堂十方同聚會箇箇學無爲此  
是選佛場心空及第歸慧先門下直拔超升不歷科  
目諸人既到者裏風雲布地牙爪已成但欠雷聲燒  
尾如今爲你諸人震忽雷去也以拄杖擊禪床下座  
五祖演禪師解夏上堂一塵起大地收一葉落天下  
秋金風動處警砌畔之蛩吟玉露零時引林間之蟬  
噪遠煙別浦行行之鷗鷺爭飛絕壁危巒處處之猿  
猿競嘯又見漁人舉櫂樵子謳歌數聲羌笛牧童戲  
一片征帆孤客夢可以發揮祖道建立宗風九旬無  
虛棄之功百劫在今時之用如斯話會衲子攢眉不  
見道一塵不立始歸家若有纖毫非眷屬  
解夏上堂九旬三箇月彈指瞥然間忙者直然忙閒  
者直然閒事事無窮盡千古白雲山  
上堂三月安居今已滿九旬禁足事如何西天蠟驗  
聞聲久此土鷄珠說者多季運二千年遠意混流水  
乳積成河林泉開土齊弘護莫使墮頽著衆魔

圓悟勤禪師解夏上堂秋光清淺秋露虛凝秋風颼  
颼秋色澄淨乃釋迦護生之功已畢實衲僧結制之  
法周圓若能內忘已見外了法空內外一如虛凝澄  
寂則全心卽佛全佛卽心與諸佛把手共行與祖師  
同得同用到箇裏更說什麼結更說什麼解二六時  
中淨裸裸赤灑灑終日著衣不曾挂一縷絲終日喫  
飯不曾咬一粒米所謂動若行雲止猶谷神豈有心  
於彼此那有像於去來觸處逢渠全機獨脫正恁麼  
時如何白雲本是無心物等閒出沒大虛空復云九  
十日功圓此日不須更驗蠟人來雖然萬里無寸草  
袋口今朝已解開

解夏上堂圓覺伽藍豁開戶牖華嚴剎海大座當軒  
促百千億劫爲一念豈止百二十日長期延一念作  
百千億劫寧論此世來生始見流金燦石俄然玉露  
垂珠時節不相饒物理有變復當時結夏普天匝地  
一時結此時解制普天匝地一時解結時初不相著  
解時初不相離到者裏通一線曉一機去你爲你我  
爲我長底長短底短清者自清濁者自濁於中也無

去來亦無動轉浩然太均同歸一致然後放收擒縱  
得大解脫更喚什麼作你作我作長作短一時截斷  
且自恣一句作麼生道雲在嶺頭閒不徹水流澗下  
太忙生

解制上堂尋常一味無過樸實頭坐斷千差更須高  
著眼壁立萬仞處淨裸裸平田淺草裏峭危危當處  
平和拖泥帶水深挑痛割犯手傷鋒欲得兩不相妨  
各請休撥罷釣且九夏賞勞一句作麼生道險處豈  
肯忘顧鑑縱行平地索隄防

解夏上堂毫端寶剎寬濶優游十世隣虛古今渺邈  
洞視不見微聽不聞到者裏非止善財七日歛念設  
使文殊百劫運大智力起無邊神用亦不能覩見只  
汝諸人九十日間各各於中全體遊歷出沒卷舒縱  
橫收放八穴七穿東涌西沒儻忽於此知得諦當去  
不妨步步踏著實地心心契證平常苟或未然今日  
布袋口開還委悉麼良久云無謂清秋多勝致低回  
且復按雲頭

龍門遠禪師解夏上堂以一粒芥子擊修羅窟於中

晏坐九旬振六鑲錫杖登須彌盧直上安居三月倚  
長松而自誓臨綠水以經行周遊井邑則動止蕭肅  
依處叢林則威儀濟濟豈論城隍聚落不分勝地寶  
坊心月孤圓神珠炳煥六門虛靜萬法咸如如此護  
生豈有生之可護如此持律豈有律而可持囊內蠟  
人通身雪冷誠堪慶賀喜何如哉

解夏上堂毗目仙人執善財手頓見過去微塵諸佛  
及其放手宛然依舊龍門長老領諸大眾爰於此地  
結足安居及其解夏宛然依舊善財依舊處微塵諸  
佛含攝有歸大眾依舊處三月九旬歛收無迹還會  
麼毛端藏利海芥子納須彌不離見聞緣超然登十  
地四生六道卽心自性三途八難普現色身居華藏  
海之中住不思議之內如斯之旨乃吾輩之常分耳  
還信得及麼

解夏上堂拈起拄杖卓一下云圓明了知不由心念  
抵死要道墮坑落塹畢竟如何乃靠拄杖下座  
嶽林眞禪師解夏上堂古人道秋初夏末合有責情  
三十棒嶽林則不然靈山會上世尊拈花迦葉微笑

正當恁麼時好與三十棒何故如此太平時節強起  
干戈教人吹大法螺擊大法鼓舉步則金蓮蹤蹠端  
居則寶步巍峩梵王引道於前香華繚繞帝釋隨之  
於後龍象駢羅至今後代兒孫遞相放教三三兩兩  
皆言出格風標劫劫波波未肯歸家穩坐鼓唇搖舌  
宛如鐘磬笙竽奮臂點胸何啻稻麻竹葦更逞遊山  
翫水撥草瞻風人前說得石點頭天上飛來花撲地  
也好與三十棒且道坐夏賞勞如何酬獎良久曰萬  
寶功成何厚薄千鈞價重自低昂

虎丘隆禪師解夏上堂有佛處不得住上無攀仰無  
佛處急走過下絕已躬從來無向背本自絕羅籠出  
門撞著須菩提寸草不生千萬里自是長嘴鳥休言  
芳樹不棲謾自說禪說道摩斯吒直饒心掛樹頭未  
免身沉海底莫動著三十棒且置休夏自恣一  
句作麼生道青山綠水元依舊明月清風共一家  
大慧杲禪師解夏上堂四月十五者公案七月十五  
方結絕卽今者裏許多人人人有理難分雪案中莫  
有辨口利詞底麼試出來分雪看直饒分雪得去也

須腦門著地始得

解夏上堂拈拄杖云百二十日夏日日無空缺露柱逞神通燈籠呈醜拙徹不徹却來棒頭爲汝決卓一下

解夏上堂一百二十日禁足三十五日在外走鬻斗煎茶餽不同泥牛解作獅子吼今朝法歲已周圓拈得鼻孔失却口以大圓覺爲伽藍七七依前四十九解夏示衆洞山萬里一條鐵瀏陽一擊百雜碎雲門關字常現前翠巖眉毛在不在乃舉拂子云雲門大師來也還見麼擊拂子云一彩兩賽

解夏示衆衲僧相見莫疑猜布袋結頭今日開露柱著衫南嶽去燈籠脫帽上天台驀拈拄杖云只有雲門木上座終年無去亦無來有時獨靠古屏畔覷破門前下馬臺擲拄杖下座

應庵華禪師解夏上堂舉僧問雲門秋初夏末前程或有人問未審對他道什麼門云大衆退後僧云過在什麼處門云還我九十日飯錢來師云者僧有迎刃底謀略雲門具殺活手段雖然若在報恩門下更

須勘過始得下座

或菴禪師解制上堂虎穴魔宮潤步挨毀僧謗佛不安排無明三毒令人怕是我冤家一樣乖會麼正令提綱法堂前草深一丈邪師過謬蓋裏淹殺幾人出處不凡到頭得地氣吞雲夢光射斗牛以法界作伽藍龍蛇易辨以恒沙爲廣衆衲子難瞞虎口爭餐非爲性燥馬前相撲豈是英靈九夏三秋全提大用諸方未嘗到底境界盡底掀翻佛祖不出口底舌頭一齊坐斷誰跨自恣道甚護生鼻直眼橫風高韻遠入得南禪室出得南禪門行人不似路爲仇拈得死蛇解弄活祇如來早布袋頭開日見日親復有何說良久云端的克家真種草不同短販野盤僧復舉僧問古德九旬禁足今當滿自恣之機又若何德云湖鰥趁蛺蝶九步作一歇復問會麼僧云不會德云兩箇兒童攜木鼓者邊拍了那邊舞須臾變現百千般一一示君君看取師云者僧探頭太過古德拔貧鬬富未見老成忽有人問南禪九旬禁足今當滿自恣之機又若何但向道要行便行得住且住也不問會



與不會他或云必竟如何却向道生鐵面皮刀砍不入拍盲氣性已徧諸方是則是切忌錯舉

密庵傑禪師解夏上堂烏巨今日解夏乃遵黃面老子二千年前話欄驗蠟人徹底冰清護戒珠了無縫罅惟有露柱燈籠不肯入者保社何故從來心似鐵端不受差排

解夏上堂十五日已前無繩自縛十五日已後脚瘦草鞋寬正當十五日天無私蓋地無私載風不鳴條雨不破塊大家撫掌樂昇平一任東倒及西搥喝一喝下座

解夏上堂四月十五日結七月十五日解六隻骰子滿盆紅大都只是看頭采喝一喝

解夏上堂一箇葫蘆纔倒地滿地葫蘆盡傾倒欲識單傳直指禪今日鬪湊得恰好

無準範禪師解夏上堂一夏已滿無事不辨遂府鉢孟卽州磁碗

高峰妙禪師解制示衆九旬把定繩頭不容絲毫走作直得箇箇皮穿骨露七零八落冷眼看來正謂掘

地討天千錯萬錯今日到者裏不免放開一線彼此無拘無束東西南北任運騰騰天上人間逍遙快樂然雖如是且道忽遇鑊湯爐炭劍樹刀山未審如何棲泊良久云惡

解制上堂布袋頭開餒驢餒馬要騎便騎要下便下若到江西湖南撞著焦尾大蟲切莫道在西峰度夏解制上堂一夏以來諸人懣懣山僧亦懣懣懣懣逢懣懣彼此無空過今朝聖制告圓不免更說些懣懣禪贏得大家俱懣懣如何是懣懣禪咄猛火著油煎解制上堂拈拄杖卓一下云打開布袋頭放出百千牛縱隨芳草去終不被人收一日歸來重會面半含容笑半含羞大衆羞且止畢竟笑箇什麼又卓一下云休

萬峰蔚禪師上堂一葉落天下秋一塵起大地收解開布袋口衲僧得自由脚頭脚底風雲起撒土揚沙輾入流逼塞虛空無影象啼鶯元在柳梢頭畢竟作麼生取用喝

天如則禪師解夏示衆以拄杖擊禪床云圖覺伽藍

一擊百雜碎也四月十五結本無結七月十五解亦非解西天人驗蠟人冰自成多事東土人驗鐵彈子慣弄虛頭我者裏一味樸實你有拄杖子與你拄杖子你無拄杖子奪却你拄杖子

唯庵然禪師解制上堂舉翠巖夏末示衆云一夏已來與兄弟說話看翠巖眉毛在麼保福云作賊人心虛師云好事不出門長慶云生也師云惡事傳千里雲門云關師云錯者一隊漢只解護惜眉毛不知打失鼻孔龍峰今日直要與伊據款結案大衆還委悉麼暑氣盡隨雲雨去清風透入戶庭來喝一喝

永泰仁禪師解夏上堂松風凜凜敗葉紛紛岸柳衰殘猿啼遠岫若也善觀時節方與諸聖相隣未出得衲僧活計諸仁者當此之際正好橫擔拄杖高挂鉢囊到處撞開方丈門且與老胡相見若也一言不契坐具拂開便行豈不快哉山僧自行脚已來未嘗逢著一箇半箇何故如此良久云土曠人稀相逢者少率庵宗禪師上堂舉嶽林振禪師示衆云布袋口開還有買的麼僧云有林云不作賤不作貴作麼生買

僧無語林曰老僧失利師云嶽林設箇問端也甚奇特及至被人道箇有字直得東遮西掩囊藏不迭護國云今日布袋口開還有買底麼良久云欄杆雖共倚山色不同觀

雪庭淨禪師解夏上堂知有底人過萬年如同一日不知有者過一日如同萬年不見死心和尙道山僧行脚三十餘年以九十日爲一夏增一日也不得減一日也不得取不得捨不得不可得中祇麼得翠雲見處又且不然山僧行脚三十年來誰管他一日九十日也無得也無不得處處當來見彌勒且道彌勒在甚麼處金風吹渭水落葉滿長安

古梅友禪師解夏上堂九旬禁足特地成錯三月安居無繩自縛布袋解開乾坤寥廓放去若龜毛收來懸兔角試將兩眼挂虛空一陣涼風生殿角鐵關樞禪師解夏上堂七月十五放出猛虎吼作金毛吞却佛祖大衆既是猛虎爲甚作獅子哮吼上堂舉潯山問仰山子一夏作得箇什麼仰云開得一片畚種得一籬粟潯云子也不空過一夏施鳩毒

於樽俎之間仰山問潯山和尚一夏作得箇什麼潯  
云日中一食夜後一宿仰云和尚也不空過一夏揮  
戈矛於笑談之頃召大眾云會麼兩箇駝子相逢著  
世上祇今無直人

月江印禪師解夏云秋初夏末兄弟家東去西去如  
壯士展臂不假他力如獅子遊行不求伴侶蓋爲人  
人脚跟下有條通天活路三世諸佛六代祖師天下  
老和尚與你把手共行豈不見雲門大師問洞山近  
離甚處查渡夏在甚處湖南報慈幾時離彼八月二  
十五雲門云放你三頓棒次日上方丈問云昨日蒙  
和尚放三頓棒不知過在甚處飯袋子江西湖南便  
怎麼去洞山於言下大悟雲門提出倚天長劍凜凜  
神鋒不易洞山放將赤身衝他白刃正與麼時如何  
金烏啄破琉璃殼玉兔挨開碧海門

正法明禪師解制上堂林葉紛紛落乾坤報早秋分  
明西祖意何用更馳求若怎麼會得始信佛祖之道  
本自平夷大解脫門元無關鑰彌綸宇宙逼塞虛空  
量不可窮智不能測若也未明此旨不達其源任是

百劫熏功千生煉行徒自疲苦了無交涉若深明此  
旨洞達其源乃知動靜施爲經行坐臥頭頭合道念  
念朝宗祖不云乎迷生寂亂悟無好惡得失是非一  
時放却如是則誰迷誰悟誰是誰非自是諸人獨生  
異見觀大觀小執有執無已靈獨耀不肯承當心月  
孤圓自生違背何異家中捨父衣內忘珠致使菩提  
路上荆棘成林解脫空中迷雲蔽日山僧今日幸值  
衆僧自恣化主還山諸上善人得得光訪不可緘默  
隨分葛藤曲爲今時少開方便也須是諸人著眼各  
自諦觀若更擬議尋思白雲萬里遂拈拄杖云於斯  
明得靈山一會儼在目前其或未然更待來晨分付  
正堂辨禪師解夏上堂十五日已前不得去少林隻  
履無藏處十五日已後不得住桂子天香和雨露正  
當十五日又且如何阿呵呵風流不在著衣多  
退庵休禪師上堂結夏時左眼半斤解夏時右眼八  
兩謾云九十日安居贏得一肚皮妄想直饒七穴八  
穿未免山僧拄杖雖然如是千鈞之弩不爲鼯鼠發  
機

石屋珙禪師解制上堂有佛處不得住樓臺月色雲  
收去無佛處急走過池塘荷葉風吹破三千里外逢  
人不得錯舉朗州山澧州水四海五湖皇化裏腰包  
頂笠萬千千問著盡言山與水忽有不甘底出來道  
山但言山水但言水有甚麼過良久云未可全拋一  
片心逢人且說三分話

解制上堂九旬同禁足自恣是今朝暮雨青燈寺西  
風白石橋孤身三事裊萬里一輕包若到瀉山處須  
防笑裡刀

解制上堂今朝七月十五涼風開我竹戶嶺上一片  
兩片白雲被他吹得七橫八豎輕飄飄浮逼逼欲散  
不散欲聚不聚老僧招手向白雲白雲白雲何不住  
到頭終是覓山歸流落天涯與途路喝一喝

元叟端禪師解夏上堂四月十五日結拈拄杖左卓  
一卓諸方向者裏禁足安居七月十五日解拈拄杖  
右卓一卓諸方向者裏休夏自恣空劫前無佛名無  
衆生名結又結箇甚麼解又解箇甚麼靠拄杖便下  
座

解夏上堂秋山削玉秋水磨銅南北東西活路通兩  
隻草鞋健如虎一條錫杖穩如龍忽然撞著定上座  
道無位真人與非無位真人相去多少切忌無言滿  
面紅

解夏上堂結却布袋頭萬象森羅沒出氣處解却布  
袋頭山河大地得大自在結也結了解也解了諸人  
一任東去西去前程忽有人問著輒不得道在中天  
竺過夏下座

解夏上堂舉東山和尚示衆云百煉黃金鑄鐵牛十  
分高價與人酬庭前不有華含笑又是東山一夏休  
師云徑山隨斃斃也有一頌老矣無心鑄鐵牛眼前  
隨分卽相酬庭前葉脫西風起且喜凌霄一夏休  
楚石琦禪師解夏上堂今日解也南天台北五臺一  
任七縱八橫前程忽有人問永祚近日如何作麼生  
祇對但道來時不教某甲傳語管取坐斷天下人舌  
頭雖然者箇是永祚的那箇是上座的

解夏上堂盡十方世界是箇真實人體菩提煩惱生  
死涅槃有爲無爲前聖後聖結制解制長期短期眞

實體上了沒交涉雪峰三到投子九上洞山末後鰲山店上打失鼻孔大隨參六十餘員善知識長慶坐破七箇蒲團與化於大覺棒頭深明黃檗意旨掀翻海嶽罷却干戈如將谷響千斤換得空花萬片威音那畔空劫已前但有言說都無實義穿却天下人鼻孔一句作麼生道大鵬展翅蓋十洲籬邊燕雀空嗽嗽復舉僧問雲門秋初夏末前程忽有人問未審對他道什麼門云大眾退後僧云過在什麼處門云還我九十日飯錢來師云放過即不可未審道什麼但對他道七十二棒翻成一百二十過在什麼處對他道你但喫棒我要者話行

呆庵莊禪師解夏上堂聖制告圖正是今日諸方叢席說禪說道闊浩浩地我者裏孤迥迥峭巍巍縱有佛法誰著眼觀拍禪床下座

上堂解夏之後東去西去南去北去直須向高山頂立深深海底行若是閨閣中物捨不得未免墮坑落塹擊拂子當門更不栽荆棘免被人來惹著衣

愚庵及禪師解夏進退兩序上堂有進有退有結有

解左之右之風流儒雅鐘樓上念讚床脚下種菜勝首座道猛虎當路坐卓拄杖云一雨普滋三草二木解夏上堂四月十五日結却布袋頭十字縱橫底有甚數七月十五日解却布袋頭無繩自縛底有甚數喝一喝結也不可解亦何曾有結解二圓離面南看北斗下座

笑隱訢禪師解夏上堂禪人解夏東西去莫道腰包趁早涼三界炎炎如火宅不知何處是家鄉

解夏上堂舉僧問九峰西天夏末多有得道果者未審此間有也無峰云有僧云是什麼人峰云頭戴午夜月腳踏黃金地師云西天此土不離寸步得道得果鳳縈金鎖我此一衆總不與麼不用修行也無功願九十日中亦不虛過如今暑退涼生一任經行坐臥莫問祖師機緣總是野狐涎睡便是鵝眼龍睛也與從頭按過放出長沙老大蟲驚到嵩山破竈墮恕中惺惺禪師解夏上堂舉德山遠和尚夏滿上堂僧問九旬禁足今已滿自恣之儀事若何德山云糊塗趁蛺蝶九步作一歇僧云未審意旨如何德山以頌



示之云兩箇兒童昇木鼓左邊打了右邊舞利那變現百千般分明示君君記取拈云答也答了頌也頌了爭奈者僧未肯點首在靈巖路見不平要與德山相見自恣在今朝有華當面貼一句定話訛猢猻趣蛺蝶蛺蝶飛無處尋空中打坐海底穿針薦拈拄杖顧視左右云衆中莫有因齋慶讚者麼卓拄杖休將閒學解埋沒祖師心

上堂夏有解結法無定相有無之義空裏漚華南天台北五臺在諸人脚跟底踏著踏不著置而不說前程忽有問何處來切不得道瑞巖來教他疑三十年無文璨禪師解夏上堂舉老宿一夏不爲師僧說話公案師頌云一言已出驢難追道了如何悔得來冷地被入相許露牙關咬定口慵開

了庵欲禪師解夏上堂佛歡喜僧自恣香象渡河截流而去有利無利不離行市拄杖頭邊別有天地卓拄杖喝一喝

南石琇禪師解夏上堂圓覺能出一切法一切法未嘗離圓覺螻蛄知雨而封穴石蛙應節而揚葩粘手

是是是

粘脚底有甚數十字縱橫底有甚數

解制施主捨禪床席并法衣上堂九夏安居纖塵不起一衆高人行藏輕利沉香井水飲者除渴潮田米飯食者不饑仰山燒畬種粟瀉山夜寢晝餐百丈捲拜席向馬祖世尊以伽黎圍飲光良久夜來金氣應涼到竹床多

壽昌經禪師解制上堂三月安居九旬禁是不求佛法僧豈爲人天福說箇願一切衆生同證菩提大似父死呼公哭畢竟作麼生除是波斯能嚙鐵珍重破山明禪師解制上堂東風解凍百草萌芽行脚衲子似粟如麻拖泥帶水兮草鞋癢似虎混俗和光兮拄杖活如蛇向有佛處不可住無佛處急走過方稱英俊作家切不可向萬里無寸草處去虛度生涯大衆且如山僧者裏九旬禁足三月調心今日解制臨行一句作麼生道摘楊花摘楊花

筓庵問禪師解制上堂神通妙用遊戲自如動靜去來無憂無喜塵劫非遠刹那非促布袋頭日日解開安樂神時時應現何必朝參彌勒暮謁釋迦俗諦義

中真成勝諦火燄裏轉大法輪百草頭全彰祖印豁  
開頂顙截斷流機超出人天一頭地且隨緣不變大  
海納川一句畢竟作麼生道日長閒晝永春老綠陰  
多

解制上堂舉三聖問雪峰透網金鱗以何爲食峰云  
待汝出網來向汝道聖云一千五百人善知識話頭  
也不識峰云老僧住持事繁師云三聖雪峰把手向  
高高山頂立深深海底行是則同道唱和節拍相隨  
山僧者裏要且不然忽有問透網金鱗以何爲食向  
他道今日解制更云一千五百人善知識話頭也不  
識但云善爲道路且道與古人是同是別下座

牧雲門禪師解制上堂上元時節天色晴霽天童者  
裏大開門戶放諸菩薩子出門遊戲一地二地三地  
四地五六地歡喜發光留不住地地增修要遠行剛  
剩第八不動地日月燈明佛忍俊不禁涌身高七多  
羅樹一一爲他摩頂授記去者下坡不走快便難逢  
住者眉毛撕結鼻孔相拄去去住住住菩薩子莫  
道病天童語話無憑據咄

全室泐禪師解夏上堂今朝七月十五一句全賓全  
主解却布袋頭關一任東去西去無佛處急走過有  
佛處不得住三千里外逢人不得錯舉喝一喝

東苑鏡禪師解制辭衆入山上堂孤亭獨望春山遠  
九曲清清日夜行且喜風光流不盡垂楊堤畔月初  
生大衆一結一解原是千古風規一住一行要且機  
緣有自山僧今日對衆分付拄杖子欲向千萬峰頭  
去也大衆再四勸請爲法久住師曰大衆向我拄杖  
頭邊道得一句來山僧即住衆擬議師卓一卓曰從  
來共住無人識長嘯一聲歸去來下座

鼓山賢禪師解制日上堂今日解制諸兄弟未免或  
東或西山僧有三句分付第一出門不得拖著死屍  
走第二到人家喫飯不得沾唇第三不得向萬里無  
寸草處住着若能不犯這三句他日燒一片香供養  
老僧未爲分外若於三句有犯切莫道在真寂過冬  
珍重

弘覺志禪師解夏兼爲檀越薦嚴上堂一露眞性豈  
假胞胎識想爲緣致有形累累若諸人從四月十五

至今七月十五一期之內痛切如喪考妣急遽如救  
頭然觸體裂破孃生面目全彰本有淨裸裸常光現  
前峭巍巍壁立萬仞則自然動無遺照舉必全真妙  
用難思神機莫測金錫振處空華之獄戶頓開寶杖  
敲時鏡象之蓮邦隨見作無邊如幻佛事度無量如  
夢衆生尤是教乘極則之譚作麼生是衲僧親切爲  
人一句洞岫庭山齊削玉七十二峰青到今

嵩乳密禪師解制上堂師云欲知佛性義當觀時節  
因緣卽今是甚麼時節溪柳垂金線山花展翠屏白  
雲青嶂裏深懷野僧情好個滿天和氣徧地春光傳  
不雕之心印演不說之靈章諸人倘如斯會得便知  
檀度大施門開將從上佛祖鉢袋子當陽拈出一任  
諸人東擲西拋恁麼也得落花有意隨流水不恁麼  
也得流水無情送落花恁麼不麼恁總得常憶江南  
三月裏鷓鴣啼處百花香下座

列祖提綱錄卷第三十七

列祖提綱錄卷第三十八

武林十八澗理安禪寺住持婁東行悅集

頭首四節秉拂

大慧杲禪師結夏秉拂聲前迥迥一路子黃面瞿曇  
不知一句明明百草頭碧眼胡兒罔措闊浩浩處靜  
悄悄靜悄悄處闊浩浩直下如王寶剎誰敢當頭擬  
犯鋒鏑橫屍萬里更說甚麼似地擎山不知山之孤  
峻如石含玉不知玉之無瑕更說甚麼香象渡河徹  
底截流而過更說甚麼全明全暗雙放雙收須知恁  
麼來者寸絲不挂恁麼去者堆山積嶽將錯就錯以  
大圓覺爲我伽藍身心安居平等性智九十日內和  
泥脫轆到者裏若有轉身一路則不守自家活計豈  
遵先聖軌儀所以道全鋒敵勝罕遇知音同死同生  
萬中無一且道同生同死底是甚面目驀拈拄杖云  
趙州和尚來也金佛不度爐木佛不度火泥佛不度  
水卓一下云百雜碎沒縫罅明眼衲僧盲聾瘡癰金  
剛水際藏身非非想天走馬一卽一切一切卽一盡  
大地是箇解脫門是人知有且道石室行者踢碓因

甚麼忘却移脚良久喝一喝復舉三聖道我逢人即  
出出則不爲人與化道我逢人即不出出則便爲人  
真淨和尚云兩箇老古錐竊得臨濟些子活計各自  
分疆列界氣衝宇宙使明眼人只得好笑師云真淨  
老人大似欺誣亡沒杲上座即不然豁開三要三玄  
路坐斷須彌第一峯且道在三聖分上耶在與化分  
上耶具眼者辨取

天如則禪師杭州淨慈禪寺結夏節秉拂問答畢乃  
云有法可說是名謗法無法可說亦名謗法不見一  
法是大過患若見一法亦是過患怎麼也不得不怎  
麼也不得怎麼不怎麼總不得三世諸佛歷代祖師  
到者裏結舌有分只如道法非見聞覺知不離見聞  
覺知豎拂云還見麼擊拂云還聞麼既見了既聞了  
畢竟是有法耶是無法耶喝一喝者裏是甚麼境界  
說有說無衲僧家向銀山鐵壁裏突出金剛眼睛徹  
見佛祖肝腸無絲毫滲漏和他命根一拶拶斷然後  
全主全賓全殺全活趁動南山白額吞却無毛大虫  
不妨鼻孔裏聽聲眉毛上吐氣怎麼也不得不怎麼也

◆起疑處

得怎麼不怎麼總得是謂我爲法王於法自在說甚  
麼安居禁足尅期取證大好無繩自縛去也者箇猶  
是作用邊事若曰真正舉揚且待上方拄杖子出來  
露箇消息卓拄杖云驚群須是英靈漢敵勝還他獅  
子兒

楚石琦禪師徑山首座寮結夏秉拂拈拄杖云者箇  
是徑山拄杖子爲甚麼在琦上座手裏已知來處何  
似繁詞脫或未知不免露箇消息凌霄峯頂選佛場  
開一句當陽十方坐斷果然坐斷去久參先德不妨  
禁足護生後學初機誰敢違條起例上無攀仰下絕  
已躬人人常光現前箇箇壁立萬仞三世諸佛舌頭  
無骨六代祖師眼上安眉德山見僧入門便棒畫餅  
充饑臨濟見僧入門便喝望梅止渴老妙喜見僧入  
門便道喚作竹筴則觸不喚作竹筴則背不得下語  
不得無語雕沙無鏤玉之談結草乖道人之意既不  
得下語又不得無語拈來拗作兩截看他作箇什麼  
伎倆廣澤龍王忍俊不禁把須彌山一摑百雜碎踣  
跳上梵天去也召衆云且道者一期佛事還有爲人

處也無以拄杖連卓三下復舉南嶽讓和尚遣一僧往江西探馬大師候大師上堂出問云作麼生大師云自從胡亂後三十年不曾少鹽醬師云馬大師道三十年不曾少鹽醬早是費却多少鹽醬了也我若作馬大師纔見者僧出來便下禪床擒住痛與一頓教他歸去舉似南嶽且顯師承有據自家眼目分明管取坐斷天下人舌頭曹溪一脉未致寂寥在

用彰俊禪師靈隱秉拂大道本無背向擬心湊泊則差天是天地是地山是山水是水日月星辰運行四時有什麼過黃面瞿曇也大無端剛要立期立限使大地衆生據菩薩乘修菩薩行恰如群蚋聚一器中鼓發狂鬧無有休息如斯禁制爭知靈山門下燈籠走入露柱佛殿騎却山門斯須之間礮礮於上方拄杖頭上開安居法門說秘密王三昧法拈拄杖卓一下還聞麼古德道我爲諸聖說不爲凡夫說咄

### 解制秉拂

佛朗性禪師領衆赴京考試留天界居第一座解制秉拂獅子絃一奏群音悉絕正令全提凡聖結舌衆

中有作家禪將直下出來人天衆前展陣開旗共建法幢有麼有麼良久云大衆便怎麼散去已是惡水不少既無莫怪秉拂上座將黑豆換却諸人眼睛去也舊拈拄杖卓一下云軟似兜羅又卓一下云硬如鐵壁天上天下古今不識若喚作禪道佛法正是小家惡口文章奇句亦是妄言綺語盡屬埋沒先宗得無累乎諸人若向生佛已前各各脚跟下有一片無陰陽田地極是潔淨極是分曉不勞心力回頭一觀本來成現安樂受用無不如意說甚德山棒臨濟喝盡是太平好賊亂世英雄明眼人在一場笑具更要九旬禁足結制解制懸沙止饑箭穿石裏然承堂頭和尚慈旨難以固辭只得暫借威光於萬指叢中馬頭截角況僧錄司官諸位宗主和尚屈駕臨筵爲法作證諸佛歡喜賢聖聯集人天交接并會中達官士庶七趣四生無邊凡聖八部天龍一切神衆普皆歡喜各各自聞廓徹妙旨更不敢加一絲毫頭佛法與諸人分上雖然如是疎山今日也要與諸人據款結案去也卓拄杖喝一喝云直截根源佛所印摘棄尋



枝吾不能復舉夜來堂頭和尚舉東山上堂云白煉黃金鑄鐵牛十分高價與人酌庭前不有花含笑又是東山一夏休古人與麼道畢竟意旨如何師云白煉黃金鑄鐵牛頭角覓不得十分高價與人酬大好行市庭前不有花含笑衆僧不歸單位又是東山一夏休秋初無雨白露看古人與麼道畢竟意旨如何釣竿斫盡重栽竹不得鯢鯨誓不休顧視大衆云委悉麼喝一喝云癡人面前不得說夢久立衆慈伏惟珍重下座

### 冬夜秉拂

大慧杲禪師冬至秉拂豁開戶牖妙手畫難成當軒者誰擡眸已蹉過不是心不是佛不是物不是禪不是道三世諸佛說不及六代祖師傳不到便怎麼去只是箇無孔鐵鎚直饒出得荊棘林未免死於平地。上所以道言無展事語不投機承言者喪滯句者迷可中有箇出情塵超物外不承言不滯句百草頭上薦得祖師開市裏識得自已直下如龍得水似虎靠山脚跟下正好朝打三千暮打八百何故我王庫內

無如是刀。是出格道流必不作者般去。雖然。是法無民。今夜放一線道與諸人相見。舉起拂子云。吾。是。一。道。人。道。消。滴。水。一。滴。凍。節。令。不。相。饒。狸。奴。自。枯。草。繩。水。底。藏。身。被。火。燒。擊。禪。床。一。下。復。舉。本。仁。示。衆。云。尋。常。不。欲。向。聲。前。句。後。鼓。弄。人。家。男。女。何。故。且。聲。不。是。聲。色。不。是。色。有。僧。問。如。何。是。聲。不。是。聲。仁。云。喚。作。色。得。麼。僧。云。如。何。色。不。是。色。仁。云。喚。作。聲。得。麼。僧。禮。拜。仁。云。且。道。爲。個。說。答。個。話。若。人。得。許。個。有。箇。入。處。師。云。本。仁。將。一。穿。雲。居。子。換。却。天。下。人。眼。睛。却。被。者。僧。將。一。條。斷。貫。索。不。動。干。戈。穿。却。鼻。孔。後。來。舜。老。夫。拈。云。本。仁。既。已。入。草。者。僧。又。落。深。村。然。則。陽。春。雪。曲。時。人。難。和。村。歌。社。舞。到。處。與。人。合。得。著。師。云。舜。老。夫。是。則。也。是。未。免。隨。樓。榭。秉。拂。上。座。不。惜。眉。毛。爲。諸。人。說。破。聲。不。是。聲。色。不。是。色。馬。後。驢。前。神。出。鬼。沒。雪。曲。陽。春。和。不。齊。村。歌。社。舞。且。混。淆。以。拂。子。擊。禪。床。云。者。箇。決。定。不。是。聲。復。舉。起。云。者。箇。決。定。不。是。色。且。畢。竟。是。箇。甚。麼。喝。一。喝。云。此。時。若。不。究。根。源。直。待。當。來。問。彌。勒。

歲夜秉拂

大慧杲禪師歲節秉拂百尺竿頭進一步甚麼處得者消息來萬仞峯前露一機墮在時人窠窟裏莫妄想放下著絕伎倆處便肯承當鼻孔索頭在我手裏所以南泉道牽牛向谿東放不免食他國王水草牽牛向谿西放亦不免食他國王水草不如隨分納些些總不見得杲上座隨分納些些去也良久云釋迦掩室於摩竭耕地種蒺藜淨名杜口於毗耶錮鏑著生鐵須菩提唱無說以顯道餒飯祭閒神釋梵絕聽而雨華果有領受者直饒向上一路千聖不傳硬糾糾活鍛鍛棒下無生忍臨機不見師也是隔靴抓痒總不恁麼落在無事界中且作麼生通得箇機關應得箇時節去驀拈拄杖卓一下云還委悉麼差之毫釐失之千里孟春猶寒終而復始釋迦老子是緊驢橛一大藏教是破故紙如我按指海印發光汝暫舉心塵勞先起超佛越祖之談未語已前向諸人脚跟下蹉過了也畢竟如何毗婆尸佛早留心直至如今不得妙又卓一下復舉僧問鏡清新年頭還有佛法

也無清云有僧云如何是新年頭佛法清云元正啓祚萬物咸新僧云謝師答話清云山僧今日失利又僧問明教新年頭還有佛法也無教云無僧云年年是好年日日是好日爲甚麼却無教云張公喫酒李公醉僧云老大大龍頭蛇尾教云山僧今日失利師云二尊宿一人向高高峯頂立不露頂一人向深深海底行不濕脚是則也是未免有些諸訛今夜或有人問杲上座新年頭還有佛法也無只向他道今日一隊奴僕在茶堂裏村歌社舞弄些神鬼直得點智尊者惡發把鉢盂峯一擲擲過恒河沙世界之外驚得憍陳如怕怖惶惶倒騎露柱跳入擔板禪和鼻孔裏撞倒舒州天柱峯安樂山神忍俊不禁出來攔智掇住云尊者爾旣稱阿羅漢出三界二十五有塵勞超分段生死因甚麼有許多無明被者一問不勝懍懍却回佛殿裏第三位打坐依舊點智點助道天上天下惟我獨尊自云住住杲上座他問新年頭佛法爲甚麼一向虛空裏打筋斗說脫空謾人良久云杲上座今夜失利

用彰俊禪師淨慈首座寮秉拂一年三百六十日結交頭一句子要與本地相契無一毫頭走作始得如或走作不落妙勝境界便入顛倒海裏衲僧家如百煉精金入水入火不爲火水所變入淨入穢不爲淨穢所移故此南屏門下現前一衆壁立萬仞滴水冰生又管甚三陽布令四序開端上方拄杖子聞與麼道踴躍出來與秉拂上座交相慶讚拈拄杖卓一下咄哉拙郎君巧妙無人識打破鳳林關著靴水上立喝一喝

住持謝秉拂提綱

雪巖欽禪師上堂謝一清叟并藏主秉拂夜月透靈犀寒光吞老蚌如是轉法輪乎沉乎萬象直得純清絕點固是真常流注打破相呈又成甚麼伎倆拍膝一下云山僧恁麼道也是無風起浪

元叟端禪師上堂謝夏齋秉拂雪峯和尚云演一句則千句萬句流通拈向一邊飲一味則千味百味具足置之一壁雪峯低頭歸庵巖頭聞云雪峯與我同條生不與我同條死且作麼生臨朕碁井底種林禽

今年桃李貴一顆直千金

上堂謝秉拂首座說底見也見了聞也聞了藏主說底見也見了聞也聞了拈拄杖云拄杖子涌身虚空放大光明現大神變說四十二波羅密法門未見者直須見取未聞者直須聞取卓一卓只此見聞非見聞無餘聲色可呈君箇中若了全無事體用何妨分不分

上堂謝秉拂并夏齋舉趙州會下二僧相推不肯作第一座主事白州州云總教他作第二座主事云第一座教誰作州云裝香著主事云裝香了也州云戒香定香解脫香應庵叔祖云趙州下者一槌不妨驚群動衆子細檢點將來也是泥裏洗土塊薦福門下不用相推第一座也有人第二座也有人第三座也有人雖然不免從頭注過第一座鐵額銅頭覷不破第二座陽春白雪無人和第三座真實身心同達磨師云玉本無瑕雕文喪德趙州應庵之謂也中峯咬定牙關盡力踳跳出他絳纈不得亦未免從頭注過第一座露柱燈籠俱拶破第二座偏向淨瓶裏吐唾

第三座璞玉渾金能幾箇都寺營辦夏齋又且如何  
水長船高泥多佛大

謝秉拂并夏齋上堂教中道於食等者於法亦等於  
法等者於食亦等都寺營齋內外悉皆飫飽是名食  
等首座秉拂內外悉皆見聞是名法等其施汝者不  
名福田供養汝者墮三惡道喝一喝下座

上堂謝秉拂并夏齋無絃琴上撫出五音六律無底  
鉢中釘出七珍八寶未聞者得聞未飽者得飽甚盤  
石踣跳上大鉢孟池哮吼入海俱胝道者忍俊不禁  
將國一祖師坐禪石喝成三片直下恰似川字續文  
喝一喝

鐵關樞禪師謝首座秉拂上堂一機疾雷破山十聖  
三賢耳聾眼瞎一句擗龍攬海銅頭鐵額膽喪魂飛  
且道是甚麼句卓拄杖喝一喝不是我首座大難提  
持

楚石琦禪師謝首座秉拂都寺辦齋上堂禪非意想  
以意想求之則乖道絕功勳以功勳擬之則錯安箇  
是立箇非捨箇迷就箇悟轉急轉緩轉親轉疎不能

透過那邊多只住在者裏進則銀山萬疊退則鐵壁  
千尋拶得一路開挨得一線入元來自己便是銀山  
鐵壁到與麼地有甚麼奇特三德六味味逾多一句  
了然超百億

愚庵及禪師謝齋秉拂上堂五祖和尚示衆云結夏  
無可管顧諸人未免作一家宴遂擡手云邏囉招邏  
囉搖邏囉送莫恠空疎伏惟珍重南屏冬至叢席荒  
涼直是無可施設賴有庫司都寺與堂中首座前日  
作那一場佛事不同小小離四句絕百非攪酥酪醒  
醐爲一味銚餅盤釵釧爲一金令我現前一衆三世  
諸佛歷代祖師五百十六大阿羅漢均飽禪悅法喜  
眼裏也飽耳裏也飽不覺手之舞之足之蹈之歡喜  
踴躍向宗鏡光中同聲讚歎云希有希有奇哉奇哉  
於食等者於法亦等於法等者於食亦等山僧只管  
端坐受供養且道與五祖相共多少良久云其施汝  
者不名福田供養汝者墮三惡道

解制謝都寺辦齋藏主秉拂上堂咬破鐵酸餚百味  
具足演出大藏教一句該通三脚驢子弄蹄行萬里

無寸草下座

笑隱訢禪師謝秉拂上堂正印全提聖凡路絕箭鋒相拄照用同時一句子函蓋乾坤一句子奔流度刃備有拄杖子我與爾拄杖子爾無拄杖子我奪却爾拄杖子

謝首座秉拂都寺齋上堂還丹一粒點鐵成金至理一言轉凡成聖楊岐知尙道天得一以清地得一以寧衲僧得一時如何鉢孟口向天者裏透得非但轉凡成聖點鐵成金亦能與人抽釘拔楔解粘去縛提持綱要荷負叢林其或未然同器而食飯色有異

謝首座秉拂都寺齋上堂問一答十問十答百當陽突出須彌盧於食等者於法亦等信口咬破鐵酸餚一句三立一立三要千牛拽不回先照後用先用後照俊鵲越不及離四句絕百非則不問如何是摩訶衍法卓拄杖下座

謝首座秉拂上堂舉大慧和尚在雲居圓悟會中作首座冬夜秉拂昭覺元禪師出問眉間挂劍時如何大慧云血濺梵天師云奇哉奇哉一千七百人善知

識生氣凜然誰知二百年後金陵城中再逢作者如獅子筋琴一奏則衆絃皆絕如塗毒鼓一擊則聞者皆喪我此一衆親近承事勿生疲厭各隨根機成就法器雖然有際天之雲濤可容吞舟之魚有九萬里之風可負垂天之翼

了庵欲禪師謝首座秉拂兼客至上堂南泉斬猫趙州戴草鞋而出興化法戰克賓設饋飯便行是皆發揮本有靈光要且不惜別人鼻孔出氣所以前日首座說法高聳人天今朝道伴相過光揚宗眼且道山僧鼓兩片皮成得甚麼邊事拍禪床從前汗馬無人識只要重論蓋代功

月分須知正月

楊岐會禪師歲旦上堂春風如刀春雨如膏律令正行萬物情動爾道腳踏實地一句作麼生道出來向東涌西沒處道看直饒道得也是梁山頌子

雲峯悅禪師歲旦上堂三十六句竟今朝還復起剎那不相知諸法何曾爾尊卑叙禮儀歡戚同居止廓哉總持門而人不能啓玉兔金烏藏頭露尾以拂子



擊禪床下座

眞淨文禪師歲旦上堂不見一法卽如來方得名爲觀自在諸禪德今日人人添一歲還見麼若不見又道人人添一歲若見在甚麼處安著旣見著處便見出處出處旣明方能世出世間於法自在觀自在菩薩將錢買餬餅放下却是饅頭好諸禪德一年添一歲一歲一如來拈拄杖云拄杖子亦成佛也看

◆連字難刺

歲旦上堂去年貧未是貧今年貧始是貧去年貧猶有卓錫之地今年貧連錫也無師云香嚴與麼道奇特甚奇特要且只知其貧不知其富洞山卽不然去年富未是富今年富始是富去年富惟有一領墨懸布褊形今年富添得一條百衲山水袈裟歲朝抖擻呈禪衆實謂風流出當家諸禪德洞山與麼爲復是不肯古人耶爲復扶古人耶試辨看

元旦上堂問話畢乃云一問一答皆是當人各各神通光明清淨妙心一一從自己運出來烜赫現前自是衆生迷情不覺不知改旦新元伏惟知事首座大衆尊候萬福良久云昨日今朝事不同人人依舊主

人翁雖然平等添新歲夢覺元來總是空是空却不空二十空門元不著一性如來體共同喝一喝下座白雲端禪師歲旦上堂今日普天之下盡添一歲且道水牯牛還添也無添與不添且置且道牯牛鼻孔重多少若知得他鼻孔兩分明一任侵他人苗稼若也未然臘月三十日莫道春來草自青

保寧勇禪師歲旦上堂昨日去年去今日今年來去年去不去今年來不來徧野盈尺雪大地亡纖埃無名無字人舉目聊徘徊

五祖演禪師歲旦上堂元正啓祚萬物咸新揚盡大千沙界都來只在一塵乃展手云是新是舊有人出來道看若無四面且世諦流布去也遂叉手云孟春猶寒伏惟首座大衆洎諸知事尊體起居萬福

歲朝上堂威音王已前也恁麼威音王已後也恁麼三世諸佛也恁麼西天四七東土二三也恁麼前年去年也恁麼明年後年更後年後年也恁麼忽有箇出來道和尚和尚自云若不被他喚住便一百年也只恁麼復云元正啓祚萬物咸新去年乞火和烟

得今日擔泉帶月歸晷運推移日南長至當軒有直  
道無人肯駐脚孟春猶寒伏惟首座大衆起居萬福  
蘇武牧羊海畔累日忻然李陵望漢臺邊終朝笑發  
落在甚處仁義只從貧處斷世情偏向富門多

元旦上堂元正啓祚西天此土萬物咸新獬豸麒麟  
應時納祐誠言不謬孟春猶寒萬種千般伏惟首座  
大衆普天齊用洎諸知事懷才抱義并諸化主如龍  
似虎尊體起居萬福直是如金如玉歲歲三百六十  
日管取粥足飯足

圓悟勤禪師歲旦上堂元正啓祚打開門戶萬物維  
新天地同春應時納祐不落窠臼聲無不宜萬世一  
時孟春猶寒伏惟首座大衆起居萬福乞火和烟得  
擔泉帶月歸復云新年頭有佛法正是土上加泥新  
年頭無佛法又成當面蹉過到箇裏佛法世法有無  
新舊一時拈向一邊且不落黃絲一句作麼生道還  
委悉麼乾坤一合地餬餅日月兩輪天氣穩

龍門遠禪師元旦上堂萬物咸新論故鄉擡眸元是  
舊爺娘先春花發馨香遠物外山河日月長復舉僧

問百丈如何是奇特事丈云獨坐大雄峯僧禮拜丈  
便打師云錯打人僧問德山如何是奇特事山云我  
宗無語句亦無一法與人師云猶較些子僧問羅山  
如何是奇特事羅山云道什麼師云成何道理大衆  
古人鉤頭著餌意在得魚如今洗脚上船能有幾箇  
或有人問龍門如何是奇特事山僧向伊道此去太  
湖不遠恁麼說話有甚奇特又向伊道咫尺是棠梨  
大衆還會麼等閒如不會須作等閒看下座

元旦上堂以拄杖畫一畫云天得一斗牛女虛危室  
畢地得一草木山河并土石君得一下四維無等  
匹召大衆云萬象森羅影現中一顆圓明光的歷有  
歡榮有愁戚或冤親或順逆富且貴貧且乞萬樣千  
般誰運爲空谷之聲隨應出鴛鴦繡了任君看不露  
金針太綿密褒禪奉勸各回頭莫待臨行却啾唧識  
取摩訶般若光萬古悠悠是今日久立

大慧杲禪師歲旦上堂拈拄杖空中作書字勢云歲  
朝把筆寫事皆吉應時納祐慶無不宜若作世諦流  
布平地喫交更在佛法商量眉鬚墮落卓拄杖下座

歲旦上堂去年今日也只是者箇前年今日也只是者箇先前年今日也只是者箇外前年今日也只是者箇明年今日也只是者箇後年今日也只是者箇外後年今日也只是者箇更外後年今日也只是者箇且道者箇是什麼元正啓祚萬物咸新應時納祜慶無不宜喝一喝云俗氣不除

歲旦上堂一年三百六十日今朝又是從頭起人人有箇主人公水牛銜却老鼠尾深沙軟那吒喜佛殿走出三門去僧堂撞入厨庫裏敢問大眾還有不遷義也無自云有作麼生是不遷義東君行正令華發樹南枝

應庵華禪師元正上堂舉僧問鏡清新年頭還有佛法也無清云有僧云如何是新年佛法清云元正啓祚萬物咸新僧云謝師答話清云鏡清今日失利僧又問智門新年還有佛法也無門云無僧云年年是好年爲什麼却無門云張公喫酒李公醉僧云老大大龍頭蛇尾門云智門今日失利師云二尊宿一人嘴長三尺一人項短二寸若檢點得出報恩今日白

失利

元旦上堂古今天地古今日月古今人倫古今山河釋迦彌勒坐籌帷幄耶舍拭眼罷戰沙場且道功名遂一句作麼生道萬人遠仰處紅日到中天

元正上堂元正啓祚更無回互萬物咸新截鐵斬釘應時納祜跳出窠臼孟春猶寒言端語端知事頭首各各希有雲堂大眾雍容鄭重蔣山恁麼說話且道在裏許不在裏許若在裏許未免是箇流俗阿師不在裏許又著在什麼處所以道世人住處我不住世人行處我不行不是與人難共住大都縑素要分明密庵傑禪師歲旦上堂元正一旦萬事成辦大乘小乘井索錢貫更問佛法如何也是秦時轆轤鑽松源嶽禪師歲旦示衆元正改旦萬事成現有時放行有時坐斷不惜兩莖眉和盤掇轉看佛法世法都盧一片既是佛法世法如何得成一片但辨肯心必不相賺

靈隱遠禪師上堂新歲有來由烹茶上酒樓一雙爲兩脚半箇有三頭突出神難辨相逢鬼見愁倒吹無

孔笛促拍舞涼州咄

淨慈昌禪師元旦上堂舉拂子曰歲朝把筆萬事皆吉忽有箇漢出來道和尚這箇是三家村裏保正書門底爲甚麼將來寶華王座上當作宗乘祇向他道牛進千頭馬入百疋

石霜鑒禪師上堂送舊年迎新歲動用不離光影內澄輝湛湛夜堂寒借問諸人會不會若也會增瑕類若不會依前昧與君指箇截流機白雲更在青山外高峯妙禪師歲旦示衆百年難遇歲朝春蛇女梳粧越樣新惟有東村王大姐依前滿面是埃塵

歲旦示衆山僧去年三十六今年又添一歲諸人共知拈拄杖云且道拄杖子年多少擊禪床云元正啓祚萬物咸新

萬壽念禪師歲旦上堂往復無際動靜一源含有德以還空越無私而迥出昔日今日日照無兩明昔日風今日風鼓無兩動昔日雨今日雨澤無兩潤於其中間覓去來相而不可得何故自他心起起處無蹤自他心忘忘無滅跡大衆若向者裏會去與天地

而同根共萬物而爲一體若也未明山僧爲你重重頌出元正一古佛家風從此出不勞向上用工夫歷劫何曾異今日元正二寂寥冷淡無滋味趙州相喚喫茶來剔起眉毛須警地元正三上來稽首各和南若問香山山裏事靈源一派碧如藍遂喝一喝下座護國昌禪師上堂拈拄杖卓曰三十六旬之開始七十二候之起元萬邦迎和氣之時東帝布生成之令直得天垂瑞彩地涌禎祥微微細雨洗寒空淡淡春光籠野色可謂應時納祐慶無不宜盡大地人皆添一歲敢問諸人且道那一人年多少良久曰千歲老兒顏似玉萬年童子髻如絲

萬杉堅禪師歲旦上堂有一人不拜歲不迎新寒暑不能侵其體聖凡不能混其迹從來鼻孔遶天誰管多年曆日大衆且道此人卽今在甚麼處卓拄杖曰咄咄咄沒處去

大梅英禪師元旦上堂三十六旬之始七十二候之初末後一句則且置祇如當頭一句又作麼生道拈拄杖曰歲朝把筆萬事皆吉急急如律令大衆山僧

恁麼舉唱且道還有祖師意也無良久日記得東村  
黑李四年年親寫在門前卓拄杖下座

劍門分禪師元旦上堂弄虛頭徒費力寒暑不能變  
眞實堂堂受屈深可憐幾度年年正月一拈起殺人  
刀火後莖茅萬丈高放下活人劍不是貴兮不是賤  
縱橫殺活如獅子出林群狐絕蹤跡年年是好年日  
日是好日大鵬不作老鴉飛黃河九曲纖纖直喝一  
喝下座

列祖提綱錄卷第三十八

列祖提綱錄卷第二十九

武林十八澗理安禪寺住持婁東行悅集

元旦提綱

師子端禪師新歲上堂新歲新春雪又濃森羅萬象  
盡皆同相逢莫認者般事筋斗全拋示祖風遂打筋  
斗下座

無用寬禪師元旦上堂太湖梁山徹底掀翻一柄無

用拂子擊開黃龍三關大眾各各起居多福卓拄杖  
一下云只看趙州無字不必東卜西卜下座

元旦上堂太湖山上賀新年萬象森羅笑揭天驚得  
泥牛吞石虎塵塵剎剎自安然喝一喝云風調雨順  
祝皇元下座

天如則禪師新年示衆儼陳如上座禾山殷打鼓牛  
尾巴說禪烏桺標下語說禪云臘月三十昨日去正  
月初一今日來下語云夜暗晝明去是誰去天高地  
濶來是誰來獅林好箇上堂被他抄前說了只落得  
打箇問訊燒香喫茶

仰山簡禪師元旦上堂新律纔分霞光報曉天色欲  
暖還冷氣候似冬忽春蓋鴻蒙之象初升乃嚴凝之  
寒未退時須傾刻已屬東君勿此爲勞共稱得歲剛  
有一人不在斯限天地無由蓋載寒暑豈得推遷日  
月莫謂照臨陰陽卒難變易若教此人受歲終是不  
甘時節到來又爭諱得且道受歲人與不受歲人兩  
家相見如何作賀良久日寒隨一夜去春逐五更來  
唯庵然禪師歲日上堂元正啓祚萬物咸亨薦拈拄



杖云拄杖子昨夜抽條今朝吐藥花開五葉香徧大千且道當得新年頭佛法也無卓拄杖喝一喝

鐵關樞禪師元旦謝監寺上堂三世諸佛六代祖師天下老和尚豎拂子總在拂子頭上慶賀新元令旦普山將栗棘蓬普同供養吞一任吞吐一任吐吞不下吐不出未免喪身失命喝一喝

石屋珙禪師歲旦上堂鐘樓上念讚床脚下種菜勝首座道猛虎當路坐福源者裏山門頭賀正歌唱佛殿裡祝聖諷經一種是聲無限意有堪聽有不堪聽諸人還曾檢點得出麼喝一喝下座

歲朝上堂鏡清道新年頭佛法有明教道新年頭佛法無道是有也未必有道是無也未必無張公喫酒李公醉趙州東壁掛葫蘆

元叟端禪師元旦上堂昨日喚今朝作新歲今朝喚昨日作舊年且如何是物不遷義擊拂子嶺上寒梅纔破雪城邊楊柳已含煙

元旦上堂舊歲昨朝送新春今日迎九天騰瑞氣萬國霽歡聲

笑隱訢禪師元旦上堂元正啓祚萬物咸新海宇歡呼人天交慶直得石女倒騎鐵馬踏破虛空木人鞭動泥牛耕翻碧落阿呵呵會也麼有意氣時添意氣不風流處也風流

元旦上堂金剛正體露堂堂萬象森羅般若光泯去來機超當念無陰陽地理全彰木鷄報曉啼深巷石女迎春出洞房共喜龍湖多瑞氣天風時送御爐香恕中愍禪師元旦上堂新年頭有一句子舉似諸人者一句子卽是父母未生已前底句子不得向舉起處承當不得向意根下卜度但見皇風成一片不知何處是封疆

元旦上堂新年頭佛法觸處皆現成懂懂賀歲客倒屣相歡迎笑指好天氣風日猶和明必定田稻熟鼓腹歌太平大眾忽遇上上人來又作麼生祇待青原酒趙州茶三杯兩盞醉臥煙霞大底風流出當家呆庵莊禪師元旦上堂天得一以清地得一以寧君王得一致太平衲僧得一滴水水生拈拄杖只如拄杖子得一時如何直示新年頭佛法敲風打雨任縱

橫靠拄杖

正旦上堂一切無情皆有佛性晨朝起來慶賀新年法堂上撞著露柱禮他三拜有何不可安樂山神無端性燥鼓合點胷尊者在佛殿基上說是說非總與二十拄杖越出趙州關外去也不見道三千條令主者施行

元旦上堂新年頭不可與諸人葛藤德山棒臨濟喝拈放一邊你道趙州和尚使得十二時辰還有勘驗處也無擊拂子家家門前赫日月太平不用將軍威元旦上堂老僧未開口已前一切時一切處普光心印文彩全彰待汝著眼覷來早是塗糊了也今朝特爲點出普請諸人證據焉拈拄杖卓一下云新年把筆爲事大吉靠拄杖下座

天目禮禪師歲旦上堂昨朝殘雪今日新年互相慶賀禮數周旋惟有能仁到老不辨推遷舉頭天外看渾是舊山川

楚石琦禪師歲旦上堂拈拄杖云山僧一條拄杖不曾胡亂打人今日新正開封去也釋迦老子達磨大

師放過不可自餘之輩車載斗量利劍不斬死漢忽有人出來道長老彎臂脊便棒不是與人難共住大都縑素要分明靠拄杖下座

歲旦上堂拈拄杖云新年頭有佛法拄杖子也未敢相許新年頭無佛法拄杖子也未敢相許離四句絕百非總是諸方舊話子拄杖子也未敢相許畫一畫元正啓祚萬物咸新

歲旦上堂今年年是去年年年去年來知幾年昨日是今日日日日出日入非一日只箇無去來無出入年年是好年日日是好日四溟東海流般若波羅密歲旦上堂祖師道果滿菩提圓花開世界起拈拄杖云一花開也是桃是李今日新年頭昨日舊年尾識得本來人無憂亦無喜卓一下云處處綠楊堪繫馬家家門底透長安

歲旦上堂學香嚴云去年貧未是貧今年貧始是貧去年貧有卓錫之地今年貧雖也無真淨云去年富未是富今年富始是富去年富惟有一領黑黠布衫今年添得一條百衲袈裟歲朝抖擻呈禪來實謂風

流出當家師云香嚴貧未是貧奈何猶有箇渾身眞  
淨富未是富家私未免俱呈露鳳山者裏不說富不  
說貧隨家豐儉沒疎親豎拂子收來兎角長三尺放  
去龜毛重九觔

歲旦上堂半夜起來赴省堂焚祝焚祝了丞相府諸  
衙門人事畢卽回殿堂行香撒沙呪土遶廊行  
道次第諸山報禮淮備接官若作新年頭佛法會入  
地獄如箭射

正旦上堂三百六句之始二十四氣之初斗柄回春  
風光奪目或晝短而夜長或夜短而晝長或暑往而  
寒來或暑來而寒往花根本豔虎體元斑雖然不改  
舊時人未免人人添一歲召衆云祇者一歲添到盡  
未來際那裏泊在

愚庵及禪師上堂元正啓祚萬物咸新井底蓬塵蔽  
日山上鯉魚擎雲且不涉時緣一句作麼生道拈拄  
杖云拄杖今朝添一歲拈來依舊黑黢黢

了庵欲禪師上堂新年換舊年打破又完全衲僧雖  
不薦鼻孔已遶天看看螻蛄睫上放夜市大蟲舌上

打鞦韆喝

元旦上堂月生一三世如來從此出月生二突出如  
來祖師意月生三森羅萬象競頭參拍禪床云皇基  
磅礴三千界寶曆開端億萬年

上堂元正改日一句全提萬機休罷千聖不攜紫烟  
籠帝闕睿算與天齊

上堂正日值庚申成湯德日新皇元開鳳曆八萬四  
千春

元旦上堂元正啓祚上馬見路萬物咸新觸處通津  
恭惟頭首大眾雖是死蛇却要活弄各各道體起居  
萬福獅子哮吼象王回旋虎拜稽首天子萬年

用彰俊禪師歲旦上堂舊歲欲去未去之際新年欲  
來未來之時已是泄天機於言下露眞智於衆前了  
也今日開端擊鼓集衆且道說什麼法卽得良久大  
衆露柱大燈籠一歲燈籠大古佛一歲古佛大虛空  
一歲住住否不喝住幾乎數到自己便下座

南石琇禪師元旦上堂元正啓祚萬物咸新年新月  
新日新時新大地山河纖洪動植一一俱新且道祚

僧分上事還有新舊也無喝一喝下座、

玉芝聚禪師元旦上堂撒眼流光如箭急今朝又是正月一家家門上貼桃符大鬼小鬼都竄匿猶有一箇不順陰陽的漢古貌堂堂無朕迹明逾日黑逾漆鬱壘眼睛覷不及今日被山僧捉敗了也特與諸人報消息咄佛殿裏祝讚僧堂前雲集

無趣空禪師元旦示衆今日是三百六旬第一日家家戶戶慶新年皇皇春令行天下合國羣臣祝聖延大明九重殿上八方司府堂前錦袍簇簇玉佩便便恭前鞠後俯仰周旋揚塵舞蹈萬歲聲喧威儀三百禮儀三千一時頓現若作國禮商量不唯背了如來此外更無佛法若作佛法領會不唯背了天子此外更無國禮畢竟作麼生始得禮法併致一道流通遂舉拂子鞠躬云皇圖鞏固帝道遐昌以拂子打一圓相云佛日增輝仁風永扇

密雲悟禪師歲旦上堂新年新月新日新時長老又披新法衣拈衣云者箇是衣如何是法放下衣云九九百百張七趙八孟春猶寒不得露骨喝一喝下座

箸庵問禪師元旦陞座山僧有一句子去年不曾道前年不曾道先前年不曾道幸逢時節因緣豈可等閒拋却諸上座一總立定聽山僧爲你舉似以拄杖橫按云大明國土中崇禎聖天子在上十五年過了歲序逢正今日是第一日

元旦上堂首出庶物萬國咸寧朝來洗面摸著鼻一陣好風來戶清燈籠傾聽露柱側聆放出樵童牧豎縱橫敵勝驚群一任高高山頂立深深水底行大家把手樂昇平且把手一句作麼生決定今年蠶麥熟羅睺羅兒與一文

元旦上堂祖師心印狀似鐵牛之機去卽印住住卽印破孤峯凜凜赤手全提你纔恁麼我不恁麼你不恁麼我却恁麼主賓互換權實雙彰是他伶俐衲僧自然緇素迥別忽若圓圖吞棗不免孤他先聖味自己靈山河大地礙却眼光明暗色空填置胸臆栗棘蓬且作麼生吞金剛圈且作麼生跳臨濟三玄洞山五位翻成剎法所以道得之於心伊爾作栴檀之樹失之於旨甘露乃蒺藜之園到者裏忽有箇漢出來

拈頭作尾拈尾作頭能爲佛祖之師堪作人天之眼  
鑿室拄杖兩手分付有麼元正咨祚萬物咸亨應時  
納祐慶無不宜喝一喝下座

元日陞座徹骨徹髓坐斷千山截鐵斬釘整新一句  
以此報國以此福民以此利益群生以此展開家法  
直得龍吟霧起虎嘯風生萬象昭回森羅顯煥頭頭  
成現法法全彰洞明佛祖向上一機廓示人天正法  
眼藏放行也不動一絲毫把住也何曾匿光彩伶俐  
漢向者裏著得一隻眼便能荷負綱宗提持大法匡  
扶知識贊彌叢林拈芥子作須彌轉長河爲酥酪慶  
一人之有道樂四海之宴清共助無爲同明化日也  
不爲分外且道正當恁麼時還有恁麼人麼卓拄杖  
云一點春和資氣力萬年松挺雪霜姿

弘覺恣禪師歲旦上堂元正啓祚萬物咸新恭惟首  
座大眾各各道體起居萬福薰撫掌呵呵大咲云好  
咲好咲咲得人肚腸筋欲斷你道山僧咲箇甚麼昨  
夜四更頭大禹王成湯王周武王相共拜賀新正因  
卽雲門山頂大晏昊天玉闕之宮酒半酣間武王起

身勸飲行箇令子以新正卽景席上生風爲號勝者  
免飲負者罰酒於是載言曰天開於子地闢於丑人  
生於寅周正建子天統也商正建丑地統也夏正建  
寅人統也三才者天爲首地次之人又次之商王負  
夏禹王大負當飲青州從事三大甌飛觥欲舉湯王  
曰寡人不應受罰易曰乾在坤上曰否坤在乾上曰  
泰然則周王固欲否而不欲泰乎夏禹王曰寡人亦  
不應受罰書曰天降下民作之君作之師夏正建寅  
所以便民事也是故顏淵問爲邦子曰行夏之時不  
覺語高聲喧驚醒了山洞裏石陳搏底睡起來打箇  
呵欠矢口朗吟曰洞裏無雲別有天桃花如錦柳如  
烟仙家不會論冬夏石爛松枯又一年三后聞之無  
著慚惶處亟命車駕司回輦而去爾等諸人還曾得  
知也未喝一喝云除却華山陳處士誰人不帶是非  
行

朝宗忍禪師元旦上堂拈香云此一瓣香祝延當今  
新帝聖壽無疆伏願清四海之妖氛大中興之德業  
問答 乃云若論此事如老年底人與少年底人過節



相似總是箇歲朝景況若是少年底人便覺自身與目前一切人境煥然一新卽向來所厭所棄底亦頓改觀咸同慶賀欣喜無量正所謂說似人不得呈似人不得底境界若是老年底人經歷已多雖亦共相拜慶未免一切平懷所以道任從天下樂欣欣我獨不肯又道八十翁翁入場屋真誠不是小兒戲此便是從上最初末後底關節諸人若能透此兩關自然親見古人立地處雖然只如不老不少底人又似箇甚麼焉云新年頭佛法不可多說且待諸人透此兩關來更向你說下座

### 立春日提綱

長慶圓禪師立春上堂寒氣將殘春日到無索鐵牛皆踴跳築著崑崙鼻孔頭觸倒須彌成糞掃收童兒鞭棄了懶吹無孔笛拍手呵呵笑歸去來兮歸去來煙霞深處和衣倒良久曰切忌睡著

中庵空禪師春日上堂拈拄杖卓一下云先打春牛頭又卓一下曰後打春牛尾驚起虛空入藕絲裏釋迦無路潛蹤彌勒急走千里文殊却知落處拊掌大

笑歡喜且道歡喜箇甚麼春風昨夜入門來便見千華生確嘴

斷橋倫禪師立春上堂學達觀顓禪師示衆云七佛是處隸萬法是心奴且道主人翁在甚麼處自喝云七佛已下出頭又自諾云各自祇候師云喚七佛爲性隸指萬法是心奴達觀自謂有出身路及乎自喝自諾又是奴隸邊事主人翁何曾夢見在大衆要見麼以拂子拂一拂云曉來一陣春風動開遍園林百樣花

雪巖欽禪師立春上堂春風蕩蕩春日熙熙花開笑面柳展歡眉處處呢喃紫燕聲聲曉曉黃鸝麻三斤乾屎橛庭前栢樹子者裏見得全理全事無是無非坐斷集雲峯頂上大家齊賀太平時

月江印禪師立春上堂立春之日百事大吉門上釘桃符籬頭吹筆築林下參玄人有口只挂壁泥牛鞭起越春耕通身總是黃金骨

密雲悟禪師立春上堂無影枝頭一點春可憐大地盡埋塵陳年宿債昨宵盡錯謂今朝又是新喝一喝

云舉頭天外看誰是箇般人復喝一喝下座

玉林琇禪師立春因事小參春風吹春雨潤忽地園  
林秀且媚無根樹子也開華試問禪家會不會顧視  
左右云若也會得佛法叢林時茂盛若也未會禪  
林秋晚卒風暴雨頗多衆兄弟善自護持莫被風力  
所轉卓拄杖

牧雲門禪師上堂人日立春宇宙斬新雪消冰解萬  
木欣欣正恁麼時無位真人向面門突出把定世界  
直得日月未足爲明虛空未足爲廣泰山未足爲高  
江海未足爲深黑漫漫地填溝塞壑且如何是不壞  
世相放行一句淑氣催黃鳥晴光轉綠蘋下座

立春上堂靈樞密運四序推移天地之間其猶橐籥  
看看冬到來即便春風至長連床上學得底是第二  
機若是第一機天下老和尚未曾提著山僧又如何  
折合舉拂云看看五彩畫頭黃金點額復擊一鑿云  
好好一隻春牛被僧山一鞭粉碎了也聞一知二從  
他徧界分身認影迷頭一任眼瞎瞋地  
立春小參五九四十五窮漢街頭舞舞卽舞尙有春

風四十五若作世諦流布一卷好經被歪嘴和尚念  
壞畢竟如何噴嚏一下云春朝打嚏百事大吉

弘覺志禪師立春上堂休言水土北來愁紅杏長開  
月二三但願東風齊著力不單春色在江南大衆五  
九盡日又逢春了也轉盼之間桃紅柳綠白牡丹紅  
芍藥文官果頻婆果開徧園林有日在第不審諸人  
心華幾時發明若也未得發明山僧昔年行脚在黃  
蘗傳得諸葛武侯與曹操鏖兵赤壁時因吳將周公  
瑾欲用火攻爲渠借轉東南風底祭法不免舉行一  
上上天皇皇下十茫茫卽有山東青州府益都縣大  
覺禪寺住持某乙一心虔請司風使者主風神王盤  
中有饌壺中有漿沈醉東風願東風火速發揚胡盧  
胡盧卽今東風已到待渠試爲諸人著力看拽拄杖  
下座一時打散歸方丈

元宵日提綱

五祖演禪師上堂今宵正月半乾坤都一片普賢門  
大開相逢不相見乃云過在阿誰

上堂今朝正月半與諸人相見嫩麥長新苗粒粒皆

成麵薦不薦全藉春風扇

大慧杲禪師上堂今朝正月半有則舊公案點起數盃燈打鼓普請看看即不無忽爾油盡燈滅時暗地裏切忌撞著露柱

上堂元宵佳節同歡樂處處咸燃無盡燈火光燦破勝熱面夜神忽患冷頭疼參

應庵華禪師上元日上堂十五日已前提水放火十五日已後雀噪鷄鳴正當十五日風恬浪靜雨順風調民安國泰有一句到你啞却我口無一句子到你瞎却你眼三文錢娶箇黑老婆頭不梳面不洗知他是凡是聖薦拍禪床一下云不入驚人浪難尋稱意魚

上元日上堂去年無此雪今年有此雪人皆怨此雪不見元宵燈與月莫怨雪自是時人無辨別堪辨別一片清光倚寥沉

密庵傑禪師上元上堂今朝上元節是處挂燈毯一燈然百千鐙鐙相續重重無盡如寶絲網三世諸佛向光影裏出現六代祖師向光影裏說法度人四

聖六凡向光影裏頭出頭沒山河大地向光影裏成立諸人若信得及去覓其光影來處了不可得便乃坐斷報化佛頭若信不及十二時中被光影使得七顛八倒

上堂今朝正月半普請大家看過去燈明如來在汝諸人脚跟下放光動地還見麼若也見得神頭鬼面裏元來有人在若見不得切忌撞牆撞壁

上元上堂十五日已前明頭來明頭打十五日已後暗頭來暗頭打正當十五日一鐙燃百千鐙鐙相續廓徹聖凡觀世音菩薩將錢買胡餅放下因什麼却是箇鐵酸躡若作佛法商量故是匙挑不上不作佛法商量平地陷人無數總不與麼也是食飽傷心下座

無用寬禪師元宵上堂者一點子光明歷劫不被人瞞汝等小根淺德只去經教中文書裏尋行數墨胡鑽亂鑽縱使辯才無礙也只是會得箇乾慧陸過了光陰好的勾當千般萬般無用老人今日不惜口業捋下面皮與你明白說破教你休去歇去萬年一念

一念萬年非惟一生受用免致永墮黃泉伶俐衲子  
剔起心鏡照徹無量無邊卓拄杖一下喝一喝云參  
堂去下座

雪巖欽禪師元宵上堂元宵令節且喜天晴高燒銀  
燭照佛光明集雲峯無油不點非常烜赫迥出常情  
何也我見燈明佛本光瑞如此

元宵上堂去歲元宵節無油不點燈今歲元宵節有  
月照危巖藥師琉璃光佛示現端嚴妙相一一在諸  
人眉毛眼睫上放大光明還見麼見被見礙不見被  
不見礙去却見除却礙三門與佛殿相對

元宵上堂雨中燈雲中月最分明太皎潔汝等諸人  
聞恁麼道將謂夢中說夢殊不知荊棘林中一片田  
園迥別且道與仰山相去多少吳車同轍

高峯妙禪師元宵上堂參禪須是鐵漢著手心頭便  
判只如雪覆千山孤峯不白作麼生判擲拄杖云上  
元定是正月半

中峯本禪師元宵示衆須彌燈王如來與藥師琉璃  
光佛昨夜在十字街頭相遇乃攜手看鼇山燈火忽

撞見箇龐眉雪頂老漢向白衆人前說四句偈謂惟  
心卽佛卽佛惟此話相傳占到今對面不知燈是  
火區區徒向外邊尋時二如來忍俊不禁乃厲聲曰  
你說也是惟欠悟在只箇卽心是佛卽佛惟心說與  
三歲小兒悉皆領會奈何不悟說食不療饑也請問  
時消息乃曰試以喻明有人失去徑寸之珠雖百  
千兩金不足與較其價之輕重使此珠不獲雖萬死  
莫酬其尋求之心鏤之肺腑刻之心膺形之夢寐貫  
之見聞念念不忘孜孜不捨一日不獲則一日之念  
不休一年不獲則一年之心不廢愈不見愈精勤益  
不獲益勇銳乃至情消想竭思苦神窮寒暑兩忘寢  
食俱廢積年累歲正於無可捉摸處驚忽入手圓陀  
陀光漾漾其三十年馳求之心一時頓息是謂悟也  
其尋覓此珠於心勸形察之際豈非參乎忽頓現此  
珠於神明意朗之頃豈一悟乎苟不因參尋之難安  
有此悟獲之喜也與論至此忽被箇傍不甘底一喝  
喝散惟見燈自是燈火自是火樓臺突兀車馬交馳  
華敷井井金蓮燄續條條玉燭胡張三黑李四萬人

海裏醉扶歸查沙鬼大齋郎百戲場中狂未歇正恁  
麼時且不涉悟迷共樂昇平底句如何學似琉璃滿  
腹藏明月箇箇渾身放寶光

無文璨禪師元宵上堂豎拂子云肥不剩肉瘦不露  
骨動地放光明眼睛烏律律山僧見了未免合掌讚  
歎道箇不是心不是佛不是物

佛國白禪師上堂過去已過去未來且莫算正當現  
在事今朝正月半明月正團圓打鼓普請看大眾看  
卽不無畢竟喚甚麼作月休於天上覓莫向水中尋  
法泰禪師上堂今朝正月已半是處燈火繚亂滿城  
羅綺駢闐交互往來遊翫文殊走入關籃中普賢端  
坐高樓看且道觀音在甚麼處震天椎鼓聒地奏  
笙歌

竹泉林禪師元宵上堂今朝上元節雪霽見晴春梵  
刹鐙千點長空月一輪鼓鐘喧靜夜歌管闌比隣總  
是圓通境何須別問津

上堂古杭管內靈隱名山肇建於東晉咸和年間慧  
理法師爲第一祖今日上元令節諸處放燈知事直

歲各各照管風燭下座

藏叟珍禪師元宵上堂春雪寒春宵短古佛心破燈  
盞正法眼乾紙撚抖擻精神只管看看到北斗西移  
南斗東轉上元依舊正月半

天目禮禪師元宵上堂三元宵節燒鐙奪夜寒滿  
城人共賞徹曉恁歌歡燃鐙古佛闕闕地更無一人  
識他且道廣壽還識也無乃云不識不識

元宵上堂昨夜摩騰法師徧點蓮燈助佛光明直得  
善信真人失却光彩太白龍王出來道我從龍種上  
尊王佛時便住此山未聞有者箇消息於是空中打  
箇閃電變作滿天黑風暴雨還委悉麼我見鐙明佛  
本光瑞如此

元叟端禪師元宵上堂并謝監收浴主維那千粒萬  
粒從一粒生只者一粒從甚處生千鐙萬鐙從一鐙  
起只者一鐙從甚處起識得一鐙千鐙萬鐙鐙鐙不  
疑識得一粒千粒萬粒粒粒無礙三脚驢子弄蹄行  
踏破無邊香水海拈拄杖卓一卓頂門也少者一槌  
不得



上元上堂盡大地是一碗燈三世諸佛六代祖師天下老和尚在燈影裏橫屍露骨進一步築碎迦腦門退一步踏折達磨脊梁不進不退坐在臨濟德山鼻尖上且作麼生得平展去良久云海枯終見底人死不知心

定慧式禪師元宵上堂一月初圓百川澄影一燈發彩萬炷流輝月無留影之心燈無傳輝之念若得如是可以處於誼譁入手塵俗運大悲光於沙界開普門眼於生靈豈惟觀音大士三十二種妙應無方具縛凡夫一一皆能開正法眼雖然如是也須是斬釘截鐵漢始得其或不然靜處薩婆訶

恕中愠禪師元宵上堂天上月圓人間燈晃曠劫來事不隔纖塵有佛處不得住無佛處急走過

元宵請後堂首座上堂曠大劫來燈一碗照天照地幾人知要看不盡傳持處兜率宮中夢覺時

月江印禪師元宵上堂今朝正月十五處處村歌社舞曲糸床上老僧隨分說佛說祖雪峯輓毬禾山打鼓驚起東海鯉魚吞却南山猛虎報諸人休莽鹵我

見燈明火光瑞如此

用韻俊禪師元宵上堂燃燈前色空明暗兩無偏燃燈後大地山河顛倒走正燃燈萬別千差一道明火照火兮如白晝光吞光也見真燈擊拂子下座

元宵上堂證明佛以一光散作百千萬億光謂之現

瑞瑞嚴以百千萬億本光聚作一光亦謂之現瑞古

今日月古今山河古今光明古今祥瑞且道證明佛光與

瑞嚴之光是同是別廣南除夜內涼五臺六月下雪

楚石琦禪師元宵上堂烈燄爐中撈得月此月了無

間缺大洋海底剔金鐙此鐙不屬晦明正當正月十

五日上天人問標不出黑似漆明如日自古自今誰

得誰失皆吾心之常分非有假於他術喝一喝

元宵上堂今朝正月半鐙月光撩亂目前無一物打

鼓普請看復云刺破眼

元宵上堂一切月以一月爲真一切鐙以一鐙爲體

一卽一切一切卽一一從甚麼處起泊合錯下註脚

元宵懺會上堂有一人具大闢提作無間業捨戒定

慧行貪瞋癡栽蒺藜於三有田中種荊棘於一真地

上乃至謗佛毀法破和合僧寧可永劫沉淪不求諸  
聖解脫直待一切衆生成佛盡乃發阿耨多羅三藐  
三菩提心未審此人如何懺悔良久鑊湯鑊炭吹教  
滅劍樹刀山喝使摧

元宵上堂始賀大年朝又當正月半看看百草長急  
急三春換世事密如麻光陰忙似鑽杖頭窟磊子舉  
動令人羨村歌社舞鬪施呈直截示人人不薦  
了庵欲禪師元宵上堂鏡鏡交輝燈燈相燭境智互  
融事理俱備喚作華藏性海正是平地揚波直饒盡  
乾坤大地無纖毫過思猶是轉句不見一色始是半  
提更須知有全提時節便怎麼去法堂前何止草深  
一丈放過一著有箇商量山門新舊知事隨年進退  
因時請得首座表率維那舉唱洗光佛日重整顏綱  
見前諸德一一循規守矩人人舍短從長信手揭開  
釋迦老子青蓮華眼徐步踏著達摩大師生鐵脊梁  
有底碩學飽參與汝證據無底良辰美景與汝敷揚  
以拂子置一盞云好事不須頻話會留將和氣暖肝  
腸

元宵進退兩序上堂十五日已前明中有暗十五日  
已後暗中有明正當十五日明暗雙忘體用俱寂譬  
如千鐙洞照一室光光交羅各不相借且道是知事  
分上事頭首分上事諸人分上事莫有道得底麼拈  
拄杖卓一下云蠅螟睫上放元宵狸奴倒上菩提樹  
元宵進退兩序上堂以字既不成八字亦不是侍者  
參得禪畢竟誰相委三脚驢子弄蹄行八臂那吒關  
不住覺皇殿上慶賞元宵妙觸宣明成佛子住擊拂  
子云相逢不飲空歸去洞裏桃花解笑人復舉藥山  
謂雲巖云與我喚沙彌來巖云和尚喚他作甚麼山  
云我有箇折脚鐺子要伊提上挈下巖云與麼則與  
和尚共出隻手巖庵和尚云藥山道頭雲巖知尾雖  
然頭尾兩全要且不識羞恥師云老應庵只知其一  
不知其二然儉生不孝義出豐年彼時藥山一箇折  
脚鐺子只消雲巖提上挈下已自有餘較之本覺今  
日若非兩班賢佐協力扶持便見灰寒火冷以故不  
蓄菰藿粒米直教來者飽駒駒地去豈不出他古人  
還委悉麼雪後始知松栢操事難方見丈夫心

元宵上堂釋迦老子道一人發真歸元十方虛空悉皆消殞五祖和尚道一人發真歸元十方虛空築著磕著若向築著磕著處會得只會祖師禪不會如來禪若向悉皆消殞處會得只會得如來禪要且未會祖師禪山僧道一人發真歸元十方虛空性相平等且道是祖師禪如來禪喝一喝云一釋迦二元和三佛陀自餘是甚麼盤脫丘

元宵上堂若論此事正如一燈分爲千鏡鏡鏡相續無有窮盡在東則爲知事在西則爲頭首在方丈則爲住持在閒寮則爲耆舊至於三條椽下七尺單前經行坐臥卷舒出沒莫不以此鏡而爲佛事一明一切明一用一切用重重主伴歷歷交參無黨無偏無新無故只貴現成受用到頭不涉安排任是拈狗泥猪少他一分不得擊拂子一氣不言含有象萬靈何處謝無私

元宵南山和尚至上堂盡法界是一真鏡徧塵區是一佛刹靈利漢一踏踏翻非惟可以觀光上國獨步大方便乃控佛祖宏機廓人天幽跡好大衆頭峭五

嶽眼生三角左刮龜毛右截兔角焦尾忽乘雲雷飛金毛亂觸日月落月裏仙人巧畫眉九遠播動黃金鐸喝一喝

元宵上堂十五日已前明不見暗十五日已後暗不見明正當十五日譬如一室中然一鏡外懸十鏡鏡鏡交輝重重無盡喚作境智互融事理俱備不妨奇特若約衲僧分上正是抱橋柱洗澡把纜放船有甚共語處豈不見臨濟曾下兩堂首座相見同時下喝直是賓主歷然若也見得非惟慶快平生光揚宗眼便可向高高峯頂行船深深海底走馬利劍提來斬萬機將報不平繞天下喝

愚庵及禪師上堂今朝正月十五開却千門萬戶斬新舊日風規掃蕩陳年露布良久云春暖畫堂多富貴夜深鏡月兩相宜

元宵上堂人人自有光明在看時不見暗昏昏既是自己光明因甚看時不見驚拈拄杖敲燭臺云一鏡發千光千光一鏡見

上堂十五日已前春雨如膏十五日已後春光似箭

正當十五日管絃沸月宣和氣鐙火燒空奪夜寒拈  
鐙籠來佛殿裏將山門安鐙籠上一切智智清淨無  
二無二分無別無斷故薰拈拄杖云三歲孩兒抱花  
鼓莫來攔我毬門路

天真則禪師元宵上堂元宵月正圓因甚道月半殘  
子撲落地樸子成兩片直得鬱藍天上樂奏昇平安  
竭海中金鰲鼓舞帝網重重發現百千日月交輝總  
與麼薦得早是隨他光影轉且道畢竟如何擊拂子  
云醉乘白鶴登雲闕夢跨青鸞人絳宮酒醒眼開俱  
不見閒花野草自春風

石屋珙禪師元宵謝東班殿主并無念西堂上堂進  
以禮退以禮天地與我同根萬物與我一體爛生薑  
陳皂角舊笊籬破木杓東頭賣賤西頭賣貴有利無  
利不離行市夜來無位真人提金剛圈點飛龍馬走  
徧四天下却與寰中和尙在蟻螟眼裡共賞元宵天  
曉起來依然在赤肉團上卓拄杖一下云我見鐙  
明佛本光瑞如此

元宵上堂山堂元坐思悠悠節令推遷莫暫留新歲

始聞歌鼓吹元宵又見挂鐙毬心田荊棘參天長業  
海波濤滾底流不向死前先畫策草根從自鑠枯骸  
元宵上堂南閣浮地以音聲爲佛事十方俱擊鼓十  
處一時聞福源寺裏上堂西林寺裡一一聽得西林  
寺裏念佛福源寺裡一一聽得讚歎也獲一分功德  
毀謗也獲一分功德一卽一切一切卽一鸚湖市上  
做元宵因甚東家點鐙西家暗坐你也理會不得我  
也理會不得冷水浸冬瓜大家相湮湮

天隱修禪師元夕上堂然鐙佛爲汝諸人授記去也  
以拄杖右邊卓一下釋迦牟尼過者邊著復以拄杖  
左邊卓一下慈氏世尊過者邊著且道今當第幾以  
拄杖中間卓一下誰取正眼觀著擲拄杖下座

筍庵問禪師元宵解制上堂來底白來去底自去水  
上葫蘆按捺不住是則蝦蟆跳上天不是則大蟲吞  
却虎是與不是互相鈍置碧眼黃頭何本可據無繩  
白縛去死十分有眼如盲調絃膠柱何似生遼天鶴  
萬里雲只一突鬼爭漆桶夜相揩本光照見鐙明佛

二月閉鑪日提綱

雪嶠信禪師罷鑪上堂一二三四五六七八九何峰頭  
獨足立良久云一期過了堂中不見一箇半箇且喜  
太平十字街頭撞著馬相公與你索飯錢你作麼生  
抵對喝一喝春風日日到園林夜夜面南看北斗  
牧雲門禪師罷鑪上堂孟冬十月記開鑪看看逗到  
上元時雖然村落無鐙火別有光明一段奇諸人若  
也尙留觀聽古南未免從胸記字涌出寶光慙慙相  
送薰拈拄杖云者木上座又道不必不必何故擲下  
云家家門前火把子

列祖提綱錄卷第三十九

列祖提綱錄卷第四十

武林十八澗理安禪寺住持婁東行悅集

寒食提綱三月

雲峰悅禪師寒食日上堂諸上座還會麼冬至寒食  
一百五家家塚上添新土翻思拾得與寒山南北東  
西太莽鹵南泉不打鹽官鼓以拂塵禪床下座

五祖演禪師寒食小參李白桃紅山青水綠雲橫洞  
口月皎長空只向者裏薦得法眼道月明幽室寒星  
分拱辰巽便須瓦解冰消韶國師道通玄峰頂不是  
人間心外無法滿目青山亦須百雜碎何也盡乾坤  
大地不消一捏然雖如是事無一向今夜且放過一  
著

慧遠海禪師上堂好是仲春漸暖那堪寒食清明萬  
疊雲山綠翠一天風月長隣在處華紅柳綠湖天浪  
穩風平山禽枝上語諄諄再三瑣瑣碎碎囑付叮叮  
嚶嚶你且道叮嚶囑付箇甚麼卓拄杖日記取明年  
今日依舊寒食清明

眞定府洪濟宗願禪師上堂冬去寒食一百單五活  
人路上死人無數頭鑽荆棘林將謂衆生苦拜掃事  
如何骨堆上添土唯有出家人不踏無生路大衆且  
道向甚處去還會麼南天台北五臺參

無文璨禪師清明上堂桃花無數李花無數若向者  
裏活眼不開平地上死人更是無數去年踏青人今  
年不來今年上墳底明年何處日月急如梭生死何



定據謹白參玄人光陰莫虛度

了庵欲禪師清明上堂冬至寒食一百五今朝正是三月六山又綠水又綠一聲款乃漁家曲山僧昨日偶爾郊行作得一偈學似大衆華冠不整舍那衣禿帚還隨破香箕五箇老婆三箇醜一雙紅杏換消梨下座

法舟濟禪師清明示衆驚語驚啼桃紅柳綠風月晴和春光滿目一般富貴江山却有兩般境界山僧雖則不管閒非也與諸人說箇閒架有的笙歌鼎沸羅綺駢闐人醉處玉樓窈窕馬嘶邊翠草生煙有的向楸梧塚畔松栢塋前呼孃叫子擲地號天縱噀咽煩冤莫訴任揮淚悲苦難宣者兩般人樂者樂徹心源苦者苦入骨髓山僧者裏看來却好箇如幻法門一相三昧且如何是一相三昧卓拄杖云愁人莫向愁人說說與愁人愁殺人

湛然澄禪師清明示衆綠滿園林翠欲流子規啼血正綢繆紙灰堆滿三尺塚哭倒斜陽恨未休大衆爲人一世收成結果不過如是而已須知大千世界一

丘塚去來生死總在裏許你以長河爲酥酪祭獻此人他亦不受且道爲甚暫

山茨際禪師清明示衆春朝晴日望飛煙半是人家燒紙錢本有爺娘渾不識却看黃土哭蒼天

鋪帳簾提綱四月

雪巖欽禪師上堂鋪帳簾青碧紗廚涼簾水鋪三伏暑威不到水晶宮闕不如敢問諸人畢竟與洞山道向鑊湯爐炭裏回避還有商量處也無卓拄杖云蚊子上鐵牛

端午提綱五月

眞淨文禪師上堂今朝五月復端午隨衆生心解分布糴子雖然應所知要須一一知來處且道從什麼處來薰拈拄杖云若知拄杖子來處卽知一切法來處所以隨衆生心應所知量循業發現只如大衆從什麼處發現一一分明在目前若知發現不妨奇特若也不知何名出家遂擲下云只者末後一著也大難會喝一喝下座

五祖演禪師端午上堂今日端午節白雲有一道神

符也有些小靈驗不敢隱藏舉似諸人一要今上皇帝太后聖躬萬歲二要合朝卿相文武百官州縣寮察管居祿位三要萬民樂業兩順風調有箇符使却來報白雲道諸處盡去徧只爲神通小不柰一件事何遂問他是甚事使云禪和子鼻孔透天白雲向伊說莫道你我尙不柰何然雖如是澤廣藏山理能伏豹畢竟如何一抽三三添四黃牛角向天八脚垂過鼻急急下座

端午上堂舉昔日有秀才造無鬼論論就纔放筆有鬼現身斫手謂秀才云你爭柰我何白雲當時若見便以手作鶻鳩嘴向伊道谷谷孤

圓悟勤禪師端午上堂新月如鉤輕雲映火山前夢熟篋裏蠶繰田夫戡戡栽苗柳岸垂垂之線風調雨順盜賊消禳我輩林下之人一餉非常變快纔作此語鷲地有箇符使出來道山前諸處五瘟行疫病太甚欲就和尙覓箇神符往前驅逐山僧遂以拄杖畫一圓相與之瞥然不見逡巡却來道五瘟疫鬼已驅向他方世界去也只有一事待請益和尙此靈驗神

符從何處得來山僧劈脊便打當下滅跡消聲因行掉臂成箇頌子五月五日天中節赤口毒舌盡消滅五月五日午時書放下蛇頭捋虎鬚

龍門遠禪師上堂今日端午世間人釘桃符書門闥使萬邪不窺其戶百鬼不入其門世間人又使針燒炙採藥登山使萬病不干其體疫癘不入其身遂失聲叫曰阿哪哪阿哪哪盡大地人燒破皮肉教山僧受無限苦痛昔楚大夫以忠言不用沉于湘江後人哀之以竹筒盛飯繫五色絲祭之風俗至今流傳不斷遂嘔吐數聲曰世間人喫却米糲教老僧脹破肚皮大衆別人燒炙別人喫物爲甚麼龍門長老受痛受飽未能情忘緣慮事出見聞於此門中遂爲戲論豈不見先聖有言曰懷州牛喫禾益州馬腹脹天下覓醫人灸猪左膊上何也遠走不如近匍匐久立大慧杲禪師上堂今朝又是五月五大鬼拍手小鬼舞驚然撞著桃符神兩手椎胸叫冤苦艾人云休叫苦遂拈拄杖卓一下云只有一處堪回互回互不回互回而更相涉擲下云不爾依位住參

端午示衆拈拄杖舉雲門大師道從上諸聖爲甚麼不到者裏蓮華峰庵主道古人到者裏爲什麼不肯住師云二尊宿折東籬補西壁抱橋柱洗澡把纜放船卽不無要且無爲人底道理雲門卽不然未到者裏教伊到已到者裏教伊頭破腦裂且道還有爲人處也無良久云一二三四五虛空闕處補五四三二一當門書大吉好手揮斤去鼻泥衲僧機妙安能識驀然識百草頭邊露消息且作麼生是露底消息庵陪臨庵箇臨急急如律令卓一下

上堂今朝五月五天降沛然雨友人與門神聚頭相耳語且道說箇什麼雪竇禪師來一口吞佛祖

上堂今朝又是端午節文殊善財忙不徹殺人活人藥不靈自添腦後三斤鐵纂拈拄杖卓一下云觀音妙智力能救世間苦遂擲下云是什麼鐵蛇鑽入土應庵華禪師端午上堂五月五日端午節好事當陽難掩塞歸宗突出拄杖頭閒神野鬼俱消滅砌下寒泉忽倒流嶺上白雲不敢白復學文殊一日令善財採藥云是藥者採將來善財徧採無不是藥却來白

云無不是藥者文殊云是藥者採將來善財拈一莖草與文殊文殊提起示衆云此藥亦能殺人亦能活人師云大小文殊被善財換却眼睛下座

端午上堂一二三四五五四三二一從頭檢點來笑殺維摩詰帶累李翳子噴水髭鬚濕灑淨已周圍大念波羅密蔭山怎麼道千古誰人識識不識何處覓堪與叢林爲軌則驀拈拄杖卓一卓云急急如律令勅

或菴體禪師端午上堂天下今朝是端午元來覺報無門戶野鬼閒神枉出頭赤口白口空婆娑平居更不釘桃符號令只擲塗毒鼓若還耳見眼聞聲管取縱橫超佛祖

密庵傑禪師端午上堂五月五日端午節陰雲變難甘雨未決君王降賜寶香林下祈求懇切孚祐龍善時節好將一雨潤焦枯匝地清涼消惱熱記得僧問乾峰十方薄伽梵一路涅槃門未審路頭在什麼處峰以拄杖子畫一畫云在者裏僧後請益雲門門拈手中扇云扇子踴跳上三十三天築著帝釋鼻孔東

海鯉魚打一棒雨似盆傾大衆乾峰搖頭雲門擺尾  
亘古亘今挂人唇齒徑山有條攀條拈拄杖擲下云  
會看雲雷般地起

兜率慧照禪師上堂舉拂子曰端午龍安亦鼓撈青  
山雲裏得逍遙饑餐渴飲無窮樂誰愛爭先奪錦標  
却向乾地上划船高山頭起浪明樵玉鼓暗展鐵旗  
一盞菖蒲茶數箇沙糖粽且移此鬱單越來與南閩  
浮提鬪額看擊禪床下座

雪巖欽禪師端午上堂天悠悠雲悠悠輓底浪花翻  
雪競龍舟當是時也可笑三閭楚大夫正在死水裏  
浸殺浸不殺千古萬古湘江濶

鐵關樞禪師端午上堂今朝五月五打動震天鼓豎  
拂子托出無底盤滿釘黃金黍禪流板齒無毛到此  
如何吞吐解吞吐達磨大師不是祖

中峰本禪師端午示衆春秋夏五不書其月記史之  
人乃疑文闕闕不闕十字街頭石敢當恣向人前逞  
妖孽倒騎艾虎上高樓背挂神符施妙訣禁赤口消  
白舌收卷門門五色錢將謂無人能鑑別忽被無手

法師劈臂搗住拽向蟬螳眼中却把真機多漏泄且  
漏泄底在甚麼處庭中一樹石榴花曉日照開如潑  
血

千巖長禪師端午上堂夏日喫麥粥頭頂茅草屋東  
司雨淋淋無處可下足中有老頭陀豈可稱尊宿可  
憐諸禪和剛要相攢簇雖然無受用且喜相和睦健  
者共成禪病者奉水菽今朝端午節無酒又無肉擎  
出一杯茶滿泛菖蒲玉且道成得甚麼事人情若好  
喫水也甜

唯庵然禪師端午上堂黃米粽喫一鉢菖蒲茶喫半  
甌箇是衲僧好時節大家相見飽齣齣縱橫自在自  
樂自由說甚仰山開畚潏山牯牛禾山打鼓雪峰輓  
毬總是小兒襍劇且非先德宗猷只如端午掩殃一  
句又作麼生目前無怪異不用貼鐘馗

端午上堂諸方盡喫菖蒲茶唯我自酌青原酒儲備  
闌闌發頭狂打落南辰連北斗擲拄杖下座  
南石琇禪師端午上堂是處人家懸艾虎靈巖但喫  
菖蒲茶莫言淡薄無滋味畢竟風流出富家

了庵欲禪師上堂聞聲悟道見色明心鵲噪鴉鳴風動塵起疑人面前不得說夢僧問趙州如何是祖師西來意州云庭前柏樹子深山藏獨虎淺草露群蛇一年一度天中節細切菖蒲泛醖茶下座

上堂五月五天中節不書符不捏訣放教心地坦然平百怪千妖自消滅豈不見文殊一日令善財採藥善財云無不是藥者文殊云是藥採將來善財拈一莖草度與文殊文殊接得示衆云此藥亦能殺人亦能活人天童華和尚云大小文殊被善財換却眼睛大衆應庵老人可使爲百世宗師要且只知其一不知其二山僧道一手不獨拍兩手鳴摑摑擔板禪和氣食牛擡頭只道乾坤窄喝

上堂時節不相饒今朝五月五東家釘桃符西家懸艾虎孤峰絕頂頭也須資一路拈起須彌髓且擊虛空鼓翻身躍倒鬼門關大地山河無寸土喝一喝下座

廣慧寶琳禪師午節上堂今朝五月五百草靈苗誰不覩善財採藥與文殊殺活臨機互爲主禪家流莫

莽園眨上眉毛好看取信手拈來知不却甜者甜兮苦者苦

元叟端禪師端午上堂五月五日端午節艾虎桃符總休說鳳山只箇金剛王百怪千妖俱殄滅江南兩浙春寒秋熱觀世音菩薩將錢買胡餅放下手却是生鐵

午節上堂中峰今朝五月五且無桃符并艾虎當陽直截便却機妙用縱橫絕方所稱僧家休莽園甜瓜徹蒂甜苦瓠連根苦

恕中愍禪師端午上堂龍牙和尚云學道先須有悟由還如曾關快龍舟雖然舊閣閒田地一度贏來方始休大小龍牙見地不脫坐在者裏山僧不惜眉毛爲地撥開一路便見功超一切道絕名言乃云迷悟從來總自由要須平地上行舟乾坤儘侗無今古千載清風卒未休就中忽有出來道瑞巖也是釘椿搖櫓阿呵呵將謂無人便下座

端午上堂五月五日端午節競渡江頭歌管咽禪僧共啜菖蒲茶無限馨香生頰舌百病消除千妖殄滅



文殊令善財採藥善財拈草度與文殊石上栽華文殊接得示衆云此藥亦能殺人亦能活人空中釘橛顧視左右云莫有與文殊善財作主底麼喝一喝用彰俊禪師端午上堂學五祖端陽示衆云昔日有秀才造無鬼論論就纔放筆有鬼現身斫手謂秀才云你爭奈我何白雲當時若見便以手作鴉鳩嘴向伊道谷谷呱呱拈云無鬼論就有鬼現形置之莫問五祖以手作鴉鳩嘴也是隨邪逐惡瑞巖家無白澤之圖亦無如是妖怪

天目禮禪師端午上堂月屆魁賓節臨重午不鬪龍舟不喧鼙鼓山中藥草信手拈來舉拂子云見麼亦能殺人亦能活人其或未然菖蒲浮苦茗角黍膩人牙擊拂子一下笑隱訢禪師端午上堂盡大地是藥信手拈來草文殊與善財一起復一倒當機解變通更問中峰老日中或饑或飽夜後蚊蟲獨蚤事事求如意日日添煩惱有事不如無事好楚石琦禪師端午上堂今朝五月五不打毒芸鼓荒

却自家田畝却家中主報諸人休莽爾赤口白舌盡消除無位真人汗如雨

端午上堂今朝五月五艾人騎艾虎南北東西走一遭回來說道大地衆生皆受苦所謂生苦老苦病苦死苦乃至五陰盛苦一切諸苦皆可醫惟有禪和子心病最難醫用不得砒霜石蜜甘草陳皮作麼生醫得我有一隻古方無有醫不得者僧問趙州學人乍入叢林乞師方便州云喫粥了也未僧云喫粥了也州云洗鉢盂去粥了洗鉢不用狐疑鯨吞海水盡露出珊瑚枝撫掌下座

愚庵及禪師上堂五月五日端午節潦倒徑山無法說大家喫醃菖蒲茶一般滋味休分別分別則任汝諸人且道畢竟是何滋味良久云人情若好喫水也肥

無文璨禪師端午上堂符不書藥不採起死禁不祥拈拄杖云幸有者箇在卓一下滿院薰風夏日長人在藕花香世界

東叟頴禪師上堂搥動鼓衆斯聚耳同聞目同觀超

乾坤越今古夫何故如此五月五是端午

笑嚴寶禪師端陽日示衆舉大慧杲和尚上堂今朝  
又是五月五大鬼拍手小鬼舞蕭然撞著桃符神兩  
手撻胸叫冤苦師云大衆大慧與麼道大似少箇禁  
方何謂向青天白日裏見神見鬼笑嚴則不然今朝  
正是五月五雲從龍風從虎山僧要與十方現前諸  
大聖凡賭箇賭信手拈來百草頭甜者甜兮苦者苦  
拈拄杖云蕭然突出者一條穿過從上諸佛祖是你  
現前諸人百樣具有爲什麼唯少者一箇衆中忽有  
箇見義勇爲漢憤地出來道和尚且莫寐語好若論  
者一箇敢道現前人人不欠半分毫師放下拄杖笑  
云汝宛不知矢上更加尖堆上重添土  
湛然澄禪師端午上堂五月五天中節赤口白舌盡  
消滅桃符艾虎插滿頭雄黃菖蒲和酒噎酩酊不知  
歲月移千妖百怪皆驅絕誰管魔來與佛來一齊都  
把腦門揭大衆何故如此不見道護生須是殺殺盡  
始安居要知殺底道理麼逞此良辰以艾葉爲旗以  
菖蒲爲劍以猛利心挺英雄膽不管是非得失聖凡

真妄乃至貪嗔癡愛一切諸煩惱賊提起一刀兩斷  
直得淨裸裸赤漚漚圓陀陀活潑潑作箇世出世間  
大丈夫兄弟還有恁麼人真得恁麼地麼若不得恁  
麼地山僧有箇護身符子相送也拈拄杖云看看  
太上老君急急如律令勅

筌庵問禪師端陽上堂神鋒凜凜寶劍當關百怪潛  
蹤群妖屏跡初非造作不屬安排不歷功勳不緣途  
徑向前黠黑退後岌業一操直入觀體全提百折不  
回渾鋼鑄就山河大地是物明暗色空是物塵塵爾  
剎剎爾該括萬有統攝六虛喚甚麼作山河大地喚  
甚麼作明暗色空有時惺惺有時寂寂內外融徹表  
裏洞如到者裏三世諸佛與鷲奴白牯同時得同時  
失同時照同時用汝諸人知有不知有威音那畔太  
煞現成今事門頭曾無異軌山僧不妨應時及節與  
諸人把手共行去也拈拂子云葵榴紅似火蒲艾綠  
如茵

牧雲門禪師端午示衆五月五端陽節心月浴主作  
禪悅角黍雖然沒得管杜田米飯須防噎放下筯肚

已飽當午日輪正杲杲拈來蒲劍斬蛇頭閒看兒童  
鬪百草善財手裏有一莖能殺人能活人不是尋常  
底藥草療諸病無不好只在山僧拄杖頭諸人不用  
別尋討

弘覺恣禪師天中節請首座上堂孤忠未見險君王  
抱憤尤甘沒楚湘火宅正炎迷出路寸心那得不回  
皇有般漢道三界若空華四生如夢幻本無能出之  
人亦無所出之處只要了空達幻覺夢而已山僧道  
善哉夢作麼生覺幻作麼生達空作麼生了齊着力  
莫央庠截如飛之箭浪舞跨海之龍舫高標奪得靈  
山錦方信男兒當自強喝一喝復舉文殊一日命善  
財探藥曰是藥者探將來善財徧觀大地無不是藥  
却來白曰無有不是藥者殊曰是藥者探將來善財  
遂於地上拈一莖草度與文殊文殊接得呈起示衆  
曰此藥能殺人亦能活人師云有效藥非靈無病方  
乃聖善財熱護文殊文殊熱護善財卽置豎拂子云  
只者一莖草利害在甚麼處便能殺人亦能活人要  
識源達委麼問取堂中第一座

青苗會提綱啓 散 附夾茄 六月

華藏洞禪師青苗會上堂破一微塵出大經爲飛魚  
躍更分明不將眼看將心看已是重敲火裏水淹黑  
荳味平生直須劫外話豐登綠成白雪桑重綠割盡  
黃雲稻正青

大潯泰禪師啓青苗會上堂德山入門便棒平地生  
堆臨濟入門便喝無風起浪俱抵只豎一指未免顛  
頂雪峰覩出三毬小兒戲劇到者裏總用不著爭如  
六月三伏甘雨普滋水足東臯禾青南畝農夫鼓腹  
樵者高歌古佛豕風儼然如在於斯會得共樂昇平  
脫或未然只知事逐眼前過不覺老從頭上來

月江印禪師青苗會上堂常啼菩薩賣却心肝學般  
若則易破一微塵出大經卷則難破一微塵出大經  
卷則易攝大千經卷入一微塵則難一掬之水可以  
漲滔天之浪一簣之土可以成九仞之山也不易也  
不難青山常伴白雲閒

無文璨禪師看青苗經兼謝曰首座上堂諸佛所說  
法要如稻麻穀粟一字一句咬嚼得破永絕饑虛受

用不盡者般說話開先既遇上等人也要拈出展兩手云今朝正是六月一

了庵欲禪師建會上堂山中二三日啓建青苗會開眼與合眼總是法性海三賢固不知十聖何曾會惟生界無盡此願亦不退稽首毗盧師和南觀自在時有僧出云久響本覺元來是箇座主師云你只識座主要且不識本覺僧便問如何是本覺師劈脊便棒云烈焰豈容蚊蚋泊擲拄杖便歸方丈

笑隱訢禪師啓青苗會上堂雨澤應期秋成可望信知道一雨普霑三草二木各遂其生一音演說大小根機各充其量直得山前廖胡子無著歡喜處高聲唱道五臺山上雲蒸飯佛殿堦前狗尿天利竿頭上煎餿子三箇胡孫夜簸錢拈拄杖畫一畫云家無白澤之圖必無如是妖怪

石屋琪禪師散會天得一以清地得一以寧聖人得一天下和平衲僧得一事事現成拈拄杖云拄杖子得一任運騰騰晚來縱步東湖上笑指禾苗一色青

愚庵及禪師滿散上堂僧問藥山尋常不許人看經意旨如何云常轉如是經百千萬億卷云山一日看經次有問和尚不許人看經因甚却自看山云我只遮眼又且如何云汝若看牛皮也須穿云和尚今日普請看經畢竟功歸何所云汗邪滿車甌甕滿箆乃學教中道如來所演八萬四千法藏言教皆名爲文離一切言音文字理不可說是名爲義又云若諸經中文句廣博能令衆生心意踊躍名不了義若能宣說文句及心皆同灰燼是名了義山中今日滿散青苗勝會見前大眾一七日中披宣大藏依了義經不依不了義經一句一偈一字一義莫不格於天地感於神明悉使見聞心意踊躍且如何說箇文句及心皆同灰燼底道理雲門大師道直得觸目無礙祇得名身句身山河大地是名名亦不可得喚作三昧性海俱備猶是無風匝匝之波直得忘知于覺覺卽佛性喚作無事人更須知有向上一竅在且作麼生是向上一竅拈拄杖汗邪滿車甌甕滿箆喝一喝恕中慍禪師青苗上堂依經解義三世佛冤離經一

字卽同魔說山中連日集衆看經用保禾苗但見白底是紙黑底是字既不離經自立亦不依經解義且道是佛說是魔說喝一喝

笑隱訢禪師青苗會上堂改旦令辰恭惟首座大衆起居多福數日祈保青苗有煩飄經風雨以時天之道百穀生成地之利所以祖師道心地生諸種因事復生理果滿菩提圓華開世界起驚拈拄杖云拄杖子走到西天却歸新羅國裏去也卓一下云石牛欄古路一馬生三賓

了庵欲禪師滿散青苗上堂佛以一音演說法衆生隨類各得解靈山會上退席五千逝多林中半響半啞眼空四海必有商量心洞十方孰辨眞倒卓拄杖云綠楊陰裏戴嵩牛芳草渡頭韓幹馬喝一喝下座保寧勇禪師炙茄齋上堂佛祖正令凡聖俱忘機智難明心境雙絕所以佛祖到者裏盡皆亡鋒結舌設有一言半句皆是爲蛇畫足之談實際理中本無是事何謂只要諸人瞥地去不逐語言云返本還源去不涉岐路去踏破化成去截斷兩頭去歸家端坐去

諸人何不向佛未出世時薦取祖師未來時薦取父母未生時薦取祇如父母未生時且自家作何面目委悉麼良久云團團古鏡無纖翳試請回頭一照看五祖演禪師炙茄會上堂六月三伏天火雲布都野松間臨水坐解帶同歡禪徒侶弄荷花賓朋傾玉甌紅塵事繁華碧洞何瀟灑重會在明年相期莫相捨白雲曾有約願結青蓮社

列祖提綱錄卷第四十

列祖提綱錄卷第四十一

武林十八澗理安禪寺住持婁東行悅集

立秋日提綱七月

密庵傑禪師立秋上堂一葉落天下秋風高雲淡水碧空浮達磨不會接手句少林空坐冷啾啾耐雲門垛根漢復於頭上更安頭記得僧問雲門達磨九年面壁意旨如何門云念七師喝云果然只在者裏良久復云勘破了也



法石空禪師立秋上堂千家樓閣一霎秋風祇知襟袖涼生不覺園林葉落於斯薦得觸處全真其或未然且作寒溫相見

斷橋倫禪師立秋上堂德山低頭夾山點頭俱胝豎起手指頭玄沙壘破脚指頭提起拄杖云都來不出山僧拄杖頭何以見得卓拄杖云一葉落天下秋愚庵及禪師秋日示衆叨據名藍海上洲慙無道福繼芳猷宗綱委地方堪憫聖德如天未易酬好把靈符懸肘後莫將閒事浣心頭金風昨夜飄梧葉地北天南又早秋

開旦過提綱八月

天目禮禪師上堂諸方今日旦過堂開盡皆容受福泉深山牢關把定一跡難登且道放開卽是把定卽是王郎衫袖潤鄭老帽簷高

中秋日提綱

眞淨文禪師上堂今朝八月中秋正是月圓當戶所謂盲者不見非日月之咎故經云是法平等無有高下迷者自迷悟者自悟大衆當知不得莽鹵

五祖演禪師中秋上堂中秋月中秋月古今盡謂尋常別別不別皎皎清光徧大千任從天下紆紆說圓悟勤禪師中秋上堂秋半西風急當空月正圓蕭蕭木葉落湛湛露珠懸嘹唳衝雲鴈淒清抱樹蟬頭渾漏泄切忌覓幽玄

大慧杲禪師中秋上堂人有心看月月無心照人有無成一片方始得惺惺驀拈拄杖卓一下云者箇不可不惺惺擲下云若知撲落非他物始信縱橫不是塵

中秋上堂舉仰山與長沙斲月次山以手指月云人盡有者箇只是用不得沙云却是請汝用山云作麼生用沙近前一踏踏倒仰山山起來云直下是箇大蟲師云皎潔一輪寒光萬里靈利者葉落知秋傷蟬者忠言逆耳不休不休已不已小釋迦有陷虎之機老大蟲却無牙齒當時一踏豈造次驀然倒地非偶爾衆中還有縊素得二老出者麼良久云設有也是掉棒打月

或菴體禪師中秋上堂天上中秋月人間半夜燈不

辜黃面老何媿黑衣卿正按乾坤濶旁提星斗明朝  
昏門大啓飲啄慶生平

壽寧道完禪師上堂古人見此月今人見此月此月  
鎮常存古今人還別若人心似月碧潭光皎潔決定  
是心源此說更無說咄

法泉佛慧禪師中秋上堂畫一圓相以手拓起云諸  
仁者還見麼團團離海嶠漸漸出雲衢諸人若也未  
見莫道南明長老措大相却與寶華王座上念中秋  
月詩若也見得此夜一輪滿清光何處無

投子普聰禪師中秋上堂寂住峰頂葉落歸根明月  
堂前金風玉露且道深秋一句作麼生道良久云古  
往不知何處去後夜依前月到窻下座

渤潭景祥禪師中秋上堂靈山話曹谿指放過初生  
斫頭底未問龍眠老古錐昨夜三更轉向西正當恁  
麼時有人問如何是月向明暗未分處道得一句便  
與古人共出隻手如或未然寶峰不免依樣畫樣應  
箇時節乃打一圓相曰清光萬古復千古豈止人間  
一夜看

虎丘隆禪師中秋日上堂云摩竭掩室毗耶杜詞斯  
皆理爲神御故口以之而默豈曰無辯辯所不能言  
也放出陝府鐵牛觸殺嘉州大象撞透天關掀翻地  
軸看看磕破諸人髑髏還有識痛痒者麼良久云萬  
山不隔今宵月一片清光分外明

劍門分禪師中秋上堂八月十五中秋節月滿長空  
光皎潔還見麼拍禪床云劍門者裏不是天機輕漏  
泄蓋是老婆心太切大衆尋光弄影沒交涉下座

羅漢南禪師上堂禪不禪道不道三寸舌頭胡亂掃  
昨夜日輪飄桂花今朝月窟生芝草呵呵萬兩黃  
金無處討一句絕思量諸法不相到

靈隱淳禪師中秋上堂吾心似秋月碧潭清皎潔乃  
喝云寒山子話墮了也諸禪德皎潔無塵豈中秋之  
月可比虛明絕待非照世之珠可倫獨露乾坤光吞  
萬象普天匝地耀古騰今且道是箇甚麼良久云此  
夜一輪滿清光何處無

寓庵潛禪師中秋上堂去年人看中秋月今年人看  
中秋月今年人是去年人去年月是今年月還有人

向者裏著得一隻眼麼若也著得徑山分半院與伊  
住其或未然歸堂喫茶一作  
大慧

雪巖欽禪師中秋上堂暈入靈犀胎含老蚌正好修  
行正好供養有人於此拂袖便行脚跟下已喫三十  
拄杖何以見得禪歸海經歸藏

中秋上堂非關不知圓非圓不知闕圓關本相因本  
無圓與闕既無圓闕是汝諸人向甚處見月豈拂子  
云團團離海嶠漸漸出雲衢打圓相此夜一輪滿清  
光何處無

中秋上堂好供養好修行拂袖便去也不多爭何故  
此夜一輪滿清光何處無

中峰本禪師獅子巖東岡幻住庵中秋示衆云天上  
月水中月光漾漾與誰說今宵幸遇中秋節記得靈  
山話曹溪指南泉翫寒山此將謂廣寒殿裏別無人  
元來總是弄巧翻成拙竹影篩金瑤塔積雪盡謂一  
輪光皎潔那知今夜圓後夜缺有箇譬喻試聽說三  
十夜止有一夜圓此圓時如諸禪德之精勤勇猛也  
三百六十夜止有一夜是中秋此中秋之月如諸禪

德於精勤勇猛中打成一片之時也奈何精勤時少  
懈怠時多又奚止於一暴十寒而已哉雖三百六十  
夜遇此良宵其或癡雲驟起迷霧橫陳靚體昏昏  
依舊沒交涉無始時來總是怎麼蹉過昔人有喝火  
口號謂日間開炒炒夜間靜悄悄可惜好光陰一時  
都過了照顧火燭時聞者多有警省本上座對此中  
秋之月亦有箇口號勉爲大眾學似天上月月月二  
十九夜缺只有今夜圓莫教雲霧攝攝不攝眨得眼  
來天又明寬著程途且待三生六十劫

石屋琪禪師中秋上堂初三月十五月缺時無圓圓  
時無缺圓缺不相干清光常皎潔昨夜蟾宮雨露多  
天風吹落黃金屑

中秋上堂黑月難見白月易見黑白未分已前眼見  
何如心見所以道見見之時見非是見見猶離見見  
不能及卓拄杖云昨夜蟾宮桂子開好風吹下天香  
來昭王白骨埋青草無人爲掃黃金臺

中秋謝藏主上堂天上月正圓人間月方半諸人恐  
未知打皺普請看道是如來藏裏摩尼珠又似賓頭

盧尊者手中琉璃碗比也不可比辨也不可辨天風  
吹露濕桂花香浸雲邊廣寒殿

笑隱訴禪師中秋上堂舉盤山道心月孤圓光吞萬  
象光非照境界亦非存光境俱亡復是何物師云盤  
山好箇心月孤圓又道復是何物惜乎話作兩橛報  
國不是將官物作自己人情也要諸人同一受用玉  
露暗飄無景樹金風微動夜明簾木人鞭起泥牛吼  
不許蒼龍臥碧潭

恕中愍禪師中秋謝侍者上堂一痕未吐千聖罔測  
其由三五正圓萬像莫逃其質長沙與仰山一踏南  
泉拂袖便行諸人還會麼犀牛扇子無頭角拈起清  
風徧大千

古梅友禪師中秋上堂衲僧家沒來由天不管地不  
收杖頭挑日月隨處逞風流業海深無底隨流輾入  
流還有得知時節底麼莫問渠儂知不知一輪明月  
挂中秋

南石琇禪師中秋上堂有進有退有主有賓有權有  
實有照有用眼目人天綱維法社者箇是衲僧分上

事三家村裏舅老婆左塗右抹十字街頭廖胡子東  
倒西僵且道是什麼人分上事良久此夜一輪滿清  
光何處無

無文璣禪師中秋謝修造進嚴耆舊上堂土木場中  
輾一回平生已眼豁然開廣寒宮殿無關鑰撞破觸  
體歸去來

中秋上堂拍禪床云山僧今日豁開廣寒宮殿千門  
萬戶六通四闢普請盡大地人穩步而升操三寸戈  
與萬人敵雖然仙桂第一枝畢竟誰折得

鐵關樞禪師中秋上堂缺月圓月半明半暗吞月吐  
月全放全收拂子打圓相一點光吞萬象秋

楚石琦禪師中秋上堂天地未分時高低覆載何在  
日月不到處光明照燭無偏真箇是描不成畫不就  
昨夜三更白如晝

中秋上堂舉雲巖掃地次道吾云何得大區區生巖  
云須知有不區區者吾云與麼則第二月也巖豎起  
帚云者箇是第幾月吾拂袖出去雲門云奴見婢殷  
勤師云雲巖豎起帚道吾便出去總是第二月那箇

是不區區者此夜一輪滿清光何處無

中秋上堂賣買朱砂畫月筭來枉用工夫縛將白粉塗成要且未是真月文殊道但一月真中間自無是月非月豎拂子云本無偏照處剛有不明時

中秋上堂一月普現一切水一切水月一月攝盡大地是水阿那箇是月盡大地是月阿那箇是水你若不信錢塘江裏少哩

中秋上堂天上月圓人間月半古人道赫日虧虧半鳥沉始得圓且那一半落在甚麼處更深夜靜共伊商量

中秋上堂鳳山說何似萬象說八月十五夜月最親切八月十八日潮更直截聞不聞警不警嘉州大衆喫蒺藜陝府鐵牛流出血

了庵欲禪師中秋上堂舉馬祖與西堂百丈南泉既月公案師云言氣相投機感相應古今盡謂既月話奇特殊不知馬大師憐兒不覺醜若也據令而行者一隊弄光影漢總好與本分草料免見門戶寂寥拍禪床云禹力不到處河聲流向西

上堂好箇中秋節莫言無供養風吹丹桂花清香滿天上諸人眼裏也飽耳裏也飽鼻裏也飽只恐肚裏不飽若得肚裏飽去則不疑佛不疑祖不疑天下老和尚拈出袖裏金鎚打開光明寶藏不涉凡聖路歧便是渡河香象喝一喝

中秋上堂久矣不上堂口邊生白醭侍者來燒香請法拈出秦時舊轆轤金剛腦後下一鎚空裏磨盤生八角寒山撫掌笑呵呵夜來月向西邊落喝一喝

中秋客至上堂靈山指月曹溪話月馬祖百丈西堂南泉既月盤山道心月孤圓光吞萬象尤非照境境亦非存光境俱亡復是何物獼猴繫枯椿洞山道光境未亡復是何物黑牛臥死水育王師翁云月在水裏不上徒勞敲碎水中天夜深山寺閉門睡月自飛來在面前用盡自己心笑破他人人口本覺今日中秋靈山上客垂訪適值滿天風雨既無可修行又無可供養終不拂袖便行未免相與憑危欄倚曲檻推出手面一輪直是清光萬里三關不立開鑿人天四句頓除光揚祖道擊拂子云八萬四千非鳳毛三十



三人入虎穴

重陽日提綱九月

眞淨文禪師上堂先上座煮黃栗粥供養禪衆喫了  
總飽勦勦地挂起鉢盂知恩方解報恩三十年後不  
得辜負趙州老直饒當下見得個儒分明不隨古人  
言語所轉各證無生法忍得大解脫須知三年一閏  
九月重陽是何宗旨喝一喝下座

天童樸禪師重陽上堂牛皮鞵露柱露柱啾啾叫鐙  
籠佯不知虛明還自照殿脊老鴟吻聞得呵呵笑三  
門側耳聽就上打之遶譬如十日菊開徹阿誰要阿  
呵呵未必秋香一夜衰熨斗煎茶不同鍋

石門雅禪師重陽示衆茱萸鮮嫩菊花香暢殺陶家  
醉倒郎我輩泛觴雖絕分東籬閒玩也無妨大衆閒  
玩卽不無且道眼在什麼處知有底眉毛眼上橫未  
語者紅黃裏亂走阿呵呵今日元來九月九喝一喝  
永泰覺禪師上堂金風浙瀝玉露淒清菊解香苞稻  
懸嘉穰時清道泰野老謳歌處處登高人人歡樂諸  
禪德祇如林間衲子豈不知時若也燕默忘形昧他

光景翠微深處不逐四時一炷旃檀無恩不報拍禪  
床下座

月頂輪禪師重陽上堂重陽何物助僧家籬菊枝枝  
盡發花不學故侯將伴飲爲君泛出趙州茶只此一  
盃醒大夢盧仝七碗謾矜誇良久曰便請卓拄杖一  
下

寓庵潛禪師菊旦上堂今朝九月初九天色半晴半  
雨衲僧鼻孔眼睛切忌和泥合水廼顧視大衆惺惺  
直是惺惺伶俐不妨伶俐等閒問著十人五雙不知  
落處不見道事因叮嚀起一作太慧

羅漢南禪師示衆鷗鷺籬根菊正黃妙談西祖意琅  
琅不知誰解聞斯語堪爲宗門立紀綱便見羅漢拂  
子展大神通化作文殊普賢觀音勢至穿過諸人髑  
髏必也盡知來處可謂於出入息中供養恒沙諸佛  
若也不知分付德山臨濟擊一擊

愚庵及禪師九日上堂舉大茅示衆云欲識諸佛心  
但向衆生心行中識取欲識常住不遷義但向萬物  
凋落處會取師云古人言不虛發發必全眞衆生現

行無明煩惱業識茫茫作麼說箇諸佛心秋變冬凋  
春生夏長萬物榮謝無有停息又如何說箇不遷義  
三玄三要事難分得意忘言道易親一句明明該萬  
象重陽九日菊花新拍禪床云汾陽和尚來也切忌  
錯下註脚

重陽上堂舉真淨和尚云九日無白醪飽餐黃栗糕  
十日有黃菊催人打禾穀五更鐘未鳴隣鷄已數聲  
相逢不下馬各自奔前程師云逸格風流通身又采  
老雲庵美則美矣若約衲僧分上猶欠勦絕在山僧  
效顰亦有一偈舉似大眾非圖過古超今且要應時  
應節九日無白醪黃茶滿碗澆十日有黃菊涼颺動  
林麓五更鐘未鳴過鴈兩三聲更欲求玄旨迢迢十  
萬程

上堂舉白雲示衆云金蕊叢叢帶露新采來烹茗賞  
佳辰浮杯何必須宜酒但有清香自醉人開福道白  
雲老人大似巧媳婦做出無麵饅飀惜乎知味者少  
開福效顰亦有一偈重陽黃菊未成花落帽無勞憶  
孟嘉但得青山長在眼不妨流水去無涯師云白雲

開福大似徐六擔板各見一邊徑山見處也要諸人  
共知時移節換是尋常過了重陽又一陽人事自生  
今日意黃花只作去年香

笑隱訢禪師重陽上堂中峰用處沒疎親道合寧論  
主與賓却笑汾陽彊分別重陽九日菊花新

鐵關樞禪師重九上堂九月九釀生口茱萸茶菊花  
酒三世諸佛不知有

無文璨禪師重九上堂天地一東籬萬古一重九黃  
花三兩枝東湖隨分有逢人不拈出只麼空雙手醉  
殺天下人不是茱萸酒

千巖長禪師上堂九月九家家盡喫茱萸酒堪笑山  
居道者家兩枚豆糲塞却口太寒酸無可有八角磨  
盤空裏走却有些兒勝俗人日日面南看北斗

了庵欲禪師重九客至上堂兩兩不成雙三三自成  
九本色住山人何處尋窠臼卓拄杖云離四句絕百  
非驢前馬後莫亂針錐

九日上堂三四五六七八九碧眼胡僧不知有三更  
收得夜明符天曉起來成漏逗籬下黃花爛熳開龍

山落帽霑風埃令人長憶龐居士天上人間不可陪  
阿呵呵會也麼若也不會山僧更道兩句去也石頭  
一箇住山斧古往今來稱獨步馬師胡亂三十年誰  
道少鹽還少醋喝一喝

上堂舉白雲示衆云金藥叢叢帶露新采來烹茗賞  
佳辰浮盃何必須宜酒但有清香自醉人師云白雲  
老人似巧媳婦做出無麵餠飪惜乎知味者少開  
福效顰亦有一偈重陽黃菊未成花落帽無勞憶孟  
嘉但得青山常在眼不妨流水去無涯

九日進退頭首上堂今朝九月九萬物隨時候滿泛  
茱萸茶何用菊花酒畢竟醉兀兀不似長醒醒諸人  
若也信得及便見堂中上座決有長處知得堂中上  
座決有長處便知釋迦老子橫說豎說直說曲說四  
十九年重重敗闕知得四十九年重重敗闕便知興  
化堂前饋飯吹香克賓維那全鋒敵勝知得克賓維  
那全鋒敵勝便知古雪寶抑揚有準韓大伯笑裏藏  
刀知得抑揚有準笑裏藏刀便知國師三喚侍者三  
應將謂我孤負汝却是汝孤負我雖然且道節文在

什麼處擊拂子云閃電爍開千聖眼好山多在太湖  
中

重陽永福子有和尚歸上堂開甘露門據甘露室令  
諸衆生食甘露味永福和尚即其人也茲者龍蹄舊  
窟鳳返丹山草木叢林頓增光彩本覺法弟何幸如  
之所謂物宜求新人宜求舊無端陳蒲鞋手握赤梢  
鯉倒跨三脚驢跳出雲峰破桶箍中揚聲大叫云欲  
上座你只見錐頭利不見鑿頭方豈不聞佛法大事  
靜退小節山僧被渠一問直得無言可對無理可伸  
只記得汾陽和尚道三玄三要事難分得意忘言道  
易親一句明明該萬象重陽九日菊花新喝一喝下  
座

湛然澄禪師上堂三玄三要事難分得意忘言道易  
親一句明明該萬象重陽九日菊花新此汾陽老人  
與臨濟大師共箇鼻孔毫毛竅穴一些子也不異無  
端後來有箇老宿將三玄三要逐句解說曰體中玄  
句中玄玄中玄雖則眉目活肖以東墻看來直是埋  
沒祖宗賺誤後賢何也不見百丈云六句內會取三

句外用得若一句作一句說長老自墮地獄不干學  
人事若三句作一句說學人自墮地獄不干長老事  
驀拈拄杖云喚作拄杖是人天有句不喚作拄杖是  
聲聞無句亦有亦無非有非無是菩薩中道句若乃  
如是逐句指點則拄杖子入地獄如箭射然拄杖子  
還向你諸人曾道箇什麼來以其無恁麼事所以能  
穿過你諸人觸體透入你諸人眼睛你諸人也須各  
各善知回互始得復豎起拄杖云看看今日是重陽  
節澄長老無可說大家邀往煙雨樓把手登高望秋  
色遂以手作急招勢云來來欲窮千里目更上一層  
樓

牧雲門禪師重九上堂九月重陽節風俗愛登高登  
高必須山登山須到頂而今時節祖庭秋晚叢林凋  
零求箇到頂底絕少你須知得上山路也得若知得  
上山路不向中路止息要到頂也不難設或連上山  
路也不解儘你將常熟山繞百匝千匝千年萬年每  
日只見撞牆撞壁又烏知宇宙之寬天地之大而今  
一衆幸同住山中上山路最近遂拈拄杖指云若解

驀直去便可做睨天外同賞重陽其或未然遙知兄  
弟登高處徧插茱萸少一人

石雨方禪師上堂操一葉之扁舟是第一義泛鑑湖  
之曉月是第一義拈妙香而氤氳是第一義散天花  
以怡悅是第一義法筵龍象衆在什麼處去也移形  
山向天華天華不大移天華向彤山彤山不小沒絃  
琴彈得者頭頭合拍籬邊菊賞得底處處成歡雖然  
若是陶淵明何須賦歸去

開爐提綱十月

眞淨文禪師開爐上堂凡夫色礙二乘空礙菩薩色  
空無礙目前萬象森羅理事融通自在僧堂又添煖  
火十方高人共會不必更分彼此同是一眞法界喝  
一喝下座

保寧勇禪師開爐上堂今朝十月一爐簇無煙火削  
髮披緇流競向爐邊坐霜清天乍寒水冷冰未鎖不  
知天上與人間更有阿誰過似我拍手大笑下座  
法昌遇禪師開爐日以一力搗鼓陞座曰法昌今日  
開爐行脚僧無一箇唯有十八高人緘口圍爐打坐

不是規矩嚴難免見諸人話墮直饒口似秤錘未免  
燈籠勘破不知道絕功動枉用修因證果喝一喝但  
能一念回心卽脫二乘羈鎖

偃溪聞禪師開爐上堂舉趙州和尚示衆云老僧三  
十年前在南方火爐頭有箇無賓主話直至如今無  
人舉著師云森羅萬象明闇色空日夜舉揚趙州古  
佛不是不知只爲貪程太速

長翁淨禪師開爐上堂召衆打圓相云箇是天童火  
爐近前則燒殺退後則凍殺忽有箇漢出來道合作  
麼生因火爐動也

超化藻禪師開爐上堂雪滿寒窓燒盡丹霞木佛冰  
交野渡凍殺陝府鐵牛直得寒灰發燄片雪不留任  
運縱橫現成受用諸禪德要麼衲帔蒙頭坐冷煖  
了無知

圓悟勤禪師開爐上堂三世諸佛向火焰裏轉太法  
輪熱發作什麼火焰爲三世諸佛說法三世諸佛立  
地聽也須照顧眉毛若是聊聞徹骨徹髓信得及見  
得徹直下與三世諸佛同生同死與火焰同起同滅

當處解脫得大安隱衲被蒙頭便是箇清涼世界苟  
或未然只知事逐眼前過不覺老從頭上來

開爐上堂乾爺近火理合先焦滴水永生事不相涉  
倘或透生死明寒暑融動靜一去來直得意遣情忘  
如癡似兀然後乃可饑則喫飯健則經行熱則乘涼  
寒則向火雖然如是趙州道我在南方二十年有箇  
無賓主句直至如今無人舉得且無賓主話火爐頭  
如何舉得還委悉麼衲被蒙頭萬事休此時山僧都  
不會

晴堂遠禪師開爐上堂天無門地無壁葫蘆棚上種  
冬瓜兩手扶犁水過膝跳金圈吞栗棘毆拍板對無  
孔箇屈屈獨脚山魃解雙趂去年冬裏無炭燒今年  
定是無火炙饑時饑到眼睛黃窮時窮到赤骨立屈  
屈且道屈箇甚麼耐耐監寺副寺維那典座直歲等  
却與泥水匠商量放出兩頭鴟鵂咬殺佛殿脊  
或庵體禪師開爐上堂暑往寒來十月朝開爐著火  
擁雲袍斷將不涉廉纖句勘破當年噉酒糟會麼風  
頭稍硬暖室商量漢語難明胡言易辨妙峰孤頂犬



競鬪饑善法堂前鬼爭漆桶說甚面壁九年耳聾三日胡餅是饅頭烏龜成白鼈東西十萬南北八千元來只在鼻頭尖摸著通身汗如雨

開爐上堂舉五祖演和尚示衆云難難幾多般易易沒巴鼻好好催人老默默從此得過得者四重關了泗洲人見大聖焦山老漢也有此說難難放過軟頑易易多添瞋睡好好和衣便倒默默有筋有骨過得四重關了屋裏販楊州其或猶豫未決更聽一頌黃緣過夏又經冬難易當知好惡同肚裏饑瘡無括擾爐中生炭滿空紅挑灰弄土非相許濶論高談豈相容疊足跏趺描不就眼空煙景振宗風

應庵華禪師開爐上堂三世諸佛吞却火焰火焰燒殺三世諸佛一盲引衆盲相牽入火坑棒打不碎底填溝塞壑刀斫不入底臥雪眠霜作世諦商量也得作佛法流布也得渾圖吞却三十年後有人索飯錢在直饒爛嚼白湯嚥下未免粘牙帶齒且道蔣山爲人在什麼處爛研巴豆三千顆瀉盡諸方五味禪雪巖欽禪師開爐上堂死柴頭上有無煙火水晶宮

裏烈焰燒空舜若多神眉鬚自墮拈拄杖云拄杖子聞與麼道是信耶是不信耶卓拄杖云雙破

開爐上堂不冷不熱爐韃半眞半假金鑪鑄作瓶盤釵釧却成品字柴頭且道與趙州無賓主話相去多少疑則別參

開爐上堂火冷灰寒炭又無大家兀坐嘴盧都冷灰堆裏忽豆爆大地通紅火一爐世界與麼濶火爐與麼濶則不問且道香匙火筴大小長短相去多少不得動著

列祖提綱錄卷第四十一

列祖提綱錄卷第四十二

武林十八澗理安禪寺住持婁東行悅集

開爐提綱

高峰妙禪師開爐上堂豎起拂子云者些火種自靈山傳至西峰已得二千二百三十餘載今日幸遇開爐特爲諸人拈出以拂子吹一吹乃擲下云照顧燒

却眉毛

開爐上堂三千世界作爐百億須彌爲炭生鐵鑄就  
禪和炙得通身紅爛正恁麼時莫有躡得過底麼左  
右顧視云噯將謂水不能溺火不能焚元來總是一  
隊爛額焦頭漢

中峰本禪師開爐示衆世界潤一丈古鏡潤一丈你  
還知蒲團上一箇吞不下吐不出底無義味話頭也  
潤一丈麼者裏一肩荷負得去便可喚火爐作古鏡  
喚古鏡作世界都無異致如其未爾火爐與古鏡世  
界與話頭相違不止三千里何以如此蓋能所分別  
作障礙觀體如銀山鐵壁之堅只此便是生死輪迴  
根本故楞嚴謂根塵同源縛脫無二識性虛妄猶若  
空華由塵發知因根有相相見無性同於交蘆者裏  
無你動步處無你著眼處昔安楞嚴讀到知見立知  
卽無明本知見無見斯卽涅槃雖破句讀之其桶底  
當下脫落直得七穿八穴洞見老釋迦心肝五藏直  
下喚古鏡作火爐不妨洞照森羅萬象喚火爐作古  
鏡不妨薰炙冰霜面皮洗盡見塵綯乾情浪無第二

念無第二人喚南作北敲東擊西死柴頭上爛發心  
華水底輝騰赤焰冷灰堆裏撥出火種毛端盤結青  
煙一切處和氣藹然一切處陽春燠若信手拈來安  
有一毫剩法與人爲知爲解者哉年來佛法無靈往  
往將根塵識妄認作真心說得宛然了無交涉記得  
儒勸學有詩謂擊石乃有火不擊元無煙人學始知  
道不學非自然此說雖曰訓蒙於禪學分上說得恰  
妙何以知然謂石中有火不以智巧擊之引之則終  
於不遇也今人惟知石中有火未曾施半錢智巧之  
力擊之終日指此冷石說火之用說到光然落地依  
前只是塊石頭要覓一點火爲用了不可得此是不  
肯死心做工夫以求正悟惟記相似語言而說禪者  
是也更有一等闢提人聞說石中有火急碎其石欲  
取其火乃至碎抹爲塵終不得火却不責不以智巧  
求之便乃不肯信石中果有真火此是不信自心成  
佛之凡夫也此說且置何謂智巧勉向第二門頭立  
箇喻子首以信根爲石次以無義味話頭爲擊石之  
手又以堅固不退轉志願之鐵打箇火刀乃以精進

勇猛不顧危亡之力向動靜閒忙中敲之擊之使不  
間斷又必待無量劫中蒙佛祖授記般若種性乾草  
驚忽相承是謂智巧也引起一星子延燎不已直教  
三千世界化爲焦焰復何難哉捨此智巧未見有燒  
物之火無緣而自出也記得百丈令潯山撥火潯撥  
之不得丈躬撥得之謂潯曰爾道無者箇潯直下還  
著得智巧也無聊說一偈十方世界火爐濶冷灰堆  
裏深深撥得一星兒遽喜歡今古拈來關聒聒諸禪  
流休抹撻燎却眉毛莫便休或不如此遭凍殺  
唯庵然禪師開爐上堂煖氣相接正在斯時深深冷  
灰裏撥著星兒之火向死柴頭上發機燎起亘天烈  
燄燒却舜若多神面皮敢問諸人作麼生回避擲拄  
杖下座

開爐上堂十月風高作寒色今朝正值開爐日長途  
多少未歸人祖父田園俱喪失何如白鷺鷥翹足溪  
邊立毛長骨瘦歷風波那論有食與無食諸兄弟也  
要大家知此消息且道是什麼消息歸堂喫茶  
元叟端禪師開爐上堂舉雪峰云三世諸佛向火焰

上轉大法輪雲門云火焰爲三世諸佛說法三世諸  
佛立地聽應庵云二世諸佛爲火焰說法火焰燒殺  
三世諸佛師云三大老一人鼻孔遼天一人眼睛突  
出一人脚跟不點地諸人若也揀辨得出鳳山今日  
開爐其或未然前頭大有雪霜在

開爐上堂舉雪峰示衆云世界濶一丈古鏡濶一丈  
玄沙問云火焰濶多少峰云如古鏡濶沙云者老漢  
脚跟未點地在師云古鏡卽是火焰火爐卽是古鏡  
不是雪峰老漢爭得頭正尾正鶻峰今日忽有人問  
火爐濶多少只向道隨家豐儉

呆庵莊禪師開爐上堂舉趙州和尚指火示僧云我  
喚作火你不得喚作火師云趙州老老大大剛要挑  
灰弄火雲居則不然相共圍爐燒火向主賓道合自  
忘言

橫川珙禪師開爐上堂僧出云丙丁童子來求火師  
云歸去生柴帶葉燒乃云古鏡濶一丈火爐濶一丈  
火焰爲三世諸佛說法三世諸佛立地聽你諸人長  
連床上立地聽

黃龍新禪師開爐示衆舉雪峰道三世諸佛向火焰裏轉大法輪雲門道火焰爲三世諸佛說法三世諸佛立地聽雪峰雲門交互爭輝薪盡火滅三世諸佛向甚麼處聽莫戀白雲深處坐切忌寒灰燒殺人

石屋珙禪師開爐上堂法昌和尚道法昌今日開爐行脚僧無一箇惟有十六高人緘口圍爐打坐福源不與麼道福源今日開爐炭壑也無一箇五湖四海禪和袈裟蒙頭打坐不是冷眼旁觀免見挑灰弄火寬心寧耐到春來屋角梅花香朵朵

上堂十月初一日開爐諸方說寒道熱福源一味尋常不會安排施設深深埋兩箇炭團滿滿堆一爐黃葉莫嫌火種無多只要煖氣相接放下重簾密糊窻縫誰管你屋上濃霜庭前深雪但得自家屋裏一團和氣外邊冷言冷語不須聽由他自歇諸禪德本色住山人且無刀斧痕

笑隱訢禪師開爐上堂住院無福冬來事事無家貧羞見客戾少未開爐壁破添泥補窻屢欠紙糊西來祖師意勘破老臊胡

開爐上堂火爐頭話無賓主中峰一一爲君舉捏不成團擘不開貴似黃金賤如土放兩拋三是幾多五元來二十五

月江印禪師開爐上堂東邊是知事西邊是頭首師子兒哮吼龍馬駒踴跳火爐濶一丈古鏡濶一丈古佛塔廟前面南看北斗

鐵關樞禪師開爐謝靈山閣黎上堂拈拄杖只者火種靈山會上付囑天寶向沉埋之秋撥開紅焰煖熱叢林撥一撥云見麼者裏蹉過凍殺閣黎

愚庵及禪師開爐上堂今朝十月初一門外寒風凜凜待歸煖處商量何似當陽拈出薦拈拄杖云火爐濶一尺古鏡濶一尺三世諸佛出不得六代祖師出不得天下老和尚出不得

上堂諸方今日開爐未免與諸人說些火爐頭話以拂子作吹火勢云喚作火燒殺你不喚作火凍殺你無文璨禪師開爐謝蒼蒼踏田上堂趙州無賓主話田地穩密底開口便道着信脚便踏著若是東西不辨南北不分未免被人侵疆越界薦福門下總是田

地穩密底人拈起香匙放下火筴一一天真因甚如此公驗分明

開爐上堂寒涕垂頤圍爐打坐說什天之高地之大最好笑是老楊岐拈起死柴頭未開口時先話墮傑峰愚禪師開爐上堂天寒歲晚孤峰上此道寥寥孰與論旋補荷衣消白日頻燒槽榼到黃昏宗風且莫留人世佛法應無繼子孫賴有隣封來送供人間何處不稱尊

恕中愷禪師開爐上堂楊岐和尚示衆云薄福住楊岐年來氣力疎寒風凋敗葉猶喜故人歸囉囉哩拈起死柴頭且向無煙火山僧雖衲末裔要且不與同塵薄福住靛峰多嘖還少喜此日話開爐火種無些子報諸人休擬議大家收足上蒲團今歲立春在年裏

了庵欲禪師開爐上堂今朝十月旦開爐無獸炭倒轉死柴頭光明何燦爛三世諸佛在此轉大法輪六代祖師在此聯芳續焰天下老和尚在此各立門庭光光相羅如寶絲網大用現前清機歷掌有功者罰

無功者賞引水澆蔬土老前披簑側笠千峰上喝開爐上堂舉丹霞燒木佛公案乃云山僧當時若作院主待他道既無舍利更請兩尊燒之便與踏向火中免見千古之下引得一類學語之流隨例道大用現前不存軌則喝一喝

南石琇禪師開爐上堂趙州和尚示衆云老僧三十年前在南方火爐頭有箇無賓主話直至如今無人舉著且道如何是無賓主話若向者裏會得一大藏教是甚拭瘡疣紙雖然若喚作無賓主話玄沙道底下座

開爐請藏主維那兼明首座設齋月西堂至上堂往來不往來是藏不是藏機先解洞明依然未諦當拈起金鎚放下鋤斧要知有實有權挂眉間劍借香積飯灼爾能奪能縱雖然未是火爐頭話且如何是火爐頭話今朝初一明月初二

天真則禪師開爐上堂寒冬冷月到來也大家祇得補破遮寒若向鍼頭線後透得管取工夫自然成片且道工夫成片後如何以手托起云如意寶珠元自



具無勞撥火再尋冰

開爐上堂今朝是開爐日普請東西兩序知悉若不是饅饅湯餅大家打些麵喫下簾攏粘戶隙拾竹柴烘衲頭扒草火當炭壑阿呵呵甚奇特且道作麼生是不通風縫受用底一句子挂拂子作烘手勢云你也烘我也烘深藏穩便度隆冬

朝宗忍禪師開爐上堂把住繩頭結百千萬億爲一大網大開爐轡盤鎔餅釵釧爲一金密密綿綿古往今來無可擬堂堂赫赫上天下地莫能儔直得千聖躋攀無路萬靈景仰無門魔外潛蹤狐狼絕蹟且道具甚麼神通得恁麼自在衲帳蒙頭萬事休此時山僧都不會下座

牧雲門禪師開爐上堂今日開爐諸人還識開爐底甚麼霜花點白山寮各下暖簾楓葉飛紅將見堅冰躍至通方上士鑒在機先得旨歸根去天寒人寒滴水滴凍隨流認得性無喜亦無憂不假炭煤宏開爐韞直下化鈍鐵作良金鎔頑銅成法器妙手雖呈大功不宰驅馮山水牯直入欄圈打疎山木蛇橫鑽泥

土且道甚麼時節是他出頭分莫看水草嫩枯淡好聽春雷換甲鱗下座

弘覺恣禪師上堂天童寺裏開爐以虛空爲爐床四大部洲爲爐脚須彌盧爲火筋七金山爲炭圍其餘森羅萬象日月星辰赤縣神州山川人物爲引火黃葉且道火種潛以拄杖劃一劃云饒你向者裏薦得透脫分曉及乎應用未有其方也則是箇守死善道要得發焰聯輝正未可也當恁麼時發焰聯輝一句作麼生道喝一喝云八萬四千非鳳毛三十三人入虎穴

開爐上堂佛法無多子久長難得人山僧昔在茲山以不辦久長之念住凡四周寒暑散席他往東住天台南住於越西住吳興北住青齊已經十有一載無端遭人抑逼還復歸領住持則巖頭雲老室內冰冷正當今日開爐作麼生得接燄連輝去拱手云著力全在諸弟兄

冬至提綱十一月

眞淨文禪師上堂冬後一陽生乾坤解通變衲僧莫

守株彼此丈夫漢日日天真活人人自可見如何都不顧隨他物所轉喝一喝下座

雲峰悅禪師冬至上堂節令屆書雲山家何所論一輪纔出海萬類盡沾恩以拂子擊禪床下座

雪竇顯禪師冬至上堂相逢不拈出舉意便知有早是不啣嚙漢更亂踏步向前實謂苦屈諸禪德看他先覺未離兜率已降闍浮未出母胎度人已訖若言周行七步目顧四方天地之間唯我獨尊尙有人不放伊過如今巧說異端不肯荷負真可哀愍所以道天魔外道是辜恩德漢聲聞二乘是自欺誑人你見如此不平之事便合憤悱驅將去喝將去隨例道我不知我不會者般底苦海裏有什麼出頭時

白雲端禪師上堂今朝至節一陽生於此日拈起拄杖且道者箇作麼生便恁麼構得且恁麼應時納祐若數至大年朝前頭大有雪在所以承天十度發言九度休何謂如此當門不必栽荊棘後代兒孫惹著依雖然如是三十年後太公釣魚

五祖演禪師冬至上堂少年天子此日拜郊林泉之

士遠望歌謠萬歲萬歲更下座

冬日上堂達磨西來事久多變後代兒孫門風無限攪擾身心一團麻線白雲今日都通截斷大眾一百單五近清明上元定是正月半

圓悟勤禪師大禮令節上堂七日來復各歸至盡之本一陽生起聿見天地之心徹底關重立當陽闡正眼直得萬國共慶四海同歡福聚一人位隆無極有箇奇特應時應節因緣舉似大眾還委悉麼皇帝有勅大赦天下

佛鑒勤禪師上堂世尊有密語迦葉不覆藏乃曰你尋常說黃道黑評品古今豈不是密語你尋常折旋俯仰拈匙把筯祇揖萬福是覆藏不覆藏忽然瞥地去也不可要會麼世尊有密語冬到寒食一百五迦葉不覆藏水泄不通已露賊靈俐衲僧如會得一重雪上一重霜

渤潭進禪師冬至上堂五九四十五聖人作而萬物觀秦時轆轤鑽頭尖漢祖殿前樊噲怒曾聞黃鶴樓崔灞題詩在上頭晴川歷歷漢陽戍芳草萋萋鸚鵡

洲可知禮也君子務本本立而道生道生一一生二  
二生三三生萬物慕拈拄杖起身云大衆寶峰何似  
孔夫子良久曰酒逢知己飲詩向會人吟卓拄杖下  
座

虎丘隆禪師上堂靈機密運日月旋流四象推遷一  
陽來復化育之本匝地普天草木昆蟲悉承恩力且  
作麼生是化育之本良久云一氣不言含有象萬靈  
何處謝無私復舉僧問南院日月交謝寒暑迭遷如  
何是不涉寒暑者院云紫羅抹額繡裙腰僧云向上  
之機今已曉中下之流如何解會院云炭庫裏藏身  
師云問既有宗答亦驚群雖然如是南院只解觀根  
逗器應病與藥虎丘更資一路或有僧問日月交謝  
寒暑迭遷如何是不涉寒暑者對他道前村深雪裏  
昨夜一枝開待他又問向上之機今已曉中下之流  
如何解會對他道買帽相頭

懶庵鼎需禪師上堂二十五日已前群陰消伏  
泥龍閉戶二十五日已後一陽來復鐵樹開花正當  
二十五日塵中醉客騎驢騎馬前街後街遞相慶賀

物外閒人訥被蒙頭圍爐打坐風蕭蕭雨蕭蕭冷湫  
湫誰管你張先生李道士胡達磨

應庵華禪師冬至上堂君子道長小人道消衲僧活  
計不在兩頭有般癡漢便問未審在什麼處似者般  
底不打更待何時且道寶林怎麼道還有過也無試  
定當看

密庵傑禪師冬至上堂曰南長至慶無不利石筍暗  
抽條寒巖增暖氣東村王老半醉半醒林下道人沒  
巴沒鼻慕拈拄杖云若人於此徹根源勝似燃燈親  
授記擲拄杖下座

冬至日入新衆寮上堂天不言四時行地不言萬物  
生聖人不言垂衣拱手萬國來王衲僧不言移鹵星  
爲吉曜捏大地作伽藍裁長補短革故鼎新便見玲  
瓏八面峭峻十方坐斷溪山包羅風月且入門一句  
作麼生道一陽來復後瑞氣自騰騰

物初禪師上堂一冬二冬你儂我儂暗中偷笑當面  
脫空雖是尋常茶飯誰知米裏有蟲夜來好風吹折  
門前一株松

光孝徹禪師冬日上堂羊頭車子推明月沒底船兒  
載曉風一句頓超情量外道無南北與西東所以劫  
前消息非口耳之所傳格外真規豈思量之能解須  
知佛佛祖祖了無一法爲人子子孫孫直下全身荷  
負既已萬機寢削自然一糝不留湛湛之波碧水冷  
涵於秋色靈靈之照霽天淨洗於氷輪宛轉旁參叶  
通兼帶夢手推開玉戶翻身撥動機輪正令纔行又  
見一陽萌動化工密運俄驚三世變遷雖則默爾無  
言爭奈熾然常說無遷無變今朝拈置一邊有故有  
新且道如何話會諸人還委悉麼群陰消剝盡來日  
是書雲

谷隱靜顯禪師冬至上堂晷運推移日長一線且道  
佛法長多少自曰九九八十一諸人還會麼若無人  
會山僧爲你重說偈言九九八十一日南長至日晷  
運既推移大家相委悉非爲世諦流布且要應時納  
祐參

玉泉皓禪師冬至示衆晷運推移布褐赫赤莫怪不  
洗無來換替

典牛游禪師至節上堂晷運推移日南長至布褐不  
洗無來換替大小玉泉無風起浪雲巖路見不平直  
下一鎚粉碎遂高聲曰看脚下

石屋拱禪師冬節上堂昨夜陰回陽復爻曉來湖岸  
見氷消皇官日影喜添線胡地笱長梅破梢春漏一  
痕舒柳眼雲拖五色東天腰明明空劫已前事不是  
虛言誑爾曹

治父川禪師上堂群陰剝盡一陽生草木園林盡發  
萌唯有衲僧無底鉢依然盛飯又盛羹

東叟顯禪師上堂拈拂子畫一畫云伏羲發天地之  
秘未明者消息又點三點云瞿曇示圓伊之形未明  
者消息者消息如何辨的不見道冬至乃書雲物擊  
拂子

天日禮禪師上堂云黃鐘纔起時九數從頭數相將  
幽谷爲啼次第雕梁燕語田父祭勾芒叢祠敲社鼓  
農父狎牛郎村姑教蠶婦光陰老盡世間人冬至寒  
食一百五

密印民禪師冬至上堂舉玉泉皓和尚云雪雪片片

不別下到臘月再從來年正月二月三月四月五月  
六月七月八月九月十月依前不歇凍殺饑殺免教  
胡說亂說師曰不是罵人亦非贊歎高出臨濟德山  
不似雲居羅漢且道玉泉意作麼生良久曰但得雪  
消去自然春到來

雪巖欽禪師冬至上堂謝橫舟相訪曉天月白古岸  
舟橫一陽來復吾道大亨直得千年晉栢樹與千年  
陶公并起來叉手當胸互相慶賀道且喜寒氷發焰  
枯幹花開堂前露柱也懷胎

高峰妙禪師冬至上堂良久云一陽來復萬物咸新  
恭惟盲龜跛鼈鬼怪妖精莫問前長後短大家扶起  
破沙盆

冬至上堂世間動不動法皆屬陰陽遷變焉拈拄杖  
云惟有山僧木上座能爲萬象主不逐四時凋乃靠  
拄杖云無形木寂寥

千巖長禪師冬至上堂六陰已極一陽生佛道還同  
世道亨惟有祖師門下客依前日午打三更  
無用寬禪師冬至上堂陽隨陰轉陰隨陽滅氣數循

環轉轉不歇索性不顧危亡盡力一棒打徹喝一喝  
云便是臨濟德山也是馬後落節下座

元叟端禪師冬至上堂開口道著舉步踏著十箇有  
五變因甚不知落處冬至月頭賣被買牛冬至月尾  
賣牛買被不覺日又夜爭教人少年

至節上堂群陰剝盡一陽復生千卉萬彙無不發生  
拈拄杖云拄杖多年挂屋壁夜來頭角也崢嶸

冬至上堂靈機廓徹萬法無私智鑑洞明十虛無間  
轉一陽出六陰之內驅六陰入一陽之中塵塵普應  
刹刹全彰道泰時清民康物阜拍禪床云五色祥雲  
連鳳闕一輪紅日耀龍樓

呆庵莊禪師冬至上堂魯公臺上書雲是世法不是  
佛法慈明堂前揭榜是佛法不是世法徑山門下佛  
法世法拈放一邊施主今日辨供堂中大有胡餅一  
任諸人橫咬豎咬

冬至上堂舉洞山撥退果桌話師拈云當斷不斷反  
招其亂若是徑山見他道過在什麼處便與掀翻果  
桌亦使洞山知有向上爪牙今日兒孫不致寂寥雖



然也須腳踏實地始得拈拄杖不向藍田射石虎何人知是李將軍卓拄杖下座

愚庵及禪師上堂冬至前後砂飛石走草木叢林作獅子吼群陰剝盡一氣潛同一亦莫守萬法無咎驚拈拄杖云拄杖子吞却山河大地置而不問且道馬大師自從胡亂後因甚二十年不少鹽醬卓拄杖金輪天子同草店家風別

無文燦禪師冬至上堂至日書雲雲作何色眼裏無筋青黃赤白

冬至上堂僧問疎山如何是冬來意山云京師出大黃師頌云京師出大黃價直極相當未曾識道地枉自費商量

鐵關樞禪師冬至上堂六陰剝左卓拄杖云獅子峰撐天拄地一陽復右卓拄杖云將軍峰拄地撐天中間卓拄杖云三箭定天山

至節舉趙州問寰中般若以何爲體中云般若以何爲體劍輪揮處日月沉輝長水請益瑯琊清淨本然云何忽生山河大地瑯琊云清淨本然云何忽生山河

大地寶杖敲時乾坤失色若是皮下有血底向二大老未開口前薦得群陰剝盡何曾動著一絲毫一陽來復未免眼中重著屑時節至兮理自彰梅到骨寒香破雪

了庵欲禪師冬至上堂一冬二冬又手當胸逢場作戲遇緣卽宗打瓦鼓應黃鐘風從虎兮雲從龍下座上堂化育之本物我同途生佛之元古今不易所以雪峰道盡大地撮來如粟米大拋向面前漆桶不會打鼓普請看卓拄杖云六爻未動群陰塞一氣潛回萬彙新

上堂節序推遷又見一陽來復靈光洞耀依然體露眞常撥開向上玄關突出眼睛鼻孔釋迦彌勒猶是他奴且道他是阿誰擊拂子云嶺梅殘雪後雲鬢未梳時

笑隱訢禪師冬至上堂群陰剝盡一陽復生四時運行萬物資始直得護龍河上化日舒長觀稼亭前祥雲五色城市笙歌鼎沸士女遊觀山堂鐘鼓深沉衲僧禪寂眞諦俗諦不二佛法世法混融所以道知一

切法即心自性成就慧身不由他悟

鑄法鐘提法器 挂鐘 鳴鐘 施鐘

應庵華禪師新鑄鐘上堂有大智人具大知見啓大爐鞴奮大鉗鎚然後示大機顯大用於二百日中成此大法器住大解脫門亘千萬億劫震大圓音空明暗相以此津濟四生以此梯航九有以此祈祥懺罪以此息苦停酸以此揭示頂門正眼以此流通佛祖慧命直得星飛電捲山色凝光鳳舞鸞翔龍馳虎驟豈不見玄沙和尚道直似秋潭月影靜夜鐘聲隨扣擊以無虧觸波瀾而不散猶是生死岸頭事苟能於此洞明便見玄沙老子即今向紫霄峰下拭眼堂前騎聲蓋色坐斷十方脫或未然塞却耳根分明聽取無用寬禪師正覺寺挂鐘父母未生一點子洪爐烹煉轉指神當陽挂起打一下天上人間播好音連打二下云上祝吾皇萬萬春

山茨際禪師爲雲居印心院主挂鐘師云祇樹林內忽鐘聲撩倒阿難悟本真今日山僧重擊著阿誰會得證圓聞乃擊鐘三下云若將耳聽終難會眼裏聞

來方始親

大潯智禪師初居秀州之西庵一日普淨院範鐘成請鳴鐘曰長子羅喉羅遵受如來勅撞鐘發大機阿難圓信人我今撞此鐘見聞獲大益上徹三千界下透無窮極塵劫迥寥寥太空常寂寂息苦與停酸皆承此恩力

應庵華禪師傳法寺智都僧正請鳴鐘師示衆云頑銅鈍鐵美玉精金大冶紅爐一模鑄就不假毗沙門天王神力豈從須彌頂顛上持來器重千鈞樓高百尺啓圓通三昧發清淨妙音直須眼處承當莫向耳邊領略鑊湯爐炭不用吹而自滅刀山劍樹何待喝而後摧昏夢頓除沉迷了悟萬象森羅俱作舞大千沙界一時聞大衆且道末上一槌落在甚麼處劫石有消日洪音無盡時

弘覺志禪師爲新鐘發聲大冶煅成眞法器那堪高岡聳人天聲光自此長輝赫佇聽洪音徧大千

天隱修禪師居士施銅鐘薦考妣請小參師拈槌指鐘云者鐘彼爲薦父母又乞山僧說法山僧無法可

說記得東坡居士有鐘銘偈云有鐘誰爲撞有撞誰撞之三合而後鳴聞所聞爲五缺一不可得汝則安能聞汝聞竟安在云云大小東坡說義理禪山僧則不然驀舉鐘槌云還見麼復敲鐘三下云還聞麼者裏會得一超直入如來地其或未會更聽一偈鐘聲一擊頓超然薦拔先靈出陰纏今日老僧親指示管教步步踏青蓮

挂板法語挂鐘板

密雲悟禪師挂板叢林號令佛祖鉗椎今朝懸向堂前輕輕擊著直令人人頓斷命根雖然如是更有一人且道具何面目高著眼始得

山茨際禪師挂板叢林號令佛祖紀綱懸起也有眼皆見擊著也有耳咸聞既見既聞直下是觀音入理之門當處即善財功圓之際雖然如是且不落聲色一句作麼生遂擊板云騎聲蓋色甚分明

弘覺恣禪師挂鐘板迥無依倚處立卓縱橫竊絕機宜中翕張變態化裁妙天然之矩矱動寂露法王之根苗所以把住則烈日霜飛四溟無水洩放行則寒

冰燄發大地忽陽和正當今日權衡佛祖高聳人天即置斬新條行新令一句又作麼生道遂擊一下云霹靂一聲喧宇宙心華開遍少林春

石雨方禪師寶壽挂鐘板舊日規模一任梅花連夜發斬新條令豈容客子帶回春銅頭鐵額底到此也須重鍛龍驤虎驟底不妨依教奉行今有密言有誰唱和良久曰無則仰勞二上座去也遂擊鐘板

挂木魚提綱

無用寬禪師梁山挂木魚上堂不似魚不似蜃燦破處空鉢孟安柄饑逢王膳不能餐香積國門施號令喝一喝云倒騎廊廡日日敲禹門一跳風波高卓拄杖一下云照顧眉毛便下座

製法鼓提綱

白雲演禪師新製法鼓上堂多載頑皮擊不響新皮纔動震天雷無滯莫言隨勢去有聲誰謂不平來何也雙眼聽不聞雙耳覷不見一條平坦路是誰沒方便

大慧杲禪師新製法鼓歲旦上堂新歲擊新鼓普施

新法雨萬物盡從新一一就規矩普賢大士欣歡乘  
時打開門戶放出白象王徧地無尋處拈起拄杖云  
惟有者箇不屬故新等閒開口吞却法身擲下云是  
甚麼千年桃核裏元是舊時仁

恕中愍禪師新執法鼓上堂只與麼散去已遲三刻  
那更指東畫西說黃道黑明眼人咬牙有分雖然有  
條攀條無條攀例不見鹽官示衆云虛空爲鼓須彌  
爲椎什麼人打得掘地深埋南泉云王老師不打者  
破鼓是精識精法眼別云王老師不打班門弄斧靈  
巖新執法鼓以木爲身以皮爲面要打便打要歇便  
歇且無許多勞攘只是不得聞著聞著則喪身失命  
且誰是喪身失命者床下爛蒲鞋籬根秃荳蒂

天真則禪師製法鼓上堂此鼓震若雷霆懸如日月  
震旦國中擊動兜率天宮普說塵塵說刹刹說熾然  
說道八臂那吒撲帝鐘金剛腦後三斤鐵海門坐斷  
閻外乾坤却笑禾山輕漏泄從此泉石增輝無不歡  
悅切切箇箇圓圓俱透徹以拂子擊空云寥寥寥寥  
列祖提綱錄卷第四十二終